

اربعہ تسویہ و احد

جیہان فاضل

Amany Morad



أربعة تساوي واحد

أربعة تساوي واحد

چيهان فاضل

چيهان فاضل

تستعرض لكم دار نسمات الأدب للنشر

الإلكتروني بعزيمة وإبداع جديد

الكتاب : أربعة تساوي واحد

المؤلف: جيهان فاضل

غلاف الكتاب: اماني مراد

موك اب الكتاب: سها منصور

تنسيق داخلي: منى وجيه

إدارة الدار: رزان محمد كليب

مع نسمات الأدب، أفكارك تنبض بالحياة!

[نسمات الادب للنشر الإلكتروني](#)

الفصل الأول

كانت تتحدث بمرح كعادتها مع صديقتها

وهي تسير في شوارع مدينتها الجميلة

- أنتِ يا بنت المجنونة مش عايزة

توافقي على العريس ليه؟

- هو ده عريس بجد

- لا هزار يا خفيفة

- على فكرة أنتِ اخدتني عليّ أوي

مكنوش واحد وعشرين سنة الـ اعرفك

فيهم عشان تكلميني كدا

- نعتذر للبشهندسة ممكن اعرف

رافضه ليه دا أمك مسبتش حد من

صحابك عشان يكلمك ويخليكي توافقي

بتكبر مصطنع:

-تقبلنا

-الـ هو إيه؟

-الإعتذار

-يارب صبرني عليها "وكملت بعصبية"

ردي يا متخلفة رافضه ليه؟

نظرت لها بخوف مصطنع من عصبيتها

وقالت:

-بغض النظر عن رأيك وأني متخلفة

لأنها بتفرحني لما بسمعها بس هقولك

بنفاد صبر:

-قولي

- اسمعي ياستي ده عريس

-يارب صبرني لا عروسة آمال إيه راجل

محترم وشغال ومعاه فلوس ومش

هخليكي محتاجة حاجة

-استووووب بقى هو ده الـ كنت عايزة

اسمعه

-مش فاهمة

قالت بمرح:

-التعليم المجاني يغور

-يا بنتي اتهدي وكملي باقي كلامك جد

-رغم إني مش هقدر بس هحاول بصي

يا ستي

-ها

-ست الكل والحج شايفين أنه هيقدر

يوكلني ناس طيبين وعلى قد حالهم

نعمل إيه حظي كدا بقى فاكرين أنه طالما

هياكلني يبقي خلاص مفيش مشكلة، يا

عالم ياهوه في حد هيموت من الجوع

-يابنتي أنا مش فاهمة ام حاجة اتكلمي

عدل يا زفتت الطين

-مأنا قلت التعليم المجاني يغور محدش
صدقني

-والله والله يا "نوره" لو متكلمتي عدل
لكون مزعلاكي مني
ردت "نور" بضحكة مستفزة:

-متزعليش نفسك يا ضنايا لحسن يجيلك
شجر وده بيجي لصغيرين
تفوهت باسمها بغضب:
-"نورره"

لم تهتم "نور" بتحذيرها:
-عيون "نوره" وقلب وروح "نوره"
اشتعل الغضب بها فأسرعت "نور"
وقال:

-معلش يباشا عيل وغلط اسمعي يا
أحلى 'جيجي' فى الدنيا

اردفت "جيهان" بنفاد صبر:

-ارغي

قالت "نور" بجدية:

-بصي ياستي كلكم شايفين أنه كويس

بس عشان شغال ويقدر يأكلني بس مش

شايفين أنه بيدخن وأنا بتخفق من

السجاير

ردت "جيهان" بما يحدث فعليًا:

-كل الشباب بتدخن ده مش سبب

والموضوع منتشر بطريقة غريبة

لم تقبل "نور" بما قالت:

-مش معنى أن كل الشباب بتدخن يبقى

أوافق أنا مش هقبل بواحد بيضيع

فلوسه وصحته في شيء تافهة

تحدثت "جيهان" باقتراح:

-بسيطة خليه يبطل

أردفت "نور" بثبات:

-مع أنه مش سهل يبطل بس نشوف

سبب غيره، ده مش بيصلي ولا يعرف

أي حاجة عن دينه

تسألت "جيهان" بتعجب وهي تنظر لها:

-وأنتِ عرفتِ ازاي؟

ابتسمت "نور" بخبت:

-ده سر المهنة يا روعي آمال يتقدم ليا

عريس من غير ماعرف هو مين؟ أنا

عرفت عنه كل التفاصيل

هتفت "جيهان" ساخرة منها:

-لا جامد أنت، وأنتِ ممكن تخليه يصلي

وتسمعوا دروس دينيه مع بعض

وتشجيعيه وتأخدي بأيده

هزت "نور" رأسها برفض فهي تريد
من يقربها إلى الله:

-يا حجة أنا عايزة حد يأخذ بأيدي وكمان
شيخ المفضل قال أن الزواج ليس
مؤسسة علاجية ولكنه مقام بناء أسرة
يعني لما هفكر اتجوز هتجوز الشخص
المناسب ليا عشان مقولش هيتغير بعد
الجواز لان مفيش حد بيتغير

أرَدَفَتِ "جيهان" في محاولة أخيرة
لأقناعها:

-لو حبيتيه واتعاملتي معاه بما يرضي
الله هيتغير وهتبقى حياتك كلها سعادة
وسلام

ردت "نور" بلامباله:

-نشوف سبب غيره

حدثت بها "جيهان" بشر:

-هو أنتِ عايزة ترفضني وخلص

هزت "نور" رأسها:

-بصراحة اه

فقدت "جيهان" صبرها لتصبح بعصبية:

-نورره

ردت "نور" بمرح:

-طيب بصي آخر سبب وهقتك بيه وأنتِ

تروحي زي الشاطرة تقنعي عمك

عشان زهقت منكم

قالت "جيهان" بنفاد صبر:

-ارغي

تحدثت "نور" بجدية على غير عاداتها:

-في صفات كتير وحشه وانتم بالنسبة

ليكم عادي وأنا مش مرتحاله ومش

حاسه بيه مش هينفع أقبل بحد مش قبلا
عشان ارضيكم، غير كل ده انا مش
هقبل اتجوز واحد مش بيصلي ويبدخن
مهما حصل

هدأت "جيهان" قليلاً :

-محدث هيجبرك على حاجة وأنتِ مش
صغيرة بغض النظر عن غبائك وعبطك
بس أنتِ بلوه

ردت "نور" بفخر:

-الله يكرم اصلك يا بنت خالي محدش
بيفرحني غيرك

ابتسمت "جيهان" بسخرية:

-أول مرة اشوف حد يفرح لما يتهزق
"نور" بفرحة طفلة:

-أنا بموت في الشتيمة وبخني (بصوت

رامز جلال)

تهدت "جيهان" بضيق وهي تسبها:

-الله ياخذك يا شيخه، قوليلي يا "نوره"

بجد أي موصفات الزفت اللي أنت عايزة

تسألت "نور" بجدية:

-معاكي ورقه وقلم

هتفت "جيهان" بعدم فهم:

-ليه؟

ردت "نور" بضحك:

-عشان تسجلي المواصفات وتلحقي

تدوري على عريس لختك

وكملت بمرح وبصوت مرتفع بعض

الشيء:

-عشان القطر قرب يوصل مصر وأنا
لسه متجوزتش يا عالم حد يوقف القطر
لما اركب ويمشي تاني خمس دقائق بالله
عليكي ولا أقولك دقيقة واحدة وأنا
هركب بسرعة

وضعت "جيهان" يدها على وجهها
بعصبية:

-يا بت حرام عليكى تعبتيني اتكلمي جد
شوية

- احم تعرفي زين؟

- لا

-تعرفي أدهم؟

- لا

-تعرفي مالك؟

-لا

-تعرفي فهد؟

دفعتها "جيهان" لداخل:

-لا ويلا ادخلي عشان وصلنا والبنيات

هيقتلونا ونكمل جوه

ولجوا للمطعم وجلسوا بجوار صديقاتهم

بدون حديث لتقول "بسملة" بعصبية:

-والله معنكم دم لأنتِ ولا هي بقالكم

ساعة بتقولوا في الطريق طريق إيه ده

نظرت "نور" لـ "جيهان" تلقي الخطأ

عليها:

-المرّة دي مليش دعوة شوفي البخيلة

اللي مرضيتش تركب سرفيس عشان

توفر ٢ جنيه

ضربت "جيهان" يدها التي تشير بها:

-بخيلة في عينك، أنا بحب اتمشى مش
بحب اركب وأنتِ اللي كل خمس ثواني
تقفي أنا مالي لو لوحدي كان زماني
وصلت

أردفت "بسملة" بضيق:

-حبك برص

ردت "نور" بحنق:

-اي مستريحش أنا تعبت الله

سخرت "جيهان" منها:

-معلش أصلك عندك خمسين سنة

قالت "نور" بتمثيل:

-اه يا بنتي نعمل إيه السن بقى

تجاهلتها "جيهان" وهي تنظر لمن

تجلس تتابعهم بصمت:

-أي يا "دودو" ساكتة ليه

تحدثت "دعاء" ببرود:

-مستنيه تخلصوا خناق

هتفت "نور" بمرح:

-خلاص خلصنا ارغي مين اللي جامع

الفرقة انهرده

اشارت "جيهان" على نفسها:

-أنا، عشان خاطر نشوف حل فيكي يلا

قولي موصفات زفتك

تسالت "نور" ببعض المرح:

-أنت متعرفيش مالك، أدهم، فهد، زين

صح.

ردت "جيهان":

صح.

غمزت لها "نور" بمشأغة:

-بس أكيد عارفه "ياسين الجارحي"
طبعاً.

"جيهان" بعصبية بالغة كأنه حبيبها
وليس بطل روايتها المفضلة:

-إلا "ياسين" ده خط أحمر ده ليا
لوحدي.

أردفت "نور" بسخرية:

-يعني "أية" تقتلك.

"جيهان" بلامبالاة:

-لأ "أية" غلبانة واقدر عليها.

هتفت "دعاء" بنفاذ صبر:

-اخرسي أنتِ وهى اتكلموا جد أنتم

مجانين اللي أنتم بتتكلّموا عليهم دول

خيال فوقى يا ماما.

ردت "جيهان" بحزن:

-بس أنا بحبه خالص والله.

وضعت "نور" يدها عليها لكي
تواسيها:

-متز عيش والله عارفه بس نصيب هو
متجوز نعمل إيه؟

كانت بسملة تحاول بصعوبة كتم
ضحكتها خوفاً من غضب دعاء التي
صاحت بهم:

-يعني أنتِ وهى جاييننا من آخر الدنيا
عشان أسمع العبط ده وكممان جايين
متأخرين يعني أنا اخذ ساعة ونص فى
الطريق عشان أسمع الكلام ده أعمل
فيكم إيه؟

نظرت لها "نور" ببراءة بعيدة كل البعد
عنها:

-ولا حاجة يا جميل أنت الكبير العاقل

اسمعي أنتِ وهي

هتفت "بسملة" ببرود:

-ارغي

رمشت "نور" بعيونها وهي تنظر لهم

بهيام:

-أنا عايزة واحد زي "حمزة" جوز

"مليكه" فى رواية "جميلة حد الفتنه"

كدا طيب وشجاع ومحترم ومتدين ذكي

واهبل وقمر ومب يكلمش بنات وبيغض

بصره وكده يعني

فى مكان آخر، كان يقف بثقة وهو يقاتل

بشراسه ولا يهتم لشيء فهو شخص لا

يخشى أحد

كملت "نور" حديثها:

-ويكون حساس والأهم مبيدخنش لأنني

بكرهه السجاير وريحتها والتي بيدخن

كان ينفخ فى السجارة بغضب وهي

تحترق بين أنامله

تهدت "نور" تنهي صفات فارسها

المستقبلي:

-والأهم من كل ده أن يكون رومانسي

أوي

تسألت "دعاء" بسخرية:

-وده نجيبه منين؟

أجابت "نور" بمرح:

-من أقرب صيدلية

تجاهلتها "بسملة" وهي تحدث

"جيهان": -وأنتِ يا "جيجي" إيه

مواصفات فتى أحلامك بما أن "نور"

مش هتجوز وهتفضل معنا

نظرت لها "نور" بشر:

-ليه يختي وحشة ولا وحشة

ردت "بسملة" بجدية:

-لأ بس المواصفات دي مستحيل تكون

موجودة

أردفت "دعاء":

-بغض النظر عن فارس أحلام "نور"

قولي أنتِ يا "جيهان"

اعتدلت "جيهان" في جلستها تقول

بجدية:

-احمم هو أنا مش مجنونة زي "نوره"

أنا مواصفتي عاقلة شوية

"دعاء" بابتسامة:

-طب الحمد لله قولي

ولكن تلاشت ابتسامتها عندما تحدثت
"جيهان":

-أنا عايزة واحد يكون ابن كـ**
يتجوزني غصب عني وأنا رافضه
ويفضل يضرب فيَّ ليل نهار وأنا اكرهه
وبعدين يحبني ويعاملني كويس وأنا
أعرف أنه بقي كذا بسبب امه لما سابت
ابوه كره جنس حواء وأنا اغير تفكيره
ونعيش في تبات ونبات ونخلف صبيان
وبنات إيه رأيكم

في مكان آخر كان يجلس بهدوءه المعتاد
وهو يبتسم بسعادة تلك الابتسامة التي لا
تفارق وجهة مهما حدث وهو يداعب
طفلاته الصغيرة ويتحدث معها بمرح

هتفت "نور" بفخر:

-هي دي الصفات ولا بلاش

قالت "دعاء" بسخرية:

-ما شاء الله هي دي الصفات ولا بلاش،

بس من غير مقاطعه أنتِ وهى هتفضلوا

جنب اهلكم

قالت "بسملة" بصدمة:

-بس يابت يا "جيجي" صدمتيني في

مواصفتك كنت فاكراكِ عاقلة عن كده

ردت "جيهان" وهي تحرك يدها بلا

اهتمام:

-يا شيخه عيب عليكِ عاقلة قال

غمزت "نور" لـ بسملة:

-طيب قولي أنتِ يا "بسوا"

ابتسمت "بسملة" وهي تجيب:

-عايزة واحد زي عنتر بن شداد شجاع
وقوي وشاعر كدا يدور ورايا يقول شعر
فيّ وفجمالي

في مكان آخر كان يقهقه بسخرية على
الفتاة التي أخبرته أنها تهيم به عشقًا
فأردف بثقة أن العشق كذبة وهو لا
يؤمن به

صفت "نور" بفرحها:

-الله الله الله على الجمال هو ده الكلام ولا
بلاش

نظرت لهم "دعاء" بسخرية وضيق:

-طيب وعنتر ده نجيبه منين يختي

ردت "بسملة" بمرح:

-من عند عم عبده المكوجي

قالت "دعاء" بتعب مما فعلوا المجانين
بها:

-لا بجد ده كثير عليا والله

تسألت "جيهان" وهي تركز على
"دعاء":

-طيب وأنتِ يا "دودو" إيه مواصفاته

أردفت "دعاء" بهدوء:

-مفيش مواصفات بس يحبني ويحترمني

ويتقي ربنا فيّ ويعاملني بما يرضي الله

حدقت "نور" بها بصدمة:

-هي البنت دي أزاي متأثرتش بيا رغم

كل اللي عملته عشانها

ربتت "جيهان" على يدها بموساه:

-معلش يا قلبي دي غلطها هي

قالت "نور" بحزن مصطنع:

-والله أنا عملت كل اللي عليّ عشان
تتحرف وبرضوا زي ما هي حد يقولي
أعمل إيه؟

"بسملة" بتأثر مصطنع:

-متز عيش يا قلبي

ردت "دعاء" بجدية:

-أنا هقولك تعملي إيه؟

أبتسمت "نور" بغباء:

-إيه؟

أردفت "دعاء" بضيق شديد:

-كل واحدة تروح على بيت أهلها عشان

أنا كرهت اليوم اللي عرفتكم فيه

وعند ذكر ذلك اليوم لم يستطيعوا تمالك

أنفسهم وهم يقهقهون بشدة

Flash back

كانت تسير في الحرم الجامعي لا تعلم
اين تذهب لتتظر ابنة خالها فالיום هو
الأول لها في الجامعة بعدما رفضت ان
تداوم الأسبوع الأول من الدراسة، كانت
ترتدي سروال من خامة الجينز وفوقه
بلوزة بنية قصيرة إلى حد ما وحجاب
قصير يخفي خصلات شعرها الكثيفة،
وعيونها العسلية التي تزيدها جمالاً مع
بشرتها البيضاء النقية دون مساحيق
تجميل ، كانت تتحرك بثقة لتسمع صوت
أحد الشباب وهو يخرج صوت صاخب
«صفارة» وهتف بمراوغة:

-إيه يا جميل رايح فين؟

حدقت فيه بشر ولم ترد لتقول فتاة
تجلس بجوار الشاب:

-سيبها يا "بودي" دي شكلها بيئة أوي
"نور" لم تكن مسالمة لدرجة أن تسمع
أحد يخطأ بحقها وتصمت لذلك عادت
خطوتين وهتفت ببرود:

-البيئة دي أنت يا روح ماما
هبطت الفتاة من على السيارة التي
تجلس عليها وقالت بعصبية:

-اتحركي يابت من هنا
نظرت "نور" حولها يمينًا ويسارًا تبحث
عن شيء وعندما لم تجده هتفت
بسخرية:

-إيه ده؟ شكك نسييتي تكتبي اسمك هنا،
معلش المرة الجاية اكتبيه عشان عامة
الشعب اللي زي متعرفش ومنتعبيش
نفسك وتقولي امشي من هنا

ضحك أحد الشباب من من يجلسون
لتنظر له الفتاة بشر وهتفت بتحذير:
- "عادل"

صمت المدعو "عادل" وقامت الفتاة
بدفش نور بعيداً وهي تقول:
- يلا يابت من هنا

اختل توازن "نور" وسقطت لتتعلق
ضحكات الشباب والفتيات عليها لتنهض
بغضب وعلى حين غرة جذبت الفتاة من
حجابها بقوة وهي تهتف بشر:
- بقى أنا يا زبالة ترفعي إيدك عليا

تحركت إحدى الفتيات لكي تدافع عن
صديقتها لتقول "نور" بعصبية:
- لو فكرتي تقربي هسيبها واضربك أنتِ

ركضت "جيهان" و"بسمة" بسرعة عندما وجدوا "نور" تضرب الفتاة، حاولوا ابعادها لكن أتت فتاة وضربت "نور" لكي تبعدها عن صديقتها، فغضبت "بسمة" ودفشتها بعيداً، وحتد الشجار بينهم، واصبح الشجار بين "نور" و"جيهان" و"بسمة" وخمس فتيات اخريات إلى أن أتى أمن الجامعة، فقالت الفتاة التي كانت السبب في المشكلة وهي تشير على نور:

-هي دي اللي ضربتنا وجابت صاحبها كادت "نور" أن تقترب لتبعدها "جيهان"، فقالت "دعاء" التي كانت تتابع الحديث منذ البداية:

-كداية هما اللي غاظت فيها وكمان
وقعتها

قال الأمن: اتحركوا كلكم، وأنتِ تعالي
أشار إلى "دعاء"، وذهب بهم إلى غرفة
العميد وقص له ما حدث ليقول العميد
بعصبية:

-أنتم فاكرين نفسكم فين؟ عشان خناق
وضرب في بداية الدراسة
تدخلت "دعاء" تقول بجدية وثقة:

-حضرتك هي مغاظتش الأستاذ ده كان
بيضايقها بالكلام ومش هي بس كذا بنت
قبلها، ولما ردت عليه، البنت دي زقتها
على الأرض فطبعي تدافع عن نفسها
احنا هنا بنتعلم ازاي ندافع عن حق
الناس ونحقق العدل فمش معقول تسكت

عن حقها، وبعدها اصحابها ادخلوا
عشان يخلصوا الموضوع، راحوا البنات
دول ضربينهم، يبقى مين اللي غلطان

اشارت على الشاب بعدها الفتاة ثم باقي
الفتيات، ثقتهما جعلت الدكتور الذي
يجلس ينظر لها باعجاب من ثقتهما رغم
أن الجميع يقف بخوف وقلق

قام العميد بفصل الشاب لمدة اسبوع
وهدد الفتيات، ثم غادروا غادرت
"دعاء" أولاً لأنها لا تعرف أحد منهم
وبعدها الفتيات وقالت "بسملة":

- "جيهان" هي دي بنت عمك؟

ردت "جيهان" بأسف:

-للأسف

أردفت "بسملة" بسخرية:

-دي بلطجية أكثر منك

وضعت "نور" يدها على قلبها وقامت
بالانحناء قليلاً كأنها تحيي أميرة
وهتفت:

-شكراً شكراً

ثم تسالت بجدية واهتمام:

-هي مين البنت اللي دافعت عننا دي؟
ردت "بسملة":

-دي "دعاء" واحدة معنا في سنة تانية
بس هادية أوي وملهاش دعوة بحد
أردفت "نور":

-طب تعالوا نتعرف عليها ونشكرها
عشان اللي عملتوا

قالت "بسملة" بسخرية:

-طب اتعرفي عليا أنا الأول

ضربتها " نور " بخفه على رأسها:
-ياختي ما احنا اتعرفنا في الخناقة،
وبعدين انا كنت جايه ومش طيقاكي
عشان " جيهان " صدعتي بيكي
وبعدھا تحركوا يبحثون عن " دعاء "
فوجدوها تجلس وهي تبكي

Back

وعادت كلاً منهم إلى منزلها بعد
مشاكسة لا نهائية بين المجنونة " نور "
والحنونة " دعاء "

في صباح يوم جديد على بطلنا الأول
يستيقظ بطلنا الرائع وكعادة كل يوم
يلتقط سيجارة من على كومود ويقوم
بإشعالها لكي يهدأ لا أعلم حقاً ما علاقة

السجارة بالهدوء ويغيب في دوامة
الماضي ليقطع شرودة رنين هاتفي
ليلتقط الهاتف من جواره وهو يستمع
لطرف الاخر بهدوء

- ايوا

-تمام

-هكون هناك فوراً

وأغلق الهاتف، ثم توجه إلى المرحاض
ليغتسل وبعد خروجه وقف يصفف
خصلات شعره بعناية
دقات منفصلة على باب غرفته تليها
سيدة في أواخر العقد الرابع من عمرها،
تقول:

-صباح الخير يا "أشرف"

اقترب "أشرف" منها وهو يقبل جبينها:

-صباح النور يا ماما فين "مازن"

ابتسمت منى لأبنها:

- "مازن" في اوضتة أنت خارج

بادلها "أشرف" الابتسامة:

-اه يا حبيبي خلي بالك منه، أنا عندي

شغل ويمكن أتأخر

ربتت "منى" عليه بحنان:

-حاضر يا بني بس متنساش تروح

تتظمن على ولاد خالتك

هز رأسه وهو يهم بالمغادرة:

-حاضر هشوف بس أفضى ونروح مع

بعض سلام عليكم

تركها وغادر على الفور وهي جلست

بحزن على حالة أبنها فهي تعلم ابنها

منذ وفاة زوجته الحبيبة وهو يلهي
نفسه في العمل ولا تراه إلا بضع دقائق
يأتي ليغير ثيابه ويظمن على ابنه
ويغادر مرة أخرى، لئنه يعود كما كان،
ايا لئنه الزمان يعود يوماً

*** **

الفصل الثاني

♡ أتمني أدخل الجنة لكي أذهب إلى
السيدة خديجة وأبكي بشدة بين أحضانها
وأخبرها أن الحياة قاسية جدًا وأن
حفيدتها توّلمت كثيرًا من هذه الحياة.♡

صاحت "جيهان" باسمها وهي تولوج
لداخل منزل "نور" بعدما فتح لها ابن
عمتها:

-نوره نوره نوره

لترد "نور" بضيق:

-إيه بتدوري على تايهه؟

ردت "جيهان" بلا اهتمام:

-يلا اتاخرنا

أردفت "نور" وهي تتناول طعامها:

-حاضر ياختي الجامعة مش هتمشي

استني افطر

"جيهان" بذهول:

-لسه هتفطري

أردفت "نور" بتعجب:

-يعني أموت من الجوع

ذكرتها "جيهان" بغضب "دعاء" كلما

تأخرت :

-لا هتموتي على ايد "دعاء"

ولكن "نور" لم تهتم وهي ترد عليها

بلامباله:

-سبيك منها تعالي بس عمك عامله

مكرونة بشاميل خيال

ابتسمت "جيهان" بسعادة وهي ترى

طعامها المفضل أمامها:

-مكرونة بشاميل لا "دعاء" تستني بقي
جلست "جيهان" تتناول بنهم وهي
تحدث عمته:

-تسلم ايدك يا عمته ويخليكي ليا يارب
ردت العمه بحب:

-ويخليكي ليا وميحرمنيش منك يارب
نظرت لهم "نور" بغيظ ثم نظرت
لوالدها:

-اشمعنا دي تدعيها وأنا لا، ده أنا
بحس أنها هي بنتك مش أنا
أجابت العمه بصدق:

-عشان هي بنتي، وأنتِ بقالك ساعة
تطفي ومقولتيش حتى كلمة
حدقت بها نور بضيق وقالت:

- هي بتجامل على فكرة، ويلا يا زفته

قومي مش هاكل سديتي نفسي

قالت "جيهان" بتعجب:

- بس غريبة يا عمتو صاحيه بدري

وعملي كمان مكرونة

ردت عمتها بضيق:

- عشان الزن ويارب نخلص منه

جذبتها "نور" بعصبية:

- اخلصي وبطلي رخامه

نهضت "جيهان" وهي تودع عمتها:

- سلام يا عمتو

- "أشرف" بيه قبضنا على كل العصا

ما عدا "حسن" هرب قبل ما ندخل

كان ذلك صوت أحد الضباط أقل رتبة،

نظر له "أشرف" ثواني ثم قال:

-تمام خدهم على الحبس وأنا هتصرف

ادى الضابط التحية العسكرية:

-تمام يا فندم

بعد دقائق غادر من المكان ليقود سيارته

إلى وجهته ولكن لفت انتباهه مجموعة

شباب وفي المنتصف فتاتان ويبدو أنهم

مجموعة أوغاد يزجون الفتيات، فقرر

أن يهبط من السيارة؛ ولكن قبل أن يهبط

أبتسم حينما رأى فتاة قوية تصفع أحد

الشباب بقوة...

رفضت "نور" ما تقول تلك الحمقى ابنة

خالها:

-أنسي أنا مش همشي لو مركبتيش
السرفيس معي هركب لوحدي
ردت "جيهان" بتوسل مصطنع لعلها
تقتنع:

-والله في طريق قريب أنا مشيت في
امبارح
رفضت "نور" ما تقول تلك الحمقاء من
وجهة نظرها:

-مش همشي برضوا
عادت "جيهان" تتوسل وهي تحدق بها
ببرأة:

-عشان خاطرنا واحنا مروحين والله
هنركب
تهدت "نور" باستسلام:
-يارب صبرني يلا

سارت معها في طريقها المجهول، وتكاد تقسم أن قتل إحداهم هنا فلن يعلم عنه أحد لأجل الهدوء الذي يخيم على المكان، شاكستها "جيهان" كالعادة لتدمج معها في مشاكستها التي لم تنتهي؛ ولكن قطع حديثهم شخص يأتي من الخلف يجذب يد "جيهان" له وكأنها ملكية خاصة به، ويحدثها كأنها عشيقه له غادرت المنزل دون إن ياذن لها بذلك: على فين يا جميل؟

وكذلك فعل رجل آخر «عذرًا أقصد ذكر ليس رجل» مع "نور"

خمس شباب يتحركون حولهم ويرونهم غنيمة، يشبهون الحيوانات حينما تقع

أعينهم على فريسة، جذبت كلاً منهم
يدها بقوة وغضب وصاحت "نور" بهم:
-وأنت مال أهلك

وجذبت يد "جيهان" وكادت بأن
تتخطاهم وتسير في طريقها بلا اهتمام؛
ولكن جذب يدها شخصاً آخر وهو يبتسم
أبتسامة مقبته:

-يعني جميلة ولسانك طويل تيجي ازاي
رد شاب آخر بنظرة مقززة:
-بس أنا بحب النوع ده أوي
أردفت "نور" بشجاعة:

-أنت متعرفش مش بس لساني طويل لا
وايدي كمان وفكر تقرب منناتاني
وإلا... قاطعها شاب تالت بخوف
مصطنع:

- لا لا لا مش لدرجادي دي بتهدد كمان
أنا عايز دي وأنتم خدو دي (واشار إلى
جيهان)

ردت "نور" بسخرية:

- لا والله ده بينقي كمان وسع كدا يا
حبيب أمك بدال ما اخليها تترحم عليك
رد الشاب الأول ببلاها:

- لا هي أصلاً الله يرحمها

"نور" بحزن مصطنع:

- يا حرام معلىش يا ضنايا يلا يابت

ردت "جيهان" بانزعاج شديد:

- متقوليش يابت

صفت "نور" وجهه بخفة ثم ردت
عليها بضيق:

-يخربيتك ده وقته، ثم أنك السبب اللي

جبتينا هنا عشان نشوف الحيوانات دي

دافعت "جيهان" عن نفسها:

-وأنا أعرف منين أن في حيوانات في

الشارع

أنزعج الشباب ليرد أحدهما بغضب:

-اخرسى أنتِ وهي ويلا قدامي

(وجذبهم)

نظرت له "نور" بقوة:

-شكاك كدا عايز تترحم على عمرك

وركلته بقدمها فجذبها شخصاً آخر،

فجذبت حفنه من التراب ثم صفعته بها

في وجهه وهي تركض و"جيهان" بيدها

كأنها طفلتها

ركضوا خلفهم الشباب ليمسكوا بهم
ويصفعها أحدهم على وجهها بقوة كادت
بأسقاطها أرضاً، لولا يد اسرعت
لتجذبها إليه قبل أن تسقط

فمن هو؟؟؟

تسأل "أشرف" باهتمام:

- أنتِ كويسه؟

هزت "نور" رأسها بإيجاب، فوقف
"أشرف" بثقة وهو ينظر لهم والغضب
يسيطر عليه ليلاكم الشباب بغضب مميت

ليركضوا هرباً من وحش ثائر كهذا

ابتسمت له "جيهان" بامتنان، وقالت:

- شكراً لحضرتك

بادلها "أشرف" البسمة بأخرى وقال:

- تعالوا اوصلكم

رفضت "نور" بلباقة:

-لا شكراً احنا شوية ونوصل

أردف "أشرف" بصيغة أمر فهو خشى

أن يتعرضوا لموقف آخر كهذا في هذا

المكان المنعزل:

-قلت اركبوا واخلصي

"نور" بعند:

-وأنا قلت لا

حذقها "أشرف" بشر قبل أن يجذب يدها

ويتحرك بها جهة السيارة لتصعد بضيق

بجوار مقعد السائق وصعدت "جيهان"

بالخلف «وقاد بصمت»

تسأل "أشرف" وهو ينظر أمامه:

-رايحين فين؟

ردت "جيهان" بهدوء:

-الجامعة

لتقول "نور" بعصبية:

-أنت ازاي تعمل كده؟

أردف "أشرف" ببرود:

-زي الناس

هتفت "نور" بغضب:

-يعني أنت بدافع عننا عشان تخطفنا

كان بإمكانها أن ترفض الصعود معه

ولكنها شعرت بالأمان بجواررة ف شخص

دافع عنهم لا يمكن أن يفعل شيء سيء

بهم ولكنها أردت أن تزعجه لا أكثر

رد "أشرف" بسخرية:

-بس يا مجنونة اخطفك ليه؟ وأظن أن

لبسكم ده يتلبس في البيت مش في

الشارع ده مش لبس واحدة محجبة

أردت "نور" أن تزججه ففعل هو، لتقول
بجنون:

-وأنت مالك؟! وبعدين أنت مين أصلاً
عشان تقولي البس إيه؟

تغاضى عن الجزء الأول ورد على باقي
حديثها:

-أنا واحد عادي، بس ده مش لبس
يخليني اغض بصري

كانت ترتدي سروال باللون الأسود
وفوقه بلوزة باللون البنفسجي وحجاب
باللون الابيض به نقوش بنفسجية،
نظرت له بغضب ولم تزعج نفسها بالرد

بعد لحظات تحدثت "جيهان" بغباء:

-عارفة يا بت يا "نوره" أنا كنت بفكر
في إيه واحنا هنتخطف

تسألت "نور" وهي تنظر لها في
المرآة:

-إيه؟

ردت "جيهان" بهيـام في حلمها
المستحيل:

-أن أحنأ هنتخطف ويكون فيهم واحد
يتجوزني بالعافية ويعذبني وبعدين احبه
شردت "نور" بحلمها كذلك وقالت:

-ياااه فكرتيني وانا كنت بفكر أن هيجي
واحد زي "حمزة" ينقذني ويكلمني وهو
يبص في الأرض واقوله شكراً، يااااا
فكرتيني ليه؟

ردت "جيهان" بأسف: اه بس للأسف
أردفت "نور" بحزن: للأسف فعلاً

اما "أشرف" فلا يصدق هذا الكم من الغباء الذي يقبع داخل هاتان حماقتان، ليتوقف بالسيارة أمام بوابة الجامعة ويقول:

- يلا انزلوا

ما زالوا يتحدثان عن فارس احلامهن ولم يشغل بالهم أين هم؟ وكيف يثقون بشخص يرونه لأول مرة؟ ولكن للحق هم حماقتان كما أطلق عليهم

هبطوا من السيارة ونظرت له "جيهان" وقالت بهدوء:

-شكراً

أما "نور" فنفخت وجنتيها بضيق وهي تنظر له:

- احنا مكناش محتاجين مساعدة من حد
بس شكراً

لم يهتم "أشرف" وهو يعود تشغيل
السيارة:

- وأنا مش منتظر شكرك

وفي ثواني كان يختفي من امامهم
بسيارته، ووقف فى المكان المنشود
وغاب في شرود قصير فى تلك المجنونة
صاحبة البشرة البيضاء كالحليب الصافي
وعيونها اه من عيونها فهي عسليه
مثلها وهي طويلة القامة ويقال كل ما
هو قريب من القمر يشبه وقوامها رائع
فهي حقاً فتاة جميلة فهي نوراً حقاً تشبه
القمر فوجهها يشع ضوء كالقمر فى
منتصف الشهر ولكنها مزعجه فى

ردائها الملفت للأنظار وفي النهاية هي
لا تعني له شيء.

كان يسير داخل المشفى بهدوئه المعتاد
لتقطع طريقة إحدى الممرضات:

-دكتور "إبراهيم"

وقف "إبراهيم" وتساءل: في حاجة؟

أجابت الممرضة بأحترام:

-الدكتورة "هاجر" عايزة حضرتك في
طفل حالته صعبة ومحدث هيقدر يتعامل
معا غير حضرتك

تسأل "إبراهيم" بقلق عن طفل لا يعلم
عنه شيء، لكن داخله فطرة في حب
الأطفال:

-هو فين؟

أردفت الممرضة: في غرفة رقم...

رد "إبراهيم" وهو يتحرك من أمامها:

-تمام

وتركها وغادر وهي وقفت تحدث
نفسها:

-هو في حد كده، ده طيبوب خالص ربنا
يكرمننا بواحد نص حنية الدكتور
"إبراهيم" يا حظها اللي هيكون من
نصيبتها

تسألت ممرضة أخرى وهي تقترب
منها:

-أي يا "هبه" واقفه تكلمي نفسك

ردت "هبه" وهي ما زالت تنتظر في
الجهة التي سار فيها:

-لأيا "مريم" بس كنت بفكر في
المحظوظة اللي هتتجوز الدكتور
"إبراهيم"

أردفت "مريم": اه والله محظوظة بس
الدكتورة "هاجر" هتموت عليه وهو
مش بيعبرها رغم أنها أحلى واشطر
دكتورة في المستشفى

تحدثت "هبه" بغيره:

-بس رخمه ودمها ثقيل

أيدت "مريم" حديثها:

-في دي معك حق بس يلا نروح نشوف
شغلنا وملناش دعوة بحد.

«حقًا ليس لك علاقة بأحد، إذا ماذا
يطلق على ما حدث منذ ثواني؟ سوى

غيبية أو بهتان "وَتَحْسَبُونَهُ هَيِّنًا وَهُوَ
عِنْدَ اللَّهِ عَظِيمٌ"»

إمام يقول (لو إغتببت في كل يوم
شخصين فقط) وعشت بعد سن البلوغ
سنتين سنة معناه يوم القيامة راح يكون
عندك ٣٢٤٠٠ خصم أمام الله هل انت
مستعد!!

من تخلص من الغيبة و النميمة تخلص
من ثلث عذاب القبر
كفارة الغيبة:

اللهم اغفر لي ولمن اغتبثه و ظلمته
وأسأت إليه وتجاوز عني وعنه.

"في الجامعة"

تحدثت "بسملة" براحة وهي تغادر

قاعة المحاضرات:

-ياه أخيرًا خلصنا

ردت "جيهان" وهي تسير خلفها بملل:

-الدكتور ده ممل على الآخر

أيدتها "بسملة" في الحديث:

-اه والله أنا لولا الملائمة كنتش

حضرت

أنزعجت "دعاء" من حديثهم: بس أنتِ

وهي الدكتور "فارس" كويس وبيشرح

حلو، أنتم بس أي حد لازم تتريقوا عليه

تسألت "جيهان" بحاجب مرفوع:

-وأنتِ مالك؟ احنا اتكلمنا عليكِ، بس

لاحظتي يابت يا "بسوا" الدكتور كان

بيبص علينا ازاي

ابتسمت "بسمة" فهي علمت ما ترمي
إليه صديقتها:

- اه ياختي كل شوية يقولنا فاهمين وهي
تقولاه اه يا دكتور وقعدين يوزعوا
ابتسامات طول المحاضرة

توترت "دعاء" وقالت بضيق:

- إيه اللي بتقولوا ده؟ أنتم شكلكم
اتجنيتوا

وتركتهم وسارت إلى كافتريا الجامعة
وهم جلسوا بجوارها، غمزت لها
"جيهان" بمشاكسة:

- اعترفي كلنا عارفين أن عينه منك من
أول يوم

رفضت "دعاء" أن تخوض في هذا
الحديث الذي يؤلم قلبها:

-بس بقي أنتِ وهي

وغابت في شرود قصير فهي حقًا تتمنى

أن يكون لها ولكنه المعيد وهي مجرد

طالبة عادية بل أقل من العادية

فاقت من شرودها على صوت "نور"

الذي يأتي من الخلف ورددت بصوت

مسموع:

-اهي كملت وجات صاحبة المشاكل

تحدثت "نور" بمرح:

-مرحبًا متجمعين عند النبي يا قوم،

وسمعتك على فكرة

"دعاء" بلا اهتمام: مش مهم اترزعي

جلست بجوارها، لتقول "بسملة":

- احكي لنا يا "نور" إيه اللي حصل
الصبح؟ عشان الدكتور دخل قبل ما
"جيبي" تحكي حاجة

غابت "نور" عنهم لبضع دقائق لأول
مرة تفكر في رجل فهي فتاة تتجنب
الاحتكاك بأي رجل، ولكن ذلك الشخص
كان غريب بالنسبة لها كان شخصاً قوي
تشاجر مع خمس رجال بدون أن يمسه
أحد، كان ملامحه تدل على قوة
شخصيته وبشرفته السمراء وعينيه
السوداء كسواد الليل وشعره الناعم
ورغم طولها فهي وقفت بجانبه كأنها
طفلة يا لله هل يوجد رجل بهذا الجمال؟

- لحظة من فضلك! أين "حمزة" هذا
الذي تريد به؟؟ فهو لا يشبه "حمزة"
أبدًا، إذاً ليس هناك داعي لأفكر به
نادت "بسمة" عليها:

- نور نور نور

عادت "نور" للواقع وردت بانزعاج
طفيف:

-إيه ياعم أنا كرهت "نور" بسببكم
تحدثت "دعاء" بسخرية: "نور
المهدي" سرحانه ده من عجائب الدنيا
صح، اعترفي كنت سرحانه في مين؟
نظرت لها "نور" ببسمة ساخرة:
-اتنيلي هو أنا اعرف اشكال غيركم
ضحكت "بسمة" بمرح وهتفت:
-ما هي دي المشكلة؟

سردت لهم "نور" ما حدث باقتضاب:
-الزفته دي هي اللي مشتتنا من الشارع
وشفنا شباب زبالة كانوا عايزين يعملوا
الغلط بس جه واحد جنتل وعمل معهم
الغلط ورباهم خلاهم يجروا زي الكـ***
ووصلنا لحد الجامعة ومشى
قالت "دعاء" بعصبيية: وانتم ازاي
تركبوا مع واحد غريب؟
ردت "جيهان" بهيام: اصلوا قمر كدا
ومحدثش يقدر يقوله لا
شعرت "نور" بالغيرة ولا تعلم لماذا
وتحدثت دون تفكير:
-احترمي نفسك ازاي تقولي عنه كدا
قدامي

نظروا لبعضهم بتعجب، فتحدثت هي
موضحة مقصدها:

-مش قصدي بس احنا بنهزر فى كل
حاجة إلا الرجالة مش بنعكس حد
هتفت "بسملة" بمشاكسة:

-بس البت "نور" شكلها وقعت
وقالت "دعاء" بمرح:

-اواه حب من اول نظره على وضعك يا
باشا

صفعة "جيهان" مقدمة رأسها:

-ياااه دانا غيبه ازاي مخدتش بالي
"نوره" بتغير

ردت "دعاء" بسخرية:

- طول عمرك غبية يا حبيبتي

انزعجت "نور" بشدة:

-بس بقى غيرة إيه وحب إيه اللي
بتكلموا عليه بطلوا عبط

لم يتحدثوا الفتيات كي لا يزعجونها
وبعد ثواني قالت "بسملة":

-طب يلا بقا نروح أحنا المحاضرة
بتاعتنا اتلغت وأنتِ يا "نور" عندك
محاضرات ولا هتروحي

أردفت "نور" بدون اهتمام: لا عندي بس
مش هحضر اشمعنا انتم

ردت "جيهان" بجديّة: عشان احنا
معندناش بس أنتِ عندك

أردفت "نور": كان بس أنا لغيتها يلا
نمشي

(دعاء، جيهان، بسملة في نفس العام،
أما نور فهي أصغر منهم بعام)

في مكان قريب كان يقف يتأملها وهي
تتحدث مع رفيقاتها كم هي رقيقة
وجميلة، جمالها ملفت للأنظار بشرتها
السمراء تزيدها جمالاً وعيونها
الخضراء تجعلك تعشق النظر لها كأنها
لوحة فنية، فكل من يراها بعين قلبه لا
يقول سوى كلمة واحدة "الله" فهي من
إبداع الخالق، ويتمنى أن يقترب منها
ولكن لا تسمح له بالاقتراب ولم تعطيه
يوماً إشارة لكي يقترب هو...

نعم أنه هو... الدكتور "فارس" عاشق
"دعاء"

كانوا يسيرون في الطريق ليروا مشهد
محزن طفل بريء لم يتجاوز الأربع
أعوام يتسطح أرضاً فاقد للوعي وحوله

كم هائل من الناس لم يتحرك أحد لانقادة
أسرعت الفتيات إليه لتحمله "جيهان"
وتتحرك به بسرعة فائقة لأقرب مشفى
وأصدقائها بجوارها
"في المشفى"

نظرت "جيهان" لأصدقائها وقالت:

-خلاص روحوا وأنا هتصل اطمنكم
عشان متتاخروش وأنا هستني اطمن
عليه وامشي

أيدت "نور" حديثها: ايوه روحوا وأنا و
"جيهان" بيتنا قريب لكن أنتم هتتاخروا

فكرت "دعاء" قليلاً وكادت أن ترفض
لكن تذكرت والدها فخشت أن يقلق
عليها:

-ماشى بس خلو بالكم من نفسكم

أردفت "نور" بهدوء: ماشي
جلس الاثنان بانتظار خروج الطبيب،
إلى ان خرج بعد دقائق وقال بتسأل:
-أنتم تقربوا لطفل

نفت "جيهان" برأسها: لا احنا شفناه
في الشارع وكان لازم نجيبه هو كويس
صح الدكتور بعملية: ايوه بخير
متقلقيش بس لازم تستتوا عشان هنباغ
الشرطة عشان تعرف هو مين

ردت "جيهان" بهدوء: تمام يا دكتور
تسألت "نور" بتعجب وهي ترى القلق
واضح على "جيهان":

-يابنتي خايفة ليه كدا محسساني أن
ابنك

ردت "جيهان" بحزن: مش عارفة يا

"نوره" بس خايفة عليه قوي

ابتسمت "نور" لها لكي تطمئن:

-إن شاء الله خير

ردت "جيهان" بتمني: يارب

خرجت إحدى الممرضات وهي تقترب

منهم:

-يا مدام ابنك فاق و عمال يعيط تعالي

شوفيه

ركضت "جيهان" بسرعة، لتقول "نور"

بدهشة:

-مدام... هي امه صح وأنا معرفش...

إيه ده بطلتي نكاء وروحي شوفي ابن

اختك

وقبل أن تخطوا لداخل أوقفها الطيب،
وهو يقول:

-يا أنسه تعالي كلمي الظابط
تأففت "نور" ومع ذلك ردت:

-تمام بس الطفل بيعيط و "جيهان"
دخلت تشوفه

رد الدكتور بثبات: تمام روعي وأنا
هدخل اشوفها وابعثها

قالت "نور" وهي تتحرك: تمام

خطئ الطيب لداخل ليرى الفتاة تعانق
الطفل بقوة وكأنها تخشى أن يتركها،
أبتسم وهو يراها هكذا فالأمومة فطرة
داخلنا فترى طفلة تحتضن دميتها
وتخشى عليها من أن يمساها أحد، وهي

حقًا كذلك منذ الصغر وهي أكثر ما تتمنى
أن يصبح لديها طفلة وتصبح أم حنونة
إبتسم الدكتور؛ "إبراهيم" وقال:
-كلمي يا أنسه

تسالت "جيهان" بتعجب وهي تنظر له:
-مين؟

أردف "إبراهيم" بهدوء: الشرطة عشان
تاخذ اقوالك وتمشي
وهنا داهمها الحزن هل حقًا ستترك هذا
الطفل الملاك؟ وتذهب

"عند نور"

صاحت "نور" بضيق من هذه الأسئلة
التي لم تنتهي:

-يعني أنا أعرف مين ابن مين ده؟

رد الضابط بطريقة جعلت كل خلية بها
تغضب:

-لوقتي يا أنسه في بنات كتير "أستغفر
الله" بتعمل كدا وبترمي اولادها في
الشارع بدون رحمه

ردت "نور" بغضب ولم تهتم بمن
أمامها: وأنا مال أهلي، احنا لقينا طفل
صغير مرمي في الأرض، عملنا اللي
علينا وجبنا المستشفى ولا هو خيرًا
تعمل شرًا تلقى

فتح الباب وقال: قصدك أجرًا تلقى
نظرت له "نور" بصدمة: أنت؟؟؟

الفصل الثالث

"أتمنى أدخل الجنة لكي أذهب إلى سيدنا بلال وأطلب منه أن يأذن لي لأسمع صوته لأنها أحد أمنياتي أن أسمع صوته"

كانت "بسملة" و"دعاء" يجلسان في السرفيس للعودة للمنزل، فمنازلهم قريبة من بعضهم، فقالت "دعاء":
-اتصلي بـ "نور" اطمني روحك ولا لا.
أردفت "بسملة" بصوت منخفض:
-اتصلي أنتِ، أنا مش معي رصيد.
صفتها "دعاء" على رأسها بخفة:
-يا ذكية يعني لو أنا معي كنت قولتلك
ليه؟
حدقت بها "بسملة" بضيق وقالت:

- خلاص هبعثها مسج على الوتس.
- هتفت "دعاء" بخفوت: طيب.
- اخرجت "بسملة" الأموال من حقيبتها
- لتدفع أجرة السرفيس، ورفعت يدها
- لتناولها لمن يجلس امامها:
- لو سمحت اتنين من خمسين.
- رد عليه الرجل: هاتي يا أنسة
- ناولتها له "بسملة" واردفنت: شكراً
- وقف السرفيس فى الطريق ليصعد
- الرقاب، ليقول التباع:
- وسعي يا أستاذة قعدي الناس جنبك.
- ردت "بسملة" بعدم فهم وهي تنظر
- لسرفيس الذي لا يوجد به مكان:
- ناس مين؟ هو فيه مكان فاضي.

فرد شباب بجديّة: المكروباص ملبان
اطلع ياسطا

أردف التباع بعند: هنركب الاتنين دول
ونطلع

صاحت "بسملة" بعصبية: هتركبهم
فين؟ هو في مكان أنت هتستعبط.

تدخل الشاب يقول بهدوء: خلاص يا
أنسة اهدي وأنا هكلمه.

نظرت له "بسملة" بشر وقالت بعصبية:

-وأنا مش صغيرة عشان حد يرد مكاني

نظر لها بضيق ثم عاد ينظر لسائق
وقال:

-خلاص اهدي وأنت ياسطا أطلع يا عم
اتاخرنا

تحرك السائق دون أن يصعد أحد لتقول
"دعاء":

-يا بنتي اتكلمي عدل الراجل مقلش حاجة
ردت "بسملة" بضيق:

-يعني هو حد قالوا يدخل أي الناس دي
كان يستمع لحديثها الوقح وكيف تتجراً
أن تتحدث عنه هكذا وهو من تركض
خلفه الكثير من الفاتنات، إذن وجدنا
دمية أخرى مشاكسة سأجعلها تركض
خلفي كالأخريات، ولكن من هي هذة
الفتاة يا ترى؟ هذة المرة الأولى التي
أرها تصعد سرفيس بلدتنا ولكن لا بأس
سأعلم من هي؟ ونبدأ تحدي الحصول
عليها...

وقف الضابط باحترام وهو يقول:

- "أشرف" باشا بتعمل إيه هنا؟؟؟

رفع "أشرف" يده ليتبادلا تحية السلام
وقال:

-مفـيش يا "علي"، "مازن" تعبان
وجيت عشان اطمـن عليه، وعرفت أنك
هنا جيت اسلم عليك.

أردف "علي" بجديـة وهو يـربت على يد
صديقه:

-الف سلامة عليه، هو عامل إيه
دلوقتي؟

رد "أشرف" بثبات: تمام الحمد لله بخير.

ثم نظر للخلف ليتحدث معها:

-بتعملي إيه هنا؟

أردفت "نور" بتهكم لـازع:

- اهي كملت، بتفسح، يعني بعمل إيه؟!!

هتف "علي" بعصبية:

- أنتِ يابِت اتكلمي باحترام مع "أشرف"

باشا

قالت "نور" بنفاز الصبر مما يحدث:

- بت أي ياعم أنت هو أنا مجرمه عندك

عشان تكلمني كدا، ادي اخره اللي يعمل

خير في ام البلد دي

قبل أن يرد عليها قاطعة أشرف قائلا:

- بس يا مجنونة، خلاص شوفها يا

"علي" بتعمل إيه هنا؟ عشان تمشي

أردفت "نور" بضيق شديد:

- لا كتر خيرك والله تعبناك معانا

وصاحت بغضب:

- إيه ياعم هو انتم ماسكني تحري، أنا
فعالاً غلطانة، شوفوا مين يعمل معكم
خير تاني

أردف "أشرف" بجدية: بس يا ام لسان
طويل

نظرت له بتذمر لبيتسم "أشرف"
ويقول:

- خلاص بقي

دقات منفصلة على الباب يليها العسكري
يطلب الاذن لدخول "جيهان" وبعدها
ولجت بخطوات هادئة وتساءلت:

-اي يا "نوره" خلصتي

ردت "نور" بضيق منها: اه ياختي
خلصت أنتِ سبب المشاكل من أول اليوم

أشارت "جيهان" على نفسها باستتكار
وقالت:

-أنا... ليه إن شاء الله؟! هو أنا اللي
اوقر كدا مخليه كل اللي رايح واللي
جاي يعاكس فينا هتفت "نور" بتهكم:

- لا يختي أنتِ اللي بخيله ومش بترضي
تركبي وتكسري رجلي من المشي

أردفت "جيهان" تدافع عن نفسها:

-أنا مش بخيله بس بحب اتمشى،
وبعدين مش أنتِ اللي قولتي تعالوا
نروح نشتري وشفنا الطفل هناك

نظرت لها "نور" بشر وهتفت من بين
اصطكاك اسنانها:

-بس أنتِ ياختي عملتي فيها الام
الحنونة وجريتي عليه واجبرتنا نيجي
هنا

أبتسم "أشرف" على الصدمة التي
تعتلي وجه "علي" من هؤلاء الحمقى
اللتان لم يهتموا باين هم؟ وامام من
يتشاجرون؟

ليقطع "أشرف" حديثهم الذي لن ينتهي
بقوله:

- بس أنتِ وهي

سأل "علي" "جيهان" عدت اسئلة، ثم
سمح لهم بالمغادرة، لتقول "جيهان":

-لو سمحت لما يصحي الطفل اتصل بيا
عشان عاوزه اشوفه

جذبتها " نور " من يدها وهي تدفعها
لكي تسير أمامها:

-يلا ياختي جبتيلنا الكلام يخربيت
معرفتك

ردت " جيهان " ببرود: ومعرفتك

وخرج الاثنان من المشفى يتشاجرا
كالعادة، ليضرب " أشرف " كف بكف
وهتف:

-مجانين

في المساء وتحديداً في منزل نور

صاحت " نور " وهي تقترب من والدتها:

-ماما ماما ماما

ردت "فايزة" بضيق: نعم ياروح أمك

هتفت " نور " ببراعة مصطنعة وهي
تعانق والدتها:

- ماما أنتِ عارفه أني بحبك صح؟
ابعدتها "فايزة" عنها برفق وقالت:
-مش مهم، عايزة إيه؟
قبلت "نور" يدها وهتفت بمرح:
-حبيبتي يا ماما يلي فهماني
أردفت "فايزة" بنفاذ صبر:
-وبعدين هتقولي عايزة إيه؟ ولا اقوم
اشوف ورايا اي
تحدثت "نور" بسرعة: لا لا خلاص
تعالى نروح عند بيت خالي، عشان
خالي وحشني
عبثت "فايزة" بحنق: خالك برضوا!
وبعدين أنتِ مش لسه كنتي معها
هتفت "نور" بكذب لم يخفى على
والدتها:

- اصل عايزين نذاكر سوء

قالت "فايزة" ساخرة: أنتِ وش مذاكرة

تصنعت "نور" الحزن وقالت:

- ديمًا ظلماني

- أنا مش فاضية يا "نور"

- خلاص اروح أنا

- لأ اتصلي بيها أنتِ، اخوكي مش هنا

ومفيش حد يوديكي

أردفت "نور" بتوسل: عشان خاطرني يا

ماما عيد الأم جاي وهجبتك هدية حلوة

حدقت بها "فايزة" ساخرة: دانا من يوم

مخلفتك وأنتِ مجبتليش كوباية مياه

محت "نور" دموع وهميه وردت

بحزن:

-برضوا كدا يا ماما زعلانة منك

هتفت "فايزة" ببرود: احسن

أردفت "نور" بجديفة وحرزن: ليه

محسسائي إن أنت مش ضنايا؟

تسألت "فايزة" بعدم فهم: أنا إيه

ياخي؟!

ردت "نور" بمرح: متخدش في بالك

ياحب، يلا بقى اسيبك عشان الزفته

وحشتني

قالت "فايزة" بقلة حيلة: ربنا يستر لما

تتلموا على بعض يبقى فيه مصيبة

غمزت لها "نور" وهي تغادر :

-ده كرم منك والله

"في منزل جيهان"

صاحت "جيهان" بعصبية في وجه
شقيقتها:

-بت أنتِ اطلعي من دماغي عشان مش
ناقصاكي

ردت "نيرة" ببرود: ليه يا عسل مالها
دماغك؟ دانتي فاشلة ولا بتذاكري ولا
نيلة

هتفت "جيهان" بنفاذ صبر:

-الله يكرمك ابعدي عني يا "نيرة"
وقلتك أنا ميلمسش حاجة حد، والفستان
مش أنا اللي اخدته

تسألت "نيرة" بنفس البرود: امال ازاي
كان في اوضتك؟؟

أردف "جيهان" بعصبية: يمكن الحيوانات
التانية هي اللي حطته هنا

بكل برود قالت "نيرة": هي مخرجتش
انهارده

هدأت "جيهان" قليلاً وقالت:

-ماشي خليني معك هي مرحتش مكان،
بس أنت مش شوفتيني وأنا داخله البيت
وشفتي لابسة إيه، يبقي إيه هغير في
الشارع مثلاً

نيرة: معرفش

صاحت "جيهان" بعصبية وقد فقدت
صبرها وهي تدفعها خارج الغرفة:

-ظالما متعرفيش ابعدني عني كدا عشان
أنا مصدعه اصلاً

حدثت "جيهان" نفسها بعد أن اغلقت
الباب:

- ياربي أي الناس دي أنا نقصاكي أنتِ
كمان بس ماشي يا "ملك" لربيكي على
اللي عملتية بس افوقك

وأثناء حديثها اتفتح الباب بقوة،
فصاحت بجنون:

- عايزة إيه تاني يا غبية أنتِ...

صمتت عندما رأت وجه الزائر وقالت
بضيق:

- كان لازم أعرف أنه أنتِ، تصرف زي
ده لازم يطلع منك

ردت "نور" بمرح: قلبي بقي

تسألت "جيهان" بهدوء بعدما جلست
على الفراش:

- جايه ليه؟

جلست "نور" بجانبها وقالت:

-في حد يقول لحد كدا

ردت "جيهان" بلامباله: مش أنا قولت
يبقى فيه

أردفت "نور" بتعجب منها: هو أنا جايه
احكيك همي، القاقى شايله طاجن ستك
اعتدلت "جيهان" وقالت وهي تشير
على الباب:

-روحي اقفلي الباب الأول وتعالى قوليلي
"نوره" برضوا بتشيل الهيم، دي
"نوره" تشيله لبلد
تحركت "نور" جهة الباب وقامت
باغلاقه وهي تقول:

-ظلماني يا اختي، بس قوليلي أنت مالك
ده البيت كله بيشتكى منك وبيقولوا من
ساعة ما رجعتي من بره مش مبطله

خناق رغم أنك مروحه زي الفل
واربعناشر

أردفت "جيهان" بحزن: الدكتور
مكلمنيش وخايفة على الطفل أوي،
ومش عارفة ليه؟ اقولك حاجة

أنتبهت لها "نور" وهتفت باهتمام:
قولي

نظرت لها "جيهان" وقالت بتردد:
-نفسي يكون ملهوش أهل واخده اربييه
مش عارفه ليه بس حاسه أن ابني
هتفت "نور" لا يليق بحديثهم الجاد:

-اعترفي يابت أنتِ اتجوزتي من ورايا
وده أبنيك وبتضحكي علينا
وضعت "جيهان" يدها على رأسها بتعب
وقالت:

- "نوره" بالله اتكلمي جد عشان أنا
تعبانة ومش حملك

أردفت "نور" بجديّة وضيق من تفكير
تلك الحمقاء:

- "جيهان" أنتِ سامعة نفسك بتقولي
إيه؟ مينفعش تفكري بأنانيه وتتمني
حاجة وحشه زي دي، أنتِ المفروض
تدعي يلقي اهله بسرعة

لم ترد عليها بل أكتفت بنظرة حزينة،
لتقول "نور" بهدوء:

- طالما ساكته يبقى كلامي مش عاجبك،
اقولك بقي أنا جيت ليه ومستنتش
اشوفكم بكرة

ردت "جيهان" بدون اهتمام: قولي

أخرجت "نور" هاتفها وهي تبحث فيه
وقالت:

-استتي اتصل بباقي الفرقة عشان مش
هعيد كلامي كل شوية

قامت بالاتصال بـ "دعاء" ثم ضافت
"بسملة" التي قالت بمرح:

-ها الكلام على إيه يا وش السعد

هتفت "نور" عبر الهاتف وقامت بتفعيل
السماعة الخارجية:

-اسمعي ياستي الضابط اللي وصلنا أنا
وزفتت الطين...

قاطعتها "جيهان" وهي تدفشها بعيدًا
عنها:

-احترامي نفسك

اردفت "دعاء": سببها تكمل، مالوا؟

ردت "جيهان" بتذمر: يعني أنتِ مش سامعه؟

هتفت "بسملة": يعني هي غلظت في البخاري، كمل يابت مالوا؟

ردت "نور" وهي تغمز لـ جيهان:
-اتصل بيا

نطق الثلاثة في نفس اللحظة: ليه؟

ردت "نور" بغرور: قالي اسمك إيه ونتعرف وطلع أرمل ومعه ولد زي القمر

تسألت "دعاء": بثبات وأنتِ عرفتي منين أن ابنه زي القمر؟

حممت "نور" وهتفت بخجل مصطنع:

-احم أصل بعثلي صورته على الوتس

صاحت "جيهان" بعصبية: نعم ياروح

امك وأنتِ كمان كلمتيه على الوتس

ردت "نور" ببرود: عمّك دي اللي
بتغلطي فيها، واسمعوا بقى أنا قتلوا إيه
أنتم تعرفوا عني ذلك

أردفت "بسمة": أنتِ ذلك كله يا روي

تسألتي "دعاء" بهدوء: قلتي إيه؟

ردت "نور" بمرح: قولتلوا أنا بنت ناس
محترمه ومبكلمش حد بالطريقة دي ولو
رن عليّ تاني هخليه يندم على اليوم
اللي شافني فيه

هتفت "جيهان" بفخر: تربيتي وبعدين

ردت "نور": ولا حاجة

أردفت "دعاء" بعد تفكير فهي الوحيدة
التي تتمتع بذكاء دون عن الحمقوات
صديقاتها:

- "نور" اخلصي وقولي ام الحقيقة لأن

كل الكلام ده مدخلش دماغي

هتفت "نور" بمرح: بس دخل عليهم

صح يابت

أردفت "بسملة" بتعجب: يعني كل الكلام

ده مش حقيقي

ردت "نور" بهدوء: مش بالظبط في

جزء حقيقي

قالت "دعاء" بجدية: أنه رن عليك

ردت عليها "نور" بمرح:

-ايوا يا جامد أنا مش عارفه أنت لسه

قاعدة معانا ليه المفروض تشوفيك

ناس من برنامج العباقرية تصحبهم

مش اشكال زي دي

أشارت إلى "جيهان" التي قامت
بضربها بالوسادة وقالت بغضب:

- يعني أنتِ يا غبية بقولك مضايقه
وعمالا اتخانق مع كل اللي يكلمني وأنتِ
عمالا تألفي قصة من خيالك

قالت "بسملة" تايدها فيما تفعل:

- اضربيها يا "جيجي" تستاهل

حاولت "نور" تصد ضرباتها وقالت:

- خلاص ياعم كفاية، اسنتي اقولكم
الحقيقة واسمعي أنتِ عشان الموضوع
يخصك

أشارت إلى "جيهان" التي هتفت
بضيق:

- اخلصي عشان تغوري من وشي مش
عاوزه اشوف حد

ردت "نور" بجديّة: كلمني وقال أن
الطفل معرفوش اهله وهو بقي كويس
وهينقلوا على دار ايتام لحد ما حد يسأل
عليه

أردفت "جيهان" بفرحة: بجد الحمد لله
قالت "دعاء" بعد فهم: هي الغيبة دي
فرحانة على إيه مش المفروض تزعل
ردت "نور" بتمثيل وحنن مصطنع:

-اصل بعيد عنك من يوم ما ابنها مات
في حادث القطر وهي كل ما تشوف طفل
تفتكر ابنها، مسكينة نفسها تبقى ام،
فقدت عقلها في الحادث نعمل إيه الضنا
غالي

وهتفت "بسملة" تكمل حديث الأخرى:
يا حراااام زعلت عليكي أوي يا قلبي،

ربنا يعوضك خير معلىش راح فى مكان
احسن

وأردفت "دعاء" ببرود تشارك معهم
السخرية منها:

-وأنا يا قلبى كنت مسافرة مقدرتش اجي
اعزىكى، بس متزعلىش نفسك أنت لسه
صغيرة والعمر قدامك وتجيبي عشرة
صحتك بالدنيا يا قلبى

صفت "نور" بفرحة وحماس شديد من
مشاركة "دعاء" الحديث معهم:

-تحيا "دعاء" تحيا "دعاء" أخيراً كدا
بقيتى البست فرند بتاعى

و"بسمة" أخرجت صوتاً صاخب
(صفت):

-واو مين اللي بيتكلم "دعاء" مش
معقول احنا لازم نعمل احتفال
لانضمامك لفرقة المجانين
أردفت "جيهان" بضيق: خلصتي أنتِ
وهي ولا لسه
هتفت "نور" ببرود: لسه متفقتاش على
الحفلة هنعملها فين
دفشتها "جيهان" بعيد وقالت:
-"نوره" امشي من هنا وانتم مش
عايزة اعرفكم تاني
أردفت "دعاء" بثبات: خلاص بقى يا
بنات متزعلوهاش في النهاية انتم مش
هتسوا بيها الابن غالي برضوا

لم تستطيع "نور" و"بسملة" السيطرة
على أنفسهم لتصدح ضحاتهم تملئ
المكان، لتهتف "جيهان" بغضب:

-حتى أنتِ يا "دعاء" اتعديتي منهم

ردت "دعاء" بهدوء: يعني نقلك إليه؟
بذمتك ده صح اللي بتفكري فيه، عايزة
طفل يكون معندوش أهل، وافرض
معندوش أنتِ هتعملي إيه؟

هتفت "جيهان" بندفاع ودون تفكير:

-هتبنى ويكون ابني

ضحكت "دعاء" بسخرية وهي تقول: لا
أنتِ كدا مجنونة فعلاً، يا ماما لازم
عشان تتبنى طفل تكوني متجوزة
وحالتك المادية كويسه وجوزك يوافق

غير كدا أنتِ لسة صغيرة يعني اتجوزي
وجيبي مكان الطفل عشرة فهمتي
هزت "جيهان" رأسها برفض كأنها
امامها وقالت بحزن:

-لأ مفهمتش ومش عايزة افهم، أنا
هروح بكرة اشوفه في المستشفى لو حد
فيكم عايز يجي ماشي مش عايزين
احسن

تهدت "نور" بضيق وقالت: خلاص
سبوها براحتها
تسأل "دعاء" بجديّة بعدما تذكرت
شيء:

- "نور" أنتِ عرفتي مين أن الظابط
متجوز ومعا طفل زي القمر؟؟
توترت "نور" ورغم ذلك قالت بتردد:

-كنت بهزر بس هو فعلاً معاه طفل لأنني
سمعتة وأنا في المستشفى بيكلم الطباط
وبيقول أن ابنه تعبان وكمان دخلت على
الاكونت بتاعه وشوفته متصور معاه
تسألت "دعاء": "ليه يا نور" احنا مالنا
بيه؟

ردت "نور" بحرج طفيف: فضول والله
وعارفه إنني غلطانة ومتقلقيش مش
هتكرر تاني، المهم انتم بقى اخباركم
إيه

وبدأت كل واحدة منهم تقص لهم ما
حدث منذ تركتهم، واعترض "نور"
على طريقة تعامل "بسملة" مع الغرباء

كان يجلس بجوار الصغير وهو حزين
وهو أكثر شخص يبغض الحزن ويقول
دائماً أن الشيطان يرقص فرحاً عندما
يرى الإنسان حزين، وهو لن يسمح
لشيطانه أن يكون سعيد، ودائماً يبتسم
ويقول رب الخير لا يأتي الا بالخير ولكن
الآن حزين على هذا الصغير الذي لم
يتجاوز الأربع أعوام أين الرحمة في
ترك طفل بريء في قارع الطريق؟ أين
والدته التي تألمت تسعة أشهر؟ وتركته
هكذا بلا رحمة ولكن ربما هناك شيئاً
آخر لا أحد يعلمه

قاطعت سبيل أفكاره دخول الدكتور
"هاجر":

-دكتور "إبراهيم" أنت لسه قاعد

رد "إبراهيم" بهدوء بعدما اعتدل:

-آه اتفضلي أنتِ أنا قاعدة شوية

تسألتي "هاجر" بتعجب: بس أنت

خلصت شغل واكيد تعبان

أبتسم "إبراهيم" وقال برفق: شكراً يا

دكتورة على اهتمامك بس ممكن تمشي

أنتِ

قالت "هاجر" بثبات: لو عايزني...

قاطع "إبراهيم" حديثها بقوله: لا شكراً

اتفضلي

اردفت "هاجر" وهي توليه ظهرها:

سلام

رد "إبراهيم" عليها: سلام

وبعد خروجها صدح رنين هاتف

"إبراهيم" ليجذبه ويرد على المتصل:

- مساء الخير يا عمّو

ردت "سميرة" بجديّة: مساء النور،
اتأخرت إليه يا "إبراهيم"، "حنان"
عنيده ومث راضية تمام غير لما تيجي
وعندها مدرسة الصبح تعالى شوف حل
معها

رد "إبراهيم" بهدوء: خلاص يا عمّو
قوليلها إني جاي في الطريق
قالت "سميرة" بحب لابن شقيقها
الوحيد والنسخة الأخرى من أبيه:
-توصل بالسلامة يا بني

رد "إبراهيم" ببسمة هادئة: الله يسلمك
يا عمّو
واغلق الهاتف لينظر لصغير بحب وهو
يهمس:

- هجيك بكرة بدري.

«لم يكن أول ولا آخر طفل يترك بقارع الطريق بلا رحمة ولكن خلف كل كارثة سبباً مجهول، فلا شيء يحدث لنا عبث ربما السبب الذي جعل "إبراهيم" يتعلق بالصغير لهذا الحد هو مستقبلة المجهول، فماذا سيفعل الصغير في غابة الحياة؟ التي لا ترحم الكبار فما بالك بالصغار»

كان "فارس" شارد في معذبة قلبه ولكن قرر أن يفعل المحال قبل فوات الاوان و"أشرف" الذي لم يفكر يوماً بفتاة والآن وبكل أسف يمر طيفها امامه ربما بسبب جمالها الملفت للانظار، ولكن

للحق طريقتهما في الحديث ملفته أكثر،
جنونها وطريقتهما الطائشة جعلته يبتسم،
ربما هو لقائهم الأول وأبداً لن يكون
الأخيرة.

«مازلنا في البدايات والحكاية لسه في
اولها بين المجنونة والمغرور نلتقي في
البارت الرابع إن شاء الله من رواية
أربعة تساوي واحد»

الفصل الرابع

"بتمنى أدخل الجنة لكي أذهب لسيدة
آسيا امرات فرعون واسألها ازاى كنتِ
مؤمنة وأنتِ عايشه في بيت كله ظلم
ومتأثر تيش، وازاى قدرتي تشيلي حجر
كامل فوق بطنك، ازاى كنتي قويه كدا،
وازاى قدرتي تصبري"

"في المدرج "

جلسوا الأربع فتيات بجوار بعضهم وهم
يتحدثون، لتقول "دعاء" بصوت
منخفض:

-بس أنتِ وهي الله ياخدكم الدكتور
هيطردنا بره

ردت "نور" بمرح وصوت منخفض
بعض الشيء:

-متقلقيش معانا وسطى

تسألت "بسملة" بتعجب: وسطت أي دي

نغزتها "نور" في مرفقها وهتفت وهي

تغمز لها:

-ركزي يا غبية الدكتور عينه هتطلع

على بنت المستخبي

أردفت "جيهان" بهمس: آه يا بنت

المحظوظة الدكتور هيموت عليها وطبعاً

هتجح من غير ما تتعب

ردت "دعاء" بضيق: ماشي أنتِ وهي

لما نطلع بره هربيكم

قالت "نور" وهي تشير بيدها بلا

اهتمام:

-ربي نفسك الأول ياختي

أرتفع صوت الدكتور "فارس" في
القاعة وهو يقول:

-الدكاترة بيتكلموا في إيه؟

اشارت نور على نفسها وهي ترد: احنا

رد الدكتور "فارس" بسخرية: هو في
غيركم بيتكلم

نظرت يمينًا ويسارًا وابتسمت واردفت
ببلاها:

-لا محدش بيتكلم غيرنا الحمد لله

همست "دعاء" بنبرة شبه باكية:

-منك لله يا "نور" يا بنت ام "نور" إيه
اللي جابك تحضري معانا

ردت "نور" بحنق: وأنا أعرف منين أن
دكتوركم رخم

عاد صوت "فارس" يصدح:

-إيه المهم اللي بتتكلّموا فيه ومش
مركزين معايا

نهضوا الأربعة وهم ينظرون لبعضهم
البعض ولم يتحدث أيًا منهم، ليقول
"فارس" بضيق:

-اطلعوا بره والمرة دي انذار المرة
الجاية مش هتضرولي تاني

ردت "دعاء" بحزن: يا دكتور احنا
اسفين مش هتتكرر

نظر لها "فارس" وقال بثقة: عارف
اتفضلوا

خرج الأربعة خلف بعضهم لتنظر
"دعاء" بحزن لـ "فارس" ليبادلها
النظرة بأخرى حنونة، ثم غادرت
خلفهم، لتقول "نور" بسعادة:

- عارفة يابت يا "جيجي" شعور حلو
اوي وأنت طالعه كدا مطرودة من
السكشن ياااه دي أحلى حاجة عملها
هتفت "جيهان" بنفس السعادة: اه يابت
الواحد مكنش فاهم حاجة وقاعد
وخلص

وقالت "بسملة" بمرح: احسن عمل
الصح والله

أردفت "دعاء" بنفاد صبر: أنتم
معدكمش دم صح؟

ردت "نور" عليها بعدم فهم: لا عندنا
ليه؟

لتقول "دعاء" بعصبية: يعني اتهزقتوا
واتطردتوا ولسه بتضحوا فين الدم بقى

أردفت "نور" ساخرة: هو أنتِ مش
جامعة نفسك معنا ليه؟ هو أنتِ مش
مطرودة معنا

تسألتي "دعاء" بحنق: "نور" يا حبيبتني
فاكرة لما اتقبلنا أول مرة
ردت "نور" وهي تضع يدها عليها:
- هو ده يوم يتتسي

دفشتها "دعاء" بضيق: يومها
المفروض كنت قطعيت لساني عشان
ادخلك واتصاحبنا

هتفت "نور" بغرور: المفروض تبوسي
ايدك وش وضر عشان عرفتيني

ردت "دعاء" بضيق: اه طبعاً اصل أنتِ
مش كل يوم توديني في داهيه ومشكلة
شكل

تسألت "بسملة" بتذكر: على سيرة
المشكلة هتروحني المستشفى يا
"جيجي"

ردت "جيهان" بلهفة: اه طبعاً هروح،
هتجيو معايا؟

قالت "بسملة" بهدوء ثم أقترحت: أكيد،
طب تعالوا نروح دلوقتى بما أن
معندناش حاجة

هزت "جيهان" رأسها وكادت أن تتحرك
لولا صوت "دعاء" الغاضب:

-محدث فيكم هيروح مكان غير لما
يعتذر من الدكتور

وضعت "نور" يدها في خصرها وهتفت
بنزق:

-ليه إن شاء الله؟ أنا مش هعتذر لحد

قالت "دعاء" بعند: هتعتذري غصب
عنك لأن محدش كان بيرغي غيرك
ردت "نور" بضيق: ليه ياختي مش أنت
اللي قولتيلي احكيك الحلم اللي حلمته
هتفت "دعاء" بنفاد صبر: ده كان قبل
الدكتور ما يدخل مش بعد
أردفت "نور" بلامبالاة: مبحبش اسكت
غير لما اخلص كلامي اعمل إيه؟
ردت "دعاء" وهي تدفعها للأمام:
تعتذري ويلا عشان الدكتور طلع
دخلوا الأربعة خلف بعض مكتب الدكتور
"فارس" بعدما سمح لهم بالدخول
وهتفوا في نفس اللحظة:
-اسفين يا دكتور مش هتتكرر

رد "فارس" بهدوء: تمام اتفضلوا بس
أنا مباحبش حد يتكلم وأنا بشرح
كان يتحدث وهو ينظر لمن تقف في
الخلف، وقبل خروجهم تحدث "فارس"
بتردد:

- "دعاء" استني أنتِ

أردفت "نور" بابتسامة: في حاجة يا
دكتور

رد "فارس" بسخرية: اسمك "دعاء"

قالت "نور" بسماجة: لأ، بس صحبتي

رد عليها "فارس" ببرود وهو يشير
للباب:

-طيب اتفضلي أنتِ، وسيبي صحبتك

أن كان يظن أن "نور" ستغادر بهذه
البساطة فقد أخطأ، لتهتف ببرود مماثل:

-ليه؟

رد "فارس" بحدة فقد نفذ صبره: قلت

اتفضلي

أردفت "نور" بصوت منخفض: خلاص

يا عم متزوقش

صدحت ضحكات "جيهان" و"بسملة"

لتجعل "دعاء" تكاد تفقد وعيها من

الخجل، نظرت لهم برجاء ألا يخرجوا

ويتركوها بمفردها ولكن فوات الأوان

فهي تقف الآن أمامه ولم تستطع أن

ترفع أعينها عن الارض حاولت أن

تجمع قوتها التي تبخرت بعد نطقه

اسمها بهذه الطريقة المميزة، فقال

"فارس" بهدوء:

-مالك يا "دعاء" أنتِ خايفة مني كدا

ليه؟؟ اتفضلي اقدي عايز اتكلم معك

كان يجلس خلف مكتبة وهي تقبع قرب

الباب، لتتحدث بتوتر:

-هو...في... حاجة

أردف "فارس" بابتسامة: حاجة حلوة

اقدي

استجمعت "دعاء" ثقتها وقالت بثبات:

-اتفضل حضرتك قول عشان البنات

مستيني بره

أشار "فارس" للمقعد: اقدي الأول

جلست على حافة المقعد بتردد وهي

تشعر بالخجل يكاد يقتلها هذه المرة

الأولى التي تتحدث معه منذ رأته، فمر

على لقائهم الأول ما يقارب الثلاث أعوام

ألقى "فارس" قبلة وانتظر تأثيرها على
من تقبع أمامه:

-تجوزيني؟

نظرت له "دعاء" بصدمة وعدم
تصديق:

-إيه؟؟؟

قال "فارس" بهدوء وبسمة تزين
وجهه:

-میں نفعش اتقدمك وأنا معرفش رأيك
فيا، موافقة ولا لا، فكري براحتك
وهنتظر ردك ولو وافقتي او رافضتي ده
ملوش علاقة باني الدكتور وانتي طالبة
وتقديرك ملهوش دعوة بالكلام ده

لم تستطيع أن ترفع عيونها من الأرض
هل حقًا حلمها المستحيل تحقق هكذا

ببساطة رباه هذا حلمًا جميل تخشى أن
تستيقظ على كابوس مؤلم، قطع
"فارس" صمتها:

-اتفضلي دلوقتي وأنا هنتظر ردك تكوني
فكرتي في طلبي

وكأنها عصفور سجين وتم إطلاق
صراحه، في ثانية كانت تختفي من
أمامه، تنهد "فارس" براحه ينتظر ردها
الذي يعلمه جيدًا ويعلم رأيها به فهو
رأى بعيونه نظرات الحب التي تلمع
داخل مقلتيها، فتلك السمرات الفاتنة
جعلته اسير منذ تعلقت عيونه بعيونها
الخضراء

«من قال أن السمرات لم تخلق للحب، بل
الحب خلق منها ولها»

عندما وصلت إلى أصدقائها تسألت
"نور" بلهفة:

-إيه يابت قالك إيه؟؟

ردت "جيهان" بهدوء: اسستي أنتِ مش
شايقة وشها ضارب الوان ازاي

اقرحت "بسمة" عليهم: طيب تعالوا
نقعد في الكافتريا

ردت "جيهان" وهي تضع يدها بيد
"بسمة":

-يلا

بعد جلوسهم قالت "نور": هااااا انطقي
كان عايزك في إيه؟

وتسألت "جيهان" بفضول: يلا يا
"دودو" قولي الفضول هيموتني

أردفت "دعاء" بتوهان: عايز يتجوزني

ردت "نور" براحة: طب الحمد لله

ثم نظرت لها بصدمة وهتفت:

-إيه بتقولي إيه؟

أردفت "جيهان" بفرحة: احلفي

تسألتي "بسملة" بعدم تصديق:

-بجد ولا بتهزري معنا

ابتسمت "دعاء" بعدما ادركت ما حدث:

-بس أنتِ وهي أنا مش مصدقة زيكم

قالت "نور" بحماس: وقلتيوا موافقة

طبعاً

هزة "دعاء" رأسها بنفي وقالت: لأ

اتسعت عيون "جيهان" وهي تصفحها

على رأسها:

-يا بنت المجنونة في حد يضيع عريس

زي ده، دأنتي هتموتي عليه

ردتلها "دعاء" الصفة بأخرى: مردتش
يا ذكية مش رفضت وقالتي هستتي ردك
غمزت له "نور" وردت بمرح: اشطا
مبروك يا عروسة

قالت "بسملة" بحزن مصطنع: يا بنت
المحظوظة هتودعي العزوبية قبلي
وأردفت "جيهان" بتمني: كدا أنت
ضمنتي العريس والشهادة عبالى يارب
وضعت "دعاء" كفها في وجه "جيهان"
" وهي تقول:

- الله أكبر، إيه يا مصيبة منك ليه
جوزتوني وأنا لسه موفقتش
غمزت لها "نور" بمشاكسة: يابنت
دانتي دقيقة كمان وكنتي قولتيله يلا بينا
على المأذون

تسألت "بسملة" بهدوء: وهتردي عليه
امتي؟

أبتسمت "دعاء" وقالت: لما أفكر بقي
يستنى مانا بقالي ثلاث سنين مستتية

صفت لها "نور" وردت بمرح: يا جامد
أنت تربيتي يا معلم

نهضت "جيهان" وهي تشير لهم: يلا يا
معلم أنتي وهي عشان لو "حزومي"

مشي ومشفتوش أنا هدخل فيكم السجن
ردت "نور" بسخرية: مين "حزومك"

ده ياختي؟
اردفت "جيهان" بابتسامة: الواد

الصغير ياختي بس قلت اخترلوا اسم
نهضت "نور" وهي تقول بسخرية:

-واخترتي "حزومك" والله ذوقك رائع يا

اختاه

واشارت للفتيات: يلا عشان "حزومها"

في مكتب إبراهيم

أردف "إبراهيم" بهدوء: خلي بالك عليه

وأنا إن شاء الله هتكفل بيه

قالت مديرة الدار: متقلقش يا دكتور كل

الأطفال اللي هناك ولادي

ناولها "إبراهيم" بطاقة تعريفية:

-ده رقمي، في أي وقت رني عليا، لو

تعب أو احتاج حاجة

ردت مديرة الدار وهي تنهض:

-ربنا يجزيك خير يا دكتور هستأذن أنا

أشار لها "إبراهيم" بهدوء: اتفضلي

وذهبت المديرية مع الطفل إلى دار الأيتام

كانوا يسيرون في طريق المشفى ودون
مقدمات سقطت "جيهان" أرضاً لتطلق

صرخة عالية:

-اههههههه

جلسوا اصداقائها بجوارها لكي تتمكن
من الوقوف ولكن قدمها تؤلمها بشدة
ولم تستطيع السير، لترد بوجع:

-اهه مش قادرة اقوم رجلي وجعاني
قوي

قالت "دعاء" بحزن وهي تفحص
قدمها:

-حد فيكم يوقف تاكسي بسرعة

أردفت "نور" بهدوء: المستشفى قريبة
خلينا سندها وتمشي

ردت "جيهان" بوجع: مش هقدر امشي
يارب تتشلي

حدقت فيها "نور" بشر وهتفت من بين
اصطكاك اسنانها:

-ياريت كان اتقطع لسانك وخرستي بدل
ما تتكسر رجلك وتعذبينا

أردفت "بسملة" بخوف عليها: خلاص
بقي يا "نور" هي موجهة وانتي
عماله ترغي

قبل أن ترد عليها تحدثت "دعاء":

-اخلصي مش وقت خناق

وفجأة وقفت سيارة أمامهم ونزل هو
بطلته التي تخطف الأنظار، ليقول
"أشرف" بثبات:

-في إيه؟ ومالها؟

أشار إلى "جيهان" لتقول "نور"
بضيق:

-ملهاش

ردت "جيهان" بألم: لا مالي رجلي
اتكسرت بسببك

أشارت "نور" على نفسها وتسألت
باستنكار:

-وأنا عملت إيه؟

ردت "جيهان" بنبرة باكية: دعيتي عليا
منك لله

ربتت "بسملة" عليها واشارت لـ
"نور":

-وقفي تاكسي يا "نور" واخلصي هي
موجوعة وأنتِ مش حاسه بيها

أردف "أشرف" بثبات: أنا رايح
المستشفى اركبوا اوصلكم

ردت عليه "نور" بضيق: شكراً مش
عايزين

رد "أشرف" بهدوء وهو يشير على
"جيهان":

-اخلصي صاحبك تعبانة

أردفت "نور" بعند: قولت لا وممكن
تفضل حضرتك

همست له "دعاء" بخفوت: خلاص
تعالى نركب لأنها تعبانة ومفيش تاكسي
فاضي

ردت "نور" بغضب: مستحيل على
جثتي لو ركبتم معه

وبعد دقيقة كانت "نور" تجلس بجانب
"أشرف" و"بسملة" و"دعاء"
و"جيهان" في المقعد الخلفي، لتقول
"نور" بضيق:

- "جيهان" ملاحظه إنك كل يوم تعملي
كارته

ردت "جيهان" بوجع: أنتِ السبب
محدث دعا عليا غيرك
أردفت "دعاء" بسخرية وهي تربت
عليها:

-يعني أنتي شايفها شيخة

نظرت لها "نور" بشر وهتفت بنزق:

-نقطينا بسكاتك أنتي الثانية

قالت "جيهان" وهي تكاد تبكي من

الوجع:

-اههه منك لله يا "نور" يا بنت ام

"نور" أنا مش عارفة عمتي عملت ذنب

إيه عشان ربنا يبتليها بواحدة زيك

ردت "نور" ببرود:

-دانا اللي مش عارفة خالي عمل إيه

وبيكفر عن اخطائه بيكي

تدخلت "بسملة" تقول بضيق منهم:

-بس أنتي وهي فضحتونا

هتفت "نور" ساخرة: مين اللي بيتكلم؟؟

تحدث "أشرف" وهو يقف بالسيارة أمام
المشفى وينظر لها:

-وصلنا المستشفى ولا مش واخده بالك

خرج من السيارة وتقدم من "جيهان"
ليحملها لداخل، لتقف "نور" أمامه
وتتسأل بعدم فهم:

-إيه ياعم بتعمل إيه؟

أردف "أشرف" ببرود: يعني هعمل إيه
هدخلها؟

ردت "نور" بعصبية: لما تتشل ابقى
نشوف الموضوع ده بس هي هتدخل
على رجليها

أشار عليها "أشرف" بثبات: بس هي
تعبانة ومش قادرة تمشي
ردت "نور" بلامبالاة: أحسن

أنهت "دعاء" هذا الهراء بقولها الجاد:

- احنا هنسندها لحد جوه

امسكت بيدها "نور" و"دعاء" لتستند

عليهم وتتقدم ببطيء

تحدثت "نور" بهمس وصل لـ

"بسملة":

-ده اللي ناقص يشيلها كمان

دخلت لغرفة الكشف وجوارها "دعاء"

التي تتمسك بها كالطفلة ليقوم الطبيب

بعمل واجبه ويخبرهم بعد دقائق أنها

على ما يرام ولكن يجب أن تلزم الفراش

لمدة أسبوع ولا تتحرك واعطاها إبرة

مسكن، وبعد خروج الطبيب تقدمت

"نور" و"بسملة" لداخل لتقول "نور":

- كل ده وفي الآخر طلع مش كسر آمال

لو كسر كنتي عملتي فينا إيه؟

ردت عليها "جيهان": أنا عرفاك عاوزة

تخلصي مني بس قاعدة على قلبك

ردت "دعاء" بيأس منهم: هو انتم

مبتعبوش؟ دانا تعبت

اردفت "نور" ببرودها المعتاد: لأ

شعرت "جيهان" بجوع لذلك قالت:

روحي يا "نوره" هتيلي كشري عشان

جعانه

قالت "نور": هروح عشان أنا كمان

جعانه تعالي يابت "بسملة" معايا

ردت "بسملة" بتعب وهي تجلس بجوار

"جيهان":

- لا روعي أنت أنا تعبانة

ضربتها "نور" على رأسها وقالت قبل
ان تغادر:

- غوري مش عايزة حد منكم أصحاب
تعر

أبتسمت لها "بسملة" بسماجة: شكراً يا
ذوق

قالت "جيهان" برجاء: عايزة اشوف
"حمزة"

ردت عليها "بسملة": لما تقومي
بالسلامة

أردفت "جيهان" بهدوء: روعي أنتي
طيب شوفيه، وتعالى قوليلي عامل إيه؟

أشارت "بسملة" لـ "دعاء": روعي
أنتِ يا "دعاء" وأنا هقعد معها

أردفت "جيهان" بحزن مصطنع: روحوا
انتم لتنين عشان خاطري ولا عشان انا
تعبانة خلاص محدش هيروح يسأل على
الواد اليتيم ده

أبتسمت "بسملة" بعدم تصديق وقالت:

-البت عايزة توزعنا

قالت "دعاء" بهدوء: طب حد فينا يقعد
معك لحد ما تيجي "نور"

هزة "جيهان" رأسها بنفسي: لا روحوا
عشان عبال ما تيجي نمشي

كانت "نور" تسير بخطوات هادئة،
ويسيروا خلفها ثلاث شبان في شارع
المشفى، ليقول الشخص ١:
-الجميل ماشي لوحدة ليه؟

وقال الشخص ٢: لا وشايف المشية باشا
باشا

قال الشخص ٣ وهو يغمز لأصدقائه
بعبت:

-من حقاك تتقل يا جميل بس براحه على
قلبي الضعيف

هتفت "نور" بضيق ونفاذ صبر: احترام
نفسك أنت وهوه بدال ما ندمكم

رد الشخص ١ وهو يغمز بوقاحة: وحش
يا باشا أنا بحب القطط الشرسة

أصدرت "نور" صوتًا ساخر: أنا اقدر
اوريك القطة دي ممكن تعمل إيه؟

في تلك اللحظة أتى "أشرف" وتساءل
بغضب:

-فيه إيه؟؟؟

ردت "نور" وهي تنظر للشباب بتشفي:

-مفيش حاجة

وفي ثواني فقط اختفوا الثلاث شبان

لتقول "نور" بسخرية:

-جبناء

قال "أشرف" بجدية: صحبتك معها حق

نظرت له "نور" وتساءلت: حق في إيه؟

مش فاهمه

نظر لها "أشرف" من أعلى لأسفل

وهتف بضيق ملحوظ:

-جمالك اوفر وكل شوية حد يعاكسك

بسبب لبسك ده

وأشار إلى ثيابها فقد كانت ترتدي جيب

ضيق للغاية باللون الاسود وبلوزه

باللون الأبيض وحجاب يظهر بعض

خصلات شعرها، نظرت "نور" للأرض
بخجل، ليتسأل "أشرف" بحدة:

- أنتِ ازاي تطلعي كدا أصلا

تلاشي خجلها وردت عليه بعصبية:

- أنت مالك؟ وبعدين أنت مراقبني كل ما

روح مكان اشوفك

نظر لها من أعلى لأسفل وهتف يقلل من

شأنها:

- هرقبك أنتِ ليه يعني؟ أنا جاي اشوف

ابني في المستشفى ومعلش المرة الجاية

ابقي اخذ اذن سيادتك عشان اجي

كادت "نور" ان تسأل عن شيء ولكن

تراجعت، ليجيب سؤاها الغير منطوق:

- أكيد كنت متجاوز مش منزله من على

Google play بس الله يرحمها عندك

عروسة

أردفت "نور" تقلل منه كما فعل معها:

-ليه مستغني عنها عشان ادهالك أنت،

دانا عايزة اخلص من البيت "جيهان"

اللي معذباني بس مش لدرجادي

هتف "أشرف" بثبات: ليه يا وزة

مشبهش

ردت "نور" بضيق: اسمي "نورهان"

رد "أشرف" بثقة: عارف، ويلا روعي

مكان مارичه والبس ده مشوفكيش بيه

تاني، وراجعي دينك يا اخت "نور"

وبحدة قال: فاهمة

وأن كان ظن ان صوته المرتفع

سيجعلها تخشاه فقد أخطأ هذه "نور"

المهدي " لا تخشى أحد لذلك نظرت له
بتحدي وقالت:

- أنت مين اصلا عشان تكلمني كدا؟ التزم
حدودك يا كابتن

اقترب منها بضع خطوات وأردف بثقة:

- اتمنى اشوفك تاني وتكوني لابسه كدا
وشوفي هعمل إيه؟

وتركها وغادر وهي مازالت تقبع محلها
كالصنم لتحدث نفسها بهمس:

- إيه الغباء ده؟ مين ده عشان يكلمني
كدا دانا محدش أبداً اتحكم فيا مغرور

وغبي

ثم سارت في طريقها بغضب

"عند جيهان"

دقات هادئة كصاحبها على باب الغرفة
لتأذن لطارق بالدخول، فولج "إبراهيم"
وهو يبتسم لها:

-الف سلامة عليكي

أعدت "جيهان" في جلستها وردت
عليه:

-الله يسلمك يا دكتور

أردف "إبراهيم" بهدوء يفسر سبب
وجوده:

- أنا شوفتك وأنتي داخله مع اصحابك
تعبانة وجيت اظمن عليكي، أنتي كويسه
رغم تعجب "جيهان" من اهتمام لكنها
قالت:

-الحمد لله بخير، المهم "حمزة" عامل
إيه؟

رد بأستغراب: "حمزة" مين؟؟

قالت "جيهان" بحزن عندما تذكرت أنها

لم ترى الصغير التي أتت لأجله:

-الواد الصغير اللي أنا جبته امبارح

رد "إبراهيم" بثبات: آه، راح الدار بس

هو بخير متقلقيش

أردفت "جيهان" بزعل:

-أنا كنت جايه هنا عشان اشوفه ووقعت

في الطريق وعشان كذا اتاخرت كان

نفسي اشوفه

أبتسم "إبراهيم" لها وقال: متزعليش

ممكن تروحيه الدار لما تبقي كويسه

هتفت "جيهان" بتمني: ياريت والله،

نفسي اشوفه أوي

رد "إبراهيم" برفق: إن شاء الله
تشوفيه بعد اذنك

ردت "جيهان" بخفوت: اتفضل
نظر لها "إبراهيم" بابتسامة هادئة ثم
غادر ليجد أمامه "دعاء" و"بسملة"
التي قالت:

-بقالنا ساعة ندور عليك يا دكتور
تسأل "إبراهيم" بتعجب: خير في حاجة؟
ردت "دعاء": لا خلاص أنت كنت طالع
من عند اللي بعثتنا نطمن على "حمزة"
ضحك "إبراهيم" بخفوت: قوليلها الدكتور
"إبراهيم" كتبة في سجل المستشفى
"رحيم"

ردت "بسملة" بلا اهتمام: "رحيم"
"رحيم" حلو برضوا

غادر "إبراهيم" وآتت "نور" من
الخارج ليتقدموا الثلاثة لداخل، فتفاجأت
"نور" عندما رأت "جيهان" تبكي
فقالت بخوف: "جيجي" مالك في إيه؟

وأردفت "بسملة" باهتمام: في إيه يا
بنتي مالك؟

أقتربت منها "دعاء" وتساءلت:
"جيجي" قولي بتعطي ليه؟

و"جيهان" لا رد ومازلت تبكي، لتقول
"نور": اخلصي قولي مالك؟

ردت "جيهان" ببكاء: "حمزة" مشي
ومش هشوفه تاني، أنا عايزة اشوفه
مليش دعوة

نظرت لها "نور" بشر ثم هتفت بهدوء:

-طيب اهدي وهنرحلوا كنا لما تقومي
بالسلامة

تسألت "جيهان" بحماس: بجد

ضحكت "نور" بيأس: بجد ياختي

تذكرت "بسمة" ما قاله "إبراهيم"،
فقالت:

- "جيجي" الدكتور سماه "رحيم" مش
"حمزة"

أردفت "جيهان" بعند: بس أنا سميته
الأول مليش دعوة

قالت "دعاء" بهدوء: نتناقش في الاسم
بعدين، المهم أنا مش هروح الكلية غير
لما ارد على "فارس" و"جيجي" مش
هتروح يبقي أنتم الاتنين تروحوا واحنا
هنروح الأسبوع الجاي، تمام

أردفت "نور" بجديّة: لأمش تمام وأنا
كمان مش هروح زيكم
نظرت له "دعاء" وتساءلت بضيق: ليه
ياختي؟

قالت "نور" بعند: اشمعنا أنتم
واردفت "بسملة": وأنا مش هروح
زيكم

نظرت لهم "دعاء" بضيق وقالت: اهي
كملت، ومين هينقل المحاضرات اللي
مش هنعزها؟
ردت "بسملة" بمرح: هنتصرف.

الفصل الخامس

♡ أتمنى كثيراً أن أدخل الجنة لكي أذهب
لسيدنا عمر بن الخطاب وأخبره إنني
أحببته في الله، وعشقت عدله وشجاعته
وتمنيت أن التقى به، ويومًا ما سيتربى
إبني على شجاعة ابن الخطاب وسكون
قدوته♡

بعد مرور أسبوع في الجامعة
أردفت "نور": يلا أتاخرنا
ردت "جيهان" بضيق: أنا مش عاوزه
أحضر روعي قولي للبنات يحضروا هما
قالت "نور" وهي تنظر يمينًا ويسارًا
تبحث عنهم:
-هي فين اصلاً الغيبة اللي قالت
هتستاني هنا؟

ردت "بسملة" بمرح وهي تأتي من

خلفها:

-قلب الغيبة

أبتسمت "نور" وهي تهز رأسها بنفي:

-مش أنتي الغيبة الثانية

أردفت "دعاء" بمرح وهي تصفها

على رأسها:

-قلب الغيبة الثانية، عارفه يابت يا

"نور" رغم إني ارتحت منك الأسبوع

اللي فات بس وحشتيني

أردفت "نور" بمرح مماثل وهي

تعانقها:

-حبيبتشي

أبعدتهم "بسملة" عن بعض وقالت:

-يلا طيب عشان المحاضرة هتبدأ

ردت "جيهان" برفض: أنا مش هحضر
دفشتها "دعاء" أمامها وهي تقول: يلا
يا ماما فشلنا
وذهبوا لدخول المدرج وبدأت المحاضرة
ولكن كلاً منهم كانت في عالم آخر عالم
به أحلام وردية بعيداً كل البعد عن عالمًا
الحقيقي، وبعد إنتهاء المحاضرة تحدثت
زمليه لهم تجلس خلفهم وهي توجه
حديثها لآخري:
-عارفه يا "علا" في ناس بتسكت لما
تتهزق
ضحكت "علا" عندما علمت على من
تتحدث وقالت:
-ناس تخاف متخشيش بس تصدقي يا
"نرمين" طلع عندهم دم مكنتش أعرف

أرتفعت ضحكات "نرمين" وقالت
بصعوبة وهي تقلد "دعاء":

-احنا أسفين يا دكتور

زادت ضحكات "علا" بسبب طريقتهما
في الحديث:

-كان شكلهم يضحك

نظرت لهم "نور" بشر ثم ضحكت
ساخرة:

-تصدقي وأنا كمان ضحكت

ردت "نرمين" بحاجب مرفوع: وأنتي
مالكِ هو حد كلمك؟

حدقت فيها "نور" بضيق وداخلها
صوت يخبرها أن تجذبها من شعرها
وتعلمها الاداب، ولكنها تماكنت نفسها
وقالت:

- لا يا شيخه بجد، آمال انتِ بتتكلمي عن مين؟

ضحكت "علا" بسخرية: اللي على رأسه بطحه بيحسس عليها يا حبيبتى
أردفت "نور" بثقة: والكلاب برضوا
مش بتعرف تعمل حاجة غير أنها
تهو هو صح

هتفت "علا" بغضب: أنتي قصدك إيه؟
ردت "نور" بمراوغة: اللي فهمتي يا
روحي

نهضت "دعاء" وهي تقول:
- سيبيك منهم يا "نور" دول آخرهم كلام
يلا

وجذبت يدها وخرجوا من القاعة، لتقول
"علا" بغل وهي تحدث نفسها:

-ماشي مبيقاش اسمي "علا" لو
مخلتكمش تتدلوا في الجامعة كلها

تسألت "جيهان" بجدية بعدما خرجوا:

- "دعاء" مقلتش هتروحي تقولي
لدكتور "فارس" أنك موافقة أمتي

ردت "دعاء" ببعض الخجل: عايزة
اروح بس مكسوفه ومش عارفة اقوله
إيه

ردت "نور" بجدية: تقولي له أنك موافقة
ولو عايزك يجي يتقدملك، الموضوع
بسيط

وقالت "بسملة": الموضوع بسيط ومش
محتاج كسوف أنتي قليلو زي ما "نور"
قالت وبس

في تلك اللحظة تقدم "فارس" منهم
وقال بجدية:

- "دعاء" ممكن دقيقة

نظروا الأربعة لبعضهم وابتسموا
و"نور" غمزت لـ "دعاء" فجعلتها
توترت أكثر، تقدمت "دعاء" منه خطوه
وبصوت حاولت بقدر الإمكان أن تجعله
طبيعي:

-حاضر

وتحركت خلفه وهو يسير أمامها إلى أن
وصلوا لكافية لتجلس امامه نظر لها
بهدوء وتحدث:

-ممكن أعرف مش بتيجي الكلية ليه؟
من ساعة ما اتكلمت معك وأنا

مشفتكيش، تغيبني أسبوع عشان اللي
طلبته منك

ردت "دعاء" بارتباك: لأ، هو... هو
بس "جيهان" كانت تعبانة ومش هتقدر
تيجي والبنات قالوا أنهم مش هيحضروا
فمحببتش اجي لوحدي

أردف "فارس": رغم إنني مش مقتنع
بس تمام، هالهااااا

ردت "دعاء" بغباء: ها إيه؟

ابتسم لها "فارس" بحب وهو يقول:

-فكرتي؟؟

صمتت وصمت العالم في نظرة ظن ان
صمتها دليل على رفضها ولم يرى
وجهها المشتعل من الخجل ولكنه أراد

ان يسمع الاجابة منها وهي لم ترد، فقال
"فارس" برجاء خفي:

- ردي ومش هزعل حتى لو كان قرار
مش هيسعدني بس دي حياتك أنت
ووعد مني أن الكليّة ملهوش أي علاقة
بالموضوع عشان متخفيش وتوافقي
عشان كدا

و"دعاء" ظلت على صمتها بسبب
خجلها وهي تفرك يدها بتوتر، لينظر لها
بحزن حاول اخفائه ثم نهض وقال:

-تمام أنا وصلني جوابك وآسف على
ازعاجك

وتحرك خطوتين لتقول "دعاء" باندفاع
وخوف:

-دكتور استني

وقف ثم عاد ليقف أمامها ويبتسم، لتقول
"دعاء" بتوتر:

-حضرتك هتيجي عندنا امتي

رد "فارس" بسعادة: انهاردة لو حابه
هتصل بباكي وهاخذ منه معاد

تحدثت "دعاء" بسعادة ظاهرة وهي
تغادر بسرعة:

-بعد أذنك

وفي ثانية كانت تختفي من أمامه ليبتسم
ويتهد براحة ويهمس:

-سنلتقي قريباً دعائي وستصباحين لي
وحدي، أمي وابنتي وزوجتي العزيزة

عند البنات ركضت "دعاء" لـ "نور"
وعانقتها بفرحة شديدة وسعادة وصلت
عنان السماء، ورغم مشاكسة "نور"

وحكاياتها التي لا نهاية لها إلا أنها
مصدر الحنان لصديقاتها ورغم أنها
أصغرهم ولكنها تعرف جيدا متى تكون
عاقلة ومتى تكون مجنونة وفي اغلب
الاحيان هي مجنونة بالفعل، ربتت
"نور" عليها وقالت:

-مبروك مبروك يا قلبي

أبعدتها "جيهان" عنها وأردفت:

-سيبها عايزة احضنها أنا كمان

وهتفت "بسملة" بحماس وفرحة: وأنا
وأنا

ردت "نور" بمشاكسة: اقعدي أنتي يا ام
سيد على جنب

نظرت لها "بسملة" بتذمر:

-ام سيد في عينك يام أربعة وأربعين

تعانقوا الأربعة بسعادة بالغة ولكن هناك
مجنونة لن تترك الفرصة تضيع منها
هباءً، فاردفت "نور" بغمزة وقحة:

-بس هنتمسك آداب

دفعتها "دعاء" بعيداً عنها بضيق
وقالت:

-فصلتيني غوري يخربيت معرفتك

ضحكت "نور" واردفت بمشاكسة: هو
أنتي فون عشان افصلك

نظرت لهل "دعاء" بشر وقالت:

-بس يا "نور" بس يا حبيبي ارحميني

أردفت "جيهان" بحسرة وحرزن
مصطنع:

-هتودعي العزوبية قبلي يا بنت
المحظوظة

وقالت "نور" وهي تولول كما العجائز:

آه ياتي ياما يلي محدش عبرك يا

مسكينه هتعنسي بدري يا حزينه

هتفت "بسملة" بتسأل: يعني إيه عانس

يا "نور"؟

ردت "نور" بحنق: يعني فاتها القطر

ياختي

هتفت "جيهان" بمرح: تركب القطر

اللي بعده

أردفت "نور" وهي تنظر لـ "جيهان"

بضيق:

-اهي دي السخيفة بعينها

تدخلت "دعاء" تقول بجديّة: مفيش

حاجة اسمها عانس وفاتها القطر دي

كلمة ملهاش معني اخترعوها ناس

متخلفة، في حاجه اسمها قسمة ونصيب
ودي ارادت ربنا، يعني نصيبك هيجي
لما ربنا يريد

حدقت فيهم "نور" وقالت: اهو عاجبك
كدا فتحتلنا الفيلسوفة ومش هتسكت
غيرت "جيهان" الحديث وهي تقول:

-سيبكم من الكلام ده، وقولوا مين هيجي
معايا، أنا رايحة اشوف "حمزة" في
الدار

ردت "نور" عليه: أكيد أنا بس هتصل
بمama اقوله

هزة "جيهان" رأسها بنفي: لأ متقوليش
عشان هتروح تقولهم وأنا مش عايزة
حد يعرف

رغم أن "نور" لم تعتاد أن تخفي شيء
على والدتها ولكنها رضخت لها:
-طيب

واردفت "دعاء" بهدوء: بس أنا لازم
اقول لـ بابا

وقالت "بسملة" وهي تخرج هاتفها:
-وأنا كمان

نهضت "جيهان" وهي تشير لهم:
-ماشي بس يلا

كان يجلس "أشرف" بمكتبه يعمل ورن
هاتفه فرد وعندما أتى صوت الطرف
الآخر فوقف بقلق، وقال:
-إيه؟

صمت يستمع لطرف الآخر وقال: أنا
جاي حالاً

وأغلق الإتصال وقام بالاتصال بشخص
آخر واردف بجدية:
• جهز القوات حالاً

"دار الايتام"

ك طائر سجين تم إطلاق صراحة هكذا
كانت "جيهان" تتطلق بسعادة بالغة
تصل عنان السماء مع طفل بريء يحمل
من الخذلان ما يكفي، خذلان لا يناسب
أعوامه الأربعة، وقالت بمرح:

- "حزومي" أنت بتغش شيفاك مفتح
عنيك غمض يلا

أردف "حمزة" ببراءة وهو يضع يده
أعلى عينيه:

-مش مفتح

وعلى بعد صغير كانت "نور" تركض
خلف طفلة صغيرة وهي تضحك بشدة:

-امسك حرامي امسكيها يا "دودو"

ركضت "دعاء" خلفهم وهي تضحك:

-مش قادرة

و"بسملة" كانت تحمل طفل صغير
وترفعة للأعلى لتصدح ضحكاته تملئ
المكان

كان المكان يمتلئ بالبهجة ف الأربعة
صنعوا جو خاص بهن مليء بالسرور،
وملامح الأطفال تتبض بالسعادة ولكن
توقف كل شيء حينما دخل عليهم رجال

مقتعين يحملون السلاح الصمت عم
المكان والاطفال ينظرون لهم بترقب
وخوف شديد

ليحدث إحدى الرجال ١:

-كله يرفع ايده لفوق اي حركة هخلص
عليكم

صوته جعل الأطفال يبكون ويصخرون
بخوف وركضوا خلف المشرفات
والأربعة فتيات حاولوا بقدر الإمكان أن
يجعلوا الأطفال تهدأ

ليحدث حقير آخر ٢: لو سمعت نفس
هخلص عليكم واللي معها تلفون تطلعه
ومش عايز نكاه عشان مترحمش عليكم

ردت "نور" بتذمر: ده جاي يقلبنا

اخرج الجميع هواتفهم ما عدا انكى
اخوتها قالت:

-مش معي

وقفت كل فتاة وبجوارها مجموعة من
الأطفال لكي تهدئهم و"جيهان" تعانق
"حمزة" بخوف عليه وبجوارها طفلتان

تسالت "نور" بعصبية: أنتم مين؟
وعايزين إيه من الأطفال دي ويعني
سايبين الدنيا كلها وجاين عند الايتام
دول

رد شخص ثالث وهو الزعيم وبهدوء
مرعب:

-احنا عايزين حاجة من الحكومة
هيعلوها هتطلعوا سالمين غير كدا
قولوا على نفسكم يا رحمان يا رحيم

وأكمل بصوت مرتفع: دخلوهم كلهم في
أوضة وخلاكم مرقبينهم اي حركة
خلصوا عليهم

وبعد تنفيذ ما قال رن هاتفه بالرقم
المنتظر، ليرد بغرور:

- "أشرف" باشا يا مراحب وأنا أقول
التلفون بيرقص ليه اتاري اسمك منور
ع الشاشة

رد "أشرف" بغضب: عايز إيه يا حسن
الكلب؟؟

صدحت ضحكات "حسن" لتزيد جنون
"أشرف" وقال:

- عايز سلامتک يا باشا

أردف "أشرف" بغضب: ورب الكعبة
لدفئك التمن يا كلب وهوريك تلعب مع
مين

زادت ضحكات "حسن" وهو يقول:
الوقت مش في صالحك عشان تهدد
اخويا يطلع من السجن ويركب الطائرة
اللي مستتية وهنسحب غير كدا اترحم
على الشهداء

بعد صمت دام لدقيقة رد "أشرف":

-موافق بس لو لمست حد لدفنك مكانك

رغم تعجب "حسن" من رضوخه له
بهذه السرعة:

-معاك ساعة واحدة لو مكنش اخويا
خارج حدود البلد اترحم عليهم عشان
هفجر الدار بالي فيه

أغلق الهاتف في وجهه وهو يضحك:

-ووقعت يا "أشرف" ومحدثش سمي
عليك

اما "أشرف" كان يضرب في العربية
بجنون والقوات مازالت تنتظر إشارة
منه وهو اتصل باللواء وقال بهدوء رغم
غضب:

-ايوا يا فندم

تسأل اللواء بجديّة: عملت إيه يا
"أشرف" وعرفت مين اللي محتجزهم

رد "أشرف" بثبات: "حسن السيد": هو
اللي هناك عشان يطلع أخوه

أردف اللواء بتسأل: هتعمل إيه؟؟

رد "أشرف" بجديّة: هطلب من حضرتك
تطلع "حسين السيد" على مسؤوليتي

عشان أكسب وقت، وهدخل أنا الدار
لوحدي وبتعامل معهم والقوت هتستتي
بره

أردف اللواء بحدة: هطلع واحد مجرم
محكوم عليه بالإعدام

قال "أشرف" بهدوء: هيرجع وعلى
مسؤوليتي الشخصية يا فندم، بس
الأطفال مش ذنبهم حاجة عشان نخاطر
بحياتهم

قال اللواء: تمام يا "أشرف" هطلعه بس
أنت المسؤول قدامي

رد "أشرف": تمام يا فندم

اللواء: ربنا معاكم

في الغرفة المحتجز بها الجميع

أردفت "بسملة" بصوت منخفض:
هنعمل إيه؟؟

ردت "دعاء" بقلة حيلة: مش عارفة؟
قالت "بسملة" بقلق وهي تنظر لهم:
-أنا خايفة قوي

زجرتها "دعاء" بنظراتها وقالت:

-طب ما احنا كلنا خايفين مش شايفه
الولاد عاملين ازاي، فكري في حل
للمصيبة دي

أردفت "نور" باقتراح: احنا كل واحدة
تدور على حاجة ونقف وراء الباب
ونصرخ وكل اللي يدخل نضربه

حدقتها "دعاء" بنظرات ساخرة: بس
ياما عبط دول معهم مسدسات لو عملنا
أي حركة هيقتلونا

جلست بجوارهم وهي تقول: طيب
هنعمل إيه؟

ثم وجهت كلامها لمن تحتضن الطفل
بصمت غريب عليهم:

- أنتي يا زفته يعني محدش سامع صوتك
يا سبب المصايب

ردت "جيهان" بضيق: بس يا "نوره"
عشان مش فيقالك خالص

ردت "نور" بضيق مماثل: يعني مش
أنتي اللي جيبنا هنا

أردفت "جيهان" بضيق وقد أوشك
صبرها على النفاذ:

- والله مضر بتكيش على ايدك اهدي لما
أفكر هنعمل إيه؟

هتفت "نور" بغیظ: هدينا لما نشوف،
تعالوا يا عيال نغني ونلعب مفيش حد
واخذ منها حاجة

جلست في منتصف الغرفة وجلس
الأطفال بجانبها والمشرفات ينظرون لها
بصدمة وأصدقائها بيأس من تصرفاتها،
وأردفت "نور" بلا اهتمام:

-يا عيال أنا هغني وأنتم صقفوا ماشي
رد الأطفال بحماس في صوت واحد:

-ماشي

بدأت "نور" في الغناء بحماس وكأنها
في نزهة:

سكر محلي محطوط على كريمة كعبك
محلي والعود على القيمة ...

وتجيني تلقيني لسه بخيري مش هتبقي
لغيري ايوا أنا غيري مفيش...

بنت الجيران شاغلالي أنا عنيا وأنا في
المكان في خلق حوليا مش عايز حد
ياخد باله من اللي أنا فيه...

شوفت القمر سهرني لياليا وهموت
عليكي ربي العالم بيا سيبي شباكك
مفتوح ليه ليه تقفلي ...

بهوايه أنتي قاعدة معايا عنكي ليا
مراية يا جمال مراية العين...

خليكي لو هتمشي أنا ليكي أنتي ليا أنا
ليكي احنا الاتنين قاطعين...

تسبيني أكره حياتي وسنيني واتوه
ومش هلقيني واشرب خمور وحشيش

...

وتجيلي تلقيني لسه بخيري مش هتبقى
لغيري ايوا أنا غيري مفيش
تحدثت أحدى المشرفات وهي تنظر لها
بعدم تصديق:

-هي صاحبكم مالها

ردت "دعاء" بابتسامة: هي كدا

قالت "بسملة" بتفكير:

-هو في حد ضرب البت "نور" على
دماغها وهي صغيرة

ردت "دعاء" بتعجب: معرفش بس ليه؟

أردفت "بسملة" ساخرة وهي تشير
عليها:

-اصل مش معقول دي واحدة مخطوفة،
دي اللي يشوفها يقول طالعها رحلة

كانت "نوى" تغمز لـ "جيهان" لكي
تسير جنونها فصرخت "جيهان"
بعصبية:

-بسسسس

وبسبب ارتفاع صوتها ولج أحدى رجال
العصابة وقال بغضب:

-مين اللي بيغني؟

أشار الجميع على "نور" التي قالت
بسخرية:

-والله يا جماعة مش عارفة اقول إيه؟
انتم أكثر من أصحاب عايزين تتحملوا
نتيجة غلطي، لا طبعاً لا يمكن

ردت "بسملة" بمرح: عيب يا راجل
متقولش كدا احنا أهل

بصفت "نور" على الأرض وقالت:
وطيه

الشخص ١: عارفة لو سمعت نفس كلب
هقتله

ردت "نور" بمرح ولا مبالاة: طيب
الحمد لله مقلش "نور" اغني براحتي
تقدم منها أحدهما بغضب لكي يصفعها
على وجهها اسرعت الفتيات ليقفوا
امامها، وردت "دعاء" بعصية:

-أنتم قلتم مش هتلمسوا حد وهي
معملتش حاجة دي بتسكت العيال

الشخص ٢: سييهم دول اغبياء طالما
محاولوش يعملوا حاجة يبقي خلاص
وخرجوا واغلقوا الباب خلفهم، لتقول
"نور":

- يلا يا عيال نكمل هالها ااااا حد فيكم حافظ

حاجه لـ "مسلم" نغنيها سوا

فرد أكبرهم صاحب الاثني عشر عامًا:

-مين "مسلم" ده يا أبله

ردت "نور" بصدمة مصطنعة: هو في

حد ميعرفش "مسلم" وكمان ابليه دأنت

غلبان ياض

قالت "بسملة" بسخرية: ليه هو فاشل

زيك

ردت "نور" ساخرة: ملقيش دعوة يا

بتاعة "عمرو حسن" و "فارس

قطرية"

جلست "جيهان" و "دعاء" على الأرض

ووضعوا ايديهم فوق رؤوسهم و "نور"

تغني لتنضم لها "بسملة"

"في منزل فارس"

خطى إلى الداخل بابتسامة وفرحة لا
تصف ليجد الجميع يجلس يشاهد التلفاز
ليلقي "فارس" السلام:

-السلام عليكم ورحمة الله وبركاته

رد الجميع التحية: وعليكم السلام
ورحمة الله وبركاته

أردف "فارس" بمشأغبه: دكتورنا
وصل يا هلا وغلا بالبدلة الغالية ام
١٥٠ جنية

رد "فارس" عليه وهو يجلس بجوارة:

-بس يا عشوائي هو انا ذيك

نظر له بضيق وهو يصيح به: العشوائي
ده طالع الأول على الدفعة هو أنا فاضي
اروح اجيب اكل حتى، مش زي ناس

كانت بتخرج ليل نهار ولا كان وزير
التعليم أبوه

ضحك "فارس" وهو يعانق أخيه بحب:

-أحلى عشوائي في الدنيا بس يا باشا
عيش حياتك الأيام بتمر والعمر لحظة لو
قضيته وسط الكتب مش هتلاقي حاجة
تضحك عليها لما تكبر، خير الأمور
الوسط يعني المفروض انك تخلي يوم
الخميس بريك تخرج وتتفسح مع
صحابك وتعيش حياتك بس بدون ما
تتخطى حدودك واظن فاهمني

رد "مارس" بجديّة وقد علم مقصد
أخيه:

-فاهمك يا دوك

ابتسم له "فارس" ثم نظر لـ أبيه وهو
يخبره:

-بابا انا قررت اخطب

ابتسمت "روبين" بحماس وهي تقول:

- "مرنا" صح كنت عارفه...

قاطعها "فارس" بنفي تام: لا طبعاً

"مرنا" مين دي؟؟ أنا هتجوز "دعاء

مصطفى" طالبه عندي في الكلية

هتفت "روبين" بغضب: نعم

تسأل "فارس" بجدية: في إيه يا ماما؟

أردفت "روبين" بعصبية: وأنا مش

موافقه

نظر لها "فارس" بثبات وتساءل بهدوء:

-ممكن اعرف ليه؟

هتفت "روبين" بعصبية: أكيد ضحكت
عليك أنا عارفه الاشكال دي كويس
رد "فارس" بحدة غير مقصودة: ليه
شايفاني صغير؟

كادت أن ترد لولا زوجها: في إيه يا
"روبين" هو حر يتجوز اللي تعجبه
ملكيش انك تدخل في اختياره

ردت "روبين" بغضب اعمى: لأ ليا،
وأنا مش موافقه على الجوازة دي

قال "فارس" بهدوء ولا مبالاة: أنا
كلمت ابوها واخذت منه معاد بكرة
هنروح عندهم

حدقت فيه "روبين" وهتفت بعصبية:
-والله امال جاي تقولنا ليه تأدية واجب
وخلص

ظهرت شبه ابتسامة على وجهه
"فارس" وقال:

-لأ طبعاً يا ماما انتم الخير والبركة
نهضت "روبين" لكي تغادر: بعد إيه يا
حبيبي تتهنئ بيها

قام "مارس" ليعانق أخيه: مبارك يا
حب

ربت "فارس" عليه وقال: الله يبارك
فيك يا حبيبي

تحدث والده بهدوء: مبروك يا بني
هنروح لناس امتي

ابتسم "فارس" وقال وهو ينظر لآبيه:
-الله يبارك فيك يا بابا، بكرة العصر إن
شاء الله

رد والده بحب: إن شاء الله يا حبيبي

همس "فارس" بحب: أقترب اللقاء
دعائي الغالية.

«لنرى كيف يمكن للأصدقاء الأربعة
التصدي أمام الاعداء»

"نلتقي في البارت السادس إن شاء الله
من رواية أربعة تساوي واحد"

الفصل السادس

♡اتمنى أدخل الجنة لكي أذهب لسيدة
هاجر وأسألها أزاي قدرتي تقعدني
لوحدهك فى الصحراء من غير حد
يحرصك إزاي كان عندك كل الصبر ده♡

تسلل "أشرف" للدار بطريقة الخاصة
ويسير فى الممرات بهدوء رهيب كان
يبحث هنا وهناك ليرى الأطفال يريد
الاطمئنان عليهم أولاً وبعد ذلك كل شيء
هين

دخلت الدكتوراة "هاجر" مكتب
"إبراهيم" بخطوات هادئة لا تخلو من
الثقة المنبعثة من خطواتها قبل عينيها

أتت لتزف له الأخبار الغير سارة بالمرّة،
فقالت:

-دكتور "إبراهيم" أنت سمعت اللي
حصل

رفع "إبراهيم" نظرة لها ثم عاد لما
يفعل بلا اهتمام:

- لأ

تحركت "هاجر" تقترب منه لتقوم
بتشغيل فيديو من الهاتف الخاص بها:

-في عصابة اقتحمت دار الايتام
ومحتجزين الأطفال رهائن وكمائن
الشرطة هناك

تناول "إبراهيم" منها الهاتف ليسمع ما
يقال بصدمة:

-إيه؟؟؟ ازاي؟ ومن امتي الكلام ده؟؟؟

ردت "هاجر" وهي تنتظر لساعة يدها:

-من ساعة كذا

التقط "إبراهيم" الجاكت الخاص به

ليرتدية وهو يتحرك للخارج

تسألت "هاجر" بتعجب: هو أنت رايح

فين؟

رد "إبراهيم" قبل أن يغادر: الدار لازم

اروح الدار "رحيم" في خطر

ما زالوا يجلسون كما هم منذ ساعة

تقريباً والصمت يخيم عليهم إلى أن

قاطعت الهدوء "جيهان" وهي تصيح

بهم:

-جاتني فكرة

تسألت "دعاء" بتركيز: فكرة إيه؟

ردت "جيهان" وهي تشير إلى النافذة:

-أنا هنتظ من الشباك ده للاوضة الثانية
وادخل واشوف حاجة امسكها في ايدي
واضرب الراجل اللي واقف قدام الباب
وافتحلكم ونربطه وكل اللي يجي نعمل
كده

أردفت "دعاء" بنفاز صبر:

-لأ طبعاً "نور" قالت نفس الفكرة واحنا
مش موافقين تعرضي نفسك للخطر
اصبري واكيد البوليس هيتصرف

ردت "جيهان" باصرار: سببها على الله

احنا لازم نعمل حاجة مينفعش نفضل كدا

قالت "نور" بجدية: وأنا جايه معاك

ردت "جيهان" بسخرية: ريحين فرح

أردفت "نور" بعند: مـيش فيـه رجلي

على رجليك

تدخلت "بسملة" تقول بضيق وخوف

عليهم:

- أنتم مجانين صح لا أنتي ولا هي

هتروحوا مكان

أبتسمت لها "جيهان" وقالت لكي

تطمئنها:

- متقلقيش يا "بسملة" مش هيحصل

حاجة

ثم نظرت لـ "نور" وقالت: يلا يا آخر

صبري

"جيهان" كانت تعلم أن "نور" عنيدة

ولن ترضى أن تتركها تذهب بمفرده

لذلك وافقت دون نقاش، لتقول "نور"
بمرح:

-بدأت المتعة يحيا العدل

أشارت "جيهان" لصغير: "بسملة"
خلي بالك من "حمزة" لو حصله حاجة
هقتلك سامعه، وغني أنتي مكان "نور"
عشان محدش ياخذ باله

ردت "بسملة" بتذمر منها: هو احنا كل
اللي فيه ده بسببك وبسبب الأستاذ
"حمزة"

رفعت "نور" يدها للأعلى وقالت بمرح:

-لن أتأخر يا سادة، بت يا "بسملة"
هسلمك المهنة لحد ماجي

ردت "دعاء" بضيق من تصرفاتها:

-العقل زينة ربنا يرحمك برحمته

قالت "نور" : أنتِ هتفولي علينا ولا إيه

وأكملت حديثها بمرح:

- ممس راجع يا بلد ممس راجع يا مصر

سحبتها "جيهان" من يدها بعصبية:

-اخلصي ياختي

صعدا الاثنان على المكتب المجاور

لشرفة وهبطوا للغرفة المجاورة بهدوء

خشيت من أن يعلم أحد بهم، لتقول

"نور" بهمس وهي تنفض ثيابها:

-هنعمل إيه؟

وقبل أن ترد عليها انتبهوا لصوت

خطوات يأتي من الخارج ويقترب من

الباب، فقالت "جيهان" بهمس:

-بس اسكتي في حد جاي تعالي بسرعة

جلسا الاثنان بجانب خزانة قريبة، وقالت
"جيهان" بنبره خافته:

-هنشوف لو واحد لوحدة هنطلع نضربه
بالحديد دي

اشارت إلى قطعة حديد صغيرة رأتها
وهي تجلس، وعادت تقول:

-ولو أكثر يبقي نستني نفكر

أردفت "نور" بهمس: ماشي

ولج احدهم بخفة بعدما فتح الباب برفق
كأنه لص وكان يرتدي زيّ أسود وهو
يضع قبعة الجاكت فوق رأسه، فهمست
"نور":

-واحد بس

ردت "جيهان" بهمس مماثل: طيب يلا

بس من غير صوت لحسن ياخذ باله

جذبت "نور" منها القطعة المعدنية
وهتفت:

-أنا اللي هضربه

جذبتها منها "جيهان" بعند: لا أنا اللي
لقيت الحديدة

ردت "نور" بتصميم أقوى: بس أنا اللي
هضرب مليش دعوة

قالت "جيهان" بنفاد صبر: "نوره"
مش هنتخانق أنا اللي هضربه

لم تهتم "نور" بما قالت وهي تسحب
منها الحديدة وقالت:

-قولت أنا ويلا

خرج الاثنان من جانب الخزانة بهدوء
وقبل أن ترفع "نور" يدها كانت قبضته

تعصر يدها بقوة أمتها وهو يقترب منها
ويهمس بجوار أذنها بشر:

- لو حد تاني هو اللي دخل كنتي من
أعداد الموتة دلوقتي

في الخارج

أردف أحدى الرجال: الطيارة لحد
دلوقتي متحركتش

نظر "حسن" في ساعة يده: باقي ١٠
دقايق لو متحركتش خلصوا على كل

الموجدين

تسأل أحد الرجال الذين يحملون سلاح:

- هو النمر ممكن يلعب معنا

بسمة ثقة انارت وجه "حسن" وهو
يقول:

-مظنش هيخاف على العيال اللي هنا،
اصل بعيد عنك هههههههه قلبه أبيض
مش زينا

تسأل نفس الشخص: بس النمر مش
سهل معقول يستسلم بسهولة

رد "حسن" بخبث: اللعبة لسه في اولها
هو هينشغل بينا وأنا هدفي الأساسي
بيته انا عايز أحرق قلبه ولحد ما يرجع
هيكون بيته بقي كوم تراب هههههههه
هههههههه

شخص ١: مكذبش اللي قال عليك ثعلب
تعاليت ضحكات "حسن" بغرور ولكنه
أخطى هذه المرة

"في منزل فارس وبالأخص بغرفة
مارس"

يجلس أعلى الفراش وبجوارة مجموعة
من الكتب وهو يتابع قراءة كتابه بتركيز
شديد وبالقرب منه يجلس صديقة على
المقعد الخاص بالمكتب وهو يتابع إحدى
المحاضرات على الابلاب توب وعلى
الاريكة يجلس اخر يدون شيء في
النوته

الكل يتابع ما يفعل بتركيز منذ ساعات
إلى ان قال "مارس" وهو يتحرك بتعب
واضح:

-أخيرًا

نظر له صديقة بتعب وهو يقول:

-أنا كمان عشر دقائق واخلص واروح

بقي عايز أنام

تحدث "مارس" بعد تفكير في حديث

أخيه:

-تعالى نخرج شوية نشم هوه

نظر له اصدقائه بصدمة هل يعقل

"مارس" يطلب الخروج وهو من جعل

حياتهم تتراوح بين الدراسة والعمل

والمنزل ورغم ان الثلاثة لا يحتاجون

للعمل لأن عائلتهم ميسورة الحال...

اخبرهم ذات مرة ان الرجل لا يجب ان

يعتمد على رجل مثله وانه يجب ان

يتعب ليعلم كيف يصرف ماله دون

اسراف أو تبذير... ويومها بحث الثلاثة

عن عمل إلى ان وجدوا فمنهم من عمل

حارس أمن ومنهم عمل دليفي لخبرته
في قيادة الدراجة وهو عمل مقدم طلبات
في إحدى المطاعم ومازلوا مستمرين
في عملهم ورفض كلاً منهم العمل مع
والدة لكي يعتمدوا على أنفسهم أولاً
وهذا ما حدث منذ عمان أو بالضبط بعد
انتهاء اختبارات أتمام الثانوية العامة

أقرب منه "ربيع" وهو يضع يده على
جبينه ليتفقد درجة حرارة أن كان
مريض:

- غريب شكك كويس مش فاهم أنا
سمعت صح ولا غلط

انطلقت ضحكات "مارس" تعم المكان
ليتعجب أصدقائه مما يحدث معه
وعلامات الدهشة واضحة وضوح

الشمس ليهدأ قليلاً وياخذ شهيق وزفير
ويخبرهم ببساطة:

-معكم حق تستغربوا بس احنا بقالنا
سنتين مخرجناش مع بعض رغم ان
احنا ديمًا مع بعض بس ياما بنذاكر او
بنخرج نبحث على معلومات محتاجينها
في الأبحاث ولما بنجوع بنروح المطعم
اللي شغال فيه وبناكل وكل واحد يروح
شغله حتى في الاجازة مش بيتغير حاجة
من الشغل للبيت وكل يوم نروح بيت حد
فينا نقعد كل واحد في جنب وفي ايده
كتاب بيقرأ ولما يخلص يقلنا فهم
واستفاد أيه

واكمل حديثه بعدما نظر لأصدقائه
وعلامات التعجب ما زالت:

-اللي بنعمله مش غلط بالعكس
المعلومات اللي عندنا معتقدش ان حد
تاني ممكن يوصلها بسهولة غير اللغات
اللي اتعلمناها في فترة قصيرة وتفوقنا
في الاختبارات بس الحياة برضوا مش
كدا لازم على الأقل يكون في يوم اجازة
نستريح فيه من تعب الأسبوع نخرج
نشم هوا ونتغدا ونضحك ونهزر ذي
البشر الطبيعيين ومن غير ما نغضب ربنا
ولا نتعدى حدوداً

صمت قليلاً ليري ردت فعل أصدقائه،
ليتحدث "فادي": معك حق والله -

-المفروض فعلاً نأخذ بريك بعد كل التعب
ده انا خلاص شوية وهفصل نور ومياه

وجلس بجوارهم على الفراش، تحدث
"ربيع" هو الآخر: خلاص طالما اتفقتنا
نشوف يوم فاضي عندنا في الأسبوع
ونخرج فيه

اقترح "مارس" عليهم: ممكن الخميس
معدناش محاضرات

أردف "فادي" بهدوء: بس عندنا شغل
رد "ربيع" بجديّة: خلاص يبقى الجمعة
بعد الصلاة نطلع ونروح المكان اللي
عايزينه

قال "فادي": ونأخذ معنا الك...

قاطعه "مارس" وهو يعلم ما سيقول
صديقة، هذا مدمن الكتب لقد نسي في
ثواني أنه متعب ويريد البريك:

-لأ يا حبيبي من غير كتب احنا هنطلع
عشان نشوف الناس مش نقراء في
الهواء الطلق زي ما انت بتفكر
أردف "فادي" بضحك:

-هحاول أصل متعودتش اخرج من غير
ما يكون معايا كتاب
قال "مارس" بجدية: اتفقنا

رد "ربيع" وهو ينهض: اتفقنا ويلا يا
"فادي" نروح عشان تعبت
نهض "فادي" هو الآخر وقال بمرح:

-يلا سلام يا "ميمو"
حدقه "مارس" بضيق فهو لا يحب
اسمه:

-احترم نفسك يا ض، الله يسامحك يا ماما
على ذوقك في الاسماء

غادر أصدقائه وعاد ليستلقي على
الفراش لتقع عينه على ورقة صغيرة
على الحائط مدون عليها "اطلبوا العلم
ولو في الصين" ابتسم وراح في ثبات
عميق

ترك "أشرف" يدها لتسقط أرضاً، لتقول
"نور" بألم:

- آه يا ابن المفترية يكش يقتلوك ونخلص
منك

تسأل "أشرف" بعصبية ونبرة
منخفضة:

- انتم بتعملوا إيه هنا؟

ردت "نور" بسخرية: بنتفسح

نظر لها "أشرف" بشر: أقسم بربي لو
متكلمتيش عدل لكون أنا مخلص عليك
ومريح البشرية منك ومن لسانك
ردت "جيهان" ببرود: احنا فكرنا أن حد
من العصابة هو اللي دخل
رد عليها بسخرية: أنا من رأيي
متفكروش تاتي وبعدين بتعملوا إيه هنا؟
وفين باقي الناس المحتجزة؟ والاطفال
حد حصلوا حاجة
إشارة "جيهان" على النافذة:
- هنا، وأنا و"نوره" جينا عشان نضرب
العصابة ونحاول نطلع
أشار إليهم بسخرية لأذعة: انتم تقدرنا
على الرجالة اللي بره دي

وصعت "نور" يدها في خصرها وهتفت
بتشنج:

-ومالك مستقل بينا كدا ليه إن شاء الله؟

هتف "أشرف" بحدة: وطي صوتك كان
لازم اتوقع انكم هنا أنتم الاتنين كوارث
متحركة

نظرت له "نور" بتذمر وقالت بضيق:

-هنعمل إيه دلوقتي؟

وصلهم صوت يقترب فقال "أشرف"
بهمس:

-هششش في حد جاي

تسأل "نور" بعدم فهم: ايوه يعني
هنعمل إيه؟

وضع "أشرف" يده على وجهه بيأس
وقال:

-يارب صبرني

قالت "جيهان": يلا نرجع مكانا لحد ما

يجي وأنا اللي هضرب كل واحدة دور

ابتسمت "نور" بحماس: ماشي يلا

نظر "أشرف" للأعلى وهو يتهدد

بضيق:

-لا بجد مش معقول أيه ده؟ دول كتر

خير اهلهم والله انههم مسـتـحملين

الكوارث دي

وعاد يقلد صوت "نور": بس أنا اللي

هضرب مليش دعوة، هيلعبوا مين

يضرب الأول استغفر الله

تسحب ليقف خلف الباب وحينما ولج

الرجل لداخل وقبل أن يستوعب ما حدث

كان يسقط مخشى عليه بسبب ضربه

فوق رأسه، تقدمت "نور" منه فطرفت
يدها بالأخرى بحماس شديد:

-شاطر

وضع "أشرف" إحدى أنامله على فمه
كي تصمت:

-هشش يخربيتك اسكتي

ردت "جيهان" بغباء وهي تشير على
السلاح: بت يا"نوره" ده معا مسدس

أردفت "نور" بنفس الغباء: اه صح أنت
جبت المسدس ده منين؟ اوع تكون
سارقة ولا تكون تبع العصابة وجاي

تقتلنا

وضع فواهة المسدس فوق رأسه وقال
بعصبية:

-أنا هقتل نفسي وارتاح من كمية الغباء

اللي عندكم

أخفصت "نور" يده وهي تقول بحنق:

-هتصوت كافر حرام عليك

زجرها بعينيه وردد:

-حرام عليكى أنتِ، عارفة لو سمعت

نفس واحدة فيكم هخلص عليها واريح

البشرية منها سامعين

قال آخر كلامه بحدة لتجعلهم يهزوا

رأسهم بمعنى حاضر، ليقول "أشرف"

بهدوء:

-لفوا وشكم الناحية الثانية

ردت "جيهان" بدون تفكير: ليه عايز

تهرب؟

وضع "أشرف" يده على رأسه بقلّة
حيله:

-يارب صبرني، عشان هاخذ اللبس ده
واشار لـ رجل الممدد على الأرض وقال:
-والبسّه عشان اقدر اتحرك فى الدار من
غير ما حد يشك فيا

قالت "نور" بهدوء: ماشي

نظروا بعيد وأغمضوا أعينهم إلى أن
قال:

-يلا

قالت "نور" بإعجاب: الله شككك حلو في

لبس الحرامي ألبسه على طول

ابتسم "أشرف" بيأس: حاضر عايزة

حاجة تاني

ردت "نور" بتفكير: لا مش فاكرة

قال "أشرف" بتحذير: اخلصي أنتي
وهي مفيش وقت، أنا هطلع وأنتم خلكم
هنا عشان ميحصلكمش حاجة ومحدش
فيكم يتحرك

ردت "نور" ببرود: بص يا باشا هنتعب
نفسك في الكلام وبرضوا هنطلع معك
يبقي وفر كلامك ويلا

نظر لـ "جيهان" لتهز رأسها بمعنى
اوافقها الرأي، ليقول "أشرف" بنفاد
صبر:

-يلا

خرجوا الثلاثة ووضع كاتم صوت
للسلاح وكل من يعترض طريقة يلقي
الموت إلى أن سمع صوت يبغضه كثيراً

-كنت عارف أن النمر مش هيستسلم
بس هولة ارمي اللي في ايدك يا نمر
عشان مخلصش عليهم

نظر له فرأى رجلين يضعون السلاح
على رأس الأطفال، ألقى ما بيده وركلوا
بعيدًا عنه وقال:

-طول عمرك مش راجل يا "حسن"
دايما كنت بتحمي في الأطفال والنساء
وعمرك ما اتحميت في دراعك

صدمت ضحكات "حسن" بسخرية:
وأنت لسه زي ما أنت عامل فيها النمر
بس لو أنت النمر فأنا الثعلب

رد "أشرف" وهو ينظر بعيدًا:

-بس النمر عمره ما تهزم

وفي نفس اللحظة كان يعطي إشارة لـ
"نور" بعينه أن تدخل الأطفال الغرفة
المجاورة لهم بعد أن تركهم الرجال
وتقدموا من "أشرف"

لكم الرجل الذي يمسك به بقوة اطاحت
به وركل الآخر الذي يضع السلاح على
رأسه وفي ثواني معدودة كان يقرب زمام
المعركة لصالحة فهو لم يكن ضابطاً
عاديّاً أبداً، أستغل "حسن" الحرب الغير
متكافئة بين النمر ورجاله وكاد بالهرب
ولكن النمر قد لاحظ ذلك لينال منه طلقة
نارية بقدمه لتصدح صرخاته في المكان
لتأتي القنارات ويتم القبض عليه
خرج الجميع من الغرف لتتظر "نور"

و"بسملة" و"جيهان" لبعضهم
ليبتسموا وهم يهملوا بالغناء:

-مصر مصر مصر والله وعملوها
الرجالة ورفعوا راس مصر بلدنا ووقف
وقفنا رجالة مبروك لمصر
ولولدها... الكل طائر من الفرحة ومصر
لبسالنا الطرحه يارب ديمنا من الفرحة
متحرمناش

قالت "جيهان": "نوره" غني النمر
غنة "نور":

-النمر أول ما بيظهر يخض واللي يقف
قصاده يجيبه الارض...كله بيتلبش من
دخلته صاحب هيبه وعارف سكته عنده
قوة تسوق بشريه واللي يمسه ده
مالهوش ديه...مفيش حد قصاده يسد

كانت جميع المشرفات تنظر لبعضهم
بصدمة هل هؤلاء جيل المستقبل؟ هل
هم فتيات ناضجات؟ يوماً ما سيكونوا
أمهات المستقبل ويخرجنا من تحت
أيدهم جيلاً ناضجاً، هؤلاء لا يناسبهم
سوى مشفى الأمراض العقلية

تحدث "أشرف" وهو ينظر لهم بصدمة:

-دول افضل مكان ليهم مستشفى
المجانين

ورأى "دعاء" تقف وهي تنظر لهم
بيأس من أفعالهم الطفولية اقترب منها
وهو يهمس لها بصوت مسموع:

-هو أنتي مش زيهم ليه

أبتسمت "دعاء" وهي تجيب: هما
مجانين اه بس طيبين خالص والله

رد "أشرف" بهدوء: باين عليهم

دخل "إبراهيم" خلف القنات وكان

يبحث بعينه عنهم وحينما رآته

"جيهان" اقتربت منه وهي تحمل

"حمزة" فقال "إبراهيم" بأستغراب:

-أنتي بتعملي إيه هنا؟

ردت "جيهان" وهي تربت على

الصغير:

-جيت اشوف "حمزة" وبعدين جات

العصابة على حظي كانت مستتياني،

وبعدين جه الكابتن وقبض عليهم

استنشق "إبراهيم" براحة فقد اطمئن

قلبه:

-الحمد لله انكم بخير هاتي "رحيم"

-اسمه "حمزة"

- لأ "رحيم" أحلى

ردت "جيهان" بعند: قلت "حمزة"

ابتسم "إبراهيم" وقال بعند مماثل وهو

يحملة منها:

- وأنا قلت "رحيم"

أتت عائلتهم الأربعة بعد علمهم بالخبر

فاقترب "مصطفى" والد "دعاء" من

ابنته ليعانقها بحب وخوف:

- أنتِ كويسه يا حبيبتى

ردت "دعاء" بحب: ايوه يا بابا الحمد لله

ابتعد "مصطفى" عن ابنته ونظر لها

بحنان:

- كنت هموت لو حصلت حاجة

ردت "دعاء" بلهفة:

-بعد الشر عليك يا بابا ربنا يحفظك ليا
وميحرمنيش منك أبداً

ابتسم "مصطفى" وهو يربت على
حجابها:

-ويحفظك ليا يا حبيبتى

نظرت "نور" لـ "جيهان" وهي تهمس
بنبرة شبه باكية:

-بصي الابهاات ولا بلاش يلا ملناش في
الطيب نصيب

تقدمت ام "بسمة" من ابنتها لتصفعها
على وجهها من تهورها ثم جذبتها
لاحضانها بقوة وهي تقول بكاء:

-حبيبتى أنتِ كويسه

ردت "بسمة" وهي تبادلها العناق:

-الحمد لله يا ماما انا كويسه متقلقيش

أردفت "حورية" بعدما ابتعدت عنها
ونظرت لها بتفحص:

- حد عمك حاجة

وضعت "بسملة" يدها على وجنتها
وقالت:

- لأ يا ماما محدش لمسني ولا كلمني
بس أنتِ ايدك ثقيله أوي

ضحكت "حورية" ثم جذبتها مرة أخرى
لاحظانها:

- طيب الحمد لله

تقدم "علي" من ابنته وهو يشير لزوجة
بالابتعاد:

- اوعي كدا عايز اطمنى على بنتي

عائق ابنته وهو يقبل جبينها:

- ربنا يحفظك ليا يا قلبي من كل شر

اتسعت ابتسمت "بسملة" بحب:

ويحفظك ليا يا بابا

قالت "نور" بضيق: اسنتي ابوكي

هيجي يولع فينا بسببك

وقبل أن تنطق بحرف كان "عثمان"

والد "جيهان" يتقدم منهم بغضب وقال:

-انتم الاتنين عايزين موتكم

ردت "جيهان" بهدوء اقرب للبرود: ليه

يا بابا عملنا إيه؟

نظر لها بشر ثم تهدد وهتف بضيق

بعدها نظر على من حوله:

-ولا حاجة يا مصيبيتي السودا

قالت "نور" بهدوء: يا خالوا احنا...

قاطعها "عثمان" بعصبية:

-اخرسي أنتي كمان، أنا هريكم من
جديد لأنني تعبت منكم

نظرت "نور" للبواب الخارجي لتجد
والدها يتقدم إليهم لتهمس لنفسها
بسخرية:

- اهي كملت

أردف "المهدي" بسخرية بعدما اقترب
منهم:

- "نور" هانم إيه متعبتيش؟ دا الشهر ده
عماله حوالي عشر مصايب مش كفاية
كدا

دافعت "نور" عن نفسها بقولها: وأنا
مالي يعني مدافعش عن حقي ولا إيه؟
رد "المهدي" بسخرية:

-لا ازاي ودي تيجي برضو يبقى مش
"نور"

ردت "نور" بمرح: شفت

هتف "المهدي" بنفاد صبر: امشي
قدامي ياخر صبري

وقبل ان تغادر نظرت "نور" إتجاه
"أشرف" لتجده ينظر لها نظرات لا تعلم
ما معناها لكنها ابتسمت له وغادرت اما
هو فكان يبتسم بانتصار لانها رضخت له
وارتدت ثياب فضفاضة بعض الشيء فقد
كانت ترتدي فستان متسع باللون الازرق
الفاتح وحجابها يخفي خصلات شعرها
بالكامل، تنهد ببسمة هادئة ثم تحرك إلى
وجهته...

«قد لا أكون رفيقة موعدهم الأول، أو
حبك الأول، ولكنني أريد أن أكون
الأخيرة»

الفصل السابع

♡ اتمنى أدخل الجنة عشان أذهب لسيدنا
عثمان بن عفان وأسأله أزاى قدرت
تختم القرآن في ركعة واحدة وأنا لما
بقراً صورة كبيرة شوية بتعب أزاى أنت
كدا نفسي أبقي زيك♡

"في منزل إبراهيم"

يجلس بجوار صغيرته يتابع معها
مسلسلها المفضل ولكنها كانت تنظر له
من حين إلى آخر بتردد إلى أن قالت
بنبرة خافته:

- "إبراهيم؟"

رد عليها "إبراهيم" كعادة بابتسامة
حنوانه:

- عيونه

أردفت "حنان" بارتباك وهي تضغط
بيدها على المقعد:

- عايزة...-

نظر لها "إبراهيم" باهتمام وقد لاحظ
ارتباكها فقال:

- أنتِ توأمري يا "حنون" قولي عايزة
إيه؟ وساعة زمن هيكون عندك

نظرت له "حنان" بهدوء وهي تفكر في
التراجع خوفاً من غضبه؛ لكنها تريد أن
تذهب لذلك هتفت بشجاع بعدما حسمت
أمرها: المدرسة مطلعة رحلة واصحابي
كلهم طالعين وأنا...-

قاطعها بنبرة لا تقبل النقاش:

- مستحيل أنتِ مش هتروحي مكان من
غيري، لو عايزة تروحي مكان معين في

الإجازة نروح مع بعض لكن وحدك،
أنسي

ردت "حنان" بحزن: يا "إبراهيم" كل
اصحابي رايعين وأنا نفسي اروح معهم

زجرها "إبراهيم" وهتف بحدة: أنا قلت
كلمة وخلصنا يلا روعي ذاكري

تركته ورحلت بخيبة أمل كانت تظن أنه
سيوافق لأجلها، رأتها عمتها وهي

تتحرك إلى غرفتها بحزن فقتربت منه
وتسألت: ليه يا بني كدا كنت سببتها

تروح مع أصحابها

أردف "إبراهيم" بحزن لم يستطع
أخفائه:

-يعني أنتِ مش عارفة ليه يا عمتو

جلست بجواره وربتت عليه بحنان
وقالت:

-ده قضاء وقدر يا بني

قال "إبراهيم" بخفوت: ونعم بالله

وغاب في شرود قصير ليرحل بروحه
الضائعة إلى الماضي الحزين وبالتحديد
من خمس أعوام وفي اليوم الذي تم
تعيّنه في المشفى كان عائداً لمنزله
كالفراشة تحلق بين الأزهار بسعادة
بالغة هكذا كان هو سعيد للغاية وأخيراً
بعد عناء أعوام نال حلمه بين يديه ولكن
قاطع كل هذا صدح رنين هاتفه ليرى
اسم أبيه ينير شاشته، ليصيب بلهفة وهو
يخبره على الفور أنه تم تعينه أخيراً،
ولكن الرد عليه كان قاتل أن أباه تعرض

لحادث سير بصحبة والدته العزيزة
وعندما وصل علم أنهم غادروا الحياة،
وكان عائلتهم السعيدة اصابتها لعنة وكل
هذا لأجل رحلة كان بها أخاه الأصغر
وآتى اتصال لوالده ليخبروه أن ابنه
سقط من اللعبة وأن قدمه تأذت ليذهب
هو وزوجته للمشفى التي انتقل لها ابنه
وقبل أن يصل انقلبت السيارة رأسًا على
عقب ولم تصب اللعنة والده ووالدته فقط
ولكن بعد يومين غادر أخاه الحياة بسبب
الصدمة التي تعرض إليها حينما علم
بوفاة والديه ومن يومها إلى الآن لم
يتبقى له سواً أخته الصغيرة وهو يخشى
عليها من نسمة الهواء

أفاق من شرودة على صوت رنين هاتفه
فرد "إبراهيم" وما زالت نبرته تحمل
بقايا حزن:

-السلام عليكم

ردت الممرضة من الجهة الأخرى:

-وعليكم السلام يا دكتور في واحدة
بتسأل على حضرتك

تسأل "إبراهيم" بتعجب:

-واحدة؟ قالتك مين؟

أجابت الممرضة وهي تنظر للفتاة التي
تقف أمامها:

-معرفة يا دكتور مرضيتش تقول بس
مصره تستناك يا أما عايزة رقم حضرتك
رد "إبراهيم" بهدوء: طب تمام قوليلها

نص ساعة وأكون عندك خليها تستنى
في مكتبي

المرضة: تمام يا دكتور

نهض "إبراهيم" وهو يقول:

-خلي بالك من "حنان" يا عمتو، أنا

رايح المستشفى

ردت بحناتها المعهود: في عنيا يا حبيبي

خلي بالك من نفسك أنت، وربنا معاك

ويوفقك ويفرح قلبك

رد "إبراهيم" وهو يتحرك بعدما قبل

جبينها:

-اللهم آمين ربنا يحفظك لينا

"في الجامعة"

قالت "نور" بمرح وهي تقترب من

صديقتها:

-أنا جيت

ردت "بسملة" ساخرة: عمتي البيت

دفشتها "نور" برفق وأردفت:

-قصدك نورت البيت

فعلت "بسملة" المثل وهي تدفشها

بعيداً:

-بس احنا في الجامعة

وضت "نور" يدها على "دعاء" وهي

تقول:

-يبقي نورت الجامعة

تسألت "دعاء" بتعجب: آمال "جي جي"

مجتش ليه؟؟

هزة "نور" اكتافها بجهل وأردفت:

-معرفش رحتلها البيت لقتها مشيت

افتكرت عندكم محاضرة بدري

ردت "دعاء" بتعجب من عدم مجيأها

إلى الآن:

-احنا كان عندنا محاضرة فعلاً، بس هي

محضرتش معنا

تسألتي "بسملة" بقلق: آمال راحت فين

دي؟

وأردفت "دعاء" بهدوء وهي تنظر لـ

"نور":

-ربنا يستر عشان أنتِ وهي بقيتوا خطر

على الكوكب

حركت "نور" جفونها وهي تتحدث

ببراءة كاذبة:

-يختي احنا غلابه

نظرت لها "دعاء" ورفعت أحدى
حاجبيها بمعنى حقاً، لتتفلسف ضحكة
خافته من "نور" وهي تقول:

-مش اوي

أخرجت "بسملة" هاتفها وتساءلت:

-مرنتيش عليها ليه؟

ردت "نور" عليها: مش بترد

هتفت "بسملة" بمرح وهي تضع
الهاتف على اذنها بعدما قامت بالاتصال
عليها:

-يبقى جهزي نفسك لكارثة جديدة

ردت "نور" بمرح: أنا على طول جاهزة

يا باشا

قالت "دعاء" بهدوء وسعادة:

- "فارس" جاي بكرة وانتم هتكونوا
موجدين تمام

ردت "بسملة" بعدما أنتهت المكالمة
دون رد:

- أنا قلت لـ بابا وماما وقالوا روجي
وهتفت "نور": وأنا اعتبريني عندك من
النهاردة

دلف إلى مكتب صديقه ليجد معالم وجه
تنبض بالضيق، فتسأل بتعجب:

- إيه يا باشا مالك؟

رد "ياسين" بضيق:

- عندي مأموري يا "أشرف" واممي
مريضة ومش عايز اسيبها لوحدها

جلس "أشرف" على المقعد وقد فهم
سبب ضيقه وتساءل:

-ألف سلامة عليها، امتي؟

رد "ياسين" بتأفف: بعد يومين

أردف "أشرف" بجدية: عندي فكرة

تسأل "ياسين" باهتمام: إيه؟

قال "أشرف" بهدوء: تعالى نروح عند
اللاء ونطلب منه إني اطلع مكانك،
ونفهمه ظروفك

أردف "ياسين" بياس بعدما تحرك
ليجلس على المقعد المقابل لـ "أشرف":
-مظنش أنه هيرضا

ربت "أشرف" على يده وقال: هنجرب
مش هنخسر حاجة وسيبها على الله

رد "ياسين" بهدوء: ونعم بالله، بس مقولتليش عملت إيه مع الكلب اللي اسمه "حسن"؟

أشتعل الغضب داخل مقلتيه كلما تذكر ما حدث وأردف بعصبية:

-الكلب عمل كل ده عشان بيعت رجالتاه يحرقوا بيتي بس الحمد لله مكنش في حد في البيت

لم يتفاجأ "ياسين" مما قال فقد اعتادوا على الخطر بسبب عملهم، وتساءل :
-والبيت اتحرق كله؟

رد "أشرف" بحزن بسبب خسارته لأشيائه الخاصة التي تحولت لرماد:

- آه، بس ورب الكعبة ما هخليه يشوف الشمس تاني

ربت "ياسين" على يده تلك المرة عندما
وصلته نبرته الحزينة:
-ربنا يعوضك خيراً منه

في مكان آخر كان ينتظر صديقه على
احر من الجمر إلى أن وصل أمامه فقال
بفخر:

-جبتك اخبار البت من طقطع لسلام
عليكم

رد "تامر" وعيونها تلمع بانتصار: قول
يا "بودي"

أردف "عبده" وهو يشير له بنظراته
نحو الهاتف:

-لا نفذ الاتفاق الأول يا "تيمو"

هتف "تامر" بنفاد صبر وهو يقوم بفتح
هاتفه:

- اخلص وهديك الرقم

غمز له "عبده" بمشاكسة: الرقم الأول
يا هندسة

تههد "تامر" وهو يقول: أكتب
١ . *****

ابتسم "عبده" وقال: فل أوي، خد
الورقة دي فيها كل حاجة عنها
سحب "تامر" الورقة من يده وهو
يبتسم عندما قرأ الاسم:

- "بسملة علي"

ثم همس لنفسه: ماشي يا بسبوسة
هنتقابل قريب اوي يا قمري

"في المشفى وبالأخص في مكتب
د/إبراهيم"

كانت تجلس وهي تتمنى أن يوفقها الله
في ما تفكر إلى أن فتح الباب وتقدم
"إبراهيم" لداخل وقال قبل أن يراها:

-السلام عليكم

نهضت "جيهان" وهي ترد عليه
السلام:

-وعليكم السلام

لينظر لها "إبراهيم" بتعجب من
وجودها:

-أنتِ؟

ردت "جيهان" بحرج: أخبر حضرتك
إيه؟

رد "إبراهيم" ببسمة هادئة: الحمد لله
بخير، اتفضلي اقعدى فى حاجة ولا إيه؟
جلست وهى تقول بارتباك : شكرًا هو
أنا...

قطعت حديثها بتوتر ليبتسم "إبراهيم"
وهو يهمس داخله:

- ما بال الجميع اليوم يتحدث معه بخوف
وقلق كأنه تحول لوحش أمامهم؟!
ثم أردف بجديّة حينما طال صمتها: أنتِ
إيه؟

قالت "جيهان" بارتباك: أنا عاوزة اطلب
من حضرتك طلب

ظهرت بسمة على وجه "إبراهيم" وهو
يقول:

- أنتِ تأمرى، بس تشربى إيه الأول

ردت "جيهان" بخجل: شكراً هو
الموضوع يخص "حمزة"

نظر لها باهتمام وتساءل: ماله "رحيم"؟
أنتِ رحتي شوفتيه تاني؟

هزت "جيهان" رأسها بنفي وأردفت:

- لأ من ساعة الحادثة اللي حصلت وأنا
مشفتوش، بس بفكر فيه وخطر على

بالي فكرة بس مش عارفه اقولها ازاي؟

قالت جملتها الاخيرة بنبرة خافته، جعلت
"إبراهيم":

-فكرة إيه؟؟

ردت "جيهان" بارتباك يخالطه الخجل:

-أنا عاوزة اتبنى "حمزة" بس لازم
أكون متجوزة...

وصمتت تراقب رد فعله، فتسعت بسمة
"إبراهيم" عندما فهم ما تريد وسبب
خجلها الشديد، فتردى نظارته الطيبة
وقال بجدية:

-كملي أنا سامعك

أردفت بلهفة وهي تغلق أعينها بخجل:

-ممكن تتجوزني اتبنى "حمزة" وطلقتني

تاني

إبراهيم:....

كانت تسير بمفردها خارج المدرج ولكن

توقفت حينما استمعت لاحد ينادي

باسمها

-نور نور نور

أستدارت "نور" لتجد شباب يصغرها
بعام، هي تعرفه فقد حدث موقف محرج
وهو ساعدها فيه، فقالت بتأفق:

-نعم يا "ربيع" في حاجة وبعدين أنا
اسمي "نورهان"

رد "ربيع" بأسف: أسف ممكن اتكلم
معاك شوية

نظرت له "نور" بشر وهتفت:

- لاء، ومين فعش تتادم عليا كدا تاني، أنا
هعديها عشان خاطر أنت شخص محترم
بس لو حد تاني كنت علمته الأدب وأنا
مبتكلمش مع حد

قال "ربيع" بحزن: أنا أسف

ردت "نور" بجدية: بعد اذنك

وتركته وغادرت بكل ثقة ولكن زفرت
بضيق لأنها تعلم كم يعشقها هذا الـ
"ربيع" منذ عام ولكن هي لا تشعر
اتجاهه بشيء وهذا ليس خطأها ولا
خطأه ولكن لا ساطه لنا على قلوبنا فهي
تنبض لمن ارادت، وهي حاولت مرارًا
وتكرارًا أن تخبره أنه يستحق افضل
منها وأنه يجب أن ينساها ولكن دون
فائدة فهو يحبها بشدة وهي تتمنى أن
تحبه لكن ليس لديها القدرة على ذلك...
القلب وما يريد

اما "ربيع" صديق "مارس" كان ينظر
لها بحسرة وهي ترحل هو يعشقها ولا
يريد سواها، يعلم بأنها تفوقه بالعمر
بعام ربما هذا ما يجعلها ترفضه لأنه

أصغر منها، ولكن من قال ان العشق له
علاقة بالعمر ولا أي شيء آخر، العشق
له علاقة بالقلب فقط

«كنت أعلم أن الحب من طرف واحد
خطيراً جداً ... وذلك ان جازت تسميته
حبا أصلاً ... لكنه مرض لا اجر
فيه... جرح لا يشفى أبداً وألم يتجدد طيلة
الوقت ... استغرب كيف لم ايبأس بعد
كل هذه المحاولات التي باتت بالفشل»

ذهبت نور لأصدقائها وهي تشعر
بالحزن، فتسأل "دعاء" بقلق:

-مالك يا "نور"؟

ردت "نور" وهي تحرك يدها بلا

اهتمام:

-مفيش

تدخلت "بسملة" تقول بجديّة: يعني إيه

مفيش؟ امال زعلانة ليه؟

أردفت "نور" تغير مجرى الحديث: هي

"جيهان" لسه مجتش؟

في تلك اللحظة رأت "دعاء"، "جيهان"

تقترب منهم فقالت بهدوء:

-ابن الحلال عند ذكره بيبان اهي ظهرت

الكارثة الثانية ربنا يستر

لكن "نور" لم تكن بهذا الهدوء، لتقول

بعصبية:

-أنتِ يا غبية كنتِ فين؟

ردت "جيهان" ببرود: اهدي لما تسمعي

اللي هقولوا ابقي اتعصي مرة واحدة

لم تتعجب "بسملة" من برودها وعلمت

أن هناك كارثة خلفه:

-إيه يا بنتي البرود اللي أنت فيه ده
يخربيتك

حدثتها "دعاء" برفق حينما وجدت
السر يعلو نظرات "نور" و"بسملة":

-قلقتيني عليكي يا "جيهان" كنت فين؟؟
ومش بتردني على الفون ليه؟؟

ابتسمت "جيهان" له بسملة لا تنتمي
لسعادة بشيء وقالت:

-هقلكم على كل حاجة، بس تعالوا نطلع
من الجامعة نروح أي مكان أنا زهقت
ردت "نور" ساخرة من حديثها: معها
حق زهقت من الكلية والمحاضرات وهي
لسه داخله من البوابة

نظرت لها "جيهان" بعند وقالت بتحدي:

-اه زهقت عندك اعتراض، ويلا نمشي

تسألت "بسملة" بهدوء: هنروح فين؟
حدقت فيها "نور" بشر، تتسأل عن
المكان؟ ولم تتسأل عن الكارثة التي
تقع أمامهم ببرود؟ فقالت بضيق:

-أي داهيه مش هتفرق المهم نعرف
الأستاذة كانت فين؟

قالت "جيهان" بلامبالاة بما تقول:
تعالوا نروح الكافية عشان اقلكم آخر
الأخبار

تحركت "نور" وهي تقول: يلا لما
نشوف اخرتها

في الكافية هتفت "نور" بغضب وصوت
مرتفع:

-يا بنت المجنونة

زجرتها "جيهان" وهي تقول: إيه؟

وطي صوتك هتفضحيني

أردفت "نور" بعصبية: لا والله واللي

أنتِ عملتية ده كان إيه؟

ردت "جيهان" ببرود: ولا حاجة

حدثت فيها "نور" بشر وهتفت: بت

أنتي متستفزينيش بدل ما اخد فيكي

تأبيده، منك لله يا آخر صبري

تسألت "جيهان" بعدم فهم لعصبيتها:

ليه عملت إيه؟ وانتم قاعدين تتفرجوا

عليها ما حدا يسكتها!

بسمة ساخرة ظهرت على وجهه

"بسمة" وهي تقول بحدة:

-نسكتها ليه ياختي، أنا عايزة اولع

فيكي على اللي عملتية

أردفت "جيهان" ببرود: ليه عملت إيه؟
ردت "نور" بسخرية: بصوا البيت، ولا
حاجة يا قلبي كل الحكاية إنك رخصتي
نفسك ورحتي اتقدمتي لواحد متعرفيش
عنه حاجة، بسيطة إيه اللي يزعل

دافعت "جيهان" عن نفسها بجدية: على
فكرة أنا مرخصتش نفسي، وعارفة أنا
عملت إيه كويس؟ وفكرت قبل أي حاجة
صدحت ضحكه ساخرة من "نور" وهي
تقول:

-فكرتي؟ طب تيجي ازاي بعد المصيبة
اللي عملتية

وضعت جيهان يدها على وجهها
وحركت اناملها برفق لكي تهدأ، وقالت:

-ممكن تسمعيني الأول وبعدين اتكلمي،
أنا ممكنش ينفع اعمل غير كذا أنا مش
هقدر اسيب "حمزة" يتربى في الملجأ
كادت "نور" أن تسب تلك الحمقاء
و"حمزة" هذا ولكن قاطعتها "دعاء"
وهي تقول:

- "نور" ممكن تهدي، سيبها تكمل
كلامها للآخر وبعدين نتكلم
أردفت "بسملة" بضيق: يعني أنت
عاجبك اللي عملته؟

ردت "دعاء" بهدوء: مش عاجبني،
بس أكيد في سبب وهي برضوا مش
صغيرة وعارفه عملت إيه
اخبرتهم "جيهان" وجهة نظرها

وتفكيرها الذي دفعها لفعل ذلك وهي
تقول:

-اولاً أنا معملتش حاجة غلط ولا حرام،
أنا طلبت منه يتجوزني ولو فاكرين أن
السيدة خديجة رضي الله عنها هي اللي
طلبت الزواج من الرسول عليه افضل
الصلاة والسلام ثانيًا دكتور "إبراهيم"
شخص كويس صح أنا معرفوش، بس
كمان أنا معرفش حد أفضل منه حاليًا
ولأني حسيت أنه بيحب "حمزة" زي
فطلبت منه يتجوزني وبعد فترة يطلقني
أكون قدرت اتبنى "حمزة"
هزت "نور" رأسها بنفي لكل هذا الهرء
الذي يخرج من فم ابنة خالها العزيز:

- لا لا أنا مش قادرة اتكلم حد يرد عليها
بدل ما ارتكب جناية، لأ والبت بتتكلم
ببساطة كأنها بتقولك أخبار الطقس

تدخلت "دعاء" تقول بهدوء: كل الكلام
اللي قولتيه مفهوش غلط

نظرت "نور" و"بسمة" لبعض بصدمة
و"جيهان" ابتسمت بانتصار، لتكمل
"دعاء" حديثها بثبات:

-باستثناء طبعًا موضوع الطلاق لأن دي
مش لعبة لو هتجوزية يبقى زواج كامل
ويدوم لنهاية غير كدا مستحيل نوافق،
وانت بقي فكري لأنني دي حياتك اللي
هدمرها بغبانك

تهدت "نور" تقول مرغمة لعلمها
بشخصية صديقة طفولتها وشبابها:

-رغم إني مش مقتنعة من البداية بس
ماشى، "دعاء" معها حق مفيش حاجة
اسمها تطلقى وشغلي عقلك وحياة
ابوكي عشان هتجيني جلطه منك قريب
واردفت "بسملة": وأنا رأيي من رأيهم
تسألت "نور" بجديفة ساخرة: وأنت مين
خد رأيك؟

ردت "بسملة" ببساطة: وانت مالك يا
عسل؟

انفالت ضحكة خافته من "دعاء"
وقالت:

-قصف جبهه

قالت "جيهان" بعد تفكير: بس أنا مش
هينفع ارجع في كلامي لأنى قتلوا إني
هتجوزوا وبعدين اطلق

ردت "بسملة" بحدة فهي داخلها لا تقبل
بهذا الهراء تخشى على صديقتها أن تقع
في غياهب لا تعلم عنها شيء:

-مخصصناش الكلام ده، احنا اللي عندنا
قولنا وأنتي هتكلمييه وتقوليلوا، ياما
مفيش جواز وخلصنا

أردفت "نور" بمرح: ام سيد بتتكلم صح

صفعتها "بسملة" على رأسها:

-ام سيد في عينك

تحسست "نور" مكان الصفعة بألم
مصطنع وقالت تغير الحديث:

-يلا اطلبونا حاجة نشربها الواحد جعان
من الصبح

ردت "بسملة" بمرح: جعانه وعايضة

تشرب آمال لو عطشانة كنتي هتأكلي

هزت "نور" رأسها بمعنى اه، فطلبت
لهم "دعاء" ما يريدون وعادوا
يتحدثون في امور كثيرة وعديدة إلى أن
تسألت "نور" بعدما تسأل لها رائحة
غريبة:

-هي أي الريحه دي؟

ردت "دعاء" وهي تضع يدها على
انفها لتمنع الرائحة من الوصول لها:
-مش عارفه

قالت "بسملة" بتخمين: دي ريحة بنزين
او غاز

سعلت "جيهان" بشدة وقالت: الريحه
شديده قوي

بدأ كل من في الكافية يسعل بشدة ولا
أحد يستطيع التنفس، فأردفت "نور"

بصعوبة بسبب حساسيتها المفرطة،
عندما رأت مصدر الرائحة:

-يا نهاري في نار

تم أغلاق الكافية ورائحة الدخان تخرق
المكان والنار تخرج من المطبخ تأكل كل
ما يقابلها، وعم الهرج والمرج المكان
والكل فقد توازنه وبداء صراخ الفتيات
والسيدات يصدح في المكان ليصيب
الرجال بحالة ذهول ولا أحد قادر على
التفكير، وكان العقل توقف عن وظيفته،
كل رجل معه فتاة يحاول مساعدتها
ولكن لا أحد يفكر كيف يمكنهم الخروج
من هنا قبل أن يحترق المكان بهم
وفرقة المجانين الأربعة فهم مازلوا كما

هما ولا يستطيعون التنفس وسقطت
"نور" مغشي عليها

خارج الكافية كان يتحدث في الهاتف
بحقد وكره شديد:

-العملية نجحت ومن غير خسائر وبعد
ساعات هيكون النمر في اعداد الموتة
ومعه شهداء الوطن ههههههه، مش
هتحرك غير لما اشوفه طالع على نقالا
هههههههه سلام... يا ثعلب

كان يعمل بتركيز مع فريقة على
المشروع المكلف به ولكن شعر
بانقباض قلبه ودقاته ترتفع وهاجمه
دوار حاد ليجد أحد يدعمه في الوقوف
وهو يتسأل بقلق:

-بشهندس أنت كويس

رد "تامر" وهو يستند عليه: مش
عارف مالي حاسس بحاجة مش عارف
إيه هي؟

رد أحدي الشباب: ممكن ترتاح شوية
ونكمل بعدين

تحرك خارج غرفة الاجتماعات وهو
يقول:

-بعد انكم

دخل مكتبة ليجلس على أقرب مقعد
ويشعر بالتشتت لا يعلم ما يحدث يغمض
عينيه ليجد صورة احدهم يصارع الموت
ويستغيث به ولا يعلم من هو؟ لتتغير
الصورة لاخرى ليرى أن هناك جسد
يجلس بعيداً في ركن من الغرفة وهو

يتوسل له بالمساعدة و"تامر" يقبع
جوار الباب عاجز عن التحرك وما زال لا
يعلم من يجلس رجل ام فتاة ولكن كل ما
يعلمه أن هذا الشخص الذي يطلب
المساعدة يعني له الكثير

انتفض بصورة مفاجئة على رنين هاتفه
لينظر له بلا اهتمام ليجد ان المتصل
احدى فتيات مسجل بـ "حبيبي ه"
ياللسخريه أصبح الحب لعبة ومضيعة
للوقت، أغلق الهاتف ثم نظر للأعلى
وهو يستغيث بالله:

-يارب أنا مش عارف في أيه؟ بس في
حد غالي عليا في خطر وانا حتى مش
عارف مين هو؟... يارب انقذه... يارب
كن معه... يارب أحفظه من كل شر...

«ربما أنا مشاكس، ولا أستحق فتاة
نارية مثلك؛ ولكن اروحنا إلتقت وأنتهى
الأمر، إن لم تستطيعي أن تكوني مثلي
سأكون أنا مثلك، ويا فرحة قلبي ان
أصبح مثل ساكنته»

الفصل الثامن

"الحاجة الوحيدة التي بتظنني الواحد إن ربنا سبحانه وتعالى قادر يعدل كل حاجة في لحظة واحدة، قادر ينزل لطفه، ويرد الظالم، ويطيب خاطر المكسور، قادر يحول الخوف الذي جواك لأمان وطمأنينه، قادر يغير كل شيء في ثانيه، فأطمئن"

داخل الكافية سقطت "نور" أرضاً فاقدة للوعي فصدرت صرخة من "بسملة" هزت جدران المكان، فهذه "نور" الاخت والصديقة وكل شيء بالنسبة لهم؛ فهي أصبحت منذ لقائهم مصدر السعادة والفرح ورغم أنها أصغر منهم إلا أنها كانت كالأم تمنعهم من فعل أي شيء

يمكنه أن يضرهم ورغم مرحها المعتاد
إلا أنها عند الجد تراها شخصًا آخر لا
يمكن أن تتخيل ان هذه هي الفتاة
المرحة صاحبة المشاكل.

وعلى بعد منهم وصله صوت "بسملة"
لينقبض قلب ذاك النمر الذي كان يبحث
عن مخرج فهو قادر على كتم أنفاسه
لدقائق

ولكن هذه المرة لا يعلم لماذا انقبض
قلبه ولأول مرة يشعر بالخوف على أحد
غير امه وابنه الصغير ظل ينظر يمينًا
ويسارًا إلى أن رأهم ليركض إليهم
بسرعة وجد "نور" مغشى عليها
ورأسها على قدم "جيهان" ولا تشعر
بشيء و"دعاء" و"بسملة" و"جيهان"

دموعهم تسيل كالشلال ويكادوا يختنقوا
من كثرة الدخان، شعر النمر ان قلبه كاد
يتوقف عندما رآها هكذا وأصبح شرس
كالنمر الذي تم إطلاقه يخبط في كل
شيء لعله يستطيع ان يكسر ذلك الباب
ولكن النار أصبحت تحرق كل شيء
وتزيد شيئاً فشيئاً والدخان جعل الجميع
غير قادرين على التنفس ويكادوا
يختنقوا أصبح النمر يخبط في الباب
بقوة شديد والآن وبعد دقائق من العذاب
استطاع ان يفتح الباب وأخيراً ولكن
الكل كان فاقد للوعي وهناك اشخاص
اصابتهم النار ولجت رجال الاطفاء
لداخل لإخراج الناس، وأشرف ركض
مرة أخره لـ "نور" وحملها وخرج بها

"بسملة" و"دعاء" و"جيهان" و"جيهان"
ساعدوهم رجال الاطفاء وتم نقل الجميع
إلى المشفى.

وبعد ما اطمئن عليها مرة واثنين وثلاثة
من الطبيب ذهب خارج المشفى وهو
يسأل نفسه ماذا حدث؟؟ وكيف حصل كل
هذا؟؟ وهل هذه خطه لقتله؟؟ وان كان
هذا صحيح من فعل هذا؟؟ والسؤال
الاهم لما كاد قلبه يتوقف عندما رآها
بهذه الحالة؟؟ وهي لا تعني له شيء هو
لا يعرفها إذن لم يشعر أنها جزء منه؟؟

كان الجميع مجتمع في المشفى وبعد
خروج الطبيب ركض "المهدي" له
ليطمئن على ابنته وهو يردف بقلق:

- "نور" بنتي يا دكتور عاملة إيه؟

أردف الطبيب بعملية: بسبب وجودها
فترة كبيرة في المكان وعدم قدرتها على
التنفس فقدت الوعي بس الحمد لله هي
حالياً بخير

أستفسر "المهدي" براحة: هتفوق
امتي؟

رد الطبيب قبل أن يغادر: في أي لحظة
ممكن تفوق

في غرفة "نور" كانت تجلس والدتها
بجانبها وهي تبكي بشدة خوفاً من
خسارة ابنتها

كانت "نور" تتسطح على الفراش،
وحركت جفونها ببطئ، وقد رأتها
"ريهام" شقيقتها فانتفضت من مجلسها

وأقربت منها وهي تتحدث بصوت عالي
وفرحة شديدة:

-نور نور أنتِ كويسه؟

أقربت والديتها منها بفرحة وعانقتها
وهي تبكي وتردد:

-كنت هموت لو حصلك حاجة

ردت "نور" بتعب: بعد الشر عليك يا
ماما، البنات فين؟

أردفت "ريهام" لكي تطمئنها:

-كلهم بخير الحمد لله، والحمد لله على
سلامتك يا قلبي

ردت "نور" بتعب:

-الله يسلمك، عايزة أشوفهم

قالت "فايزة" برفق وهي تربت على
رأسها:

-أنتِ لسه تعبانة شوية وهما هيجوا
هزة "نور" رأسها بنفي وقالت بخوف
أن يكون حدث لهم مكروه:
-لأ أنا عايزة اشوفهم دلوقتي

قبلت "فايزة" جبينها بحنو وقالت: أنا
هروح اشوف "جيهان" واجيبها واجي،
وأنتِ خليكي هنا، خلي بالك يا "ريهام"
منها

هزة "ريهام" رأسها بطاعة واردفت:

-حاضر

خرجت والدتها فدخل والدها لكي يطمئن
على ابنته الصغيرة الملقبة بالكارثة
المتحركة

في غرفة أخرى يوجد به الثلاث فتيات
فهم يمثلون الصداقة الحقيقية كلاً منهم

عندما استيقظت أول كلمة قالتها أين
اصدقائي؟ وها هم انتقلوا الاثنان إلى
غرفة "بسملة" لأنها مازالت فاقدة
للوعي، وكان الكل مجتمع خارج تلك
الغرفة ومنهم الدكتور "فارس" الذي
كاد أن يفقد عقله عندما سمع ما حدث
لمعشـوقة السمراء التي اقترب موعد
لقائهم برابط مقدس كاد يفقدها والآن
هو يأكله الانتظار إلى ان يراها ويطمئن
عليها

قالت "دعاء" وهي تجلس بقلق على
الاثنان:

-خليكي مع "بسملة" وأنا هروح اشوف
"نور"

كانت "جيهان" تقبع بجانب "بسملة"
على الفراش فقبلت جبينها وقالت بعدما
ابتعدت عنها:

-وأنا كمان عايزاه اروح اشوفها

قاطع حديثهم دخول "فايزة" التي قالت:

-عاملين إيه يا بنات

ردت "جيهان" ببسمة: الحمد لله يا
عمتو، "نوره" عاملة إيه احنا كنا
ريحنلها

ردت "فايزة" بعدما أقتربت منها
وعانقتها:

-فاقت وبتسأل عليكم هي بخير الحمد لله

أردفت "بسملة" بنبرة متعبدة بعدما
استيقظت لتو:

-طيب يلا نروح نشوفها

أقربت منها "جيهان" بفرحة وهي
تبتسم لها:

-انتي كويسة يا "بسوا" قلقت عليكي،
الحمد لله أنك فوقتي، خليكى أنتي تعبانة
هنروح نشوف "نوره" ونجيكى على
طول وطنط "حورية" بره هتدخلك
دلوقتي

ردت "بسملة" برفض لحديثها وهي
تنهض:

-لا أنا كويسة هروح معكم نطمن عليها،
ويلا

"في منزل إبراهيم"

كان يجلس حزين وهو يضع يده فوق
رأسه وكأن حزن العالم داخله ولا يعلم
لِمَ هو حزين؟ ولم يشعر بالأختناق
دخلت عليه عمته رأت الحزن بعينيه
علمت بأنه ليس على ما يرام فقالت
بلطف:

-مالك يا بني حزين كذا ليه؟

رد "إبراهيم" عليها بحزن بعدما رفع
رأسه ليرها:

-مش عارف يا عمته، بس حاسس إني
تعبان وقلبي وجعني

ربتت "سميرة" عليه بحنو: بسم الله
على قلبك حتى يهدأ بسم الله على روحك
حتى تطمئن، اطمئن يا بني خير بإذن الله

نظر لها بتردد كأن يريد أن يخبرها
شيء ولكنه تراجع، ولأنه مثل ابنها
حتى وأن لم تكن أنجبته، قالت بحب:

-عايز تقولي حاجة بس متتد قول يا
ابن الغالي هتخبي عني

ابتسم "إبراهيم" لها وقال:

-هو في موضوع كده كنت عايز اقولك
عليه

نظرت له "سميرة" باهتمام: موضوع
إيه؟

قال "إبراهيم" بهدوء: أنا قررت اتجوز

الأطلق "سميرة" صوتاً صاخب يدل
على فرحتها وهتفت:

-يا الف نهار أبيض ده يوم المنى اللي
اشوفك فيه عريس بس مين سعيدة الحظ
دكتوراه "هاجر" صح

استمسرت بلطف لعلمها العلاقة التي
تجمع بينهم، لكن "إبراهيم" هز رأسه
بنفي وقال بضيق:

-لأ مش هي طبعاً، دي واحدة تاني لسه
بتدرس في كلية الحقوق شوفتها وأنا
رايح لـ "فارس"

لم تعلق "سميرة" على اختياره فهي
تثق به وهذه حياته لذلك قالت:

-ومالوا يا بني طالما أنت عايزها يبقى
على خير الله هتتقدم لها امتي
أردف "إبراهيم" بجديّة: بكرة إن شاء

الله هتصل باباها وحدد معاه معاد عشان
اروحهم

ردت "سميرة" عليه: ربنا يتملكك على
خير ويجعلك في كل خطوة سلامة،
ويكتبها من نصيبك لو كانت خير ليك
ويبعدها عنك أن كانت شر

رد "إبراهيم" بلهفة يعترض على
جملتها الأخيرة:

-ليه بتقولي كده بس؟

انطلقت ضحكة خافته من "سميرة"
وقالت بمزاح:

- دانت وقعت بقي

تراجع "إبراهيم" وقد أدرك فعلته فقال
بخفوت:

-لأ مش قصدي بس الدعاء مش كده

اغزة له "سميرة" وتسألت بمكر:

- امال ازاي؟

تتهد "إبراهيم" وهو يقول:

- اللهم إن كانت خيراً لي فجمعني بها

وان كانت شراً لي فصلحها لي

واصلحني لها واجمعني بها

في الغرفة التي تقبع فيها "نور" كانت

تجلس بارهاق على الفراش وشقيققتها

تحاول أن تمنعها من التحرك إلى غرفة

الفتيات إلى أن ولجوا خلف بعض،

فخرجت "ريهام" لتتركهم على راحتهم،

فقالت "جيهان":

- الحمد لله على سلامتك يا تعب قلبي

ردت "نور" ببسمة خفيفة: الله يسلمك
يا بنت قلبي

قالت "بسمة" بتعب وهي تجلس
بجوارها:

-خوفت عليكي يا زفته

ردت "نور" عليها، ثم استفسرت: قلب
الزفت، هو حصل إيه في الكافية؟ عشتن
أنا مش فاهمة والحمد لله ان كلنا
كويسين

أردفت "دعاء" بغمزة مآكرة: الحمد لله،
بس عارفه إيه اللي حصل؟

قالت "بسمة" بلهفة: أنا اللي هحكيلها!

قاطعتها "جيهان": لأ، أنا اللي هحكي

أردفت "نور" بحدة: اخلصي يا زفته
أنتي وهي، حصل إيه؟

ردت "بسملة" باثارة وغمزة:

-حذر فذر، شفنا مين؟

هتفت "نور" بنفاذ صبر: أنتِ هتهزري؟

انطقي بدال ما أزعلك

أردفت "بسملة" وهي تصفحها على

رأسها بخفة:

-الظابط اللي كل شوية نشوفه كان معنا

في الكافية

ردت "نور" بلهفة وخوف: حصله

حاجة؟!!

نظر الجميع إليها بدهشة، مستغربين من

رد فعلها، ولكن لم يعلق أحد، فتدخلت

"جيهان" تقول بهدوء:

-لأ، محصلوش حاجة زي القرد وهو

اللي فتح الباب و...!

قاطعتها "نور" وهي تتهد براحة
وقالت:

- الحمد لله و إيه؟

قالت "جيهان" بتعجب مما حدث: كان
خايف عليكي وشالك وطلع بيكي على
المستشفى في عربيته رغم أنه كان
تعبان

ردت "نور" بعصبية: وانتوا كنتوا فين؟
سبتوا يأخذني يا واطين

ردت "دعاء" برفق: كلنا كنا تعبانيين،
ورحنا مع الاسعاف لان محدش فينا كان
واعي

أردفت "بسمة" بضجر:

- خلاص، اقلوا الموضوع عشان بدأ
يضايقتني

ردت "نور" ساخرة: خلاص يا اختاه،

ضيعوا علينا الخروجة ولد الذين

أيديتها "جيهان" بقولها: اه والله، كنت

عايزة اشترى حاجة، وكدا مش هينفع

نطلع غير الصبح

تدخلت "دعاء" تقوم بتذكيرهم: الصبح

هتكوني عندي يا ماما، ولا نسيتموا؟!!

أشارت "بسمة" عليها بضيق: بصوا

البت مستعجله ازاي، احنا قايمين من

حدثه وكنا هنموت

ردت "دعاء" ببرود:

-بس محدش حصلوا حاجه، وحررام

عليكم بقالي ثلاث سنين مستتية

قالت "نور" بمشاكسة لكي تستفزها:

- لا احنا عايزين راحه يومين تلاته كدا،

نأجل احنا مش مستعجلين

أردفت "جيهان" بمرح: فعلاً احنا ورانا

إيه يعني؟ يستتى شوية، أنا تعبانة

وعايزة انام يومين كده

ضحكت "بسملة" وهي تقول: وأنا كمان

ردت "دعاء" بعصبية: عارفه أنتِ وهي

الساعة سبعة لو مشفتكمش قدامي

هاجي اولع فيكم

ردت "نور" ساخرة: ليه رايعين نبيع

لين؟

أردفت "دعاء" بحدة: اه يا "نور"،

وفكري تتأخري دقيقة واحدة

قالت "جيهان" بضيق:

-طيب وبالنسبة أن بكرة اجازتنا،
وبنصحي عشرة، نعمل إيه؟

هتفت "دعاء" بسخرية: اعملي جمعية،
واياكي تتأخري

ردت "بسملة" بجديفة: خلاص ياعم
بنهزر، هنيجي بس أكيد مش سبعة، ولا
إيه يا بنات؟

أردفت "نور" و"جيهان": اشطا يا باشا
دخلت "ريهام" وهي تقول بمرح:

- فرقة المجانين أو الكوارث المتحركة
بتعملوا إيه؟

ردت "نور" عليها ببراعة: ولا حاجة
احنا غلابه

ضحكت "ريهام" بسخرية وهي تقول:

-طب قولي لحد تاني ميعرفكمش، يلا
جهزوا نفسكم عشان نمشي الدكتور
سمحكم بالخروج

ردت "دعاء" بعند وهي تنظر لهن
بتحدي:

-حتى لو ما سمحش كنا هنخرج، ابقى
تعالى يا "ريهام" بكره مع الزفته اختك
هزة "نور" رأسها برفض: لأ، محدش
هيجي معي

ردت "ريهام" بضيق: غوري يابت، كده
كدا مش هقدر اجي عشان جوزي حبيبي
راجع من السفر بكره، وربنا يتملك
على خير يا قلبي

كلهم في نفسك اللحظة: أمين

مر الليل مرور الكرام على فرقة
المجانين، ولكن لم يكن على ما يرام لـ
"أشرف" الذي ظل شاردًا طوال الليل
وهو يفكر فيما حدث واستطع بعد
ساعات معرفة من فعل هذا ولكن ما
يشغل تفكيره الآن، هي كيف حالها الآن؟
منذ تركها نائمة وهو يتخيلها أمامه
ويريد الاطمئنان عليها ولكن كيف؟ وها
هو يأخذ قرار في شيئاً هام ويجب فعله
في أسرع وقت.

اما "تامر" فهو كعادته يتحدث مع
الفتيات طوال الليل ولكن من حين لآخر
تظهر تلك القطعة المزعجة كما اطلق
عليها أمامه ويريدها وبشدة فهي الفتاة
الوحيدة التي لم تعجب به من النظرة

الأولى لأنه حقًا شابًا وسيم وجذاب ولكن ما يفيد الشكل والاخلاق سيئة.

و"فارس" كان ينظر من حين لآخر إلى الساعة يتمنى تشرق الشمس عاجلاً لتقربه من محبوبته الهادئة التي لا تنتمي أبدًا لأصدقائها ولكن يوجد شيء يجمعهم وهو نقاء قلوبهم... تذكر لقائه بها في المشفى كيف كانت تبتسم بخجل أمامه؟ خجلها وحيائها يجعله يفقد السيطرة على قلبه ويود أن يسجنها داخله لكي لا يراها أحد غيره.

أما "إبراهيم" فهو معجب بها وبجراتها وحبها لـ "رحيم" ولذلك قرر أن يكون زواجه منها كاملاً ولن يسمح لها أن

تطلب الطلاق فهي و"رحيم" سيصبحون
حياته بعد ايام باذن الله

في الصباح

«الصباح لا يتغير.. ولكن كل يوم يأتي

بشكل أجمل.. عطر الله صباحكم برضاه»

"في منزل دعاء"

قالت "دعاء" بغضب وهي تفتح باب

منزلها:

-أنتِ يا زفته منك ليها، قلت تيجوا سبعة

مش عشرة، وكم ان برن عليكم مش

بترود، ومع بعض ازاي بقى؟

ردت "نور" بضجر: ياسستي دخليننا

الأول، هو في حد بيكلم حد على الباب

وضعت "دعاء" في خصرها وقالت:

ايوه في أنا

دفعتها "نور" برفق من أمام الباب

لتدخل وخلفها "بسملة" و"جيهان"،

ليقول والدها ببسمة:

- عاملين إيه يا بنات؟

ردت "جيهان" برقعة نادر أن تظهر

عليها:

- الحمد لله يا عمو

قالت "نور" بتذمر وهي تشير على

"دعاء":

- شايف بنتك يا عمو مش راضيه تدخلنا

بيتها

ردت "مصطفى" بطيبه: ده بيتكم زي ما

هو بيتها

شاكستها "نور" وهي تخرج لها
لسانها، فقالت "بسملة":

-بس طيب، يلا ندخل جوہ عشان وانا
حاجات كثير

وأخيراً لاحظت "دعاء" الحقائق التي
يحملوها فتسأل بتعجب:

-إيه اللي في ايكم ده؟

ردت "بسملة" وهي تتحرك لداخل: تعالي
بس ندخل جوہ وهتعرفي

حينما ولجت لداخل غرفتها فتحت
نور" الحقيبة الأولى واخرجت منها

فستان ازرق جميل للغاية "بلون دعاء
المفضل"، فنظرت لها بابتسامة

وتسأل:

-إيه رايك؟

ردت "دعاء" بإعجاب: حلو اووي، بس
أنتِ هتلبسي ده ليه هو هيشوفني أنا
مش أنتِ؟ ومفـيش حد يعرف أن
"فارس" جاي يتقدملي غيركم وعمتي
يبقى هتلبسي ده ليه؟

ردت "نور" بهدوء: ومين قال أن ده
بتاعي اصلا؟

تسألت "دعاء" باستغراب: امال بتاع
مين؟

أردفت "نور" بحب: بتاعك أنتِ
لم تفهم "دعاء" أو حاولت أن ترفض
الفكرة التي وصلتها:

-ازاي؟

قالت "نور" بمرح: أي يا "دودو"
دانتي أذكي واحدة فينا، هدية مني ليكي

ردت "دعاء" بجديّة وضيب: ومين قال
إني محتاجة حاجة؟ شكرًا يا "نور" بس
أنا عندي فساتين

أقتربت منها "نور" وقالت بلطف لعلمها
بحساسية الموقف:

-إيه يا "دودو" اللي بتقوليه دا؟ أوّلاً
عارفة انك مش محتاجة حاجة، ثانيًا دا
هدية، ثالثًا هتاخدية غصب عنك لأنني
زيي زي "رحمة" أختك، ولا احنا مش
أصحاب واخوات زي مابتقولي

عانقتها "دعاء" وبكت بشدة فيشهد الله
مكانتهم في قلبها فحبها لهم يفوق قمم
الجبال فهم دائماً بجانبها في أي وقت
فهم أكثر من اخوه، فـ "دعاء" حالتها
المادية لا تسمح لها بشراء ما تريد

وكانت تفكر منذ أمس ماذا ترتدي عندما يأتي "فارس"؟ ولكن كانت تعلم أن واحدة منهم ستأتي بفستان من عندها لترتدية ولكن المفاجأة ان الفستان لم يمسه أحد قبلها إذن هذا ما جعلهم يتأخرون

اقتربت منهم "بسملة" وهي تبكي بصمت، تراقبهم وتعلم فيما تفكر كل واحدة منهم، وتتمنى لهم السعادة. قطعت "جيهان" الصمت قائلة بضيق:

- "خلاص بقى! بطلوا نكد وتعالى شوفي هديتي... يا رب تعجبك."

رفعت "نور" يدها لتزيل دموعها بأناملها، قائلة بتحد:

- "يا رب ما تعجبها حاجة غير هديتي!"

نظرت إليها "بسملة" بغضب مصطنع
وردت:

- "اصمت أيتها البهاء."

ابتسمت "نور" بخبث وقالت:

- "بل أنت البهاء، عزيزتي."

تدخلت "جيهان" بلهجة صارمة وهي
تضع يدها على خصرها:

- "اصمتوا أيها الحمقى! فهديتي هي
التي ستنال إعجابها."

لم تتأخر "بسملة" عن الرد، ورفعت
حاجبها بتحد:

- "بل هديتي يا فتاة!"

ردت "نور" بحماس:

- "بل أنا!"

صاحت "جيهان" وهي تلوح بيديها:

- "بل أنا!"

حسنت "دعاء" النقاش بنفاد صبر،
وهي ترفع صوتها لتسيطر على
الموقف:

- "حقًا، أنتم جميعًا حمقى! أريد أن
تصمتوا جميعًا! فأنا من سيقدر من هي
صاحبة أفضل هدية."

في تلك اللحظة، ولجت "رحمة" إلى
الغرفة، وتفاجأت بالمشهد الذي أمامها.
لم تستطع أن تتمالك نفسها وانفجرت
بالضحك بصوت عالٍ. سرعان ما
شاركها الجميع الضحك، لتحوّل الأجواء
إلى مرح.

قالت "نور" وهي تضحك بصوت عالٍ:

- "آهي افكرتنا مجانيين!"

ردّت "رحمة" وهي تمسك بطنها من
شدة الضحك:

- "حسيت إني مشغلة حاقلة من
غامبول!"

علقت "نور" بابتسامة:

- "الحمد لله إنها جات في غامبول!"

تهدت "بسملة" وهي تمسح على
رأسها وكأنها تحاول جمعهم مجددًا:
- "طيب يلا نشوف ورانا إيه؟"

أعلنت "نور" بحماس وهي ترفع يدها:

- "أنا هغني وأنتم تشتغلوا... اتفقنا؟"

ردّت "جيهان" بسرعة وهي تضع يديها
على رأسها وكأنها لا تريد سماع
صوتها:

- "لا يا ماما! كنا هنشتغل في البيت
سوا!"

وهكذا، بدأوا حملة تنظيف المنزل، إعداد
الطعام، وتجهيز العروس. لم يخلو اليوم
من مشاكسة "نور"، غنائها بصوت
مزعج، وثقتها الزائدة وكأنها ابنة مايكل
جاكسون، مما أضفى على العمل جواً
من المرح والضحك المستمر.

كان يقود دراجته النارية الخاصة بعمل
الدفري يسير في حواري المدينة
لينحرف في طريق مختصر ولكن
سرعته كما هي ليجد امامه فتاتان
يخرجان من إحدى المنازل ليحاول
تفادي الموقف فلم يستطع لتتقلب

الدراجة به وداخله يحمد الله أن الفتاة لم
يمسها سوء... اعتدل في جلسته ليقف
ويرفع الدراجة ليرى الفتيات مازالو كما
هم، ليتحنح باحراج: والله مكنش
قصدي.

لتجيب أحدهما برسمية: ولا يهمك أنت
كويس؟

رد عليها وهو يتحاشى النظر لهم:

- الحمد لله وبجد أسف مكنش ينفع امشي
بالسرعة دي

اجابت عليه نفس الفتاة: حصل خير

وغادرو من أمامه حاول تحاشي النظر
لهم بقدر الإمكان ولكن فشل لينظر لهم
بابتسامة ويرحل وهو يستغفر الله على
ما فعله

سارت الفتاتان في طريقهم لتتسأل
أحدهم بتعجب:

-في أي يا "ديالا" مالك ساكته ليه من
الصبح؟

وقبل أن ترد عليها ارتفع رنين هاتفها
لتجيب بمرح:

- "تيمو" واحشني يا راجل

الفصل التاسع

♡ عزة النفس أن تعيش دور المكتفي
من كل شيء ولو كنت بأمس الحاجة له
وأن لا تطلب الشيء مرتين إلا من الله
وحده، ولا تطرق باب أغلق في وجهك
يوماً ما، باب غير باب الله، فلا يوجد
شيء يستحق أن يطرق أكثر من مرة إلا
الرجوع إلى الله♡

"في منزل تامر"

هذا المنزل أبسط ما يقال عنه جنة على
الأرض، فستكون لها حظاً رائع من
ستحيا هنا داخل هذا المنزل الذي يوجد
به الهدوء والسكينة وأصوات القرآن
التي ترتل من كل الغرف بخشوع تجعلك
تبكي حينما تسمع هذه الأصوات الرائعة.

ولكن مهلاً ليس كل من في المنزل هكذا.
يدخل المنزل بطالته الرائعة ليرى الملاك
الصغيرة تخطوا الدرج بهدوء فيذهب
إليها بابتسامة هادئة فهي رغم كل شيء
بريئة لدرجة مهلكة، وقف امامها يتسأل
بتعجب:

-رايحة فين؟

ردت "ديالا" بابتسامة ساحرة: رايحة
الدرس يا "تيمو"

نظر "تامر" لساعة يده وقال: أنتِ مش
كنتِ في الدرس من ساعة

هتفت "ديالا" بمرح: ايون ايون ده
درس تاني... ثانوية عامة بقى مطلعة
عيني ياخويا

ابتسم لها بمشاكسة ثم نظر إليها من
أعلى إلى أسفل وتحدث باشمزاز:

-رايحه كدا

نظرت "ديالا" لنفسها بعدم فهم وقالت:

-كده اللي هو أزاي يعني؟

رد "تامر" ساخرًا: دي منظر بنت عندها
١٩ سنة دا اللي يشوفك كده يقول عندك
١٠٠ سنة

كانت ترتدي فستان فضفاض يصل إلى
الأرض وخمار بنفس اللون والوانهم
هادئة وبشرتها سمراء ونقيه وخالية
من أي مساحيق تجميل، وقالت "ديالا"
بتعجب:

-وأنت عايزني اعمل إيه عشان اثبتلك
أني عندي ١٩ مش ١٠٠

أردف "تامر" بضيق: البسي زي البنات
اللي في سنك مش القرف اللي أنت
لبساه ده، ناقص تيجي يوم وتقولي
عايزة البس البتاع اللي يخوف ده
"يقصد النقاب"

أبتسمت "ديالا" وقالت بشوق لتلك
اللحظة:

-والله نفسي، بس ماما اللي مش راضية
بس متقلقش هقنعها إن شاء الله

رد "تامر" بعصبية: دا مستحيل، ويلا
اطلعي غيري والبسي حاجة زي الناس
عشان هروح اوصلك

وقبل ان تتحدث قاطعة صوت غاضب
يأتي من خلف ظهره، لتظهر ابتسامتها
على وجهها:

- عايز تخلي بنتي تغير لبسها الواسع
وتلبس لبس اسـتغفر الله زي اللي
بيعجبك

رد "تامر" على والده بهدوء: يا حج
هي لسه صغيرة على اللي هي عملا في
نفسها ده

حـدق فيه "حسني" بسخرية: عندها ١٩
سنة وصغيرة، وهتكبر امتي لما تكمل
خمسـين؟ وبعدين مش ربنا أمر أن لبس
المرأة ألا يصف وألا يشف، ولا أنت
نسيت دينك يا أستاذ يا محترم
قال "تامر": بس يا...

قاطعة "حسني" بحدة وشر: مـبـسـش
ملكش دعوة ببنتي أنت فاهم

-في ايه يا حسني مالك صوتك عالي كدا
ليه؟

كان ذلك صوت زوجته، فرد "حسني"
بهدوء:

-مفيش يا ام كريم حضري الغداء

ردت "عايدة" بطبيتها المعهودة: حاضر

وذهبت تلك المرأة الهادئة الطيبة التي
تجاوزت العقد الرابع من عمرها، فهي
كالباسم أخت عظيمة وزوجة صالحة وأم
حنونة فهذه هي المرأة المسلمة الذي
يقال عنها حفيذة خديجة وعائشة رضي
الله عنهما، تقدمت "ديالا" بخطوات
هادئة من أبيها وقبلت يده، وهو أبتسم
وعانقها بحب طفلاته الصغيرة ملاكته

البريء التي يتمنى ان يكون قدرها كنعاء
قلبها، رد "حسني" بحنو:

-يلا روي يا حبيبي عشان متأخرش
أبتسمت "ديالا" له وقالت: حاضر يا بابا
ثم وجهت حديثها لشقيقها: "تامر" مش
هينفع توصلني عشان رايحه أنا
و"لمار"

رد "تامر" بضيق: طيب، فين عمتو؟

أشار "حسني" للأعلى: فوق

غادرت "ديالا" المنزل وصعد "تامر"
للأعلى وهو يهتف بنبرة عالية:

-عمتو يا عمتو

تتهد "حسني" بقلعة حيلها وهو يردد:

والله محدش خلاك كده غيرها، ربنا

يهديك ويصلح حالك يا بني

"في منزل أشرف"

جلس "أشرف" بجانب ابنه وهو يضع
قماشة بيضاء على جبينه لتخفف
الحرارة، فولجت أمه لداخل وقالت بقلق:
- قوم يا "أشرف" ناملك شوية انت
راجع من الشغل تعبان وأنا هخلي بالي
منه

رد "أشرف" بهدوء: أنا يمكن اسافر
بكرة عندي شغل ومش عارف هرجع
امتى، خلي بالك منه ومن نفسك يا ماما
ولو أحتاجتي حاجة ولا "مازن" تعب
أتصلي بـ "إبراهيم" هيجي على طول
ربتت "منى" على يده وهي تقول: خلي
بالك من نفسك، ومتشغلش بالك بينا
واتصل بي طمني عليك

رد "أشرف" عليها وهو ينهض لكي

يتجهز للخروج:

-سببها على الله

وبعد دقائق خرج "أشرف" من المنزل

بعد ارتدائه لسروال بالألوان الأسود

وجاكت جلد أسود وهو يسير بكبرياء

وغرور إلى أن وصل لسيارة فقاد

بسرعته المعتادة إلى أن توقف أمام

المقر وتوجه إلى مكتبة واثناء ذهابه

توقف امامه عسكري بأحترام وادى

التحية وهو يقول:

-اللواء طالب يشوف سيادتك

رد "أشرف" وهو يتحرك من أمامه:

تمام

وذهب إلى مكتب اللواء طرق العسكري
الباب ودخل هو بكل شموخ وكبرياء
وقال باحترام:

-حضرتك طلبتني

أشار له اللواء بجديّة: اتفضل أقمع يا
سيادة المقدم

جلس "أشرف" وانتظر أن يتحدث
اللواء ولكن ظل صامتٍ فقطع هو
الصمت:

-هو في إيه يا فندم؟

اللواء: جاتنا معلومات عن مجموعات
إرهابية بتدخل الجامعة ويبضحوا على
الطلاب باسم الدين عشان ينضموا ليهم
ومش بس الشباب لا وكمات البنات
بيستغلوهم اسوء استغلال ويبعتولهم

بنات تضحك عليهم وتحكيهم عن جهاد
النكاح وفضلة عشان يحلوا اللي
بيعملوا والشباب من كتر حماسهم
بيصدقوا

هتف "أشرف" بغضب: لدرجة دي
الشباب بقيت اغبية

اللاء: وأكتر دول بيقولوا ولهم أن
التلفزيون حرام والتكنولوجيا وفي بنت
ابوها طردها من البيت بسبب أنها
اتخانقت معاه عشان أمها كانت قاعدة
مع ابوها بيسمعوا ماتش بتقوله ازاي
سايب مراتك تتفرج على الرجالة وأنت
قاعد ملكش لازمه وهي حاليًا في
المستشفى بسبب أن ابوها وقعها على

السلم بالغلط ودي هي اللي هتوصلنا
للجماعة

استفسر "أشرف" بتعجب: طيب ازاي
شباب جامعية يصدقوا كلام زي ده؟

اللاء: حب الدين بيتولد معانا والشباب
بيكون واخذهم الحماس للجهاد في سبيل
الله وهما بيسـتغلوا دا وبيكونوا فاكـرين
أن اللي بيعملوا ده صح

تتهـد "أشرف" وهو يقول: والمطلوب
مني

اللاء: أنت هتسافر ومعاك "باسـل"
بصفتكم من ضمن الشباب اللي هتهرب
وتبقى فرد من المجموعة وتعرف مين
بيساعدهم هنا و"أحمد" هيتواصل مع

البنيت بطريقة غير مباشرة وأي معلومة
هيعرفها هيتواصل معاك

قال "أشرف" بجديّة: تمام يا فندم بس
أنا كان عندي مهمة...

قاطعة اللواء: عارف، هيسافر مكانك
"حسين"

تسأل "أشرف" عن الموعد: تمام،
السفر امتي؟

وضع اللواء امامه ملف: الملف ده فيه
كل المعلومات اللي هتحتاجها وكممان
جواز سفر باسم مستعار

نهض "أشرف" ثم أدى التحية
العسكرية وقال: تمام يا فندم

وغادر المكتب وارسل رسالة لـ
"ياسين" أنه لا يستطيع السفر مكانه

لمهمة عاجلة، ودخل إلى مكتبة ليدرس
القضية الموكل بها
"في منزل دعاء"

كانت "دعاء" تجلس بجوار والدها
"مصطفى"، واضعة رأسها أرضاً بخجلٍ
شديد. أمامهما كان يجلس "فارس"
بصحبة والده ووالدته، بينما الفتيات
يختبئن خلف الباب، يتصتن بحماس
على ما يحدث.

تحدث "فارس" باحترام شديد مع
"مصطفى" قائلاً:

-كدا يا عمي، حضرتك عرفت كل حاجة
عني، بتمنى توافق.

نظر "مصطفى" إليه بابتسامة خفيفة
وقال:

-ده شرف ليا إني أناسبك، بس الرأي
الأول والأخير هو رأي دعاء.

تحولت الأنظار نحو "دعاء"، التي
خجلت بشدة وظلت صامته.

عاد "مصطفى" ليكرر سؤاله برفق:

-إيه رأيك يا دعاء؟

وفجأة، اقتحمت "نور" المكان كالبرق
وقالت بحماس:

-موافقة طبعًا يا عمي! هو في كلام؟!

نظرت والدة "فارس"، "روبين"، إليها
بضيق وقالت:

-هو أنتِ العروسة ولا هي؟

ردت "نور" بمرح:

-أنا وهي واحد.

لكن "دعاء" لم تتحرك ولم ترد، مما
أثار استياء "روبين"، التي كانت تشعر
أنها أجبرت على الحضور.
قالت "روبين" بضيق:

- خلاص سبوها تفكر ويردوا علينا
بعدين.

نظر "فارس" إلى "دعاء" بحزن،
يتمنى أن تكسر صمتها وترد. عندها،
اقتربت "نور" من "دعاء" وهمست لها
بغضب مكتوم:

- ردي يا بنت الفرطوس، وإلا هخلي
يومك أسود زي وشك! هتموتي عليه
وعملاي مكسوفة!
ثم ضربتها فوق رأسها.

بعد لحظات من الصمت، وأمام نظرات الجميع، تجرأت "دعاء" وردت بخجل:
-اللي تشوفه يا بابا... أنا موافقة عليه.
ارتسمت السعادة على وجوه الجميع باستثناء "روبين"، التي لم تكن راضية تمامًا.

قال "مصطفى" بحماس:

- "طيب على بركة الله... نقرأ الفاتحة."

لكن فجأة، دوى صوت "نور" مجددًا:

-لا! الفاتحة لا!

استدار "فارس" نحوها بحدة غير

مقصودة:

-لا ليه؟!!

أجابت "نور" بجدية:

-لأن قراءة الفاتحة بدعة، وأيام النبي
والصحابية كانت الخطوبة من غير حاجة
اسمها قراية فاتحة. ولا إيه يا شيخة
دعاء؟

أومات "دعاء" موافقة بخجل:

-نور معها حق.

سأل "فارس" بنبرة متعجبة:

-والمطلوب يا أستاذة نورهان؟

ردت "نور" بفرحة شديدة:

-نتفق النهاردة على كل حاجة، وبكرة

نجيب الشبكة ونجهز لكتب الكتاب.

نظر "فارس" إلى "مصطفى" بسعادة

وقد راق له الكلام:

-إيه رأيك يا عمي؟ أنا موافق.

اعترضت "روبين" قائلة:

-كده استعجال، حتى البنت مفكرتش ولا
عطوها فرصة تفكر.

قاطعتها "نور" بنبرة عملية:

-خير البر عاجله يا خالتي.

ثم صرخت بصوت عالٍ: زغرطي يا بت
يا بسملة!

وبالفعل، انطلقت "بسملة" بالزغاريد،
وبدأت البهجة تعم المكان. وافق والد
فارس على العشاء بعد إصرار شديد من
"مصطفى"، واتجهت الفتيات لتجهيز
الطعام.

بعد العشاء، جاء الوقت المنتظر: جلوس
"فارس ودعاء" معًا. خرج الجميع من
غرفة السفارة، لكن... بالطبع، لم تترك

"نور" اللحظة تضيع. جلست معهم ببساطة، وكان وجودها طبيعي تمامًا. قال "فارس"، وهو ينظر إلى "دعاء" بحب:

-إيه يا دودو؟ مش موافقة ولا إيه؟ ساكتة من الصبح.

ردت "نور" سريعًا بمرح:

-إحنا هنهرج؟ ما أنت عارف إنها موافقة، هي بس مكسوفة.

قال "فارس" بغیظ وهو ينظر نحو "نور":

-أنا بكلمها هي، مش أنت.

نظرت "نور" له بتذمر ثم صمتت. لكن "دعاء" بقيت خجلة تهمس أخيرًا:

-أكيد موافقة، بس مش متعودة أتكلم مع حضرتك.

شهقت "نور" بصدمة مصطنعة:

-حضرتك مين يا بت المستخبي؟ دا هنا دفنيه سوا!

نظرت "دعاء" إليها بصدمة وهمست لها بغضب مكبوت:

-هتفضحيني يخرب بيتك! ماشي يا نور الكلب، لما يمشي هوريكي.

تحركت "نور" خارج الغرفة، فبتسم "فارس" بخفة وقال لها:

-سيبك منها يا دودو... أنا عايز أقولك حاجة.

تحاشت "دعاء" النظر إليه وسط نظراته
التي كانت تلتهمها بصمت، وسأله
بخجل:

-حاجة إيه؟

أجاب "فارس" وهو يبتسم:

-دودو، أنا بـ...

لكن صوته قُطِع فجأة عندما عادت
"نور"، ومعها "الدعم". اقتحمت
"جيهان" الغرفة وقالت بسخرية:

-بتحبها، كنا عارفين يا دكتور إنك
بتحبها، وهي متيلة على عينها بتحبك،
إيه الجديد؟ كله عارف ما عدا عم الحج
مصطفى.

نفخ "فارس" بضيق ونظر نحو "دعاء"
مجددًا وهو يحاول استجماع أفكاره.

لكن، بالطبع، الفتيات لم يتركن الفرصة ليمر هذا المشهد بسلام. جلسن جميعًا على الأرض وكانهن يشاهدن فيلمًا رومانسيًا، بينما "دعاء" تحاول كنتم ضحكها من عبث صديقاتها.

بدأت "دعاء" تشعر بالإحراج أكثر، بينما كانت عينا "فارس" مثبتتين عليها بابتسامة دافئة. كانت تريد الهروب من الموقف، لكن "نور" وأصدقائها جعلوا كل شيء أكثر صعوبة.

هكذا، استمرت الأجواء بين خجل "دعاء"، حماس "فارس"، وعبث "نور" وصديقاتها. أما "فارس"، فقد وجد نفسه مضطرًا لمواصلة معركة

"الاعتراف" في ظل حضور جمهور غريب الأطوار.

قال "فارس" وهو يحاول لفت انتباهها مجدداً:

-وكان عينيكِ وُلدتا من خضرة الغابات
في مغيب الشمس، ليكتمل السحر على
بشرتك السمراء فتشبهين لوحة رسمتها
الطبيعة بإتقان.

وقبل أن تُظهر "دعاء" أي رد فعل،
انطلقت "نور" بضيق، مقاطعة كلامه:

-بالله عليك أتكلم بالعربي! عشان مش
فاهمة ولا كلمة!

نظرت "جيهان" إليه ببرود وسخرت
قائلة:

- "فاكر نفسه محمود درويش؟ مقدرش
يقولها: أنا بحبك يابت يا نوسه، زي
اللمبي. عامل فيها شاعر!
صفت "نور"، "بسملة" على رأسها
وهي تتسأل: بتبصي على إيه؟
ضحكت "بسملة" وهي تنظر للأرض
قائلة:

- "أنا بشوف الترجمة! مش هي بتبقى
تحت؟"

هذه المرة، لم تستطع "دعاء" أن
تتمالك نفسها، فسقطت بجانبهن وهي
تضحك بشدة. أما "فارس"، الذي نفذ
صبره تمامًا، نظر إليهن جميعًا بضيق ثم
نهض وهو يقول بحسم:

- "أنا مش هقعّد معاكم ثانية واحدة! إنتو
مجموعة مجانيين!"

خرج "فارس" من الغرفة غاضبًا، تاركًا
الفتيات يضحكن بشكل هستيري. كانت
"نور" تفهقه وهي تقول:

- حلوة قوي! هو افكر نفسه في فيلم
رومانسي، وطلعنا إحنا بنهزر!

نظرت "دعاء" نحو الباب الذي خرج
منه "فارس"، ثم قالت بهدوء وهي
تحاول كبح ضحكتها:

- كدا زعل يا نور.

قالت "جيهان" بتهكم:

- ما هو ده اللي عايزاه؟

لكن "نور" لم تسكت وأضافت بحماس:

- عادي عادي، بكرة يتعود على جناتنا.

وصدقيني يا دعاء، فارس دا مش
هيسيبك قبل ما يجيب آخرك!
ثم وضعت يدها على رأس "دعاء" قائلة
بمكر:

-والله لأجهز لك خطة عشان تقولي له
أنا بحبك وتريحينا!
ضحكت "بسمة" وهي تضيف:

-وإحنا نقف نهتف من بعيد... تمام؟
كانت "دعاء" تحاول كتم ضحكتها، لكنها
لم تستطع، فأشاحت بوجهها بعيداً عنهن
حتى لا يزيد الأمر سوءاً. أما في
الخارج، كان "فارس" يقف مع والده
الذي لاحظ توتره.

سأل والده بابتسامة خفيفة:

-مالك يا فارس؟ إيه اللي مضايقتك؟

أجابه "فارس" وهو ينفخ بضيق:

-مجموعة مجانين يا بابا! أنا مش

عارف أتعامل معهم. وبعدين دعاء...

مش عارف أطلع منها كلمة واحدة!

ضحك الأب بخفة قائلاً:

-هدي نفسك يا بني. هي البنت خجولة،

وأكيد مع الوقت هتتكلم معاك براحتها.

نظر "فارس" نحو الباب مجدداً ثم تمت

لنفسه بابتسامة صغيرة:

-بكرة تشوفي يا دودو، أنا مش هسيبك

غير لما تردي عليّ زي ما أنا عايز.

وهكذا، انتهى اليوم وسط أجواء من

البهجة والمرح، حيث ظل "فارس"

عالقاً بين إعجابه بدعاء وجنون

صديقاتها، بينما الفتيات و"نور"

بالتحديد لن يترك الأمور تمر مرور
الكرام.

ولكن، يا ترى، ما الذي سيحدث في
اللقاء القادم؟ وهل ستتغلب دعاء على
خجلها؟

"في المشفى التي يعمل بها إبراهيم"

جلست على المقعد أمام رفيقتها بكبرياء
وغرور تستمع لها بصمت إلى ان قاطعة
حديثها بغضب:

- "مي" آخر مرة هسمحك تفتحي
الموضوع ده أنت سامعة

ردت "مي" بهدوء: في إيه يا "هاجر"؟
لازم ترجعي لجوزك عشان ابنك على
الأقل

قالت "هاجر" ببرود: تصحيح طليقي يا
روحي ، وأنا مش عشان ابني ارجع
لواحد زي ده... كمان متقلقيش هتجوز
قريب

تغاضت عن الجزء الأخير وردت على
الأول:

- امال عشان إيه؟ ممكن ترجعيله شفتي
حالة ابنك عاملة ازاي؟

صمتت "هاجر" لبضع ثواني لكي تتحمل
ألم قلبها لا تريد أن يراها أحد ضعيفة:

- شفته ... وعارفة كويس ان كدا أفضل
ليه؟ شويه وهيرجع لحضني، وبكره

هيشكرني اني اطلقت من واحد زي
أبوه، كان هيدمر بجد لو عاش بينا

أردفت "مي": بس على الأقل أفضل أنه
يكون عايش وسط أبوه وامه مش
عايش مع أبوه ومحروم من أمه أو
العكس أنا جربت الشعور ده وصعب
أوي على الطفل أنه يبعد عن حد فيهم
ردت عليها "هاجر" وقد عادت
لبرودها:

-لا مش أفضل... إيه الأفضل في وجوده
وسط صراع ملوش نهاية... أنا شايفة
كدا احسن على الأقل هيكون شخص
قوي مش معتمد على حد وكمان عشان
اقدر اتابع كل تصرفاته من بعيد واعرف
اتعامل معاه ازاي

تهدت "مي" وردت بلامبالاة: على
العموم براحتك انتِ ادراي بمصالحة

ابنك... المهم قوليلي قصدك إيه بهتجوز
قريب

صمتت تفكر قليلاً لترد ببساطة وهي
تتناول قهوتها بتلذذ:

-هتجوز "إبراهيم".

نظرت لها "مي" بصدمة: ازاي؟

ردت "هاجر" بثقة:

-أنتِ عارفه أنه كان بيحبني من زمان

هروح اقلوله إني عايزة اتجوزة عادي

ضحكت "مي" بسخرية: انتِ مجنونة

صح... كان بيحبك زمان قبل ما ترفضية

وتتجوزي... ثم إن ازاي تنزلي من

نفسك وتقولي لواحد تعالى اتجوزني

ردت "هاجر" بلامبالاة: عادي

نهضت "مي" من على مقعدها بضيق:

-مفيش فايدة من الكلام معاك
وقبل أن تغادر وقفت على صوت
صديقتها التي تتحدث بسخرية:
- "مي" متنسيش تقولي لاخوك يخلي
باله من إبنى لحد ما يرجع لحضني
«كان المثل الشعبي الدارج يقول "تعرف
فلان؟ آه، عاشـرته؟ لاء، تبقي
متعرفوش" ما تحمـش على حد
بالظاهر، سمعته وهو بيتكلم عن نفسه؟
عن ذكرى له؟ عن مخاوفه؟ عن ظنونه؟
شاركك حنة من روحه؟ من أفكاره؟
بجد حرام نحكم على بعض لمجرد أن
احنا بنعرف نمثل كويس، احنا اتعودنا
نخبي كل حاجة جوانا، كبريانا وغورنا
بيخاينا نمنع نفسنا من الضعف قدام حد،

عشان كدا بلاش تحكموا على حد لمجرد
صمته المبالغ فيه أو تصرف أنت
متعرفش سببه إيه»

الفصل العاشر

"لا تجبر أحداً على الاهتمام بك أو السؤال عنك؛ فمن يحبك حقاً سيبحث عنك كما لو كان يبحث عن شيء ثمين ضاع منه. فالاهتمام صفة لا يمكن لأحد أن يتصنعها، فلا تحاول أن تجبر أحداً على الاهتمام بك، فتصبح كمن يسقي شجرة صناعية وينتظر منها أن تثمر!"

ذهبت كل واحدة منهن إلى منزلها بعد قضاء يوم جميل ومتعب. فالتسبت يوم إجازة، لكن "نور" كان لديها كورس، فذهبت بمفردها إلى السنتر. وأثناء ذهابها، توقفت سيارة أمامها فجأة، وخرج منها أحدهم ليجذبها بقوة إلى

داخل السيارة، لتتطلق بعدها بسرعة البرق.

كانت تسير في منزلها بخطوات راقصة وهي تغني بسعادة غامرة، تتمايل يمينًا ويسارًا وكأنها فراشة تتنقل بين الزهور. اليوم كان رائعًا بكل ما تحمله الكلمة من معنى، فصديقتها المقربة أخيرًا حصلت على حب حياتها الذي انتظرته لأكثر من ثلاث سنوات. لظالما دعت الله أن يجمع بينهما، واليوم استجاب الله لدعواتها وتمت خطبتهما على أكمل وجه.

في تلك الأثناء، كانت "جيهان" تردد بصوت عالٍ وهي تدور في أرجاء المنزل:

- "يا ليلة العيد أنستينا... وجدتي الأمل
فينا... يا ليلة العيد!"

فجأة قاطعها صوت والدها "عثمان"
بحدة، وهو يطل عليها من بعيد بنظرة
ساخرة:

- "عيد إيه يا بنت المجنونة؟ احنا في
أول السنة!"

توقفت "جيهان" للحظة وابتسمت
بمشاكسة قائلة:

- وإيه يعني يا بابا؟ يعني مغنيش ولا
إيه؟

رد "عثمان" وهو يهز رأسه بضيق:

- لا، ما تغنيش... شوفي حاجة نافعة
تعملها بدل الرغي ده!

لم تفوت "جيهان" الفرصة لتمارحه
مجددًا، فقالت بمرح وهي تضع يديها
على خصرها:

-بابا هو أنا مرات أبوك وأنا مش
عارفة؟ مالك مش طايقتي ليه؟

نظر لها "عثمان" بنظرة صارمة هذه
المرة وقال:

-بس يا أم لسان طويل، وتعالى...
عايزك في موضوع مهم.

لحقت "جيهان" بوالدها بخطوات مرحة،
واتخذت مكانها بجواره على الأريكة.
نظرت إليه بتفاؤل وابتسامة لا تفارق
وجهها وقالت بخفة دم:

-خير يا حج!-

تجاهل "عثمان" طريقها المرححة ونظر
إليها بجدية وهو يقول:

- "محمد" بن عمك طالب إيدك.

ضحكت "جيهان" ساخرة وردت
بسخرية طفولية:

-ليه؟ هو عايز إيدي يعمل بيها إيه؟ ما
عنده اتنين... ولا هو طمع وخلص!

ازدادت جدية "عثمان" هذه المرة وهو
يكرر بصرامة:

-جيهان، مش بهزر.

تبدلت ملامح "جيهان" إلى الحزن،
خففت صوتها وهي تقول بحزم:

-ولا أنا يا بابا... أنت عارف رأيي في
الموضوع ده.

حاول "عثمان" إقناعها بهدوء:

-بس ده ابن عمك، مهندس قد الدنيا،
وعايزك... وأنا موافق لأنني مش هلاقي
أحسن من ابن أخويا لبنتي.

أخذت "جيهان" نفسًا عميقًا، وكأنها
تحاول كبح مشاعرها. نظرت له بحزم
وقالت:

-بغض النظر عن أنك مش هتلاقي
أحسن منه، بس هو مغرور يا بابا. أنا
مستحيل أوافق على واحد شايفنا كلنا
أقل منه عشان دخل هندسة وأنا دخلت
حقوق. ولو حضرتك موافق فده حقك،
بس أنا مش موافقة. بعد إذتك يا بابا.

وقفت فجأة وغادرت المكان بخطوات
مسرعة قبل أن يرد والدها. دخلت
غرفتها وأغلقت الباب خلفها، وكأنها

تحاول الهروب من مواجهة غير مرغوبة. جلست على الأرض تحاول السيطرة على دموعها كي لا يراها أحد، لكن وحدتها سمحت لدموعها أن تنهمر بحرية.

تذكرت "جيهان" تلك الأيام الماضية، عندما ظهرت نتيجة الثانوية العامة وسخريته منها كانت قاسية كخنجر اخترق قلبها. تذكرت طفولتها معه، ذلك الحب الذي نما دون أن تشعر، لكنه تحول مع مرور الوقت إلى شيء يشبه اللامبالاة. كيف تحول "محمد" من شخص كانت تراه كل شيء إلى مجرد ذكرى مزعجة في حياتها بسبب غروره وكلماته القاسية؟

قطع سير أفكارها رنين هاتفها فجأة.
نظرت إلى الهاتف بارتباك، ومسحت
دموعها سريعاً، ثم أجابت بصوت
مرتجف:

-ألو؟

كانت "بسملة" تجلس على مكتبها
تدرس بتركيز شديد. حتى الآن، لم يكن
هناك ما يشغل تفكيرها سوى تحقيق
حلمها بأن تصبح وكيل نيابة. كانت
الأولى على دفعتها في الأعوام الماضية،
وتطمح أن تكون الأولى في هذا العام
أيضاً، ليصبح حلمها حقيقة ملموسة.
كانت تراجع دروسها بهمة، مستمتعة

بشغفها بما تفعله، لكن فجأة قُطِع
تركيزها على طرقات الباب.

فردت "بسملة" بابتسامة: ادخلي يا
ماما.

دخلت "حورية" بهدوء، وهي تحمل بين
يديها كوبًا من العصير، وابتسامة دافئة
تزين وجهها. نظرت إلى ابنتها بفخر، ثم
جلست على حافة المكتب بالقرب منها،
وضعت يدها على كتف "بسملة" بحنو،
وقالت بلطف:

-حبيبتي، عاملة إيه؟

ردت "بسملة" برضا: "بخير الحمد لله،
بابا فين؟

أردفت "حورية": طلع بره... احكي لي،
عملتي إيه عند "دعاء"؟

ابتسمت "بسملة" بتلقائية، وعادت
بذاكرتها إلى اللقاء الذي جمعها بـ
"دعاء" اليوم، وهي تتحدث عن
التفاصيل بتفصيل وحماسة. كانت
"دعاء" صديقتها المقربة، وكانت دائماً
تملاً حياتها بالمغامرات والضحك.

ضحكت "حورية" وهي تقول:

-نور دي مشكلة.

فقلت "بسملة: رغم كل اللي بتعمله،
بس طيبة خالص. عارفه يا ماما، كان
نفسي يكون عندي أخت، بس بعد ما
تعرفت عليهم، حمدت ربنا إنه استجاب
لدعائي وبقي عندي ثلاثة مش واحدة.

ربتت "حورية" عليها وقالت: ربنا
يسعدك ويفرحك يا قلبي، وأفرح بيكي.

ابتسمت "بسملة" وقالت بنبرة مرحة،
تحاول أن تخفف من حدة اللحظة:

-كده ظلم! أنتِ بتدعي لبنت واحدة،
وأنتِ عندك أربعة. وانجح وانجح! كملِي
يلا.

ضحكت "حورية" وقالت بلطف:

-ربنا ينجحكم وافرح بيكم ويسعدكم،
وأشوفكم أحلى عرايس في الدنيا كلها!
كده حلو.

احتضنت "بسملة" والدتها بحب، ولم
تستطع منع ابتسامتها الواسعة وهي
ترد:

-حلو يا حلو، أنتِ.

كانت الأجواء في المنزل تضج بالمرح،
كمالو أن السعادة قد اجتمعت بين
جدرانه. كانت "ديالا" تشع حيوية
ونشاطاً، تدخل غرفته كالإعصار وهي
تصيح بمرح، غير مبالية بما سيحدث.

"ديالا" بحماس وهي تهتف: تيمو... يا
تيمو!

رفع "تامر" رأسه من على الوسادة
بضيق واضح، وقد بدأ النوم يسيطر
عليه. قال بتذمر وهو ينظر لها بنصف
عين:

- عايزة إيه؟

ابتسمت "ديالا" بخبث قبل أن ترد
سريعاً:

- حذر فذر... عمتو عملت إيه؟

أجابها "تامر" من وسط نومه وكأنه
يعرف السيناريو تمامًا:

-حطت مناكير في أيدها اليمين... صح؟

توقفت "ديالا" للحظة وهي تنظر له
بدهشة، ثم انفجرت بالضحك بشدة.
كانت عمته "إيمان" دائمة التذمر لعدم
قدرتها على وضع طلاء الأظافر في يدها
اليمنى.

فضحكت "ديالا" وقالت: لا... المرة دي

عملت أكل وعايزة الكل ينزل يأكل!

اعتدل "تامر" فجأة وهو ينهض من
على الفراش بفزع كمن سمع خبرًا
مرعبًا وقال بخوف:

-لا... انسي! المرة اللي فاتت قعدت
يومية في السرير! قوليلها "تامر" نام
ولامات... أي حاجة!

"ديالا" بضحكة خبيثة: عمتو هتزععل،
وهي قالت كلكم لازم تاكلوا.

قال "تامر" بعد تهيدة قصيرة وهو
يستسلم لقلبة الحيلة بعد أن رأى
إصرارها:

-طيب... المرة دي عاملة أكل إيه؟

"ديالا" وهي تتصنع الجدية:
"مرضيتش تدخل حد المطبخ وقالت:
مفاجأة!

اتسعت عينا "تامر" وقال بتهكم ساخر
وهو يشير إلى الباب:

-ربنا يستر... هتصل بالإسعاف وأجي
وراعي!

ضحكت "ديالا" وهي تلوح له بيدها
قائلة:

-أوك، بس متأخرش!

"تامر" ساخرًا: "طيب ياختي.

"في غرفة السفارة"

كان الجميع يجلس على الطاولة بترقب،
وهم يراقبون "إيمان" التي تقف بفخر
أمامهم وتبتسم بثقة.

"إيمان" بابتسامة عريضة: يلا الكل يبدأ
بسم الله... عمالكم بشاميل... أنما أي

عسل!

كانت "إيمان" شابة مرحة، نحيلة وطويلة، لم تتزوج بعد، لكنها وجدت في عائلتها كل حياتها ولم ترغب يوماً في تركهم.

تبادل الجميع النظرات في صمت؛ "حسني" وزوجته، "تامر" و"ديالا"، ثم "كريم" و"سلمى". بدا على وجوههم الشك والخوف من التجربة الجديدة.

"إيمان" بحزم: الكل يبدأ مع بعض!
"ديالا" وهي تهمس لتامر بمرح وخوف:

- اتصلت بالإسعاف يا ض؟ المرة دي عايزانا ناكل مع بعض يعني موتة جماعية!

"تامر" وهو يغمز لها: "واد... في
عينك! اتصلت ياختي!

حاول "كريم" أن ينقذ نفسه من الموقف
وقال بنبرة رسمية وهو ينظر لساعته:
-يا جماعة... أنا عندي شغل ضروري
في المستشفى. مش هينفع أتأخر... دي
أرواح ناس!

ردت "إيمان" بحدة: مش هتمشي غير
لما تأكل! مش كل مرة تضحك عليا
بأرواح الناس!

قال "تامر" بمرح: إيوا يا عمتو... ده
بيكذب عنده أجازة.

نظر "كريم" إلى "تامر" بغضب وقال
بنبرة خافتة:
-ماشي يا كلب.

بدأت "ديالا" أول من يتذوق الطعام
بمعلقة مكرونة بشاميل، لتتوقف فجأة
وتقول بفرحة غريبة:

-الله! دي عسل!

نظر لها "تامر" بريية وقال:

-مش معقول... عمتو أخيراً اتعلمت
تطبخ!

وبحركة مفاجئة، صفعته "إيمان" على
رأسه، فقال "تامر" وهو يغمز لها
بابتسامة:

-دأنتِ الحب... يلا حد يأكل تاني!
بدأت "سلمى" الأكل هي الأخرى، ثم
نظرت إلى "ديالا" بدهشة وقالت
بإعجاب:

-الله! فعلاً حلوة.

ضيق "كريم" عينيه وهو يراقبهم بشك:

-بجد؟ يعني مش هتصلوا بالإسعاف زي كل مرة؟

أشارت له "سلمى" بمعنى: "اطمئن!"

جلس الجميع يأكلون، لكن نظراتهم لم تخلُ من الاستغراب. كانت الصدمة تتسع على وجوههم كلما تذوقوا الطعام. وأخيرًا، انفجرت "ديالا" في الضحك بصوت عالٍ، تبعتها "سلمى"، حتى سقطتا أرضًا من شدة الضحك.

نظر الجميع إليهما بذهول، ثم ما لبث أن انضما إليهما في موجة ضحك عارمة. ووقفت "إيمان" في مكانها غاضبة ومستفسرة:

-بتضحكوا على إيه؟

قال "تامر" وهو يحاول كتم ضحكه:

-إنتي حاطة إيه في البشاميل يا أميتي؟

"إيمان" بغضب: إنتوا بتضحكوا على

إيه؟

ناولها "كريم" الملعقة وقال وهو

يضحك:

-خدي... كلي يا عمتو!

تناولت "إيمان" الملعقة ووضعتها في

فمها. وما إن تذوقت الطعام، حتى

انفجرت بالضحك معهم.

فقال "حسني" بسخرية: حاطة سكر في

الأكل يا إيمان! وأنا أقول مش معقول

تعملي أكل حلو وهم يقولوا عسل... طلع

عسل بجد!

"تامر" وهو يصفق بمرح: سكر يا

إيمان... سكر! يا خسارة تعبي فيك!

قالت "سلمى" وهي تضحك: لا يا

جماعة، الغلط المرة دي بسبب "ديالا"!

هي اللي بدلت علبة السكر بالملح عشان

نشوف خالتو هتعمل إيه!

هتفت "ديالا" بصدمة: يا فتانة! دي لو

بيعذبوكي مش هتعرفي كده!

ركضت "إيمان" خلفهم وهي تصيح،

بينما ركض الجميع في أرجاء البيت

يضحكون بمرح، كأن السعادة قررت أن

تتوقف عندهم لبعض الوقت.

لكن فجأة، قاطع هذا الجو الجميل صوت

"تامر" وهو يقول بجدية:

-أنا عايز أتجوز!

توقفت الضحكات فجأة، واتسعت عيون
الجميع بدهشة.

كانت "جيهان" تجلس في غرفتها عندما
رن الهاتف، فردت بابتسامة وهي تضع
السماعة على أذنها:
-ألو... أيه يا عمتو؟

استمعت بصمت بينما تتغير ملامحها
تدريجياً إلى قلق.

"جيهان" مطمئنة: لا، مكلمتهاش، هي
كان عندها كورس والمفروض خلصت
من بدري.

توقفت للحظة، ثم قالت بحزم: خلاص
متقلقيش، أنا هكلم حد من البنات

يشوفها. ماشي... هرن عليكى تانى.
سلام.

وضعت الهاتف جانبًا وهي تشعر بتوتر
يتسلل إلى قلبها، ثم قررت الاتصال
بصديقة "نور"، "أحلام".

"جيهان" وهي تتحدث بجديّة: السلام
عليكم يا أحلام!

"أحلام" بترحاب: وعليكم السلام، عاملة
إيه يا جيهان؟

"جيهان" مباشرة: خلصتوا الكورس
بتاع النهاردة؟

"أحلام" باستغراب: أيوة، خلصناه من
زمان.

توقفت "جيهان" للحظة وهي تحاول
استيعاب الكلمات، ثم قالت بقلق:

-طيب... هي "نور" اتأخرت ليه؟
متعرفيش؟

"أحلام" بدهشة: "إيه؟! نور مجتش
أصلاً!

اتسعت عينا "جيهان" وهي تقف فجأة:

مجتش... إزاي!؟

ردت "أحلام": معرفش والله، يمكن
حصلها حاجة، فونها كان مقفول من
بدري.

"جيهان" وهي تحاول تهدئة أعصابها:

-خلاص، أنا هظمنك. سلام.

أغلقت "جيهان" الهاتف وهي تتمتم

بغضب ممزوج بالخوف:

-فينك يا زفتة الطين!

جلست لثوانٍ تستجمع قواها، ثم اتصلت
بصديقتها الأخرى "دعاء".

"دعاء" بمرح وهي ترد: إيه يا جيهان؟
وحشتك؟

"جيهان" بقلق واضح: دعاء... آخر
مرة كلمتي "نور" إمتي؟

شعرت "دعاء" أن شيئاً غير طبيعي
يحدث، فردت بحذر:

-في إيه؟ مالك ومالها "نور"؟

"جيهان" وهي تمشي بقلق في الغرفة:
معرفش، فونها مغلق، ومرحتش
الكورس، ومش في البيت... واتأخرت
أوي!

صمتت "دعاء" للحظة، ثم صاحت
بفرع:

-إيه؟! أنا مكلمتهاش من ساعة ما كنتوا
عندي! يا ربي، راحت فين دي؟ أنا
خايفة عليها أوي... "نور" دي هتموتنا
كلنا، نقصين عمر!

"جيهان" بحزم وهي تحاول السيطرة
على الوضع: يا ربي بس ترجع بخير...
أنا هعلمها الأدب! مية مرة قتلها الفون
ميتقلش! اتصلي بـ "بسملة"، شوفي
آخر مرة كلمتها إمتى.

"دعاء" بسرعة: ماشي، هكلمها حالاً.

في تلك اللحظات، بدأ الجميع رحلة
البحث عن "نور". حالة من الذعر
والقلق عمّت كل من يعرفها. الاتصالات
لم تهدأ، والأسئلة تتكرر بلا إجابة: "فين
نور؟ راحت فين؟"

تحرك والد "نور" إلى قسم الشرطة،
لكنه عاد محبطاً بعد أن قيل له:

"الضابط" بيروود: لازم يمر ٢٤ ساعة
على اختفائها عشان نبدأ نبحث رسمياً.

أما والدتها، فقد خرجت تبحث عنها عند
كل الأصدقاء والمعارف، لكن الإجابة
كانت واحدة:

- "محدث شافها."

في منزل "نور"، كانت "جيهان"،
"دعاء"، و"بسمة" يجلسن معاً، وقد
بدأ الخوف ينهش قلوبهن. الثلاث فتيات
لم يكفنن عن الدعاء والدموع تنهمر من
أعينهن.

"جيهان" وهي تبكي بدعاء خافت: يا
رب... يا رب رجّعها لنا بخير

أما والدتها، التي كانت أشدهم خوفًا،
جلست على الأريكة وهي ترتجف. كانت
عيناها تائهتين وكأنها تبحث عن ابنتها
في الفراغ. همست بصوت خافت وهي
تبكي:

-يا ترى أنتِ فين يا "نور"؟!!

وقبل أن تكمل جملتها، سقطت فجأة على
الأرض مغشيًا عليها. عم الصمت المكان،
ولم يتبق سوى أصوات شهقات البكاء
ودعوات تُرفع إلى السماء، بينما تساءل
الجميع:

- "أين أنتِ يا نور؟ وما الذي حدث لك؟"

عاد "إبراهيم" إلى منزله بعد قضاء ليلة
مرهقة برفقة المرضى. بمجرد وصوله،
توجه مباشرة إلى غرفته، ثم دخل

المرحاض على أمل أن يخفف بعضاً من
إرهاق جسده. قضى ما يقارب ربع
ساعة بالداخل، ليخرج بعدها وهو يجفف
شعره بالمنشفة. رفع رأسه نحو الفراش
ليلمح صغيرته "حنان" جالسة تنتظره،
فابتسم لها بحب وهو يقف أمام المرآة
يصفف شعره.

"إبراهيم" بحنان: أنتِ كمان وحشتيني،
بس والله غصب عني... كان عندي شغل
كثير.

نظرت إليه "حنان" بحزن وهي تعاتبه
ثم قالت بتذمر:

-بس كده ظلم! كل يوم تقول هنخرج مع
بعض وفي الآخر تقول عندي شغل!

ثم أضافت بصوت منخفض ونبرة
حزينة:

- أنت وحشتني أوي... وبطلت تقعد تتكلم
معايا زي زمان، وأنا معنديش حد مقرب
مني غيرك... وكم ان مش بترضى
تخليني أخرج مع صحابي.

نظر لها "إبراهيم" بحزن عميق. هل
قصر في حق صغيرته مؤخرًا؟ ربما
بسبب ضغوط العمل، ولكن "حنان"
كانت وستظل عالمه كله. لن يسمح
للحزن بأن يسيطر على وجهها البريء.

تقدم نحوها ليجلس بجانبها، ثم عانقها
بحب أبوي وهمس بجوار أذنها:

-حقك عليا يا حنون، متزعليش مني...
بس أنا خايف عليك، عشان كده مش

عايزك تخرجي من غيري. وإن شاء الله
بكرة هاخذ أجازة، وهنقضي أحلى يوم
مع بعض... والمكان اللي أنتِ عايزاه
هنروحه. إيه رأيك؟

"حنان" بفرحة وهي تبادلله العناق:
موافقة طبعًا! بس يارب متغيرش
كلامك.

ضحك "إبراهيم" وهو يبتعد قليلًا عنها
ليقول مازحًا:

-لا، متخافيش... ده آخر كلام. وبعدين،
مرحتيش المدرسة النهاردة ليه؟"

"حنان" وهي تجلس بجواره: معنديش
حاجة مهمة، فقلت هقعد أذاكر في البيت.

"إبراهيم" بحزم أبوي وهو يشير إلى
الخارج: طيب يلا... من غير مطرود،

روحي ذاكري وسبيني أنام شوية،
عشان تعبان.

"حنان" بملل وهي تهتم بالوقوف: مانا
طول اليوم بذاكر!

"إبراهيم" بجديّة وهو يجلس على
الفراش:

-ذاكري تاتي، أنتِ شهادة، وعمايزك
تطلعي من الأوائل.

نظرت له "حنان" بتذمر واضح وقالت
وهي تغادر:

-حاضر! أوائل قال! مكنتش إعدادية دي
اللي هتدلونا بيها بذاكري ذاكري!

جلس "إبراهيم" على الفراش وأرخی
جسده المنهك. أغمض عينيه بهدوء،
لكنه ما لبث أن تذكر وجه صغيرته،

فابتسم لا شعوريًا. وفي خياله، عادت به
الذكريات لأول لقاء جمعه بها...

كان يعلم منذ اللحظة الأولى أنها له.
كانت تشببه كثيرًا، وكأنها نسخة
مصغرة عنه، بكل ما تحمله من طاقة
وجنون. قد تكون كارثة متحركة تجعل
أي عاقل يفكر ألف مرة قبل اتخاذ قرار
الارتباط بها، لكنه يعرفها أكثر من أي
شخص آخر. يعرف ما تخفيه خلف هذا
الجنون المبالغ فيه، ولن يتحمل أحد هذا
الجنون كما يفعل هو.

همس لنفسه بابتسامة: "هي لي...
وانتهى الأمر."

في مكان مظلم وفارغ، لا يضيئه إلا نور
خافت يتسلل عبر فتحة صغيرة، جلست

"نور" مقيدة على مقعد خشبي قديم.
كانت تحاول التحرك بقدر الإمكان لكن
قيودها تمنعها.

"نور" بصوت مرتفع وملامح غاضبة:
يا قوم! أين أنتم يا قوم؟!
ثم أردفت بلهجة ساخرة وقد بدأت
معدتها تصرخ جوعًا:

-طب يا بشر حد يرد عليّ! أنا جعانة،
عايزة أكل!

استرسلت في حديثها وكأنها تواسي
نفسها:

-منك لله يا بسملة، أنتِ السبب! فاكرة
نفسها أحمد زويل، مش عايزة نأكل
عشان نرجع بسرعة! هتخرّج تبقى

وزيرة، أيوه ما هو طموحك كبير، ولما
أرجع بس... لوريكي.

أخذت نفسًا عميقًا وعادت للصراخ
مجددًا:

-يا نااس! اللي هنا... حد يرد عليا، أمي
فين؟!!

صمتت فجأة حينما سمعت صوت باب
يُفتح بصرير مزعج. ارتجف قلبها قليلاً
وهي تتابع بأعين متسعة رجلاً ضخ
الجثة يدخل إلى الغرفة. لم تستطع رؤية
ملامحه بسبب الظلام، لكنه بدا كأنه
عملاق آلي من الأفلام.

"نور" وهي تتفحصه بتفكير مرتاب
وبلهجة ساخرة:

- هو جون مايكل عرف إني هنا وجي
ينقذني؟ لا لا... ده شكله جون سينا! ولا
أمال مين ده؟

الرجل بصوت عالٍ غاضب: اخرسي!
"نور" بلا مبالاة تجاه صراخه: هو أنت
اسمك إيه بس؟ أنا نور، و...

قاطعها الرجل بصوتٍ أعلى هذه المرة،
والغضب يتصاعد منه:
-قلتك اخرسي!

ردت "نور" بمرح وهي تتجاهل تهديده:
-عاشت الأسامي! بص بقي، أنا هقعد
عندكم شوية، فلازم تحترموني، وبعدين
أنا جعانة دلوقتي... عايزة أكل ومياه!
ولع النور، ولا أقولك؟ كفاية نوري
ههههه.

تجمد الرجل في مكانه للحظة، وهو ينظر إليها ببلاهة. كانت شجاعته أو ربما لا مبالاتها تفاجئه.

"نور" وهي تتحدث بثقة مصطنعة: صح، نسيت أسألك، أنت مستورد صح؟ تعرف حد من مصر؟ أنا كمان كنت مستوردة وشعري كان أصفر وعيني خضراء، بس استوت وبقيت زي ما انت شايف!

الرجل وهو يصيح بغضب وقد فقد أعصابه:

-اخرسي! أنت غبية؟ فاكرة نفسك فين؟ أنت مخطوفة!

"نور" بفرحة مصطنعة وكأنها لم تفهم خطورة الوضع: الله! ده بيتكلم عربي!

وبعدين عيب، احنا مستوردين زي
بعض، لازم يكون في احترام. ويلا بقى،
بطل رغي وهات الأكل والمياه!

أمسك الرجل بسلاحه ورفعته في وجهها،
لتراجع "نور" بخوف مفتعل وهي تلوح
بيدها بسرعة:

-إيه يا راجل، أنا كنت بهزر معاك!
عايزين بيّنا عيش وملح... بس خلاص،
لو زعلان مش لازم.

"الرجل" بتهديد وهو يقترب: لو سمعت
صوتك تاني، هخلص عليك.

ثم التفت وغادر الغرفة غاضبًا، وصفع
الباب بقوة خلفه.

"نور" وهي تتذمر بخفوت: براحة على
الباب يا عم، هو مش قدك!

سكتت لوهلة ثم عادت تحدث نفسها
بصوتٍ مرح وهي تحاول تسلية نفسها:

-مش لو كنت اتخطفت مع حد كان زمانه
مسأليني بدل القعدة دي! ماشي يا
أندال... أقلهم تعالوا معايا، واحدة عاملة
أحمد زويل، والتانية ماما كريمة،
والتالثة إيسا. بس اصبروا لما أرجلکم.

ثم وضعت رأسها على المقعد وهمست
بابتسامة ساخرة وخيال جامح:

-بس إيه يا بت يا نور... بقيتي مهمة
وبتتخطفني! بس يا ترى مين هيجي
ينقذني؟ أكيد مفيش حد... هو الخاطف
الشرير هيدخل دلوقتي، يشوفني ويتأمل
عنيا ويحبني، وبعدها يجيب المأذون
ويكتب عليّ! وبعدين يسأليني ويقول

امشي، أرد عليه وأقول هشوفك إزاي؟
يقولي هخلص آخر مهمة وهاجي مش
هسيبك تاني، ونعيش في ثبات ونبات
ونخلف صبيان ونبات.

ابتسمت وهي تضرب رأسها برفق، لكن
تلاشت ابتسامتها عندما وصلها صوت
أحدهما يقول بسخرية:

-دأنتي خيالك واسع!

تساؤلات:

من قال هذه العبارة؟

من هو خاطف نور؟ وماذا يريد منها؟

جيهان، من ستتزوج؟

تامر، من يريد أن يتزوج؟ وهل ياترى

ستوافق أم سترفض؟

ماذا يخفي القدر لـ دعاء وفارس؟

إذا قرر القدر أن يجعل بسمة دواءً
لأحدهما، فماذا ستفعل؟ هل ستقبل أم
سترفض؟

الفصل الحادي عشر

"حين وصف الله القمر قال: {قَمَرًا
مُنِيرًا} وحين وصف الشمس قال:
{سِرَاجًا وَهَاجًا} أمّا حين وصف النبي
ﷺ قال: {وَدَاعِيًا إِلَى اللَّهِ بِإِذْنِهِ وَسِرَاجًا
مُنِيرًا} فجمع ﷺ له بين الوصفين ليكتمل
الجمال بالجلال، وليلتحم الضياء بالنور،
فيشرق العالم كله بهديه وسنته العظيمة.
" ﷺ

في غرفة مظلمة، تتسلل إضاءة خافتة
بالكاد تكشف تفاصيل المكان. تجلس
"نور" مقيدة على مقعد، وجهها يحمل
مزيجًا من التحدي والمرح المعتاد رغم
الموقف المريب.

فقالت "نور" بصوت ساخر وهي تحديق
في الشخص الجالس على بعد خطوات
منها:

- هو أنت؟

رد "أشرف" بابتسامة جانبية: للأسف.

نظرت له "نور" بتذمر مصطنع: وعامل
سوبرمان وأنت كمان مخطوف؟ خصم
عليك!

هتف "أشرف" بنفاد صبر: بطلّي رغي،
إنتِ ما بتسكتيش؟

قالت "نور" ببراعة مستفزة: بت في
عينك! والله لو جون مايكل عرف إنك
هنا، هيجي يخلص عليك.

رد "أشرف" ساخرًا: جون مايكل اللي
كنت زي القطة قدامه؟

قالت "نور" بتعالٍ زائف: أنا بس
متربية، ما بردش على الكبير، والكبير
ليه احترامه.

"أشرف" ساخرًا: يا سلام!

"نور" وهي تحرك كتفيها بلامبالاة:
-أمممم.

قال "أشرف" ببسمة: وأنا كمان.

تسألت "نور" مستتكرة: وأنت كمان
إيه؟

رد "أشرف" متلعثمًا: متركـزيش...
المهم بتعملي إيه هنا؟

ردت "نور" بتهكم واضح:

-بتفسح! زهقت من البيت قلت أخطف
نفسي شوية.

نظر إليها "أشرف" باستغراب وهو
يهمس لنفسه بسخرية:

-مش كفاية خطفتي قلبي كمان؟

وقد لاحظت "نور" همسه: بتقول إيه؟

أردف "أشرف" مرتبِّغًا: ولا حاجة...

إيه رأيك نهرب من هنا؟

قالت "نور" بعناد: لا، اسنتي نشوف

هيعملوا فينا إيه. يمكن الخاطف يطلع

جنتل ويتجوزني ويحتاج شاهد مع جون

مايكل.

هتف "أشرف" بغیظ شديد:

-إنتِ أول بنت في الدنيا تقول كده!

"نور" بضحكة مرحة: نحن نختلف عن

الآخرون يا باشا

ثم أكملت بنبرة حزينة مفاجئة: أنا عايزة
أرتبط لسبب واحد بس.

تغيرت ملامح "أشرف" وهو ينظر إليها
بحزن. لأول مرة يرى "نور" بنبرة
جدية وحزن حقيقي خلف مرحها
المعتاد. هل كانت تخفي آلامها تحت قناع
الجنون والضحك؟ تساءل في نفسه إن
كان أهلها يتعاملون معها ببرود أو
قسوة، ربما لهذا تبحث عن مهرب دائم،
لكنها لن تكون وحدها بعد الآن.

فستفسر "أشرف" بصوت خافت: سبب
إيه؟

ردت "نور" متصنعة الحزن: عندي
شوية بوسسات رومانسية وكام فيديو،
وعايزة أنزلهم في الاستوري، ومستتية

أرتبط عشان أنزلهم وبعدين أرجع سنجل
تاني.

نظر لها "أشرف" بذهول وهو يفكر:

- "هذه البنت ليست طبيعية! هل هربت

من مشفى للأمراض العقلية؟ يا ربّاه!

تريد الزواج لمجرد نشر صور

وفيدوهات؟"

قال "أشرف" بغضب مكتوم: إنـتِ

مجنونة بجد؟ إيه كمية الغباء دي؟

حركت "نور" اهدابها ببراءة:

- ليه بس يا حج؟

"أشرف" بضيق: ربنا يرحمني برحمته،

أنا اللي جبت ده لنفسى!

ردت "نور" بتذمر: مالك قافش كده؟

الواحد جعان! يلا نام واسكت.

أغلقت "نور" عينيها وهي تتظاهر
بالنوم. لكن بعد دقائق نادها "أشرف"
بصوت خافت، وهو يبتسم مازحًا:
-يا وزّة... بس بس!

ردت "نور" وهي تفتح عينيها بغضب:
-إيه يا عم! أنت بتنادي على قطة ولا
وزّة؟ حد!

"أشرف" بغمزة مشاكسة: "عليكي
إنتِ."

"نور" بتهكم: اسمي زفتة!
"أشرف" وهو يبتسم بنبرة جادة يملؤها
الحب:

-ماشى يا زفتة... تتجوزيني؟
"نور" باستياء: زفتة في عينك!

"أشرف" بنفاد صبر: محدش طول
لسانه عليا غيرك.

"نور" وهي تبسم بمكر: نحن نختلف
عن الآخرين يا باشا.

حاول "أشرف" أن يبدو جادًا وهو يقدم
نفسه لها، فقد حان الوقت لتعرف من
هو حقًا، فقال بجدية:

-بصي، أنا المقدم أشرف المصري.
مراتي ماتت من سنة وعندي "مازن"
عمره أربع سنين دلوقتي.

رغم أنها كانت تنظر في اتجاه آخر
وكانها لا تهتم، إلا أنها كانت تصغي إليه
بكل جوارحها، وعندما لاحظ صمتها
تسأل:

-هاه؟ ساكتة ليه؟

"نور" عادت بمرحها المعتاد: عايزة
حووشي!

"أشرف" باندھاش: نعم؟

"نور": إيه؟

"أشرف" وهو يجاري جنونها: ومش
عايزاه إضافات مع الحووشي؟

"نور" وهي تضحك: مش مشكلة، أي
حاجة.

"أشرف" بتهديد ساخر: اسكتي بقي،
مش عايز أسمع صوتك!"

"نور" بضحكة خافتة: مالك قافش كده؟
خليك رويح يا با رشدي!

"أشرف" وهو يتمتم: ربي، لا أسألك رد
القضاء، ولكني أسألك اللطف فيه!

"نور" بضحكة: مالك قلبت شيخ دعاء
كده ليه؟

نظر إليها "أشرف" بإعجاب وابتسامة
صغيرة وهو يتأمل جنونها، لكنه كان
يشعر بحنان خفي تجاهها. ربما كان هذا
الجنون يغطي على خوفها الحقيقي.
كانت "نور" دائماً تردد في سرها:
- "قوتك هي نقطة ضعف عدوك".

"أشرف" بنبرة هادئة وهو ينظر إليها:
- تصبحي من أهلي يا وزه.

ابتسمت "نور" ثم أغلقت عينيها مرة
أخرى مطمئنة، وهي تعلم أن وجوده هنا
يخفف عنها خوفها. ظل "أشرف"
يراقبها بصمت إلى أن سقط هو الآخر
في النوم.

مرَّ الليل هادئاً على "المجنونة"
و"المغرور"، لكنه لم يمر بسلام على
عائلتهما وأصدقائهما، الذين عاشوا
ساعات طويلة من القلق والخوف،
يتساءلون عن مصيرهما المجهول.

في الصباح الباكر، وفي منزل "نور"،
خيم الصمت على المكان رغم امتلائه
بأصوات البكاء والهمس. كان جميع
نساء العائلة يجلسن معاً في غرفة
المعيشة، تحيط بهن أجواء التوتر
والقلق، بينما الرجال كانوا يواصلون
البحث عن "نور" في كل مكان.

جلست "ريهام" تبكي بحرقة، وهي
تضع يديها على بطنها المنتفخة بسبب
الحمل:

-طيب هترجع إمتى بقى؟ أنا عايزة
أختي!

حاولت "نيرة" تهدئتها وهي تضع يدها
على كتفها بحنان:

-اهدي يا ريهام... أنتِ حامل وممكن
تتعبى كده، حرام عليكِ نفسك والبيبي.

انتفضت "ريهام" غاضبة وهي ترد
بحدة:

-أهدى إيه؟! ودي أختي! مش عارفة
هي فين ولا حصلها إيه!

تدخلت "جيهان" التي كانت تحاول أن
تبدو هادئة، رغم الלהيب المشتعل في
داخلها فقالت بثقة مصطنعة:

-محصلهاش حاجة... هترجع بخير، أنا
واثقة من كده.

لكن كلمات "جيهان" لم تُطفئ غضب
"ريهام"، فاستدارت إليها بغضب شديد:

-بس أنتِ متتكلميش، عشان أنتِ
السبب! لو كنتي رحتي معاها، كان
هيحصل إيه؟!!

نظرت "جيهان" إليها بحزن وهدوء
ظاهري، رغم أن الشعور بالذنب كان
يفتك بها من الداخل وقالت بصوت
هادئ:

-نور مش في الروضة عشان أروح
معاها... وبعدين كل واحدة فينا في سنة
مختلفة، أروح معها إزاي؟

"ريهام" وهي تصرخ بعشوائية:

-معرفة! كان لازم تكوني معاها
وخلص!

تجمدت الكلمات على شفتي "جيهان"،
وهي تشعر أن ما قالتها "ريهام" أشعل
نيران الذنب أكثر. لم تستطع تحمل
الجلسة أكثر، فوقفت فجأة وخرجت من
الغرفة بخطوات سريعة. منذ ليلة
البارحة وهي لا تكف عن لوم نفسها...
"أين أنت يا نور؟! " كان هذا السؤال
يتردد في عقلها باستمرار، يقتلها ببطء.

في تلك الأثناء، كانت والدة "نور"
تجلس على الأريكة في زاوية الغرفة،
تمسك بمنديل مبلل من كثرة بكائها. رغم
أنها كانت امرأة قوية اعتادت مواجهة
الحياة بشجاعة، إلا أن اختفاء ابنتها
الصغيرة حطمها تمامًا. "نور" طفلتها
المزعجة التي كانت تضيف الحياة إلى

المنزل بضحكاتها وجنونها... منزلهم
الآن مظلم، بلا طعم ولا روح بدونها.
صمتت النساء للحظة، ولم يتبق سوى
همسات الدعاء وبكاء مكتوم. الجميع
يشعر بالقلق، والحزن ينهش القلوب،
بينما سؤال واحد يصرخ في أعماق كل
فرد فيهم:

- "أين هي نور؟ وماذا حدث لها؟"

كانت تلك اللحظات ثقيلة على الجميع،
حتى الهواء أصبح ثقيلًا يصعب تنفسه،
كأنهم عالقون في كابوس لا يعرفون
متى سينتهي.

في منزل "دعاء"، كان الجو مشحونًا
بالحزن والتوتر. جلس "مصطفى" والد

دعاء يحاول إقناعها بضرورة حضور
مراسم تجهيز الخطبة، بينما كانت
"دعاء" ترفض بشدة.

"دعاء" بحزم وهي تمسح دموعها: لا
يا بابا، مش هروح مكان غير لما أظمن
على نور.

"مصطفى" بلهجة هادئة ولكنها حازمة:

-يا بنتي، إحنا رايعين نجيب الشبكة
بس، ولما ترجع بالسلامة تبقى تلبسيها.
الناس جات ومينفمش نقولهم لا بعد ما
اتفقنا.

ردت "دعاء" بكاء وهي تهز رأسها: -
ماليش فيه! مش هينفع أروح مكان
ونور مش معايا.

"مصطفى" متوترًا: طيب نقول للناس
إيه دلوقتي؟

"دعاء" بحزن عميق: قلهم إن صحبتها
مختلفية، ومش هينفع أفرح من غيرها.
"مصطفى" بنبرة قاسية قليلًا: يا بنتي،
اسمعي الكلام مرة واحدة.

"دعاء" وقد زاد بكأؤها خوفًا على
صديقتها وحزنًا على حلم خطبتها الذي
يكاد ينهار: يا بابا افهمني، إنت متعرفش
نور كانت بتعمل إيه عشائي... خلاص يا
بابا! تعال معايا وأنا هقولهم بنفسي.

استسلم والدها أخيرًا، وتبعته "دعاء"
بخطوات بطيئة مثقلة بالحزن، وكأنها
تجرّ قدميها إلى المجهول، تشعر أنها
على وشك إنهاء حلمها بيدها.

دخلت "دعاء" الغرفة بثبات مصطنع،

قائلة بصوت منخفض:

-السلام عليكم.

رد الجميع السلام، وجوههم تباينت بين

من سعيد برؤيتها، ومن يتمنى ألا يراها،

ومن لا يبالي على الإطلاق.

فقالَت بحزن وهي تنظر إلى الأرض

خشية أن تلتقي عينيه:

-أنا آسفة... بس مش هينفع نجيب

الشبكة النهاردة.

ظهرت السعادة الخفية على وجه أحدهم،

بينما تحدث "فارس" بحزن حاول

إخفاءه:

-ليه؟

"دعاء" بصوت مختلق ودموع تكاد
تفضحها:

-نور مختفية من امبارح ومش عارفين
هي فين، وأنا مش هينفع أعمل حاجة
من غير ما أظمن على صاحبتني.

قاطعتها والدة "فارس" بعصبية وهي
تنظر لمصطفى بسخرية واضحة:

-استغفر الله العظيم! بنات آخر زمن...
يمكن تكون راحت مكان كده ولا كده،
وبعدين إحنا متفقين، ولا هو كلام عيال
ولا إيه؟!

لم تحتمل "دعاء" حديثها الجارح،
فردت بحزم رغم حزنها:

-لو سمحتي يا خالتي، ما تقوليش كده
عليها!

قبل أن ترد "أم فارس"، تدخل "مارس"
الابن الأصغر بحكمة:

- خلاص يا ماما، اهدي.

قال "فارس" بهدوء وهو ينظر إلى
"مصطفى":

- عمي، ممكن أتكلم مع دعاء دقيقتين؟

نظرت "دعاء" إلى والديها بعيون ترجوه
أن يرفض، لكنه تجاهلها ورد بصوت
مرحب:

- اتفضل يا بني، البيت بيتك.

نظرت "دعاء" لوالديها بخيبة أمل
وخرجت من الغرفة يتبعها "فارس".

في الخارج، التفتت "دعاء" إليه ببرود
ظاهر، تحاول أن تبدو أقوى مما تشعر
به:

- في إيه يا دكتور؟

قال "فارس" وهو يحدق بها بحزم: إنت اللي في إيه؟ لو مش عايزاني، قولي وخلاص، لكن إيه حكاية مش هينفع نجيب الذهب النهاردة؟ مش إحنا متفقين من امبارح؟

انهمرت دموع "دعاء" بغزارة، وهي تشعر أن كلماته تفسر تصرفها خطأ، بينما الحقيقة أنها لا تريد من الحياة سوى أن يكون بجانبها.

"فارس" وقد شعر بوخزة في قلبه لرؤية دموعها:

- أنا أسف... مش عايز دموعك دي تنزل تاني. إنت عايزة إيه؟ وأنا هعمله.

مسحت "دعاء" دموعها كالأطفال، قائلة
بصوت ضعيف:

- نسنتي نور ترجع بالسلامة... وأنا
هتصل بك فورًا.

ثم أكملت بخجل: عشان نروح نجيبها.

تسأل "فارس" بابتسامة هادئة: وأنتِ
تعرفي رقمي منين؟

"دعاء" وقد احمر وجهها بخجل: هو...
أصل... أنا...

ضحك "فارس" وهو يتأمل ارتباكها
الظريف:

- خلاص يا ستي، مش عايز أعرف. كل
ده عشان الرقم؟ طيب ما أنا معايا رقمك.

صمتت "دعاء" وهي تنتظر أن يخبرها
من أين حصل على رقمها، لكنه قال
بمرح:

-مش هقولك عرفته إزاي. واحدة
بواحدة.

ثم أكمل بابتسامة مشاكسة: ويلا يا آخر
صبري، نروح نبلغهم بتأجيل الموضوع،
لحد ما نشوف أخرة الكارثة المتحركة
اللي إنتِ مصاحبها.

أطلقت "دعاء" ضحكة عالية على لقب
"نور"، قائلة بمرح:

-كارثة متحركة!

اقترب منها "فارس" وهمس لها بصوت
يمتلئ بالحب:

-ضحكتك تجنن.

توقفت "دعاء" عن الضحك فجأة، وقد ارتبكت من كلماته وهمسته، لتتنظر إلى الأرض بخجل واضح.

"فارس" بابتسامة ناعمة: اتفضلي قدامي يا قمري.

كان "فارس" يسير خلفها مبتسمًا، بينما عادت "دعاء" إلى الغرفة بنبضات قلب متسارعة. لم يمر اليوم كما خطط له الجميع، لكن بالنسبة لـ "فارس" و"دعاء"، كان شيئًا جديدًا يولد بينهما، ينتظر فقط أن تنتهي عاصفة "نور" لتشرق شمس جديدة في حياتهما.

عند "أشرف" و"نور"...

كان المكان هادئًا إلا من أنفاسهما، والضوء الخافت يتسلل من نافذة

صغيرة. جلس "أشرف" يتأمل "نور"
وهي غارقة في نوم عميق وكأنها في
منزلها، رغم ظروف اختطافهما. اقترب
منها قليلاً ونادها بصوت هادئ هامساً:

-نور... نور!

لكن "نور" ردت بنبرة ناعسة وهي
تدير وجهها له:

-غوري يا بت... مش رايحة مكان!

ابتسم "أشرف" ساخراً، ثم قال وهو
يضحك:

-قومي يا ماما... عندك مدرسة!

ردت "نور" وهي تزداد التفافاً على
نفسها:

-لا مش هروح... خلي "ريهام" والبت
الزفتة "جيهان"!

انفجر "أشرف" بالضحك على حديثها
العفوي، ثم صاح بصوت عالٍ فجأة:
-نوووور!

انتفضت "نور" بفزع، وقد اعتدلت
جالسة بسرعة لتصرخ بعصية:

-إيه ياعم؟ بتنادي على تايهة ولا إيه؟!
نظر إليها "أشرف" بتهم، وهو يرفع
حاجبه ساخرًا:

-وده منظر واحدة مخطوفة ونايمة
بتشخر؟!!

"نور" رمقته بنظرة غاضبة، وقالت
وهي تكاد تخرج عن شعورها:

-نعم يا خويا؟! أنا بشخر؟!
"أشرف" مبتسمًا باستفزاز: أه والله!
المهم يلا نمشي.

حدقت فيه "نور" باستغراب شديد، ثم نظرت حولها لتدرك أمرًا غريبًا:

-نمشي إليه؟ وأنت إزاي قمت وأنت مربوط؟ وأنا فـين الحبل اللي كنت مربوطة بيه؟!!

كانت "نور" تتذكر أنها كانت مقيدة بحبل غليظ الليالة الماضية، والآن لا ترى أي أثر لذلك الحبل. وقفت لتتشاجر معه دون أن تفكر كيف فك قيدها أصلاً.

رد عليها ببرود وهو يمد يده ليجذبها معه:

-أنا اللي حلّيتك... ويلا بسرعة.

أمسك "أشرف" بيد "نور" وسحبها خلفه بحذر وهو يخرج من الغرفة التي كانا محتجزين فيها. سار الاثنان في ممر

مظلم هادئ، لم يكسر الصمت سوى
صوت خطوات بعيدة تقترب شيئاً فشيئاً.
توقف "أشرف" فجأة، وسحب "نور"
بسرعة ليختبئاً خلف أحد الجدران.

كان يقف بجانبها، يراقب القادم من بعيد
بعينين حادتين. في أقل من لحظات،
تحرك "أشرف" كالنمر، ولم تمضِ ثوانٍ
حتى كان الرجلان المطاردان جثتين
هامدتين على الأرض.

"نور" نظرت إلى المشهد بصدمة، وقد
همست بصوت مرتجف وهي تلتصق
بالحائط:

-ده... ده قتال قتلة!

التفت إليها "أشرف" بهدوء وقال
بحزم:

-يلا-

سارت "نور" خلفه مجددًا، بينما يتقدم "أشرف" بحذر، لكن فجأة ظهر أمامهما خمسة رجال مسلحين، يتقدمهم رجل ضخم يشبه أسطورة "جون مايكل" في عيني "نور". دارت معركة شرسة لم تستغرق وقتًا طويلًا، انتهت فيها الجثث ممددة على الأرض، بينما خرج "أشرف" منها ببعض الكدمات الخفيفة على وجهه.

خرج الاثنان من المخزن الموحش، وتوجه "أشرف" نحو إحدى السيارات المركونة أمامه، اسـتقلها بسرعة وانطلق بها بعيدًا عن ذلك المكان. ظل يقود بصمت حتى اطمأن أنه ابتعد تمامًا.

أوقف السيارة في مكان آمن ونظر إلى "نور"، التي كانت جالسة بجواره تحاول استيعاب ما حدث.

نور" بجديّة وهي تنظر له بعينين حائرتين:

-مين دول؟ وعايزين مني إيه؟ أنا مش فاهمة حاجة!

التفت إليها "أشرف" وابتسم بخبث، قائلاً:

-هستى ردك... وبعدين هتفهمي.

رفعت "نور" حاجبها باستغراب وهي تسأله:

- رد على إيه؟!

غمز لها "أشرف" وقال بنبرة مآكرة:

-على جوازك مني.

صاحت "نور" سريعًا بانفعال: مش

موافقة! يلا فهمني بقى!

ضحك "أشرف" وهو يهز رأسه بمرح:

-توتوتو! مش هي دي الإجابة اللي

عايزها... قولي موافقة وأنا فهمك كل

حاجة.

نظرت له "نور" بتحدٍ وهي تعقد

ذراعيها:

-ليه إن شاء الله؟! أنا لازم أفهم دلوقتي

ومن غير موافقة.

ألقى عليها نظرة جانبية ثم قال وهو

يعاود تشغيل السيارة:

-بعدين يا ورة.

"نور" تنظر له بضيق وهي تزم

شفتيها:

- هنعور فين؟!!

أجابها "أشرف" بابتسامة مطمئنة:-

- هروحك.

ظل يقود السيارة، بينما "نور" ما زالت
تتظر له بريبة وفضول، وكأنها تحاول
قراءة ما يخفيه وراء هدوئه. أما
"أشرف"، فظل يبتسم وهو ينظر
للطريق، وكان مغامرة جديدة قد بدأت
بالفعل.

في المشفى...

كان "إبراهيم" جالسًا خلف مكتبه، شارد
الذهن، يتأمل الفراغ أمامه بعينين
غائرتين وكأنهما تراقبان شيئًا لا يراه
غيره. كانت صورتها تتسلل إلى أفكاره

كالعادة، تلك "البلهاء معذبة قلبه"، كما
يجب أن يصفها ساخرًا في داخله، رغم
أن قلبه ينبض حبًا لها.

كيف لها أن تقول إنها تريد الارتباط به
ثم تتفصل عنه؟!!

كلماتها الساذجة ما زالت ترن في
أذنه... لم تدرك "هي" كم هو يعشقها
حد الجنون، حد التعلق بتفاصيلها
الصغيرة. لم تكن أول مرة يراها حين
التقيا في المشفى؛ بل كانت تراوده كثيرًا
في أحلامه وخیالاته منذ سنوات.
أصبحت الآن حقيقة أمامه، ولن يسمح
لها بالاختفاء من حياته مجددًا.

"لن أتركك أبدًا..."

قطع شروده المفاجئ رنين هاتفه
المحمول. انبعثت ابتسامة خفيفة على
وجهه، وكأنه كان ينتظر هذا الاتصال.
أمسك الهاتف ورد بسرعة وهو يجاهد
ليبدو طبيعيًا.

"إبراهيم" بابتسامة هادئة: السلام
عليكم.

صوت من الهاتف:

قال "إبراهيم" باهتمام: الحمد لله
بخير... أخبار حضرتك إيه؟

الصوت يسترسل بالكلام، و"إبراهيم"
يهز رأسه وهو يستمع بانتباه.

فقال "إبراهيم" بقلق مفاجئ: إيه؟!
ليه... حصل حاجة؟

الصوت يرد محاولاً تهدئته، لكنه يبقى
متوترًا وهو يقول:

-ولا يهم حضرتك... إن شاء الله خير.
أنهى المكالمة أخيرًا وهو يقول بهدوء:
-سلام عليكم.

وضع الهاتف أمامه، ثم استند بمرفقيه
إلى المكتب، وأخذ يتأمل يديه للحظات.
تهد بعشق وهو يهمس بصوت بالكاد
يُسمع:

- "قريبًا جدًا سنلتقي يا معذبة فؤادي..."
كانت تلك الجملة أشبه بوعد قطعه
لنفسه... مهما طال الوقت، سيجد طريقه
إليها.

في منزل تامر...

كان "تامر" يجلس في صالة المنزل
شارد الذهن، يحاول التركيز على التلفاز
أمامه، لكن صوته لم يكن يصل لعقله،
وكان هناك ما يشغل تفكيره بعيدًا.

هتفت "سلمى" بصوت عالٍ وهي تقترب
منه:

- تامر... تامر... تيموو!

"تامر" بضيق وهو يلتفت نحوها: إيه يا
بنتي... عايزة إيه؟!

"سلمى" بفضول: سرحان في إيه؟

"تامر" بلامبالاة: وليه يعني؟

"سلمى" وهي تضربه بخفة: بطل
رخامة وقول!

رد "تامر" بسخرية وهو ينظر إليها:

-سلمى، لو مش واخدة بالك... أنتِ
مراتي أخويا مش مراتي أنا، عشان كده
بلاش تحقيقات.

"سلمى" بعبوس طفولي: رخم!

"تامر" بابتسامة جانبية: وإنتِ أرخم!

دخل "كريم" فجأة إلى الصالة وهو
يضحك عليهما:

-بس أنتوا الاثنين عاملين زي القط
والفار!

"سلمى" بدلع مفتعل وهي تلتفت نحو
زوجها:

-هو رخم يا كيمو!

"كريم" بابتسامة: عارف يا قلب كيمو.

"تامر" وهو ينظر إليهما باستفزاز:

بظلووا محن... وخليها تبعد عني! كل

شوية عاملة فيها المحقق كونان ويتسأل
الناس.

"كريم" مازحًا وهو يغمز لـ "سلمى":

-تسأل براحتها، وأنت تجاوب غصب
عنيك.

"تامر" مستنكرًا: ليه بقي؟!!

"سلمى" بجديّة مصطنعة: عشان أنا

أختك في الرضاعة يا ناصح!

"سلمى، زوجة كريم وابنة خالتهم،

وتامر شقيقها في الرضاعة، لكنها دائمًا

ما تتصرف بحرية لأنه شقيقها الوحيد.

"تامر" بضحكة ساخرة: يا شبيخة

روحي! دانا أختي الحقيقية مش بتتطق

قدامي!

دخلت "ديالا" فجأة وهي تحمل كيسًا
وتستعرض فستانها الجديد:

- ليه بقى؟ ماسك عليّ ذلي ولا إيه؟!!

"تامر" بغضب وهو ينظر لها: بت...

"ديالا" مقاطعة وهي تبتم:

- قلب و عيون و روح البت! المهم... إيه
رأيكم في الفستان الجديد اللي هحضر
بيه خطوبة لمار؟

نظر "تامر" لها بدقة، قبل أن يرد
ساخرًا:

- إيه القرف اللي أنت لبساه ده؟!!

"ديالا" بحزن وهي تلمس فستانها:

- وحش؟

"تامر" بحدة: زفت! ده فستان فرح ولا

عزاء؟!!

"كانت ترتدي فستاناً رمادي اللون،
يتسع من الأسفل بشكل كبير، وعليه
خمار طويل يغطي شعرها بالكامل،
بنفس لون عينيها الرماديتين."

قال "كريم" بحب وهو يبتسم لـ "ديالا":

-قمر يا قلبي، ما تسمعش كلامه، ده
معدوش ذوق.

"ديالا" بفرحة وهي تلتفت نحوه: بجد؟!

ردت "إيمان" وهي تنظر بإعجاب
للفستان:

-جد الجد يا روح عمك! أنا هخليك
تجيبني واحد ليا، عجبني أوي!

"ديالا" بفرحة عارمة: أنا أصلاً جبت
واحد ليك وواحد لـ سلمى فوق... هطلع
أجيبهم حالاً!

ركضت "ديالا" للأعلى بحماس، تاركة خلفها أصوات ضحكاتهم تتعالى.

فقالت "إيمان" بجدية وهي تلتفت نحو "تامر":

-إيه يا تامر؟ مقدرتش تقول كلمة حلوة لأختك؟ تزعلها كده!

"كريم" وهو يهز رأسه ساخرًا: سيبيك منه يا عمتو، ده بارد ومعدوش دم!
ردت "سلمى" مؤكدة: فعلاً!

"تامر" بانزعاج وهو ينظر نحوهم: بس يا زفتة! أهو أنا أعمل إيه يعني؟ أكذب وأقولها حلو وهو وحش؟!

"إيمان" بحزم: في حاجة اسمها جبر الخواطر يا تيمو!

"تامر" مبتسمًا وهو يرفع يده
مستسلمًا:

- "حاضر يا عمتو! المرة الجاية هكذب
وأقولها حلو... حاجة تانية؟!"

توقف قليلاً قبل أن يتابع بجديّة:

- وبالمناسبة... جهزوا أنفسكم! يوم
الخميس هتروح معايا أخطب... سلام يا
أمنيّتي!

"سلمى" وهي تضحك: مقلّتيش سلام!

"تامر" وهو ينظر لها باستهزاء: سلام
يا زفتة!

غادر الصالة وسط ضحكاتهم، بينما
"سلمى" تتابعه بعينين حائرتين.

من داخل المقهى...

تتطلق أغنية كوكب الشرق "كنت بشتاق لك..." لتضيفي على المكان جواً من الشجن والحنين. كانت "بسملة" تجلس على مقعد في الخارج، تتلململ من الانتظار، بينما تفحص الساعة كل بضع دقائق. تأخرت صديقتها كثيراً، وبدأ الضيق يتسلل إلى ملامحها.

التفتت إلى يمينها فجأة، لتقع عيناها على شاب يحتضن فتاة وهما يتقدمان نحو المقهى. شعرت بالانزعاج من المشهد، بينما تهمس لنفسها بضيق:

- "ما هذا؟ عناق أمام الملاء بلا خجل!
لكن... ما شأني بهم؟ ربما تكون زوجته
أو أخته... المهم، إن لم تأتِ تلك
الحمقاء قريباً، سأغادر الآن."

تتهدت بضيق، ثم وقفت لتتوجه إلى
المرحاض داخل المقهى. كانت تسير
وهي تركز على هاتفها المحمول، قبل
أن تصطم فجأة بشخص أمامها، ليسقط
الهاتف من يدها. انحنيت سريعًا لتلتقطه،
لكنها وجدته قد التقطه قبلها وناولها إياه
وهو يعتدل في وقفته.

قال "تامر" بابتسامة خفيفة: ولا
يهمك... أنتِ كويسة؟
رفعت "بسملة" حاجبها باستغراب،
وهي تنظر له بنظرة حادة:
-أنت تعرفني عشان تقول لي أنتِ
كويسة؟ واه يا سيدي... كويسة. في
حاجة تاني؟

نظر لها "تامر" بصدمة واضحة من
حدة ردها:

-كل ده عشان قولت لك أنتِ كويسة؟

أردفت "بسملة" بحدة: وتقول لي ليه
أصلاً؟

قبل أن يرد، اقتربت "سميرة" وهي
تلهث:

-أسفة يا بسملة، والله اتأخرت غضب
عني!

التفت الاثنان نحو الفتاة القادمة، لتصيح
"بسملة" بعصبية وملامح غاضبة:

-أسفة إيه وزفت إيه؟ أنا من الصبح
مستنيك!

شعرت "سميرة" بإحراج واضح، وهي
تتظر حولها بعدما جذب صوت "بسملة"
المرتفع انتباه الجميع:

-معلش، حصل موقف في الطريق كده...

"بسملة" وهي تلتقط أنفاسها لتخفض
من حدة صوتها:

-آسفة يا سميرة، مقصدش... تعالي نقعد
بره ونتكلم.

ردت "سميرة" بلطف: ماشي، يلا.

منحت "بسملة" نظرة ساخطة لـ "تامر"
قبل أن تتجاوزه بلامح متجهمة. بينما
هو يبتسم لنفسه وهمس بهدوء:

-شكلك هتتعب أوي يا تيمو... بس
تستاهل، تعب الدنيا كلها تحت رجليها."
في زاوية أخرى من المقهى...

جلس "تامر" على مقعد بجوار فتاة
تتشبث به وكأنها لا تريد أن تتركه
للحظة.

"مريم" بدلال وهي تتمايل بجواره:
-وحشتتي يا تيمو! مش بترد عليا ليه
لما برن عليك؟

رد "تامر" بلامح جادة وبصوت هادئ:
-أنا آسف يا مريم... مش هينفع نكمل.
تجمدت ملامح "مريم"، وتحولت من
الدلال إلى الحزن والصدمة وهي ترد
بعدم تصديق:

-تامر... أنت بتقول إيه؟! أنا آسفة والله،
مش عارفة عملت إيه زعلك، بس حقك
عليا... متسبنيش!

"تامر" بأسف ظاهر: متزعزع عيش يا
مريم... بس مفيش نصيب.

قالت "مريم" وهي تبكي بحرقة:

-تامر، عشان خاطر متسبنيش! مش
هعمل حاجة تضايقك تاني، أرجوك!
وقف "تامر" بجمود وهو ينظر إليها
بحزم:

-مريم، متزعزع عيش... وربنا يرزقك
بالأحسن مني.

لم ترد "مريم" سوى بالبكاء، بينما
غادر "تامر" دون أن يلتفت.

وفي زاوية المقهى، جلست "بسمة"
تتأمل المشهد من بعيد، بينما همست
لنفسها بسخرية ممزوجة بالحزن:

- "ربنا؟! أنت لو تعرف ربنا بجد،
مكن تش تلعب بينات الناس كده!
ومتساش... كما تدين تُدان، هيترد لك
في وقت غير متوقع ومن أقرب الناس
ليك... انتظر."

«يتحدثون باسم الحب، ولا أحد يعلم ما
معنى الحب، الحب أعظم مما يخرج من
أفواههم، الحب أرقى وأسمى مما
يقولون، الحب الذي أعرفه أنا غير
الحب الذي يعرفونه الحب تسامح،
إخلاص، وفاء، والأهم من ذلك الحب
اكتفاء، فأنأ أرى رجلاً واحداً يخبر أكثر
من ثلاث فتيات أنه يحبهم ويطلق على
الثلاثة حبيباتي، الحب أصبح لعبة
لتسلية يا لسخرية، الحب أن تضع حدود

للجميع ويتخطاها هو، وأنت تبتسم؛ لأنه
الاستثناء الوحيد، الحب ليس كلامًا يقال؛
بل هو شعورٌ فوق الرائع وفوق الوصف
أيضًا، وكما قال نزار:- "كلماتنا في
الحب تقتل حبا، إن الحروف تموت حين
تقال" أما ما يحدث في هذا الزمن بعيدُ
كل البعد عن الحب.»

الفصل الثاني عشر

عندما ترى عيباً فيني، أخبرني ولا تُخبر
غيري؛ فأنا المعني بتغييره. - ففي
الأولى : نصيحة وأجر- وفي الأخرى :
غيبة ووزر.

لماذا حين نرى سلبيّة في أحد نُخبر كل
من حوله ولا نخبره هو بها؟ نحن نجيد
التشهير بالتحدث عن بعضنا، لا مع
بعضنا!

أعجبتني عبارة مكتوبة في أحد الفنادق:
- "إن أرضيناك فتحدث عنا وإن لم
نرضك فتحدث إلينا"

فلنطبقها لتنتهي الغيبة بيننا، فالحياة ما
هي إلا قصة قصيرة (من تراب - على
تراب - إلى تراب)

ثم (حساب - فتواب أو عقاب) . فعش
حياتك لله تكن أسعد الخلق، تعجبني فكرة
أن نمحي الغلظة من أجل "تستمر
الأخوة" وليس أن "نمحي الأخوة" من
أجل غلظة

لا تسبوا أصحاب المعاصي ولا تحتقروهم
فإنما نحيا بستر الله ولو كشف الله عنا
ستره لفضحنا. ولا تغترو بكثرة صيام او
صلاة فلا تدري من يكون إلى الله اقرب
إنصح ولا تفضح، وعاتب دون أن
تجرح!!♡

كان الجميع يجلس بداخل المنزل بلا
استثناء؛ أصداق "نور" وعائلاتهم.
نظرت "دعاء" حولها بضيق وقالت:

-طب إليه؟ هنفضل قاعدين كده من غير
ما نعمل حاجة؟

ردت عليها "بسملة" بنبرة محبطة:

-هنعمل إليه؟ هما دوروا عليها في كل
مكان.

تهدت "دعاء" بضيق: طب وبعدين؟

هزت "بسملة" كتفيها وقالت: معرفش.

ثم التفتت إلى "جيهان" التي كانت
شاردة على غير العادة وقالت:

-جيهان، مالك؟

أفاقت "جيهان" من شرودها وردت
ببرود:

-مليش.

نظرت "دعاء" إليهما باقتراح قائله:

طب تعالوا نروح عند طنط نشوفها.

تحركت الفتيات الثلاث متوجهات إلى
"أم نور" التي تجلس في زاوية
بمفردها.

عندما وصلن، جلست "بسمة" بجوار
"أم محمد"، والدة نور، وقالت بحنان
وهي تحاول التخفيف عنها:

-نور هترجع يا طنط، وهتصدك كمان،
بس هي مش بتحب الحزن والنكد اللي
إحنا عاملينه ده.

نظرت "أم محمد" إليهن بعينين تملؤهما
الدموع وقالت بحزن:

-أنا عايزاها تصدعني بس... ترجع.

ابتسمت "دعاء" محاولة التخفيف من
حزنها وقالت:

-هترجع وتزهقي منها كمان، بس ادعيها يا طنط.

أومأت "أم محمد" وهي تتمتم: بدعيها وبدعيكم كلكم يا رب.

قالت "بسملة" مازحة لتخفيف الجو:

-رغم إن نور مزعجة ورخمة أوي، بس كلنا بنحب جناتها.

ضحكت "دعاء" وقالت بمرح:

-عارفة فارس بيقول عليها إيه؟

نظرت "بسملة" إليها متسائلة: إيه؟

أجابت "دعاء" ضاحكة: كارثة متحركة!

انطلقت ضحكة خفيفة من "أم محمد"

وسط دموعها، وكان الكلام أعاد لها

بعضاً من روحها.

قالت "بسملة" بضحكة: احمدي ربنا إن نور مش هنا، عشان لو عرفت، هتوّلع فيه!

ضحكت "أم محمد" بحرقة وعانقت "بسملة" و"دعاء" قائلة بحنان:

-نور كانت بتحبكم أوي.

فجأة، قاطعهم صوت ساخر من الخارج يقول:

-ليه؟ هي ماتت!؟

"في منزل فارس..."

كانت "روبين" تسير بعصبية في أرجاء المنزل وهي تتحدث بحدة:

-يعني إيه بنت زي دي تمشي كلامها علينا كلنا؟!!

جلس "فارس" بهدوء، محاولاً السيطرة
على غضبه وقال بنبرة ثابتة:

-ماما، هي مش بتمشي كلامها، بس دي
صاحبته، وفعلاً مينفعش نعمل حاجة
وصاحبتها مختفية.

نظرت له "روبين" بسخرية وردت: آه
طبّعاً! لازم نستنى البرنسياسة هي
وصاحبته، الله أعلم بتعمل إيه! يمكن
ضحكت على واحد عشان فلوسه.

انتفض "فارس" واقفاً ورد عليها بحدة:

-ماما! إيه اللي بتقولي ده؟! إن بعض
الظن إثم.

لوّحت "روبين" بيدها وقالت باستفزاز:
-اسم النبي حارسك وصاينك يا حبيبي،

إنت لسه صغير، متعرفش البنات الفقيرة
دي ممكن يعملوا إيه.

زفر "فارس" بغضب وقال بجديّة: أولاً،
هم مش فقراء. ثانيًا، أنا مش صغير
وعارف كويس مين الكويس ومين
الوحش.

تجمدت ملامح "روبين" وقالت بنبرة
حادّة: قصدك إيه يا دكتور فارس؟

نظر إليها "فارس" نظرة حادة وهو
يقول:

-اللي فهمتيه يا ماما، بعد إذنك.
ثم غادر المنزل بخطوات غاضبة، تاركا
والدته غارقة في أفكارها.

رفعت "روبين" رأسها بتكبر وهي
تهمس لنفسها:

-أنا؟ وحدة زي دي تبقى مرات ابني؟!
ده مش هيحصل أبدًا.

دخل "مارس" إلى الصالة بهدوء وقال
بمئل:

-يا ماما، إحنا مالننا؟ مش هو اللي
اختارها يبقى خلاص.

ردت عليه "روبين" بغضب واضح: أكيد
عملاله حاجة. دي لا شكل ولا منظر!
مالها مرنا؟ تقول للقمر قوم وأنا أقعد
مكانك.

ضحك "مارس" وهو يقول ممازحًا:

-يعني قليلة ذوق!

رمقته "روبين" بنظرة غضب، فرفع
يديه مستسلمًا وقال بضحكة خفيفة:

-بهزر معاكي يا روبي.

ردت عليه بتهكم:

-ابقي اعمل زي أخوك وروح نقى واحدة
من الشارع.

وقف "مارس" مستعدًا للمغادرة وهو
يقول ساخرًا:

-حاضر، من غير ما تقولي.

سأته "روبين" بحدة: على فين؟

أجابها دون أن يلتفت: رايح لصحابي.

علقت بتهكم: الفاشلين!؟

أجابها "مارس" بلامبالاة: آه هما.
سلام.

غادر "مارس" وهو يتمتم لنفسه
بضيق:

-مش فاهم إزاي بتقول عليهم فاشلين،
وإحنا مبنعملش حاجة غير يا بنذاكر يا
بنشتغل... إيه ده يا ربي!

-ليه؟ هي ماتت؟

كان هذا صوت "نور" المشاغبة، ليصدم
الجميع ويصيحون بفرحة: نور!
كانت "أم محمد" أول من أسرعت
لتعانق طفلتها المزعجة. ورغم تجاوز
"نور" لعمر العشرين عامًا، إلا أنها
ستظل طفلتها الصغيرة في نظر والدتها.
راحت تتفحصها بدقة، وكأنها تريد أن
تطمئن أن ابنتها ما زالت بخير.
قالت "نور" بمرح وهي تحاول تخفيف
التوتر:

-أنا بخير يا حجة، في إيه؟

صفتها "ريهام" بخفة على كتفها ثم
احتضنتها بقوة:

- وحشتيني يا زبالة، كنت هموت من
خوفي عليكى.

ضحكت "نور" بمرح وردت: متخافيش
يا أختش، أنا زي القرد.

قاطعتها "دعاء" وهي تدفع "ريهام"
بلطف:

-اوعي كده يا ريهام! عايزة أسلم على
اللي تخفة.

تظاهرت "نور" بالدهشة وقالت بمزاح:

-إيه الحب اللي ظهر عليكم فجأة ده؟

احتضنتها "دعاء" بقوة قائلة: قلقتينا
عليكي يا مجنونة، وبسببك أجلتنا
الشبكة! ياللي تتشلي.

ضحكت "نور" وقالت بمرح: وأنا مالي
يا بوحه، الله؟

تدخلت "بسملة" بفرح وهي تقول:
-وحشتيني يا سطا.

نظرت "نور" لها بعيون ضيقة وقالت:
-وأنتِ يا معلم...

ثم تذكرت فجأة الموقف الذي أغضبها،
فأشارت إليها بغضب ساخر:
-ابعدي يابت! أنا مخصماكي.

تعجبت "بسملة" قائلة: ليه يا بوحه؟!
ردت "نور" بحدة مصطنعة:

- عشان قاتلك استتي ناكل عند الزفتة،

وأنتِ عاملة فيها أحمد زويل وتقولي لا!

ضحكت "دعاء" وقالت بسخرية: زفتة

في عينك! إيه اللي رجعتك تاني؟ كنا

ارتحنا منك شوية.

أشارت لها "نور" بإصبعها وقالت بثقة:

-كداية يا سيد، ما تقدريش تعيشي من

غيري.

ثم نظرت إلى "جيهان" التي كانت تلتزم

الصمت منذ عودتها وقالت باستغراب:

-آمال الحجة زهرة ساكتة ليه؟

تدخلت "بسملة" وهي تنظر إلى

"جيهان":

-إيه يا جيجي، ساكتة ليه؟

تحركت "جيهان" بضع خطوات لتقف
أمام "نور". وفي لحظة، كانت تصفحها
بقوة وهي تسبها بغضب:

-يا زبالة! يا حيوانة! هتموتيني ناقصة
عمري!

احتضنتها "نور" بمرح وهي تضحك:

-يا شبيخة، الأعمار بيد الله. إنتِ ماسكة
فيها ليه؟

ضحكت "بسملة" وقالت: اضربيها يا
جيجي، البنت اللي متربتش دي.

ثم رفعت يدها بابتسامة غبية وقالت
سريعًا:

-لمواخذة يا طنط.

ضحكت "أم محمد" وقالت وهي تربت
على رأسها:

-ولا يهملك يا قلبي، أصلاً هي متربتش
فعلاً.

في تلك اللحظة، كان هو يقف بعيداً يتابع
ما يحدث بابتسامة تسلب العقول، وهو
يحدث نفسه بدهشة:

- "أيعقل أن تكون هناك فتاة بهذا القدر
من الجنون؟"

قطع أفكاره دخول رجال العائلة فجأة،
بينما يسأل أحدهم بجدية:

- "من هذا؟"

قال "المهدي" بصوت هادئ: السلام
عليكم، مين حضرتك؟

تقدم "أشرف" مصافحاً وقال بجدية:

-وعليكم السلام ورحمة الله وبركاته. أنا
المقدم أشرف المصري.

رد "المهدي" بابتسامة فاترة: أهلاً
وسهلاً. تشرفنا، بس ممكن تفهمني إيه
اللي حصل؟ ونور كانت فين؟

قال "أشرف" بحزم: طبعًا هفهم
حضرتك، بس ممكن نقعد في مكان بعيد
عن الدوشة؛ ثم ألقى نظرة خاطفة على
"نور".

قالت "نور" بصوت منخفض وهي
تضيق عينيها:

-دوشة في عينك الحلوة.

أشار "المهدي" نحو الداخل: آه طبعًا،
تفضل جوه.

اعترضت "نور" وهي تقول بحماس:

-بس أنا عايزة أعرف! هتقولهم إيه؟
عشان مش فاهمة زيهم.

في تلك اللحظة، صاح "عثمان" من

بعيد:

-نوررر!

تراجعت "نور" للخلف وهي تهمس

بخوف:

-أنا بقول كده برضو.

"في المندرة..."

دخل الرجال إلى المكان المخصص لهم،

بينما جلس "أشرف" مع "المهدي" في

ركن منعزل ليتحدثا.

جلست "نور" على الأرض وسط دائرة

التفّ حولها الجميع بفضول، يتطلعون

لسماع تفاصيل ما حدث معها. كان

الترقب يملأ المكان، والعيون كلها
مُسلطة عليها.

قالت "دعاء" بلهفة: ها يا نور، احكي؛
حصل إيه بعد ما مشيتي من عندي؟

تظاهرت "نور" بالثقة وهي ترفع
حاجبها وتبدأ الحكي قائلة:

-بصي يا ستي، أنا كنت ماشية في أمان
الله... فجأة...

قاطعتها "ريهام" بفزع: ها، حصل
إيه؟!!

تابعت "نور" بحماس زائف: طلعت عليا
عربية، رشت في وشي ريحة حلوة. -
وبعدين محستش بنفسي غير وأنا بنزل
من العربية. وكان فيه رجاله كتير أوي.
قمت أنا عملت إيه...؟

قالت "بسملة" بفضول وهي تقترب

أكثر:

- إيه؟؟؟

أكملت "نور" وهي تلوح بيديها كأنها

تحاكي المشهد:

- ضربت الراجل اللي كان ماسكني! آمال

هو فاكر نفسه خاطف أي حد؟

علقت "جيهان" ببرود وهي ترفع

حاجبها:

- كدابة!

تجاهلتها "نور" وكأنها لم تسمع شيئاً

واسترسلت:

- "وجريت بسرعة، وكان في اتنين

بيجروا ورايا. قمت أنا وقفت ورا الحيط

ومديت رجلي، راح الراجل وقع. مسكت

العصاية اللي كانت جنبني وفضلت
أضرب فيه هو وصاحبه لحد ما كانوا
هيموتوا في أيدي.

عادت "جيهان" تقول بسخرية: كذابة!

"نور" رفعت صوتها بغضب مصطنع
وهي تنظر لـ "جيهان":

-إيه يا عم؟! إنت كنت معايا؟!

ضحك البعض بخفية، بينما تساءلت
"بسملة" مندهشة:

- وبعدين؟!

أجابت "نور" بمبالغة وهي تشير
بيديها:

-راح طلعي بقى إيه؟

قالت "بسملة" بحماس وهي ترفع
حاجبيها:

- إيه؟!!

ردت "نور" بجديفة مصطنعة: راجل
بدورين!

نظرت "بسملة" باندھاش: إزاي يعني؟!
ابتسمت "نور" بمكر وقالت:

- عارفة الراجل اللي في المولد اللي
بيبقى مرگب خشب في رجليه؟
ردت "بسملة" وهي تهز رأسها: آه،
ماله؟

قالت "نور" بنبرة درامية: هو ده! بس
الراجل اللي طلعتي رجليه حقيقية، قمت
أنا عملت إيه؟

"بسملة" بتلهف: إيه؟!!

ضحكت "نور" وأضافت:

- عضّيته في رجله! وقع على الأرض،
وفضلت أضرب فيه لحد ما ظهر جون
مايكل!

قالت "جيهان" بحدة وهي تهز رأسها
نافية:

- كدابة!

التفتت "نور" إليها بغضب وهي
تصرخ:

- إيه يا عم؟! إنت كنت معايا ولا إيه؟!

علّقت "دعاء" وهي تحاول كبح
ضحكتها:

- أصل الكلام اللي بتقوليه محدش
يصدقه!

أكملت "نور" بلامبالاة: المهم بقى،
ظهر جون مايكل وربطني. ماهي الكثر

تغلب الشجاعة، وده جون مايكل يا
جماعة!

تهدت "أم محمد" بضيق وقالت
بصرامة:

- ما تجزي يابت وتقولي الحقيقة
وتخلصينا!

ابتسمت "نور" وهي ترفع كتفيها
ببراءة:

- هو باين أوي إني بحور؟

ضحكت "دعاء" وقالت ساخرة: الحقيقة
أوي!

التفتت "جيهان" إلى "نور" وقالت: أنا
هروح أشرب حاجة. استني ما تحكيش
حاجة لحد ما أرجع.

قالت "نور" باستهزاء وهي تلوّح لها
بيدها:

-ماشي، روعي. استتيكي ولا يهملك!

تتهدت "نور" بعمق، ثم بدأت تحكي
الحقيقة رغم غياب "جيهان":

-المهم، في واحد رش حاجة في وشي،
ودخلني العربية. بعدها فتحت عيني

لقيت نفسي مربوطة، ونمت تاني. لما
صحيت اليوم اللي بعده، كان في راجل

واقف قدامي بيقولي: يلا، أروحك!

نظرت إليهم جميعًا وقالت وهي تهز
رأسها:

-وأنا بقى زي زيكم مش فاهمة أي
حاجة خالص! مستتية الراجل ده يطلع

عشان أفهم من الحج.

وبعد دقائق من الضحك والسخرية،
خرج "المهدي" ومعه "أشرف" من
المنذرة، وكان الأخير يتجه إلى خارج
المنزل. قبل أن يغادر، ألقى نظرة سريعة
على "نور"، مجنونته كما أطلق عليها،
ثم غادر مبتسمًا.

"في منزل تامر"

كان جميع سكان المنزل يجلسون في
دائرة وفي المنتصف زجاجة مياه
فارغة، فقالت "ديالا" بحماس:

-يلا يا عمتو، لفي الزجاجة!

التقطت "إيمان" الزجاجة وبدأت في
لفها وسط ترقب الجميع. توقفت
الزجاجة، فصاحت "سلمى" بفرحة:

-أشطه بقي، أنا اللي هسأل!

قال "تامر" وهو يزفر بضيق: ربنا
يستر!

نظرت "سلمى" له بمكر وسألته:

- "كم عدد الفتيات اللي اتكلمت معاهم في
السر؟ ولا تكذب! أنا بحذرك يا قميلة."

رفع "تامر" حاجبه بسخرية وقال:
اتكلمي زي الناس يا أختي!

ردت "سلمى" بتحدٍ: هذه لغتي الأم يا
أحمق!

نظر "تامر" إليها نظرات غاضبة، ثم
تذكر وجود والده بينهم، فقال بحدة:

-سلمى!

ضحك والده "حسني" بسخرية وهو
يراقب نظراته:

-مزعلش يا حبيبي، عارف أنك صايح.
قول، قول!

قالت "ديالا" بمرح: يلا يا تيمو، قول
لنا!

تنهد "تامر" وقال مستهزئاً:

-مالكوا متحمسين كده ليه؟ كأي هقول
لكم إزاي حصلت على جائزة نوبل!

قال "كريم" بضيق وهو يتابع الحوار:

-انجز وقلهم خلينا نخلص!

زفر "تامر" بملل وبدأ يعد على أصابعه:

-مريم... أحلام... آية... فاطمة...

تيسير... فريدة... إسراء...

وضعت "ديالا" يدها على فمها بصدمة

وعدم تصديق، بينما أكمل "تامر"

بضيق:

-مش عارف كام بصراحة، لأن عددهم
كثير. منهم في المدرسة، الجامعة،
الشارع... يعني كثير!

ضحك "حسني" بسخرية وقال: معش
يا بني، سألتك سؤال صعب!

قال "كريم": لفي الزجاجة يا إيمان!
أمسكت "إيمان" الزجاجة ولفتها مجدداً.
توقفت الزجاجة بين "تامر" و"كريم".

قال "تامر" بانتصار: بما أن مراتك
فضحتني، يلاقول. مين أول واحدة
حببتها ولسه بتحبها ولا لا؟

ثم أكمل بنفس لهجة "سلمى": ولا
تكذب! أنا بحذرك يا قميلة.

نظرت له "سلمى" بغضب وقالت: بارد!

تهد "كريم" بحزن مصطنع وقال:

-ماشي يا تامر، عايز تخرب بيت أخوك؟

تساءلت "سلمى" في سرها، هل كان
لكريم حب في حياته قبلها؟ لكن سرعان
ما بادلها "كريم" النظرة بحب نابع من
القلب وهو يقول:

-أنا محبتش ولا هحب في حياتي غير
واحدة فتحت عينا شفتها بتلعب قدامي،
كانت مكتوبة ليا من ساعة ما جت
الدنيا. ورغم إني خطبت قبلها عشان
أبعد عنها، لقيتني بقرب منها أكثر
وبحبها أضعاف الحب نفسه. هي ملاك
بضحكتها اللي تخطف القلب، دموعها
اللي بتكسرني، وخجلها اللي محلها.
صوتها المزعج وهي بتغني... كل حاجة

فيها حلوة! وأنا بحبها زي ما هي، بل
بعشقها!

صفق الجميع بفرحة، وصفر "تامر"
وهو يغمز لسلمي التي كادت تبكي من
شدة الخجل.

قالت "ديالا" بتمني: يا رب أكرمنا!
صفعها "تامر" بخفة وهو يقول:
احترمي نفسك، ده أنا قاعد!

ردت "ديالا" وهي تضحك: معاش،
الحماس خدني. يلا يا عمتو لفي!

لفت "إيمان" الزجاجة مجددًا وتوقفت
على "عايدة" فقالت "عايدة" وهي تهز
رأسها برفض:

-لا، أنا مش هلعب معاكم. أنا قاعده كده
بس.

قال "تامر" مازحًا: متهربيش يا أم
تامر!

صفعه "كريم" بخفة وهو يقول: اسمها
أم كريم!

قالت "إيمان" بضحكة خبيثة: نسيب
المهم ونمسك في هي أم مين؟ اخلصي
يا أم تامر!

ثم توقفت عند الاسم لتغيظ "كريم"، رد
"كريم" مبتسمًا:

-إيه يا إيمان؟ ده أنا حتى حبيبك!

نظرت له "إيمان" بغضب مصطنع: مش
مرضتش تجيب لي بيتزا وأنت جاي،
يبقى ولا أعرفك!

قالت "ديالا" بضحك: يلا يا عمتو،
اسألي ماما. بتهرب!

سألت "إيمان":

-بتحبي أخويا ولا لا؟ ومتقلّيش أه وأبو
العيال والكلام ده. عايزين نسمع قصة
حب!

نظرت "عايدة" بخجل نحو زوجها
"حسني" الذي ابتسم لها ليشجعها على
الحديث.

قالت "عايدة" بصوت هادئ: اللي بيني
وبين حسني أظهر من إني أقول عليه
حب زي اللي بتتكلّموا عليه. هو كان
أبويا قبل ما يكون جوزي. كنت بغلط
كثير أول جوازنا، بس عمره ما رفع
إيده عليّ ولا حتى صوته. كان دائماً
رحيم. فاكرة كويس قالي مرة: أوعي حد
فيينا ينام زعلان من الثاني، لو إنت

غلطانة أنا هاجي أصالحك، ولو أنا
غلطان تعالي صالحيني. ومدخليش حد
بيننا، لأن أي علاقة بيدخل فيها طرف
تالت بتخرب حتى لو نيته خير.

صاح "تامر" بإعجاب: الله! الله! الله!
هو ده الكلام. وأنا أقول طالع لمين؟
اتاري طالع لروميو وجوليت!

قال "حسني" بصرامة: احترم نفسك يا
واد!

ثم نظر لزوجته بفخر، كأنها كل
انتصاراته، قال "تامر":

-حاضر يا باشا. لفي الزجاجة يا حب!
لفت "إيمان" الزجاجة، وتوقفت على
"ديالا" و"حسني".

قالت "ديالا": بابا، في سؤال محيرني
من زمان. ليه الناس فاكرة إن الملتزمين
حياتهم كلها جد ومفيش ضحك؟

أجاب "حسني" مبتسمًا: عشان الدراما
المصرية صورت الرجل المتدين بجلابية
ولحية، ودايمًا غضبان ويقول أستغفر
الله العظيم كأنه معترض. لكن ده غلط.
الدين يجمل حياتنا، مش يعقدها...

أكمل حديثه بإسهاب حول التوازن بين
الالتزام والاستمتاع بالحياة، لتعم الحكمة
والهدوء المكان وهو ينظر للجميع:

-بُصوا يا ولاد، الدين مش مجرد عبادات
نأديها وخلص، ولا صورة مرسومة
غلط في خيال الناس. الدين ده حياة...
رحمة، حب، عدل، وبهجة. النبي صلى

الله عليه وسلم كان أكثر الناس التزامًا
بالدين، لكنه كان يبتسم ويمزح مع
أصحابه، ويلعب الأطفال، وكان حياته
مليانة خير وتوازن.

سألته "ديالا" باهتمام: يعني إيه توازن
يا بابا؟

أجابها برفق: يعني ما يكونش الإنسان
متدين في المسجد بس وينسى الدين في
باقي جوانب حياته. الدين بيظهر في
أخلاقنا، في تعاملنا مع الناس، في برنا
بأهلنا، وفي حبا لأصحابنا. لما تكوني
بتدرسي، لما تساعدي أمك، لما تفرحي
قلب حد بكلمة حلوة، ده كله دين. ربنا
بيحب يشوف عباده سعداء في طاعته.

قالت "سلمى": طب ليه بنشوف ناس
متدينة فعلاً بس قاسية وما بيضحكوش؟
رد "حسني" بحكمة: دي مش صورة
الدين الصح يا سلمى. ربنا سبحانه
وتعالى وصف النبي في القرآن وقال:
وما أرسلناك إلا رحمةً للعالمين. لو
الالتزام بالدين ما خلاش الإنسان رحيم
ومتسامح، يبقى فيه حاجة غلط في
فهمه للدين. النبي كان ليناً وطيباً، وكان
يخاطب كل واحد بما يفهمه، ويحترم
الناس حتى لو مختلفين معاه.
سأل "تامر" وهو ينظر بفضول: طب
يعني ممكن الإنسان يكون ملتزم
ويضحك ويتبسط؟

ابتسم "حسني" وقال: طبعًا يا تامر!
الدين ما منعش الفرحة ولا الضحك،
بالعكس، ربنا خلق لنا الدنيا بمباهجها
علشان نفرح ونستمتع، لكن في إطار
اللي يرضي ربنا. يعني نضحك من غير
ما نجرح حد، نتبسط من غير معصية،
نفرح بس ما ننساش شكر ربنا على
نعمه.

أضافت "ديالا" وهي تبتسم: يعني نعيش
حياتنا عادي بس من غير ما نبعد عن
ربنا؟

هز "حسني" رأسه مؤكدًا:

-بالظبط. الدين يسهّل حياتك ويظمن
قلبك. لما تكون علاقتك بربنا قوية،
هتحمس إنك مطمئن حتى في أصعب

ظروفك، وهتس بالفرحة في أبسط الحاجات. مفيش تعارض بين إنك تكون إنسان ملتزم وإنك تعيش حياتك وتفرح.

قالت "سلمى" وهي تفكر: يعني الدين مش مجرد صلاة وصوم؟

رد "حسني": الصلاة والصوم أركان أساسية، لكن الدين كمان أخلاق ومعاملة. لما تسامحي، لما تعيني حد محتاج، لما تحبي الخير لغيرك زي ما بتحبيه لنفسك، لما تتكلمي بأدب واحترام... ده دين. والنبي قال: إنما بُعثت لأتمم مكارم الأخلاق.

نظر "حسني" إليهم بحب وقال: الدين مش حاجة تقيدك، ده نور ينور لك طريقك. الدين ما بيحرمكش من الفرح،

لكن يعلمك تفرح صح. يعلمك إن
الضحكة اللي تخرج من القلب تكون
صافية وما تؤذي حد.

صاحت "ديالا" بحماس: يا سلام يا بابا!
يعني اللي فاكر إن الدين كآبة، هو اللي
مش فاهم الدين أصلاً.

ضحك "حسني" وقال: بالظبط! الدين
رحمة وسعادة وتوازن. ربنا ما خلقتناش
علشان نعيش في حزن، ربنا قال: ولا
تتس نصيبك من الدنيا.

قالت "إيمان" مبتسمة وهي تلف
الزجاجة مرة أخرى:

-خلاص يا جماعة، هنعيش حياتنا صح
وبالدين، من غير ما نخلي حد يحسنا

إن الدين تعقيد. ديننا جميل وبيحب
الحياة.

ضحك الجميع وأكملوا لعبتهم وهم
يفكرون في كلام "حسني" الذي زرع
في قلوبهم حبًا للفهم الصحيح للدين،
بعيدًا عن الصور النمطية المغلوطة.

"نور" بلهفة وهي تتحدث مع والدها:
-أيوه يا بابا يعني قالك إيه؟ أنا مش
فاهمة حاجة! عايزة أفهم مين اللي
خطفني؟ وليه؟

"المهدي" بنبرة هادئة محاولاً تهدئتها:
-اهدي يا "نور"، حصلش حاجة. هو
قال إنه كان معديّ وسمع صوت ضرب،

دخل وضرب الرجالة وأنتِ كنتِ نائمة،
فقومك وجابك هنا.

همست "نور" لنفسها بقلق وارتباك،
بينما كانت عيناها شاردة:

-بس هو كان موجود قبلي... يبقى إزاي
الكلام ده؟ أكيد في سر ومش عايزيني
أعرفه... يا إما هو كذب على بابا. بس
ليه؟

"المهدي" بنبرة أبوية: ادخلي نامي
شوية يا "نور"، يمكن تعبانة ودماغك
مش مرتاحة.

ردت "نور" بهدوء: حاضر يا بابا. يلا
يا بنات على الأوضة، عايزاكم في
حاجة.

تحركت الفتيات معها إلى الغرفة وأغلقت
الباب خلفهن. جلست "نور" على
السرير بينما تجمعن حولها بفضول.

"نور" بضيق وهي تسرد لهن كل ما
حدث:

- هو ده اللي حصل... وأنا مش فاهمة
حاجة.

"بسملة" بتفكير:

-ولا إحنا! مين اللي خطفك وإيه علاقة
"أشرف" بالموضوع ده؟

"دعاء" وهي تعقد حاجبيها بتفكير
عميق:

-الموضوع يقلق... بس أظن إن عمي
أكد عرف الحقيقة، لأن الكلام اللي قاله
ما يقنعش حتى عيل صغير.

"بسملة" موافقة: صح! حتى أنا مش
مقتتعة.

"نور" ضاحكة: اهي عيلة مقتتعتش!

"بسملة" بعصبية مفتعلة: نور!

"نور" بمرح وهي تضحك: قلب وروح
"نور"!

"دعاء" بتصميم: أنا هتصل بـ "فارس"

وأقوله إنك رجعتي. هو قلقان عليكي.

"نور" بسرعة: لا والله!

"بسملة" بتهمك وهي تنظر لـ "نور":

-وأقول لها يا "دعاء" "فارس" قال إيه

عليها؟

"نور" بفضول: قولي يا بت!

"دعاء" بتصحيح نبرة صوتها الجادة:

-اسمه الدكتور "فارس"، وفكري تقولي
لها حاجة... وأنا هوصيه عليكى!

"بسملة" بمرح: لا يا عم الطيب
أحسن... عايزين نعدي السنة بسلام.

"نور" ساخرة: جبانة!

"بسملة" مدافعة عن نفسها: لا يا
أختي، دي مش تهديد... ده نص الدفعة
شال المادة بتاعته السنة اللي فاتت!

ضحكت الفتيات، ثم أمسكت "دعاء"
هاتفها واتصلت بـ "فارس".

رد "فارس" بمرح معتاد من الطرف
الآخر:

-وأنا أقول الفون بيغني وفرحان ليه!
اتاري اسم جميلة الجميلات منور عندي.

"دعاء" بصوت منخفض جدًا وهي

تحاول السيطرة على خجلها:

- مساء الخير.

"فارس" بنبرة مليئة بالمرح:

- "مساء الورد يا جميل. حصل حاجة؟

ولا وحشتك؟

"نور" وهي تهمس وتضحك بجانب

"دعاء":

-يا محني!

"دعاء" بضيق وهي تحاول إبعاد

"نور" عنها:

-غوري يا بت في داهية!

"فارس" وهو يضحك عندما سمع

حديثهما:

-هي الكارثة المتحركة رجعت؟

"دعاء" بجدية: آه، رجعت من ساعتين.

"فارس" بارتياح:

-حمدلله على سلامتها يا قلبي.

"دعاء" بخجل وهي تبتسم: الله يسلم

حضرتك.

"فارس" بمزاح: حضرتي؟ ماشي!

بلغيه عمي إنا هنجي النهاردة نجيب

الذهب، وبكرة نكتب الكتاب وتصبحي

على اسمي يا جميلتي.

احمرّ وجه "دعاء" من شدة الخجل

وقالت بتلعثم:

-قول لبابا أنت!

"فارس" بضحكة خفيفة: أكيد هتصل

بيه. خلي بالك من نفسك لحد ما أجي.

"دعاء" بخجل: وأنت كمان... سلام.

"فارس": سلام.

أنهت "دعاء" المكالمة، بينما كانت
"نور" و"بسملة" تحديقان بها بدهشة
وابتسامة خبيثة، وجيهان تتابع الحديث
منذ البداية بصمت.

"نور" وهي تضحك: مبروك يا
عروسة، أنا العريس.

"بسملة" بمزاح: الدكتور "فارس" قلبه
عليك أوي... مش عارفين مين هيسقط
السنة الجاية!

ضحكت الفتيات بصوت عالٍ، بينما
جلست "دعاء" تحاول إخفاء خجلها بين
ضحكاتهن، في جو امتلأ بالمرح وخفة
الدم.

الفصل الثالث عشر

♡ لقد مرت عليك فترات أشد قسوة من
هذة الفترة..! أعرف، لكنني وفي
الماضي كنت أملك طاقة تتحمل كل
شيء، الآن أنا مستهلك.♡

كانت تسير في منتصف الطريق بثقتها
المعهودة، لا تبالي بالسيارات التي تسير
بالاتجاه المعاكس؛ لكن الآن، وهي
شاردة الذهن، كادت أن تصطدم بإحدى
السيارات. توقف السائق أمامها في
اللحظة الأخيرة ليصيح بغضب أعمى:

- أنتِ يا متخلفة! ابعدي عن الطريق بدل
ما تجيبي لحد تهمة!

نظرت له ببرود، ثم واصلت طريقها
دون اكتراث. لو كانت بحالة تسمح لها

بالجدال، لما صمتت على صراخه بها؛
لكن الآن، هي متعبة... متعبة للحد الذي
يجعلها صامته بشكل مرعب، بسبب
والدها العزيز الذي اخبرها بموافقته
على الزواج من ابن شقيقه.

كان يسير خلفها بخطوات سريعة، يريد
الوصول إليها الآن؛ ما إن اقترب منها
حتى نادى باسمها:

-جيهان!

توقفت مكانها، تتمنى أن تكون أذناها قد
خدعتها، وألا يكون هو؛ إنه آخر شخص
تود رؤيته الآن، لكن، ببطء، التفتت
لتجده يقف أمامها، ينظر لها بتقييم
واضح، تنفست بعمق وهي تقول
باستغراب:

-نعم؟ في إيه تاني؟ وماشي ورايا ليه؟

رد عليها بثقة أقرب للغرور: عايز أتكلم معاكى.

لم يكن طلبًا بقدر ما كان أمرًا، فنظرت له بسخرية، قائلة:

-معقول البش مهندس هيتواضع ويتكلم مع عامة الشعب؟ ده كتير والله!

وضع يده في جيبه، مثبتًا نظراته عليها، وقال ببرود:

-شوفتي؟

لترد عليه بحدة:

-عايز إيه يا محمد؟ مش خلصنا؟

ابتسم "محمد" بسخرية:

-تو تو تو... عايزك إنت يا جوجو.

أطلقت "جيهان" ضحكة ساخرة عند
سماع لقبها المفضل من طفولتها، والذي
لم ينادها به سواه:

-وأنا مش عايزاك يا حمادة!

"محمد" بثقة: طالما حمادة يبقى
هنتفق.

نظرت له "جيهان" بحزن، قائلة:

-صعب يا ابن عمي، كل حاجة انتهت من
زمان.

اقترب منها بجدية، وقال: لو انتهت بجد
مكنتيش تبصي في كل الاتجاهات إلا
عنيا؛ لكن أنت بتعملي كده عشان تدلعي
وتفرحي إني متمسك بيكي قدام صحابك،
وأنا معنديش مانع، بس مطوّلش...
عشان أنت عارفاني بزهدك بسرعة.

لو كان شخص آخر مكانها لأصيب بالذهول، لكن هي تحفظه عن ظهر قلب، ردت بهدوء يخالف ضجيج روحها:

-مش ملاحظ إن غرورك زاد عن الأول بكثير؟ ومش عارفة السبب إيه!

ابتسم "محمد" بثقة: دي ثقة يا باشمحمامية، مش غرور، وازاي مش عارفة السبب؟

كان يقصد أنه يتحدث بثقة لأنه يعلم أنها تحبه كثيرًا لدرجة ليس لها حدود؛ لكنها فهمت كلامه بشكل آخر، لذلكصاحت به بغضب مفاجئ بالنسبة له:

-لا! غلطانة! ازاي نسيت البشمهندس وكلية الهندسة القمة وأنا واحدة فاشلة دخلت حقوق بالعافية؟

قال سريعًا: مقصدتـش كده!

قاطعت كلامه بحدة: ولا تقصد! مش
فارقة... اسمعني يا محمد، عشان دي
آخر مرة هكلمك فيها.

نظر لها بترقب، ينتظر ما ستقوله.
للحظة، بدا وكأنه لا يهتم برأيها؛ فهي
بالنسبة له، بكل الأحوال، ستكون له.
قالت "جيهان" بحزن نابع من أعماق
قلبها:

-إنت كنت تتحب وقت ما أنا حببتك. لكن
دلوقتي... لا تتحب، ولا أنا بقيت أحبك.

ابتسم بثقة وقال: متكريش... إنت لسه
بتحبيني.

هزت رأسها وقالت بمرارة: قولتلك مش
هنكر إني حببتك. لا... دا أنا عشقتك

مش حبيتك بس! واستحملت منك أسوأ
معاملة، وبرضو متكلمتش، بس كفاية
كده... أنا تعبت. ومش عايزاك، ابعده
عني... الله يرضى عنك.

تركته وغادرت بألم كاد يحرقها، بينما
هو وقف يتأمل رحيلها بابتسامة واثقة
وهو يتمتم لنفسه:

-إنتِ ليا... حتى لو غصب عنك.
"قولتلها انا رافض نبقي أصحاب
يا تكوني معايا يا ماتكونيليش
سكتت لحظة

علشان كانت هي ملاحظه
ان انا مكسور وبهددها
مدت ايدها
ومسكت ايدي

وقالتلي خلاص فك يا سيدي

عازماك على قهوة ما تكسفينيش"

كانت "بسملة" تجلس في غرفتها، أعلى

سريرها، تحتضن وساداتها وتبكي وهي

تستمع إلى شاعرها المفضل؛ لكن فجأة،

اقتحم إعصار هدوءها الرومانسي

الهادئ.

قالت "نور" وهي تفتح الباب دون

استئذان:

-أنتِ بتحبي من ورايا يا بت؟

نظرت "بسملة" لها بغضب وردت

بحدة:

-بت في عينك يا مصيبة! مش في باب

تخبطي عليه ولا داخله زي الطور

الهايج؟

دخلت "نور" الغرفة وجلست بجوارها
وهي ترد ببرود:

-أنا عمري جيت عندك وخبطت على
الباب؟

"بسملة" رفعت حاجبها بسخرية:

-بصراحة... لا! معلى، أنا اللي غلطانة.

ابتسمت "نور" بانتصار:

-شوفتي! هال... ردي بقى، في حب جديد
ولا إيه؟

ردت "بسملة" وهي ترفع عينيها
بضيق:

-هو كان في قديم عشان يبقى فيه جديد؟

غمزت "نور" بمكر وقالت: عيني في
عينك كده!

نظرت لها "بسملة" بتحذير صارم:

-نوور!

رفعت "نور" يديها مستسلمة وقالت:

-خلاص يا سستي... قوليلي مالك طيب؟

عشان نروح لـ دعاء.

أجابت "بسملة" وهي تحاول كتم

دموعها:

-مضايقة أوي ومخنوقة ومش عارفة

مالي.

"نور" باهتمام: ليه؟ حصل حاجة معاك؟

أو حد قالك حاجة؟

هزت "بسملة" رأسها نفياً وقالت:

-المشكلة إنه لأ.

ردت "نور" بتهكم: يا بت النكدية! أمال

مضايقة ليه؟

دخلت عليهما فجأة "حورية" وهي تقول
بابتسامة ساخرة:

-والله أنا ما نكديّة، هي مش عارفة
طالعة لمين!

ضحكت "نور" وقالت بمرح:

-يا كسفتك يا حازم!

نظرت "بسملة" إليها بتشفي وقالت:

-أحسن!

"نور" بمرح زائد: منورة البيت يا طنط!

ابتسمت "حورية" بلطف وهي ترد: ده

نورك يا نور؛ أنا كنت جاية أسألكم،

تشربوا حاجة ولا تتغدوا؟

"بسملة" بحماس: أنا جعانة!

"نور" اعتذرت قائلة: تسلمي يا طنط،
بس إحنا لازم نمشي عشان نروح لـ
دعاء؛ من الصبح وهي ترن عليا.

ردت "حورية" بحنان: طيب، هجهزلكم
بسرعة مش هتأخر.

"نور" بهدوء: معلىش يا طنط، هناكل
عند دعاء عشان متزعلىش.

قالت "حورية" بابتسامة: خلاص،
براحتكم.

ثم تركتهما وغادرت الغرفة؛ نظرت
"بسملة" إلى "نور" وقالت وهي
تنهض:

-هنروح نشترى حاجة الأول.

"نور" بسرعة: طيب، بس جهزي
بسرعة. دعاء هتولع فينا!

وقفت "بسملة" لتجهز نفسها، لكن فجأة
رن هاتفها، نظرت للشاشة لتجد
"دعاء" هي المتصلة؛ أشارت لـ "نور"
قائلة:

-ردي عليها عبال ما أخلص.

التقطت "نور" الهاتف وردت بمرح:

-عروستنا القمر وحشانا!

جاء صوت "دعاء" من الطرف الآخر
بعصبية:

-ماشى والله... لوريكم أنتِ وهي بس لما
تيجوا!

ضحكت "نور" وقالت: اهدي يا جميل،
العصبية وحشة عليكِ.

لكن "دعاء"، وقد فاض بها الكيل،
صرخت بها:

-نور! أنتم فين؟

"نور" بسرعة:

-خلاص متز عيش، أنا عند بسملة،
هتجهز وهنيجي على طول، مش
هنتأخر.

سألت "دعاء" بضيق: والزفتة الثالثة
فين؟

ردت "نور" بتعجب: مش عارفة،
افتكرتها وصلت عندك، عشان رحلتها
البيت لقيتها مشيت.

هزت "دعاء" رأسها بنفي قائلة: لا،
مجتش وبردن عليها مش بترد، هرن
عليها تاني.

"نور" بتهدئة: ماشي، مسافة الطريق
ونكون عندك.

أغلقت الهاتف، ثم صاحت بضيق وهي
تلثفت لـ "بسملة":

- يلا يا زفتة، يا بسملة!

اتصلت "دعاء" بـ "جيهان" لتخبرها
الأخيرة أنها في الطريق إليها.

أصبح منزل "دعاء" مليئاً بالعائلة؛
فالليلة لقاء القلوب برباط عقد مقدس،
ورغم الهرج والمرج الذي يملأ المكان،
إلا أنها شعرت بالوحدة بدون صديقاتها،
فهن مصدر البهجة في حياتها، بينما
كانت تجلس، تذكرت ما حدث بالأمس
في محل المجوهرات، وما فعلته "نور".

«Flashback»

كانت "نور" تمسك بإحدى الدبيل وهي
تقول للبائع بجرأة:

- بص يا عمو، سيبك من الكلام اللي
قاله الدكتور، أنت هتكتب اسمي على
الدبيلة تمام؟ ولو حطيت جنبها قلب يبقى
كتر خيرك!

نظر لها "فارس" بدهشة وهو يقول
ساخرًا:

-ويكتب اسمك ليه إن شاء الله؟

نظرت "نور" إلى "دعاء" وكأنها تنتظر
إجابة، لكن "دعاء" بدت مرتبكة ولم
تفهم الإشارة. رفعت "نور" حاجبها
وقالت بحدة: أنا عارفة إنك غبية ومش
بتفهمي بالإشارة؛ ردي على الأستاذ...
أنا أبقي ليكي إيه؟

تدخلت "بسملة" تقول بتصحيح ساخر:

-دكتور... مش أستاذ.

ردت "نور" بلا اهتمام: مش هنتناقش

في المهنة دلوقتي، ردي يا دعاء، أنا

أبقى إيه؟

"دعاء"، بإخراج واضح من تصرف

"نور"، أجابت بخجل:

-صاحبتي.

وجهت "نور" نظرها إلى "فارس"

مجددًا وقالت بجدية مضحكة:

-شفت؟ يلا يا عمو، اكتب الاسم عشان

نمشي!

تدخلت "جيهان" وهي تبتسم قائلة: لا يا

نوره، مينفعش تكتبي اسمك وحدك!

ابتسم "فارس" أخيراً ظناً منه أن
"جيهان" تتحدث بعقل، لكن ابتسامته
تلاشت حين أكملت "جيهان" بحماس:

-أنتِ أنانية؛ عايزة تكتبي اسمك لوحديك
ليه؟! احنا هنكتب الحروف أحسن!
ثم أشارت إلى "فارس" وهي تضيف:
-وهنكتب حرفك معنا!

رد "فارس" بسخرية واضحة: إيه الكرم
ده؟ كتر خيرك والله!

ثم صاح بهم بنفاد صبر: أنتِ مجنونة
أنتِ وهي؟ هتكتبوا على الدبلة بصفتم
إيه؟!

نظرت "نور" إلى "بسملة" الواقفة
بجوارها وقالت:

- هو فاقد الذاكرة ولا إيه؟ مش لسه
دعاء قايلة إني صحبتها؟

قالت "بسملة" وهي تهز رأسها بأسف
مصطنع:

- شكله كده؛ يعيني عليك يا دعاء،
ملحقتيش تفرحي بيه!

رد "فارس" وقد بدأ صبره ينفد: لو
كنتوا خلصتوا، ممكن تستتوا بره مع
العيلة؟

قالت "نور" ببراءة زائفة:

-وليه؟ أنا هستنى حضرتك؟!!

تجاهلها "فارس" وهو يتحدث إلى
الصائغ بحدة:

-لو سمحت، اكتب اللي مكتوب في
الورقة!

تدخلت "نور" مرة أخرى باندفاع: وليه يكتب اللي أنت قولته وما يكتبش اسمي؟
رد "فارس" بغضب مكبوت: يمكن عشان خطيبها مثلاً؟ ودي شبكتنا وبكرة هتكون مراتي!

قالت "جيهان" بتحدٍ ساخر: وده مبرر يخايك متكتبش حروفنا؟ وتمشي سلطتك علينا حتى برا الحرم الجامعي؟

"فارس" بحزم: أيوه مبرر، ولو مسكتيش، هستغل سلطتي بطريقة مش هتعجبك!

صمتت "جيهان"، تفكر في كلامه، ثم سارت بهدوء لتجلس بجوار "دعاء"، لحقت بها "بسملة" وهي تهمس، بصوت سمعه "فارس" بوضوح:

-ده بيهدد يا عم من أولها! أنا مش
لاعبة معاكم تاني.

"فارس"، وهو ينظر إليهم بنظرات
تحذيرية:

-ده مش تهديد، ده آخر تحذير ليكم!

ثم التفت إلى "نور" التي كانت تنظر
إليه بسماجة واضحة، لتقول بتحدٍ:

-إيه بتبصلي كده ليه؟ هما خايفين على
مستقبلهم ليضيع، أنا معنديش مستقبل
أصلاً. ها... كنا بنقول إيه؟

"فارس"، وقد فقد أعصابه وهو يجز
على أسنانه:

-آنسة نورهان!

التفتت "نور" إلى "دعاء" وقالت
بمرح:

-خلاص يا عم؛ يا بت يا دعاء، ده
بيتحوّل! سيبيه، واجوزك أخويا اللي
دائمًا بتقولي عليه عسل!

نظر لها "فارس" بنظرة مشتعلة، وكاد
يحرقها بها، لتسرع "نور" وتهزول
بعيدًا، وتجلس بهدوء بجوار "دعاء".

كانت "دعاء" تتابع الحوار بصمت، ثم
نظرت إلى صديقاتها الثلاث، اللواتي
يحدّقن في "فارس" ببراعة مصطنعة،
لتطلق ضحكات خافتة وهي تهز رأسها.

«Back to present»

جلست "دعاء"، تبتسم بحب، وهي
تهمس لنفسها:

-الله يكون في عون فارس الأيام
الجاية... المجانين مش هيسيبوه في
حاله!

نفخت "نور" بضيق وهي تراقب
صديقتها:

-هااااا، خلصتي ولا لسه؟

"بسملة" وهي منشغلة بترتيب
أغراضها:

-خلاص، دقيقتين ونمشي... هروح
أحاسب وارجع.

تركت "بسملة" نور واتجهت نحو
الكاشير بخطوات سريعة، لكن خطواتها
توقفت فجأة عندما رأت ذلك المشهد
الذي جمدها في مكانها؛ كان "تامر"

يعانق فتاة بطريقة مستفزة، يهمس في
أذنها بكلمات لا تدري ماهيتها، بينما
أطلقت الفتاة ضحكات عالية أثارت انتباه
كل من في المكان؛ لاحظ "تامر" ذلك،
فتوقف لينظر بغضب إلى الفتاة، يحذر
بعينه أن تكف عن هذا التصرف، لكنه
صدم عندما وقعت عيناه على "بسملة".

تحولت نظراته من الغضب إلى الدهشة،
وأبعد ذراعيه عن الفتاة بسرعة وكأنه
ارتكب جريمة؛ أما "بسملة"، فقد اكتفت
برفع حاجبها بسخرية، ترسم ابتسامة
باردة على وجهها قبل أن تدير ظهرها
وترحل.

تأفف "تامر" بضيق وهو يتمتم:

- هي آخر شخص كنت أتمنى يشوفني
كده."

ثم التفت إلى الفتاة التي ما زالت تتعلق
به بدلع مصطنع، وقال بحدة:
- امشي.

الفتاة، وهي ترمقه بدلال: تيمو...
قاطعها بغضب متصاعد: قولى لك
امشي!

شعرت الفتاة بالإهانة فغادرت مسرعة،
بينما هو أخذ نفسًا غاضبًا وتحرك نحو
الكاشير، ليقف بجانب "بسملة" التي
كانت تحاسب؛ لم يكن يريد أن يترك
الأمر هكذا، فهمس لها بصوت يحمل
مزيجًا من التبرير والارتباك:

-دي أخت صاحبي... كانت هتقع وأنا
سندتها.

رفعت "بسملة" رأسها إليه بحدة، تنظر
له بتعجب شديد؛ لماذا يبرر لها أصلاً؟
ما شأنها به وبحياته؟ لقد رأته بالفعل
أكثر من مرة في مثل هذه الأوضاع، ولم
تهتم.

قالت له بصوت بارد وقاطع: وأنا مالي
بيك؟! أنت حر.

ثم حملت أغراضها واتجهت نحو "نور"
التي كانت تنتظرها عند الباب، خرجت
الاثنان من المكان، تاركة "تامر" يغلي
من الداخل؛ لكم الحائط بقوة، غضباً
جحيمياً، وهو يتمم بحنق:

مش عارف ليه كل مرة لازم تشوفني
في أسوأ وضع!

«قد يمنحك القدر فرصًا كثيرة؛ ولكن
واحدة فقط هي هدية العمر، وهكذا كانت
هي بالنسبة له "هدية القدر". كان
بإمكانه أن يرتبط بفتاة تملك المال
والجمال، ولكنه لا يهتم بكل هذا، فهو
يردد دائمًا:

- "اختر من يرتضيه قلبك وعقلك"...
وهي من ارتضاها قلبه وعقله.»

كان "فارس" يقف أمام المراة يصفف
شعره، يعيده كله للخلف بعد أن ارتدى
بدلة رمادية فاخرة جعلته شديد
الوسامة؛ ألقى نظرة أخيرة على انعكاسه

في المرآة، ثم ابتسم برضا، وغادر
الغرفة متجهاً نحو غرفة أخيه.

ما إن دلف إلى الداخل حتى تغيرت
ملامحه، وصاح بغضب:

- كل ده بتجهز؟ بقالك ساعة! أنا العريس
مش أنت.

استدار له "مارس" وقد لاحت في عينيه
لمعة إعجاب، ثم بدأ يصفر، غير مبالٍ
بغضب أخيه وسعيد بما يراه:

- واو... أنا لو بنت كنت اتجوزتك!

صفعه "فارس" على رقبتيه بخفة وهو
يرد ساخرًا:

- احترم نفسك.

ثم احتضنه بحب أخوي، قال "مارس"
وهو يربت على كتفه:

- مبروك يا دوك، ربنا يتملك على خير.

ابتسم "فارس" وقال بصدق: الله يبارك
فيك... وعقبالك يا حبيبي.

في هذه اللحظة، دلفت "روبين" إلى
الغرفة، مرفوعة الرأس بشموخ،
ووجهت حديثها لـ "فارس": جيت لـ
'سنّيورة' اللي قولت لك عليه؟ بدل ما
تفضحنا بلبسها قدام العيلة!

رد "فارس" بهدوء: آه يا ماما، جيت...
في حاجة تاني؟

تابعت "روبين" حديثها بحدة: آه، ياريت
تقولها متعزّمش صحابها، لأنّي مش

عايزة أشوفهم بعد اللي حصل في محل
المجوهرات.

رد "فارس" مدافعًا عن أصدقاء
خطيبته:

-ماما، دول أصحابها، وهما كانوا
بيهزروا معايا، وبعدين ده بيتها مش
هنتحكم مين يجي ومين ميغيش.

صرخت "روبين" بعصية مفرطة: يعني
إيه؟ أنت ملقتش غير واحدة زي دي؟!!

تحدث "فارس" بحزم، ولامحه غاضبة
غير مقصودة:

-مالها دي؟! أنا مشوفتش أفضل منها!
قالت "روبين" بسخرية: يبقى تكشف
نظر... لأن مستواك انحدر أوي.

أجابها "فارس" بحدة: إلا 'دعاء' يا
ماما، دعاء خط أحمر! لو مش عاجبة
حضرتك ده شيء يرجع لك، بس هي
عجباني... وأوي كمان.

"روبين" بحدة: مش عاجباني، ومش
قابلة إن واحدة زي دي تتجوز ابني.
نظر لها "فارس" بجديّة: بس أنا اللي
هعيش معاها مش حضرتك.

قبل أن ترد، دلف زوجها "ياسر" إلى
الغرفة، ونظر إليها بحدة قائلاً:

-الموضوع ميخصكيش يا روبين،
محدث قبل كده جبرك على اختيار، ولا
اختارك حاجة، عشان تختاري لابنك،
وبعدين ابنك مش صغير، يقدر يتحمل
نتيجة اختياره... ولا إيه؟

قالت "روبين" بغضب: ياسر، البنت
دي...

قاطعها "ياسر" مجددًا، وقد بدا حازمًا:
-يلا عشان ما نتأخرش على الناس.

غادرت "روبين" الغرفة غاضبة وهي
تتمتم بوعيد، لتقسم أنها لن تسمح لهذا
الزواج أن يتم، همس "مارس" الذي
كان يتابع الحديث بصمت:
-ربنا يستر.

ابتسم "ياسر" وقال له: هيستر بإذن
الله.

ثم تقدم من "فارس" ليحتضنه: مبروك
يا حبيبي.

بادله "فارس" العناق بحب: |
-لله يبارك في حضرتك يا بابا.

قال "ياسر" وهو يغادر الغرفة: هسيبكم
وأشوف روبين لحد ما تخلصوا.

علق "مارس" بمرح وهو يضحك: ربنا
معاك يا حج.

ثم التفت إلى "فارس" الذي جلس على
الفراش بضيق وقال بجدية:

-مالك يا عريس؟

رد "فارس" بخوف: خايف ماما تقول لـ
'دعاء' كلمة تزعلها في يوم زي ده.

جلس "مارس" بجواره وقال وهو ينظر
له باهتمام:

-اشمعنا 'دعاء'؟

في البداية لم يفهم "فارس" سؤاله،
لكنه سرح قليلاً ثم همس بحرارة:
مختلفة... مميزة... دافئة... حنونة...

هشة رغم قوتها الظاهرة للجميع، إلا إن
عينها تكشف قد إليه هي ضعيفة...
بتوزع حنان وحب للجميع وهي أكثر حد
محتاجه... في عينها براءة الكون كله،
وكأنها أميرة خرجت من كتب الأساطير.

صمت للحظات وهو يتذكر لقاءه الأول
بها في مكتب العميد، حين كانت تدافع
عن صديقاتها بلا خوف. عاد ليكمل
بصوت غائم بعاطفة:

-أول مرة شففتها كانت بتتكلم بكل ثقة
قدام العميد، عجبتي أوي قوتها، وفي
آخر اليوم شففتها قاعده في مكان منعزل
وبتبيكي زي الأطفال، وقفنت مكاني
أتابعها، ولما قررت أروح أشوف مالها،
لقيت أصحابها جم قعدوا جنبها، كملت

طريقي، لكن صورتها اتحفرت في
ذاكرتي للأبد.

قال "مارس" بمرح وهو يبتسم: الله الله
عليك يا حبيب والديك! كل ده ومخبي
على مارس حبيبك؟!

ابتسم "فارس" بخجل وأكمل: مش
عارف بحبها بجد ولا لأ، بس كل اللي
أعرفه إنها ليا وأنا ليا من أول لحظة
شفتها، ومينفعش يكون حد مكانها.

نهض "مارس" ليحتضنه بسعادة وقال
بحماس:

- أنت بتعشقها يا بني، مش بتحبها.

"فارس" بابتسامة هادئة: مش هتسرع
وأقول بحبها... هسيب الأيام تحدد
مسمى لمشاعري، بس حاليًا اللي أعرفه

إنها سر سعادتِي، وإنها الوحيدة التي
بفرح من قلبي لما بشوفها.

وصلت بعد نصف ساعة إلى مكتبه،
وكادت أن تدق الباب، لكنها تراجعَت
وهمت بالمغادرة، ولحسن حظه كان هو
خارج المكتب فقال "إبراهيم" بنبرة
واضحة وهو يقف خلفها: وصلتِي هنا
وهتمشي من غير ما نتكلم؟ طيب جيتي
ليه؟

التفتت "جيهان" إليه، وهمست بحزن
وهي تحاول تبرير مغادرتها:

- أصل افكرت حاجة... ولازم أمشي.

فتح "إبراهيم" باب مكتبه وهو ينظر
إليها بثبات:

-طيب تعالي نتكلم وبعدين امشي-

ردت "جيهان" بارتباك: مش هينفع...
أصلي اتأخرت-

قال "إبراهيم" بإصرار لكن بنبرة هادئة:

-محتاج أتكلم معاكي شوية... معش
عشر دقائق بس-

ترددت للحظة، ثم دخلت إلى المكتب قبله
وجلست على المقعد المقابل لمكتبه،
بينما جلس هو أمامها، يتابعها بقلق، ثم
سألها بنبرة حنونة، وكان حنان الكون
وضع في قلبه:

-مالك؟

كانت كلماته البسيطة كافية لتفجير
دموعها، فانهمرت كالشلال، رفعت يديها
لتخفي وجهها، وظلت تبكي لدقائق،

بينما هو عاجز حتى عن قول كلمة،
ليتها تعلم من هي بالنسبة له لتجعله
يرى دموعها هكذا ببساطة. دموعها
تسيل على وجنتيها فتسقط على قلبه
كالنيران. إن كانت تتألم، فهو يتألم أكثر
منها، رؤيتها بهذه الحالة تحرق قلبه
وكان أوجاع الكون بأكملها وضعت فيه.

همس أخيراً بكلمة واحدة وهو يقدم لها
منديلاً ورقياً:

-كفاية-

أخذت المنديل، ومسحت بقايا دموعها،
ثم نطقت بصوت يحمل بقايا حزن:
-أنا آسفة-

رد "إبراهيم" بثبات وقد عاد إليه هدوءه
المعتاد:

- على إيه؟

قالت "جيهان" بحيرة وملامح يائسة:

-مش عارفة... آسفة ليك وآسفة ليا،

وآسفة لكل حد دخلت حياته... أنا أسوأ

حد ممكن تقابله في حياتك.

تحدث "إبراهيم" بجدية ونبرة دافئة: لو

عايزة تعتذري لحد، يبقى تعتذري

لنفسك، أنت أجمل بنوتة شففتها في

حياتي... مزيج بين كل حاجة حلوة...

بنت عظيمة، وأخت سند، وصديقة

مخلصة، وأم...

نظرت له باندهاش وكأنها تطلب منه أن

يكمل، فقال وهو يبتسم برقة:

- أول مرة أشوف واحدة فيها كل الحنية
دي. حنيتك على 'رحيم' تخلي أي حد
يشوفك يعشقتك، مش بس يحبك.

احمر وجهه "جيهان" بخجل، ثم وقفت
لتغادر وهي تقول:

- أنا اتأخرت... لازم أمشي.

لكنها توقفت فجأة عندما سمعت كلماته
التي همس بها بحرارة:

- أنا بحبك أوي يا 'جيهان'... ومن زمان
كمان.

تصأبت مكانها للحظة، ثم استدارت
لتنظر إليه وكأنها تراه لأول مرة، تقدم
"إبراهيم" بضع خطوات وهو يكمل:

- مكنتش عايز أقولك غير لما نتجوز،
بس حسيت إنك محتاجة تسامعها

دلوقتي؛ عشان كده هقولها مرة واثنتين
وعشرة... أنا محبتش قبلك ولا هحب حد
بعدك.

حاولت "جيهان" السيطرة على
انفعالاتها المختلطة، وسألته بذهول:

- إزاي من زمان؟ وأنت شوفتني من
شهر بس؟

ابتسم "إبراهيم" بثقة وهو يخبرها:

-محصلش... أنا أعرفك من زمان أوي،
لو ركزتي هتفكري إننا اتقابلنا كثير.

حاولت التذكر، لكنها لم تستطع، عقلها
كان مشوشًا بالكامل، فقالت بصوت
أقرب للبكاء:

-مش فاكرة.

رد عليها بلطف: مش مهم تفتكري
دلوقتي... هنتكر مع بعض بعدين؛
وصح، نسيت أقولك حاجة.

سألته باستغراب: إيه؟

قال مبتسمًا: أنا كلمت الأستاذ 'عثمان'،
وأخذت منه معاد... ويوم الخميس
هنكون عندكم.

رفعت رأسها إليه باندهاش، تكاد تبكي
من الصدمة:

-ده بجد؟

أجابها "إبراهيم" بجدية وهو يبتسم: جد
الجد كمان.

عاد يتحدث بجدية أكبر: مش هسألك
دلوقتي على سبب انهيارك، بس هسنتي

لما أنتِ تيجي تقولي، وافتكري دائماً
إني موجود معاك في أي وقت.

ثم أكمل بنبرة حازمة، لكنها تحمل حناناً:

-ودي آخر مرة هسمحك تبكي فيها، أنا

بحب جناتك أكثر يا مجنونة!

نظرت له بامتنان، وابتسمت أخيراً رغم

دموعها المتبقية:

-شكراً.

"نلتقي في البارت الرابع عشر من

رواية أربعة تساوي واحد"

الفصل الرابع عشر

"تلاقيه قاعد مخنوق وقرفان ومتضايق
.. ومحدث جيه جنبه أصلاً .. وهو
نفسه لو سألته إيه مضايك هـ يقولك
مش عارف وهو مُستوحش وهو مش
واخذ باله !..

هو دا بالظبط تعريف " الوحشة "
إنت قلبك بفطرتة علي طول عاوز ربنا"

نسمات الهواء الباردة تداعب وجنتيها
برقة وهي تجلس أمام المرآة. تبسم
بفرحة لا تصدقها؛ هل يُعقل أن اليوم هو
عقد قرانها على من سكن قلبها منذ
النظرة الأولى؟! ربما هو عطاء القدر
الذي يأتي بلا حساب. تشعر وكأنها في
حلم وردي لا تريد الاستيقاظ منه، لكنه

واقع... واقع جميل يُقلقها لأنها لم تعد
أن تكون أحلامها بهذا الجمال.

كان بالنسبة لها نجمًا بعيدًا، بُعد السماء
عن الأرض، وقريبًا كأنفاسها...

"فارس" هو نجمها المضيء، والآن
تقولها بكل ما تملك من روح:

- "فارس هو هدية السماء."

أصدقاؤها الثلاثة يجلسون على الفراش
يتأملون شرودها المقلق، فقد شاركوها
كل شيء وهم أيضًا يخشون القادم.

وفجأة، طرقات على الباب تعلن عن
قدوم ضيف غير مرحب به.

دلفت "خالتها" بخطوات حانقة وهي
تأمل "دعاء" بنظرة استحقار:

-مبروك يا دعاء! والله وطلعتي أشطر
من بنت خالتك وعرفتي توقعي واحد زي
ده، عايزاكي تقعدني مع "ياسمين"
وعلميتها تعمل زيك!

تجمدت "دعاء" مكانها وبهت وجهها
أمام هذا الاتهام المهين. لم تستطع الرد
بينما أصدقاؤها ينظرون إليها بحزن.
لكن "نور" لم تستطع الصمت، فتقدمت
واحتضنت "دعاء"، ثم وجهت لخالتها
نظرات نارية وقالت:

-للأسف، دعاء ملهش في الكلام ده،
بس أنا ليا، خلي بنتك تيجي وأنا
أعلمها... أعلمها الأدب، لأن الظاهر
مش موجود عندكم!

نظرت لها "الخالة" بعصبية وقالت:
إنتي تقصدي إيه يا بنت؟!!

ردت "نور" بهدوء غير معتاد: قصدي
إن حضرتك جاية النهاردة تباركي لبنت
أختك مش تتهميها، دعاء مش من
النوع ده، لو بنتك تعرف توقع حد، ابقي
اسألها وقعت مين!

صاحت "الخالة" بسخرية: هما دول
اللي مصحباهم يا دكتورة دعاء؟!!

صححتها "جيهان" بابتسامة ساخرة:

-محامية بعد إذنك، تعبنا طول السنين
دي عشان حد يتريق علينا ويقول يا
دكتورة.

غادرت "الخالة" الغرفة غاضبة بينما
علّقوا جميعًا في سرهم على أمل أن

تترك المنزل بأكمله، تقدمت "بسملة"
وقالت بتهكم:

- لا ويقولوا الخالة زي الأم، أنا لو أمي
واحدة زي دي كنت اتبريت منها!

جلست "دعاء" على الأرض بإهمال،
ليجلس أصداقؤها حولها. قالت
"جيهان" بضيق وهي تتفقد فستانها:

- أنا مش بعرف أقعد في الأرض،
والفستان هيوسخ ولسه مفرحتش بيه!

جذبتها "نور" من يدها لتجلس قائلة: يا
شيخة اقدي واسكتي!

ابتسمت "دعاء" ابتسامة حزينة لم
تظهر سوى في عينيها، ثم همست
"جيهان" بحنان وهي تربت على يدها:

-دعاء...

ردت "دعاء" بحزن: لما ببص في
عينيها بحس إني وحشة أوي، في كل
مرة بشوفها، بفضل قدام المراية
بالساعة أتأكد من نظرتها ليا، يا ترى أنا
فعلاً وحشة؟

توقفت لو هلة تبتلع غصة البكاء، ثم
أكملت:

-مش عارفة هي بتحاسبني ليه على إني
سودة، هو أنا اخترت لون بشرتي؟ لو
عليا، كنت اخترت أكون بيضاء عشان
محدث يتريق عليا!

عانقتها "بسملة" بشدة لتبكي "دعاء"
بين أحضانها، مسحت "بسملة" دموعها
وقالت بحزم:

- هي اللي وحشة ونظرها ضعيف، لأن
السواد في قلبها هي مش فيكي، أنت
جميلة بحنانك وطيبة قلبك؛ كنت فاكراك
ذكية يا دعاء، لكن طلعتي غبية!

نظرت لها "دعاء" بتساؤل، فأجابت
"بسملة" بابتسامة:

- أيوة غبية عشان تتكدي على نفسك في
يوم زي ده بسبب واحدة متخلفة ما
بتشوفش غير المظاهر.

أضافت "جيهان" على الفور:

- لأنك فعلاً حلوة... وأحلى واحدة فينا،
ربنا قال في كتابه العزيز: ﴿لَقَدْ خَلَقْنَا
الْإِنْسَانَ فِي أَحْسَنِ تَقْوِيمٍ﴾، ودا جواب
قسم يعني ربنا خالقك في أحسن صورة
ليك.

نظرت لهم "دعاء" بامتنان وقالت
بابتسامة:

-أنتم بس اللي بتحسوني إني حلوة.

أجابت "نور": عشان أنتِ حلوة، ووظ
فيهم كلهم، اللي مش عاجبه يخبط
دماغه في الحيط. أنسي! أنتِ ملكة
النهاردة وهتتوجي على قلب فارس.

نظرت لها "دعاء" بضيق: اسمه دكتور
فارس.

صفعتها "نور" على رأسها بمرح: ده
وقته؟ سيبك! المهم جهزين يا حلويات؟

التفتت "نور" لـ "جيهان" وابتسمتا
بخبث لتبادلها "بسملة" الغمزة:

-جاهز يا باشا.

نظرت لهم "دعاء" بخوف: ناويين على
إيه؟!!

ردت "نور" ببراعة مصطنعة:

- مفيش. قلنا من زمان إن فرقة
المجانين ما عملتش مشاكل، فأقترحنا
نعمل حاجة صغيرة كدا.

هزت "جيهان" و"بسملة" رأسيهما
تأكيدًا، لترد "دعاء" بسخرية:

-من زمان إيه؟ من يوم ما اتخطفتِ ولا
إمبارح في محل الذهب؟"

ردت "نور" بتذمر: قلبك أسود يا دودو.
كنت بهزر مع فارسنا... بس النهاردة؟

قاطعتها "دعاء" بغيرة خفيفة: فارس
بتاعي أنا!

ضحك الثلاثة بشر، ثم جذبوا إلى عناق
جماعي محبب لهم.

وعلى بعد خطوات، كان "فارس" يقف
مع والدها واختها ووصل له حديثها
الذي ألم قلبه، دلفت أختها لتخبرهم
بوصوله، ليتسرب الفرح إلى وجوههم.
تقدم والدها ليقول لها: فارس طلب يتكلم
معاكي قبل كتب الكتاب.

لكن "فارس" قاطع بلطف: شكراً
لحضرتك، خلاص هتكلم معاها بعد ما
نكتب.

غادر "فارس" بصحبة الفتيات الثلاث،
الذين نظروا إليه بدهشة بعد كلمته
الأخيرة:

-شكراً... شكراً على كل حاجة.

رحل تاركًا خلفه ابتسامة أمل وراحة...
فالموعد المنتظر قد حان.

"تركيا"

في مكان جبلي، كان يقف رجل فوق
صخرة مرتديًا جلبابًا أبيض وقبعة على
رأسه. كان صاحب بشرة بيضاء ولحية
كبيرة غير منمقة. بدا صوته مرتفعًا
وهو يخاطب من أمامه؛ لم يكن غاضبًا،
ولكن هكذا يجب أن يكون الأمير من
وجهة نظرهم.

على بعد صغير، وبين الرجال، كان
"أشرف" يقف وبجواره صديقه
"باسل". كان "أشرف" ينظر إلى الأمير
بغضب يعتصره، يريد الفتك به فورًا،
لكن عليه التحلي بالصبر والانتظار.

الكلمات التي يتفوه بها هذا الحقيير كانت كافية لتشعل غضبه، حتى همس له "باسل" برجاء:

- اهدى يا أشرف، الخطبة هتبوظ لو حد لاحظ علينا حاجة.

تنفس "أشرف" بعمق محاولاً تهدئة نفسه، لكن سرعان ما صدح صوت الأمير مجددًا ليقول:

- سـ تذهبون الآن مع قائد الجناح العسكري لجماعة الإخوان المسلمين.

ثم أشار الأمير إلى أحد الرجال، وهو القائد، ليتقدم نحو المجموعة المستجدة ويصطحبهم معه لإلقاء خطبة عن الجهاد. كان "أشرف" و"باسل" ضمن هذه المجموعة.

في مكان بعيد قليلاً، جلست مجموعة من الرجال على الأرض، وأمامهم جلس رجل على مشارف العقد الرابع من عمره. بدا وكأنه على استعداد لإلقاء خطبة ملتهبة، رغم أن كلماته كانت بعيدة كل البعد عن أي سلام. رفع صوته قائلاً:

-السلام عليكم ورحمة الله وبركاته.

أيها المباركون، اخترتم لأنفسكم أعلى العبادات، وهي عبادة الجهاد في سبيل الله. ثم اخترتم من بين تلك العبادات أرقاها، وهو أن تكونوا هنا... أن تكونوا رجال الدين الذين يبغضون الفواحش ويحاربون دفاعاً عن أرض ودين.

كان "أشرف" يرمقهم بنظرات غاضبة
بينما كانوا يستمعون إليه بإنصات
وجدية. همس لنفسه بسخرية:

- "يا للسخرية... هؤلاء شباب المستقبل،
لا يفقهون شيئاً في أمور دينهم. لا
يميزون بين الصواب والخطأ، ويصدقون
هذا الهراء. يضحون بأرواحهم من أجل
لا شيء، ويظنون أنهم سيخلدون في
الجنة. حمقى... حقاً حمقى إن صدقوا
هذا."

وبعد عدة ساعات، انتهت الخطبة
وأمرهم القائد بالذهاب للنوم. توجه
الجميع إلى مكان يشبه الكوخ، لكنه كان
واسعاً بما يكفي ليسمح لهم بالتمدد على
الأرض.

كان "أشرف" يتظاهر بالنوم بينما يتفقد
الشباب حوله. عندما اطمأن أن الجميع
غرق في سبات عميق، همس لصديقه:
-باسل... يلا!

لم يتفاجأ بأن "باسل" مستيقظ بالفعل
نهض الأخير بسرعة وهو يهمس وينظر
يمينًا ويسارًا بحذر:
-يلا.

أوقفه "أشرف" وقال بجديّة: إنـت
هتراقب بره، أي حركة ابعثلي إشارة.
وأشار إلى ساعته التي بها جهاز
إرسال؛ رد "باسل" بهمسة منخفضة:
-أنت هتعمل إيه بالضبط؟

أجاب "أشرف" بضيق، محاولاً السيطرة
على غضبه:

- كل المعلومات التي محتاجينها على
اللاب، عملها كوبي وأبعثها للواء، كده
هيتبقى حاجة واحدة ونخلص المهمة.

نظر له "باسل" بتردد وقال: طيب، مش
شايف إنا بنستعجل؟ ممكن حد ياخذ
باله، وبعدين إزاي هتدخل أوضة الأمير؟
معتقدش هتقدر.

تطلع إليه "أشرف" بغضب وهمس
بنبرة حادة:

- نسيت إني ظابط ولا إيه؟

شعر "باسل" بالإحراج وقال: أنا بس
كنت...

قاطعته "أشرف" بعجلة وهو يهم
بالمغادرة:

-استتى هنا، لو في حاجة ضروري
ابعتلي إشارة فورًا.

تركه "أشرف" وغادر بخطوات سريعة
وسط الظلام، ليهمس "باسل" لنفسه
بقلق:

-ربنا يستر...

تقدمت "دعاء" بخجل من "روبين"
التي كانت تجلس واضعة قدمًا فوق
الأخرى بكبرياء. حاولت "دعاء"
التحدث بأدب:

-إزي حضرتك؟

نظرت إليها "روبين" باستحقار وردت
ببرود واقتضاب:
-بخير... مبروك.

قالت "دعاء" بارتباك: الله يبارك في
حضرتك.

في هذه اللحظة، تقدمت "حورية"
لتعانق "دعاء" بحب وابتسامة وهي
تهمس لها بفرحة:

-مبارك يا حبيبي.

ثم جعلتها تجلس على مقعد بالقرب
منها.

كانت "دعاء" تبحث بعينها في جميع
الاتجاهات بقلق، لكنها لم تجدهم، زفرت
بضيق لعلمها أنهم بالتأكيد يفعلون شيئاً
كارثياً، فقالت "حورية" بقلق خفيف:

-في حاجة يا دعاء؟

ردت "دعاء": مش عارفة بسملة
والبنات فين؟!!

"حورية" بابتسامة ساخرة: أنا شفتم
من شوية واقفين يتكلموا مع بعض.
همست "دعاء" وهي تشعر بالقلق: ربنا
يستر...

ضحكت "أم بسملة" قائلة:

-هتحصل كارثة صح؟

ردت "دعاء" بصدمة وهي ترى مشهداً

غريباً أمامها وكأنها على وشك البكاء:

-هي كارثة واحدة؟ دول ثلاثة! يعني

عليّ وعلى بختي اللي وقعني فيهم!

استدارت "أم بسملة" لتفهم ما تقصده

"دعاء"، وفجأة رأتهم. الثلاث حمقاوات

"نور"، "بسملة"، و"جيهان" يرتدين

أزياء خاصة بأعياد الميلاد، يتوسطون

الغرفة، فجأة صدحت الأغنية الشهيرة
"حمادة هلال":

"أنا سبونج بوب بوب بوب!"

كانت جميع الوجوه مصدومة، هل هذا
عقد قرآن أم حفلة للأطفال؟!!

في منتصف الغرفة، كانت الفتيات الثلاث
يتحركن على أنغام الأغنية بسعادة
طفولية.

قالت "جيهان" بامتعاض وهي تتذمر:

أنا كنت عايزة ألبس سبونج بوب!

ردت "بسملة" بفخر وهي تنظر لنفسها:

بس هو حلو عليّ أكثر!

ثم ضحكت بسعادة وهي تردد مع

الأغنية: أصفر كموني!

نظرت "نور" إلى "جيهان" بشماتة:
بس بسيط هياكل منك حته!

ردت "جيهان" بالمثل: و"شفيق" عامل
شغل مع طولك، هههه!

ضحكت "نور" بمشاكسة: عاجبني.

ثم تقدمت نحو "دعاء" لتشدها إلى
الرقص معهم، لكن "دعاء" رفضت
بقوة:

-لا... مش هرقص! خلصوا لعب بقي!

بعد محاولات كثيرة، وجدت "دعاء"
نفسها تقبّع وسطهم، بينما كل واحدة
منهم تحركها بسعادة.

تبدلت الأغنية لأخرى أكثر "حمقًا"،
وبدأت "بسملة" تغني بصوت مرتفع:

"أنا سبونج بوب بوب..."

أنا سبونج بوب أصفر كموني موني...
أنا سفنجة ومش جبنة رومي...
شخص طبيعي ومش كرتوني!
بزعل من أي حاجة وبعيط...
بس برضوا بفرح بسرعة...
بحب اللعب بالفقاعات...
وبحب أنام جوا الاناناس!"
أشارت "بسملة" لـ "نور" و "جيهان"
وهي تكمل الأغنية:
"صاحبي شفيق وبسيط...
فاكرني حويط...
مطلعين عليا سمعة...
وأنا غلوبه خالص وطيب...
ومش شرير خالص يا ناس...
أنا سبونج بوب بوب!"

همست "دعاء" بضيق وهي تنظر لهم
باستغراب:

-إيه اللي بيحصل ده؟!!

ردت "نور" ببراعة مصطنعة: والله مش
قصدنا نضايقك... إحنا بس مش بنسكت
عن حقنا، واهو زي ما أنتِ شايقة... في
ناس عايزة تحرقنا، وده معناه إن الخطه
نجحت بامتياز!

"دعاء" بحزم: طيب كفاية كده!

ردت "بسمة" بابتسامة عريضة: إحنا
كده كده متفقين على أغنيتين!

في الخلفية، كانت خالة "دعاء" تقف
بنظرات مشتتة تكاد تحرقهم، وهي
تهمس لنفسها بغضب:
-قليلات الحياء...

أما "روبين"، فكانت تنظر لهن باستياء كبير وهي تفكر بمرارة:

- "ماذا فعلت هذه الحقيرة لتجعل ابني يتزوجها؟"

في نفس الوقت، كانت "ابنة أخت روبين" تصفق بحماس كبير، حتى نظرت إليها "روبين" بحدة جعلتها تتوقف فوراً.

دخل "مصطفى" بوقار إلى الغرفة، وهو يقول:

-السلام عليكم ورحمة الله وبركاته.

رد الجميع: وعليكم السلام ورحمة الله وبركاته.

قال "مصطفى" بابتسامة: المأذون بره... يلا يا دعاء.

فجأة، صاحت "نور" وهي تهزول
للداخل:

-استتى يا عمو... عشر دقائق وأكون
عندك!

نظر الجميع لها بدهشة، لكنها لم تهتم،
وتبعتها "بسملة" و"جيهان" التي قالت
بتحذير:

-اوعى حد يتحرك قبل ما نيجي!
اقتربت "دعاء" من والدها وقالت
بسرعة:

- يلا يا بابا... بسرعة قبل ما يجوا!
ضحك "مصطفى" وهو يرد عليها: لو
مستنتيش المجنونة صاحبتك، هتقلب
الدنيا!

قالت "دعاء" بقلق: أنا عايزة نكتب قبل ما تيجي... عشان مش ضمناها!

خرج "مصطفى" بابنته نحو "المنذرة" حيث سيتم عقد القران، وخلفه بعض الضيوف.

جلست "دعاء" باستحياء على مقعد منعزل قليلاً، بينما وقفت أختها بجوارها. جلس "مصطفى" بجوار "فارس" الذي ابتسم له بسعادة، ثم نظر بريية إلى "مصطفى" وسأل:

-آمال فين أصحاب دعاء؟

رد "مصطفى" بابتسامة هادئة: شوية وجايين... متقلقش.

تتهد "فارس" بخوف وقال: ربنا يستر... يلا نكتب بسرعة قبل ما يجوا.

ضحك "مصطفى" على خوفه، ثم مد يده
لـ"فارس" لتعانق الأيدي. وضع المأذون
منديلاً أبيض منقوشاً عليه أسماءهم
وبدأ بمراسم الزواج.

بمجرد أن قال المأذون:

- "بارك الله لكم وبارك عليكم وجمع
بينكم في خير."

انطلقت الزغاريد من فم "نور"
و"بسملة" وأمها. سادت البهجة أرجاء
المنزل، بينما كانت "جيهان" تصفق
بحماس شديد قبل أن تنقض على
"دعاء" لتحتضنها وتقبلها وهي تقول
بسعادة:

- مبارك... مبارك يا قلبي! مش عارفة
أقولك إيه... أنا فرحانة أوي!

ردت "دعاء" وهي تعانقها بحب: الله
يبارك فيك يا قلبي... وعبالك أنت
والبنات يا رب!

دفعتها "نور" بعيدًا لتأخذ مكانها وتعانق
"دعاء" بحب نابع من القلب. تلتها
"بسملة" بنفس الفرحة، ثم انتهى الأمر
بعناق جماعي محبب لهن جميعًا.

ثم تركوها ليأتي الجميع ليبارك لها؛
وبعد مدة من المباركات والاحتفال، غادر
الجميع إلى منازلهم، ولم يتبق سوى
الفتيات و"فارس" الذي انتظر هذه
الفرصة بفارغ الصبر ليجلس مع زوجته
بحرية. لكن... هل ستسمح له فرقة
"المجانين" بذلك؟!

تتحنح "فارس" ليافت انتباه عديمت الذوق من وجهة نظره، وهن يجلسن بجوار زوجته العزيزة رافضات تركهما بمفردهما.

قالت "بسملة" بابتسامة مستفزة:

- في حاجة يا دكتور؟

رد "فارس" بنبرة واثقة: لا، ولا حاجة. بس نسيت أقولكم إن النهاردة كتب كتابي، لو متعرفوش، وإنها بقت مراتي يعني... عادي أقعد معاها لوحدي، صح؟

"بسملة" وهي تتظاهر بالغباء: مبارك يا دكتور، ربنا يتملك على خير... بس اتجوزت مين؟

قالت "نور" بضيق واضح: متبركلوش عشان معزمناش!

أضافت "جيهان" وهي تتقمص الجدية:

-فعلاً... مش مبارك يا دكتور.

ثم مالت نحو "دعاء" وهمست بصوت

منخفض لكنه كان واضحاً لـ"فارس":

-شفتي؟! أهو طلع متجوز، أنا قلت لك

بلاش ده... هيعمل فيها دكتور وغني

وهيتجوز عليك.

وضع "فارس" قدماً فوق الأخرى

وابتسم في هدوء وهو يتذكر نقطة

ضعفهن قائلاً بنبرة ماكرة:

-بس أنا دكتور فعلاً، وعندكم Test

بكرة... وهشوف هتعملوا إيه.

توقفت "بسملة" للحظة لتبتسم ببلاهة

قبل أن تقول:

- كان نفسي أقعد معاكم، بس ماما
مستتياني من بدري. عن إذلكم يا
جماعة!

ثم غادرت، وتبعتها "جيهان" وهي
تقول بخبت:

- أنا كمان لازم أمشي، نشوفكم بكرة في
الامتحان، يا دكتور!

التفتت نظرات "فارس" إلى "نور" التي
كانت تبتسم له بثقة، وكأنها تتحداه
بعينيها؛ أخرج هاتفه واتصل بأحدهم،
واضعًا المكالمة على مكبر الصوت.

جاءه صوت الطرف الآخر بعد لحظات:

- إيه يا بني، مش كنت لسه عندك من
ساعة؟! إيه... وحشتك ولا إيه؟

ابتلعت "نور" ريقها بتوتر، مدركة
خطورة هذا الاتصال، خاصة عندما أكد
"فارس" بوضوح:

-مفيش، كنت عايز منك خدمة كده.

رد الطرف الآخر: خير؟

قال "فارس" ببراءة مصطنعة: في
طالبة عندك غالية عليّ، وعايز أوصيك
عليها.

انتفضت "نور" من مكانها واقتربت منه
بعينين بريئتين كعيون القطط وهي
تضغط على زر كتم الصوت في الهاتف،
ثم همست: بالله عليك بلاش توصية! ده
مب يفهمش أكثر منك... ده ممكن يوديني
ورا الشمس بشارعين تلاتة!

نظر لها "فارس" بغضب مما قالته،
لتسرع في التوضيح:

-مش قصدي حاجة، بس بلاش دكتور
أمجد... الله يكرمك!

أشار إلى ساعته قائلاً بصرامة: أعتقد
اتأخرتي.

نظرت "نور" إلى يدها الفارغة ثم
همست بصدمة مصطنعة:

-أوبس! اتأخرت أوي... سلام عليكم!

وغادرت فوراً وهي تلتقط حقيبتها
سريعاً. أغلق "فارس" الهاتف مع
صديقه بكلمات مقتضبة، ثم توجه إلى
زوجته "دعاء" التي تكاد تحترق خجلاً.

جلس بجوارها مبتسماً بحب، وقال بنبرة
هادئة:

-دعاء...

رفعت "دعاء" عينيها له، ليقعافي لقاء
طويل صامت، لكنه يحوي بين طياته
آلاف الكلمات. اقترب منها أكثر ليضع
قبلات متتالية على يدها. وقبل أن
تستوعب ما يحدث، وجدت نفسها بين
ذراعيه في عناق دافئ، وهو يهمس
بجوار أذنها:

-بحبك... بحبك أوي يا دعاء، أنا
معرفة الحب غير بيك وليك، أوعي
في يوم تزعلي مني أو تبعدني...
إنتِ روعي، وبدونك أنا ولا حاجة.

يا الله! كيف لها ألا تشعر بأنها تملك
الدنيا الآن؟ الغرفة لا تسع أجنحتها من

السعادة، فهي تكاد تحلق في السماء.
ردت عليه بصوت متقطع يكاد يخرج:
-وأنا... وأنا...

أبعدها "فارس" قليلاً لينظر في عينيها
بحب هامساً برجاء:

- إنتِ إيه يا دودو؟

همست بخجل: بحبك أوي.

اندفعت لتعانقه مرة أخرى، لتختبئ داخل
أحضانها التي أصبحت من الآن ملاذها
ومسكنها. ربت على ظهرها بحنان وهو
يهمس:

-وأنا بموت فيك... يا عمري.

ابتعدت عنه بخجل شديد، فضحك
"فارس" قائلاً بغمزة:

-أنا جوزك على فكرة!

ثم أضاف وهو يخرج علبه صغيرة

حمراء مزينة بشريط أبيض:

-شفتي نسيتيني إزاي؟ خدي دي.

نظرت إليه بدهشة: إيه ده؟!!

رد مبتسمًا: افتحيها.

فتحت "دعاء" العلبه بخجل، لتجد

سلسلة فضية بها صورة تجمعها مع

"فارس". تأملت الهدية بدهشة وسعادة،

فهذا أكثر مما حلمت به، إلى جانب

السلسلة، وجدت ورقة مطوية. التقطتها

بسرعة ونظرت إلى "فارس" الذي كان

يبتسم لها بحب.

فتحت الورقة وقرأت:

-«حبيبتي دعاء، أنتِ نقيه كزهرة

بيضاء، مبهجة كالمطر بعد الجفاف،

نادرة لا يشبهها أحد؛ قيل للجمال كُن...
فكان "دعاء". أحبك دعائي.»

أغلقت الورقة ووجهها يضيء بنور
كلماته العذبة. اندفعت مرة أخرى إلى
حضنه، وهي تشعر أنها ملكت العالم
بأسره.

بعد قضاء يوم ممتع مع صديقاتها،
عادت إلى منزلها لتعود معها مشاعر
الحزن التي لم تتركها إلا لبضع ساعات،
دخلت غرفتها وأغلقتها خلفها، ثم
انهارت على الأرض، تبكي بحرقة لم
تستطع طرد كلمات زوجة أبيها التي
أطلقتها في الصباح قبل خروجها من
المنزل.

قالت "زوجة أبيها" بنبرة حادة وهي
تشير إليها بازدراء:

-هتجوزيه غصب عنك! وبعدين إنت
تطولي تتجوزي مهندس قد الدنيا؟!
احمدي ربنا إنه رضي بيك.

رفعت "جيهان" وجهها المغطى بالدموع
وهي ترد بصوت مرتجف:

-بس أنا مش عايزة... مش هتجوزه لو
كان آخر راجل في الدنيا!

اقتربت "زوجة أبيها" منها، لترد بوجه
متجهم وصوت يقطر كرهاً:

-هتجوزيه... ورجلك فوق رقبتك! أنا
أصلاً بكرهك... وبكره اليوم اللي شُفتك
فيه، ياريت كنت موتي وارتحت منك!

نظرت "جيهان" لها بسخرية مريرة
وهي تهمس بصوت متعب:

-وأنا بموت فيكي... الصراحة.

اشتعل الغضب في عيني "زوجة أبيها"،
فدفعتها بقوة نحو الطاولة. ارتطم رأس
"جيهان" بحافتها، لتسقط على الأرض
وهي تتأوه من شدة الألم؛ وضعت يدها
على رأسها، لكن الألم الذي أحست به
في روحها كان أكبر وأعمق من أي
وجع جسدي.

جلست على الأرض، مغمضة عينيها،
وهي تستعيد تلك اللحظة وكلمات
"زوجة أبيها" التي ما زالت تدوي في
رأسها.

لكنها استفاقت من شرودها على صوت
إشعار هاتفها؛ مدّت يدها المرتعشة
والتقطت الهاتف لتفتح الرسالة؛ قرأت
محتواها لتزيج دموعها، ثم ترتسم على
وجهها ابتسامة باهتة، كأنها وجدت
طوق نجاة وسط بحر حزنها.

«مش قولتك بلاش دموع؟ ليه حاسس
إنك بتبكي؟»

تمعنت في الكلمات للحظات، ثم همست
لنفسها وهي تمسح دموعها:

-يمكن... هو الوحيد اللي حاسس بيا.

كانت "بسملة" تنام بهدوء يشبه هدوء
الملائكة، إلى أن قطع سكون نومها
صوت إشعار بوصول رسالة من رقم

مجهول. فتحت عينيها بتكاسل، ثم مدت
يدها إلى هاتفها لتجد رسالة قصيرة
تحتوي على كلمة واحدة:
- "آسف".

نظرت إلى الرسالة للحظات دون
اكتراث، ثم أغلقت الهاتف وعادت إلى
نومها وكأن شيئاً لم يكن.
«ربما اقتربت بداية الرحلة، أو اقترب
أختبار الصداقة»

الفصل الخامس عشر

أشرقت الشمس لتطلق أشعتها الذهبية
في كل أرجاء الأرض، وكأنها تعلن بداية
حلم جديد أو نهاية لحكاية قديمة.
اجتمعت الفتيات، كعادتهن، في كافيتريا
الجامعة يتحدثن عن ما مضى من
أحداث. وسط هذا الجو، كانت "جيهان"
شاردة في عالم آخر، يخيم عليها الحزن.

قالت "بسملة" بقلق: مالك يا جيجي؟
حاسة إنك متغيرة بقالك فترة.

ردت "جيهان" بابتسامة مصطنعة:
مفيش حاجة.

نظرت إليها "دعاء" بدهشة وقالت:
آمال إيه الابتسامة دي؟ قولي في إيه.

فجأة، فقدت "جيهان" السيطرة على
أعصابها وصاحت:

-مفيش حاجة، الله!

ردت "نور" باستغراب: بتزعقي ليه
كده؟

نهضت "جيهان" وهي تقول بسرعة:
عن إذنكم، سلام.

قالت "نور" وهي تحاول تهدئتها:
-جيهان، رايحة فين؟

ردت "جيهان" بحدة: عايزة أتمشى
لوحدي شوية، عندك مانع؟

وغادرت المكان بخطوات سريعة،
تبادلت "بسملة" و"دعاء" النظرات،
قبل أن تقول "بسملة":

- أكيد حاصل معاها حاجة.

قالت "دعاء" بحزم: أكيد، هروح أشوف مالها وارجعلكم.

التفتت "نور" إلى "بسملة" وقالت: في حاجة بين دعاء وجيهان، ومش راضيين يقولوها.

ردت "بسملة" بتردد: تفتكري حاجة إيه؟

قالت "نور": مش عارفة؛ المهم أنا عندي محاضرة، لما أخلص أبقى أشوف الموضوع، لو دعاء قالتك حاجة، رني عليا.

قالت "بسملة": تمام، وأنا هستتاها هنا لحد ما تيجي.

لحقت "دعاء" بـ "جيهان"، تمشي
بخطوات مسرعة حتى وصلت إليها،
قالت "دعاء":

-جيهان، استني!

نظرت إليها "جيهان" بتعبير متفاجئ
وقالت:

-في إيه؟

قالت "دعاء" بإصرار: إنت اللي قولي،
إيه اللي حصل جديد؟

تهدت "جيهان" بضيق وقالت: في كذا
حاجة فوق رأسي، ومش عارفة أعمل
إيه.

سألتها "دعاء" بهدوء: زي إيه؟

بعد تردد، أجابت "جيهان": عمي طالب
مني حاجة، ومش عارفة أعملها إزاي.

ثم قصت لها كل ما دار بينهما، قالت
"دعاء" بعد تفكير:

-طيب، بسيطة، اعلمي زي ما قال، أكيد
هو عارف بيعمل إيه.

ردت "جيهان" بتردد: هشوف... ربنا
يستر، ارجعي إنت، وأنا مش هتأخر.

قالت "دعاء" وهي تنظر لها بتمعن:
مش ده السبب اللي مزعلك؟ في إيه
تاني؟

أجابت "جيهان" بعد لحظات بخوف:

-إبراهيم جاي بكرة، وخايفة بابا
ميوافقش بسبب محمد.

ردت "دعاء" بدهشة: بكرة؟ إزاي
ومحدث فينا يعرف؟

قالت "جيهان" بارتباك: نسيت أقولكم.

قالت "دعاء": سييها على الله، واللي
في الخير يقدمه ربنا، بس إنت اتفتي
معاه على اللي قولناه؟

ردت "جيهان" وهي تهز رأسها بنفي:
لا، بس هو قالي حاجة تانية أهم، بكرة
لما نجتمع مع البنات هحكيلكم كل حاجة.
قالت "دعاء": خلاص روعي، وأنا
هروح أشوف البنات وأقولهم إنك كنت
زعلانة بسبب موضوع ابن عمك.

قالت "جيهان" ببسمة خفيفه: اشطأ،
سلام.

غادرت "جيهان" متوجهة إلى مكان
آخر، بينما عادت "دعاء" إلى "بسملة"
وأخبرتها بما حدث، قامت "بسملة"

على الفور بإرسال رسالة لـ "نور"
تخبرها بما قالته "دعاء".

عادت "نور" من الجامعة، وما إن
وصلت إلى منزلها حتى فوجئت برؤية
"جيهان" تخرج من هناك. تساءلت في
حيرة:

- "ماذا جاء بها إلى هنا؟"

لكن الأمر ازداد غرابة عندما تلقت
مكالمة منها، تحت "نور" جانباً لترد
على الهاتف قائلة:
- السلام عليكم.

ردت "جيهان" بصوت واثق: وعليكم
السلام ورحمة الله وبركاته، خلصتي ولا
لسة؟

قالت "نور" متسائلة: خلصت، إنت
فين؟

أجابتها "جيهان" ببرود: في الجامعة،
شوية وأكون عندكم.

شعرت "نور" بالارتباك؛ "تكذب...
جيهان تكذب؟ ولماذا؟"

ردت بحذر: لا، أنا قربت أوصل البيت.

قالت "جيهان" بنبرة سريعة: خلاص،
تعال في الليل، عايزاك.

أجابت "نور": تمام، هخلص اللي ورايا
وهاجي.

قالت "جيهان": سلام.

أنهت "نور" المكالمة وهي تشعر
بتضارب في مشاعرها، تتساءل في
صمت: "لماذا الكذب؟ وما الذي تغيّر

فيها مؤخرًا؟" شعور القلق بدأ يتسلل إلى قلبها، لكنها قررت أن تحتفظ بتساؤلاتها لنفسها في الوقت الحالي.

دخلت "نور" المنزل متجهة مباشرة إلى غرفتها، محاولةً تجاهل كل ما يدور حولها. جلست على سريرها تفكر فيما حدث حتى قطع تفكيرها صوت إشعار رسالة على هاتفها. نظرت إلى الشاشة لتتسع عيناها في ذهول وهي تقرأ الرسالة بصوت مسموع:

-«صحبتك الغالية بتخونك، ولو مش مصدقة تعالي بكرة على العنوان ده... سلام يا حلوة.»

ارتجفت يداها وهي تمسك بالهاتف، وسرعان ما تداعت الأفكار إلى عقلها.

"لماذا أول من خطر على بالي هو جيهان؟" حاولت طرد الفكرة من ذهنها، لكنها لم تستطع تجاهل الشك الذي تسلسل ببطء.

بدأت تدور في غرفتها جيئة وذهابًا وهي تفكر: "هل أذهب؟ أم لا؟" شعرت بالإحباط من نفسها، فصرخت بصوت عالٍ: "أف بقي! خلاص، مس تحيل أروح! أنا عندي ثقة في أصحابي كلهم، وخصوصًا جيهان."

في المساء، قررت "نور" زيارة منزل "جيهان". هناك، اجتمعن مع باقي الأصدقاء بعد أن قامت "نور" بالاتصال بهن للحضور. جلست "جيهان" تخبرهن بتفاصيل ما يشغل بالها، قائلة:

إبراهيم جاي بكرة، وأنا خيفة من رد فعل بابا، خصوصًا بسبب موضوع محمد.

حاولت "نور" طمأنتها، قائلة بثقة:

- كل شيء هيكون على ما يرام، متقلقيش.

كان الجو مليئًا بالدعم، لكن في داخل "نور"، ظل السؤال قائمًا: "ماذا كانت تفعل جيهان اليوم؟ ولماذا الكذب؟"

مرت الأيام سريعًا، ليعود الغائب أخيرًا إلى أرض الوطن. كان "أشرف" يقف في المطار، ينتظرها بفارغ الصبر، وعيناه تبحثان عنها بين الحشود. فجأة،

ظهرت من العدم بابتسامة مشرقة
وقالت:

-حمد لله على سلامتك.

ابتسم لها ورد قائلاً: الله يسلمك يا
'جيهان'.

-عاملة إيه؟

قالت "جيهان" بابتسامة: الحمد لله،
بخير. وأنت؟

أجاب "أشرف" بحماس: مائة فل
وعشرة، بس أخبرك اتقطعت بقالك
فترة، ليه؟

تهددت "جيهان" بخفة وقالت: معلش،
كنت مشغولة شوية.

قال "أشرف" متفاجئاً: أوعي تقولي
رجعتي لنشاطك تاني!

ضحكت "جيهان" وقالت: لا والله، بقالنا فترة عاملين إضراب.

رد "أشرف" بنبرة ساخرة: طيب الحمد لله، لأني تعبت من جناتكم.

قالت "جيهان" ممزحة: لا يا باشا، أنا مقلتش بطلنا... إحنا أجازة مش أكثر.

علق "أشرف" بابتسامة صغيرة: ربنا يستر؛ المهم، إيه آخر الأخبار؟

جلست "جيهان" تحكي له تفاصيل ما حدث منذ أن غادر البلاد، رغم أنها كانت ترسل له يوميًا رسائل مختصرة عما يجري؛ لكنها الآن أضافت التفاصيل الدقيقة، متحدثة بحماس، بينما كان "أشرف" يصغي إليها باهتمام، يبتسم بين الحين والآخر وكأنه يستعيد ذكرياته

مع كل كلمة تقولها، كان الجو مليئًا
بالدفاء، وكان الغائب لم يبتعد يومًا.

كانت "بسملة" و"دعاء" و"نور"
يجلسن في المدرج بعد أن غادر الدكتور
القاعة، الجو كان مزيجًا من القلق
والتساؤلات، إذ أن "جيهان" تغيرت
كثيرًا في الآونة الأخيرة.

قالت "بسملة" وهي تنظر إلى "دعاء":

-جيهان اتغيرت قوي، مبقتش تقعد معانا
وكل شوية تقول رايحة مشوار لوحدها،
رغم إنها مكنتش بتتحرك من غيرنا.

هزّت "دعاء" رأسها وقالت: يمكن
بسبب إن أبوها لحد دلوقتي مردش على
"إبراهيم"، لا بالموافقة ولا بالرفض.

صممت "نور" لفترة طويلة ثم قالت: لا،
مش موضوع إبراهيم. في حاجة غلط،
أكيد مخبية عننا حاجة، تصرفاتها مش
طبيعية.

ردت "بسملة" بتأييد: وأنا مع رأي
نور، في حاجة غلط فعلاً، شوية بتضحك
وتهزر عادي، وشوية بتكون متوترة
كأنها عاملة مصيبة، وشوية حزينة
وشايلة هموم الدنيا كلها.

كادت "دعاء" أن ترد، لكنها صممت
عندما رأت "جيهان" تتقدم نحوهن
بابتسامة تبدو غير طبيعية، قالت
"جيهان":

-السلام عليكم يا بنات.

ردت الفتيات السلام بهدوء، فيما تبادلت
"نور" و"دعاء" نظرات ذات مغزى، إذ
كانت "جيهان" قد غادرت غاضبة منذ
ساعة، لكنها الآن تبدو وكأن شيئاً لم
يحدث.

قالت "نور" بلهجة متسائلة: كنتِ فين؟
جلست "جيهان" بجوارها وأجابت
ببساطة:

-رحت شفت حد أعرفه لسه جاي من
السفر.

نظرت "بسملة" لها بتعجب وسألت: حد
مين؟

ردت "جيهان" بلا مبالاة: محدش فيكم
يعرفه.

قالت "نور" بإصرار: مين يعني؟

ردت "جيهان" بنبرة غير مهتمة: مش مهم.

في هذه اللحظة، وردت لها رسالة على هاتفها، قرأتها ثم ابتسمت وردت بسرعة، أثار ذلك ضيق "نور"، فنفخت بغضب وقالت وهي تنهض:

- أنا عندي محاضرة أخيرة وهتأخر، محدش يستتاني.

وغادرت على الفور دون أن تنتظر ردًا، نظرت "جيهان" مستغربة وسألت:
-نوره مالها؟

ردت "بسملة" وهي تحاول السيطرة على غضبها:

-والله السؤال هنا إنتِ اللي مالك؟ متغيرة من فترة وأحوالك مش طبيعية.

قالت "جيهان" بجمود: مليش.

تتهدت "بسملة" بضيق وقالت: طيب،
يلا يا 'دعاء'.

- أنا اتأخرت وعايزة أمشي.

قالت "دعاء" بلطف: معلش يا 'بسوا'،
'فارس' جاي عندنا وقاللي أستتاه
علشان نروح سوا.

قالت "بسملة" وهي تنهض: "خلاص،
همشي أنا. سلام."

وغادرت "بسملة" المكان، تاركة
"دعاء" و"جيهان" في حالة من التوتر
والارتباك.

كانت تسير بخفة الفراشة، هدوؤها
وحياؤها يلفتان الأنظار. جمالها الطبيعي
يخطف القلوب، ولبسها الفضفاض

يزيدها نقاءً يجعلك تخجل من النظر
إليها. كانت كالملاك تمشي على الأرض،
لكن هناك عيوناً مترصدة، عيوناً قذرة
خالية من الأخلاق والضمير، تنهشها
بنظرات مقرزة كأنها فريسة.

ظلوا يسـيرون خلفها كاللصوص،
متحينين الفرصة، حتى دخلت شارعاً
خالياً من المارة. اقترب أحدهم منها
بخطوات حثيثة، ولم يمهأها حتى
استوعبت الموقف، فمد يده ليمسك بها.

نظرت إليه بخوف، ونفضت يده بقوة
رغم ضعفها، فهي فتاة مرهفة، حنونة،
لم تعتد التعامل مع الغرباء ولا تعرف
كيف تواجه الخطر، صوتها المرتجف
خرج بالكاد وهي تقول:

-أبعد عني!

ضحك الرجل الأول بنظرة قذرة وقال:

-البعد وحش يا جميل.

اقترب منها أكثر، لكنها صففته على
وجهه صفة مدوية أوقفت ضحكاته.

جن جنونه، واقترب منها بغضب ليجذب
حجابها بقسوة تؤلمها. انقض عليها
رفاقه، اثنان منهما أمسك كل منهما
بذراع، بينما كتم الثالث فمها بيده.
حاولت أن تصرخ، أن تدافع عن نفسها،
لكن الدموع كانت أسرع منها، تسيل
على وجنتيها بلا توقف.

أحدهم تمادى أكثر ومزق جزءاً من
ملابسها، وهي تئن محاولة الصمود،
جسدها كان أضعف من أن يقاوم ثلاثة

ذئاب بشرية، لتتهار بينهم فاقدة للوعي،
تاركة لهم زمام الأمر يفعلون ما شاءوا.

يا الله! هل وصل بهم الحد إلى أن يعتدوا
على فتاة في وضوح النهار؟ كيف لا
يخشون أحداً؟

"ولأن الله لا يترك أحداً تحت سمائه
ضائعاً، بعث لها طوق النجاة."

كان "مارس" عائداً من زيارة منزل أحد
أصدقائه عندما رأى المشهد الذي تقشعر
له الأبدان: فتاة مفترشة الأرض، تحيط
بها وحوش لا ترحم، تنهش جسدها بلا
شفقة.

تقدم بغضب لم يسبق أن شعر به في
حياته، أول ما فعله هو أن ركل أحدهم
الذي كاد أن يعتليها، ثم انقض على

الآخر بضربة أسقطته أرضاً. كانت النار المشتعلة في داخله أقوى من أي شعور آخر، استمر في ضرب هذا وذاك بلا توقف.

كانوا ثلاثة "ذكور" - عذراً، هؤلاء لا يستحقون لقب رجال. كانوا ضعفاء، فقد استنزفتهم الخمور والفواحش التي جعلتهم مجرد حثالة لا تقوى على المقاومة.

بعد أن شتتهم بعيداً عن الفتاة، أخرج "مارس" هاتفه واتصل بالشرطة ليبلغهم بما حدث، ثم اتصل بصديقه ليبقى مع هؤلاء "الحيوانات" حتى تصل الشرطة.

أغلق الهاتف، ثم التفت إلى الفتاة الملقاة على الأرض. نظر إليها بحزن عميق، وخلع جاكيت بدلته ليغطيها به. حملها برفق وكأنها قطعة كريستال يخشى عليها من الكسر، دون أن يدرك أنها انكسرت بالفعل، وربما إلى الأبد.

فتح هاتفها المحمول، وبحث عن آخر رقم تم الاتصال به. قرر أن يتصل بأحد أفراد عائلتها، فقد كانت حياتها الآن هي الأولوية.

صعدت "بسمة" إلى السرفيس، وجلست بجوار النافذة، بينما تفكيرها يسبح في ذكريات اللقاء الذي جمعها بـ "تامر" وعائلته عندما أتى لخطبتها.

تفاجأت به وقتها، ولكنه قوبل برفض
قاطع منها. لن تقبل بشخص محمل
بالذنوب، فهي تريد رجلاً يقربها إلى
الله... لا يبعدها عنه. ورغم ذلك، لم
تستطع فهم السبب الذي يجعل صورته
لا تفارق ذهنها منذ ذلك الحين.

مرّ أسبوع كامل على لقائهم الأخير،
لكنها لم تتوقف عن التفكير به.

قطع شرودها صوت السرفيس عند
وصوله إلى محطته. نزلت وسارت
بخطوات ثابتة نحو منزلها، إلا أن
طريقها قطع مرة أخرى...

كان هو.

زفرت بغضب، وأطلقت كلماتها بحدة
قائلة:

-في إيه؟ أنت مش بتفهم؟ قاتلك مش

عايزة أشوف وشك تاني!

رد "تامر" بنبرة متوسلة: بسملة، أنا

أسف... صدقيني، من أول ما شفتك وأنا

اتغيرت، محتاجك في حياتي.

نظرت إليه ببرود وقالت: أولاً: مترفعش

الألقاب. "آنسة بسملة" لو سمحت. ثانيًا:

ميهمنيش اتغيرت ولا لا. وثالثًا: أنا مش

محتجالك.

حاول أن يبرر: بسملة، صدقيني، البنت

اللي كلمتك ... أنا كنت أعرفها من قبل

ما أشوفك، وهي بتكذب، أنا متعدتش

حدودي معاها.

ردت عليه بصرامة: أنا عارفة كويس

مين الكذاب ومين الصادق، بس صدقني

أنت وهي متهمونيش لو عايز نصيحتي،
اتغير عشان نفسك مش عشاني،
واعرف أن ربنا هيحاسبك على كل كبيرة
وصغيرة. وعلى فكرة، بنات الناس مش
لعبة فكر لو حد عمل مع أختك حاجة زي
دي، هتعمل إيه؟

تغيرت ملامحه إلى الغضب، وصاح:

-محدث يقدر يتجراً يعمل كدا مع أختي،
أختي خط أحمر!

ردت عليه بسخرية لاذعة: وبنات الناس
خط إيه؟ أبيض؟

حاول الدفاع عن نفسه بعصبية: أنا
مغصبتش حد على حاجة! كله كان
برضاهم.

نظرت إليه بعينين غاضبتين وقالت
بجدة:

-ده مبرر؟ ربنا هيحاسبك حتى على
النظرة، مش تقول لي مغببتش حد،
ارجع لربنا واندم على اللي عملته قبل
ما ترجع غصب عنك.

استدارت لتغادر، لكنه وقف أمامها
ليقول بتوسل:

-بسملة، لو سمحت، اسمعيني.

قبل أن ترد عليه، قاطعته نغمة هاتفه.
أجاب على المكالمة، لكن شيئاً ما أصابه
بالصدمة. تجمد في مكانه، وعيناه
اتسعتا بعدم تصديق. سقط الهاتف من
يده.

نظرت إليه "بسملة" بخوف:

- أنت كويس؟ في إيه؟

لم يرد. فقط التقط هاتفه وركض بسرعة جنونية، تاركاً خلفه تساؤلات لا تنتهي.

جلس "فارس" بجوار "دعاء" يتناولان الطعام، وهو يبتسم لها بحب واضح في عينيه. كانت تبادلته الابتسامة بحب أكبر، تشعر وكأنها تحيا في حلم جميل تحقق أخيراً. نصيبها يشبه نقاء الثلج، كما تخيلته دوماً.

همس باسمها بحب: دودو...

نظرت إليه بابتسامة رقيقة، وقالت: نعم؟

ابتسم بحنان وقال: بحبك.

غمزت له بخفة وقالت بابتسامة مرحة:

- عارفة.

قهقهه "فارس" بصوت عالٍ، وقال: يا
جامدة أنت!

ردت عليه بجرأة لم يعهد لها منها: من
زمان يا باشا!

ضحك بشدة وقال: طيب، تعالي أقولك
كلمة سر.

نهض من مكانه وأمسك يدها برفق
لتنهض معه. ثم جذبها لعناق مفاجئ،
وهمس بخفية عندما حاولت دفعه
مبتعدة:

-إيه يا قلبي! قلبتي قطة دلوقتي يعني؟

نجحت في الابتعاد عنه أخيرًا، لكن
خجلها كان واضحًا، ونظرت للأرض

بعينين تملأهما الدموع من شدة حياؤها،
وقالت بصوت ضعيف:

-بس بقى...

لم يستطع كتم ضحكته، ثم جذبها مرة
أخرى لتجلس بجواره على الأريكة،
واضعًا ذراعه حولها بحنان؛ همس
باسمها بلطف:

-دعاء...

هممت بخجل: نعم؟

سألها بجديّة ممزوجة بحب: امتى
عرفتي إنك بتحبيني؟

بقيت صامتة لدقائق، تتذكر تفاصيل أول
لقاء جمعهما، ثم رفعت عينيها له وقالت
بصوت هادئ:

-في امتحانات الترم الأول سنة أولى،
كنت مراقب في اللجنة اللي جنبتي، دي
أول مرة أشوفك كنت واقف بثقة وقوة
غريبة، مخلص حد يتنفس أو يبص
جنبه، عجبتي أوي وقتها؛ لأنك ما
سمحتش لحد يأخذ حق مش حقه.
بعدها، بقيت بدور عليك بفضول، بس ما
كنتش بشوفك كثير؛ لكن بصراحة، ما
غبتش عن بالي لحظة.

ابتسم "فارس" لها بحب وقال:

-عارفة، ما كنتش أعرف إني محظوظ
أوي عشان تكوني إنت من نصيبي.
بيختي بيك.

ضحكت "دعاء" بمرح وقالت: وليه
متقولش إني أنا اللي حظي حلو؟ بما إني

اتجوزت دكتور قد الدنيا، وأنا واحدة
عادية.

ابتسم وقال بثقة: تو تو تو! حظي أنا
اللي حلو وحلو أوي كمان. ولو كنت
عادية في نظر الدنيا كلها، فأنت مش
عادية في نظري.

شعرت بالتوتر من كلامه، وقالت بحذر:
بجد؟ يعني أنت شايفني حلو؟ البنات
اللي في الجامعة حلوين أوي، وأنا
بخاف تكون...

لم يتركها تكمل جملتها، بل جذبها مرة
أخرى، واقترب من أذنها وهمس بحب
عميق:

- "أنتِ النجمة الوحيدة في سماء قلبي؛
أنتِ الوطن بعد غربة، أنتِ أنا... ولولا
أنتِ، لِمَ كنت أنا."

"في المستشفى..."

كان الدكتور "كريم" يسير بجديّة مطلقّة
داخل ممرات المشفى، يتابع الحالات
التابعة له باهتمام بالغ. فجأة، سمع
ضوضاء قادمة من جهة الاستقبال،
فتوجه بسرعة ليرى ما يحدث.

رأى شابًا يصرخ بجنون، طالبًا
المساعدة بالحاح. ركض "كريم" نحوه
وأشار للممرض الذي يقف بلا مبالاة
بأن يحضر فراشًا نقالًا فورًا. هرول

الممرض لتنفيذ ما طُلب منه، وعاد خلال دقيقة يحمل الفراش.

وضع "مارس" الفتاة المصابة على الفراش بحرص، وعيناه ممتلئتان بحزن عميق. أشار "كريم" بسرعة بنقلها إلى غرفة العمليات دون أن ينظر إلى وجهها. لكن حينما تبعهم إلى الداخل ليبدأ عمله، توقف في مكانه كأنه أصيب بصدمة. تجمدت عيناه، وارتسمت على ملامحه دهشة غير مصدقة؛ دمة خائنة انسابت على خده بينما يهمس بصوت مختنق:

- ديالا... ديالا!

ثم صرخ اسمها وكان قلبه ينفطر؛ كانت "ديالا" ممددة على السرير، فاقدة

للحياة؛ نظر إليها بحسرة وهو يتساءل
في داخله:

- "هل هذه طفلاتي البريئة؟ أختي
المشاكسة؟ كيف حدث هذا؟"

قطع الموقف أحد الممرضين في الغرفة
قائلاً:

دكتور كريم، المريضة بتنزف بشدة.

انتفض "كريم" من شروده، وهتف بألم:

-نادوا لي الدكتور محمد، بسرعة!

ركضت الممرضة لتنفيذ أوامره، أما هو

فجلس بجوار "ديالا"، يتحسس وجهها

بأنامل مرتعشة، وهمس:

-ورب الكعبة، لجباك حقا، وهخلي اللي

عمل فيك يدفع تمن غالي.

خرج "كريم" من غرفة العمليات بعد أن
وصل الطبيب "محمد"، غير قادر على
أن يكمل عمله؛ التفت إليه قائلاً:
-روحي بين إيديك يا محمد... أرجوك
خلي بالك منها.

في الخارج

جلس "مارس" بإرهاق شديد، وكان
نصفه الآخر يحتضر بالداخل؛ لم تمضِ
دقائق حتى خرج الطبيب من الغرفة،
فركض إليه "مارس" بلهفة قائلاً:
ظمني يا دكتور!

نظر إليه "كريم" بعينين غامضتين، ثم
قال بجمود:
-تعالى معايا.

سار الاثنان باتجاه مكتب الطبيب. أشار
"كريم" لـ "مارس" بالجلوس، ثم جلس
أمامه. قال "مارس" بقلق:

-خير يا دكتور؟

رد "كريم" بحدة بعد أن فقد أعصابه:

-مين اللي عمل فيها كذا؟ احكي لي كل
حاجة!

تراجع "مارس" قليلاً وقال بضيق: من
فضلك اهدي؛ ممكن أعرف حضرتك
مين؟

جلس "كريم" مجدداً وقال بصوت
مكسور:

-ديالا أختي...

حينها، روى "مارس" كل ما حدث
بالتفصيل؛ في النهاية، قال له بنبرة
مشجعة:

-هي هتكون بخير إن شاء الله، وحقها
هيرجعلها. بس انهيارك مش في
صالحها، لازم تبقى قوي. لما تفوق،
هتحتاج عيلتها جنبها، محتاجة تعرف
إنها مش لوحدها.

البداية... ولكن ماذا بعد؟

بدأت رحلة "تامر" من هنا، ولكن ماذا
سيحدث فيما بعد؟

ما علاقة "أشرف" بـ"جيهان"؟

ماذا ستفعل "نور" عندما تعرف
الحقيقة؟

كيف ستواجه "ديالا" واقعها الجديد؟

هل ستظل الصداقة التي جمعت بين
الأبطال صلبة أمام التحديات، أم أنها
مجرد وهم؟

رحلة معقدة بدأت للتو، ولكن هل
ستنتهي نهاية سعيدة؟

الفصل السادس عشر

لخايك خفيف علي قلوب الناس
وحاول تسيب أثر لطيف عند أي حد
بتعامل معاه عشان يفتكر ك بـ
الخير ولو مش هتقدر تسيب أثر
لطيف يبقي متأنيش أي حد أو تسيب
أثر سيء جواهم وافتكر دائماً إن
خراب القلوب والنفوس ليس بـ
هين"

بعد يوم متعب وطويل، عادت "نور" إلى
منزلها وهي تشعر بالإرهاق الشديد.
ولكن بمجرد أن وقع نظرها على والدتها
"فايزة"، التي كانت تنتظرها بابتسامتها
الدافئة، تبدد التعب تدريجياً. بالنسبة
لـ "نور"، لم تكن والدتها مجرد أم؛ بل

كانت الحبيبة الأولى، والصديقة
المخلصة، والكنز الثمين الذي وهبه الله
لها.

ابتسمت وهي تلقي التحية: مساء الخير
يا حب.

ردت "فايزة" بحب: مساء النور يا
نوري.

اقتربت منها وهي تخلع حقيبتها:
-أي جديد؟

اردفت "فايزة": مفيش، أختك جات
ومشت، وأبوك نايم، وأخوك بره، وأنا
قاعدة هنا.

ضحكت "نور" بخفة وهي تربت على
كتف والدتها:

- أنتِ الخير والبركة يا حبي؛ المهم، أنا
هموت من الجوع.

- روعي غيري هدمك عبال ما أجهز
لك الأكل.

ركضت "نور" نحو غرفتها بخفة وهي
تهتف ضاحكة:

- هو!

في غرفتها، أغلقت الباب خلفها ووقفت
أمام المرآة. نزعته حجابها بعناية،
وفكت رابطة شعرها، تاركة خصالاتها
تتناثر بحرية. نظرت إلى نفسها في
المرآة، وزفرت بضيق وهي تعبت
بشعرها:

- يا خي خلصتي على نص الشعرات!
حرام عليك يا توكة، تعر!

ضحكت بخفة ثم قالت وكأنها تحدث
نفسها:

-بتكلمي نفسك يا مجنونة؟ يلا ياختي،
الواحد جعان. وبعدين، مالو اللي يكلم
نفسه؟ مش أحسن ما يكلم حد مش
بيفهم.

توقفت للحظة، تتأمل انعكاسها في
المرآة، قبل أن تقترب منها وتطبع قبلة
على صورتها في الزجاج:

-والنبي أنتِ عسل يا بنت يا نوري.
خدي بوسة!

تراجعت قليلاً، واصطنعت الجديدة وهي
توبخ نفسها:

-عيب يا بنت الناس. الناس تقول عليكِ
إيه؟ مجنونة؟ لا سمح الله!

ضحكت من قلبها، ثم التفتت لتبدل
ملابسها. ارتدت منامة وردية وربطت
شعرها على هيئة كعكة، زينتها برباط
وردي يلائم لون المنامة. وبينما كانت
تهم بالخروج، قطع صوت هاتفها
اللحظة.

نعمة الرسائل المميزة صدحت:

"جأتك رسالة، اقراها يا حبيبي!"

التقطت الهاتف، وفتحت الرسالة

بفضول. قرأت النص المكتوب:

-«بالشفاف يا حلوة عشان تصدقي إن

مفيش حاجة اسمها أصحاب، ولو فاكرة

الصورة مركبة تعالي على العنوان ده

بكرة الساعة ١١ وانت تشوفي

بنفسك.»

تجمدت مكانها، وعينيها مثبتتان على الشاشة. لم تفتح الصورة المرفقة، لكن كلمات الرسالة أثارت زوبعة من الأفكار والمخاوف. ماذا لو كانت حقيقية؟ ماذا لو تغيرت كل الأشياء التي وثقت بها؟

-نورررر! نور! يا نور!

جذبها صوت والدتها من الخارج، فقطعت أفكارها ووضعت الهاتف على الفراش. خرجت لتجلس مع والدتها لتناول الطعام، لكن عقلها ظل شاردًا في الرسالة التي قد تحمل معها تغييرًا عميقًا في حياتها.

جلست "بسملة" برفقة والديها يشاهدان التلفاز، وهي تسترخي بأحضان والدتها

كطفلة صغيرة. كانت والدتها "حورية" تعبت بخصلات شعرها المجدد بحنان واضح. لم تكن علاقة "بسملة" بوالديها عابرة أو متوترة كما تسمع عن العديد من العائلات؛ فوالدها "علي"، رغم صرامته أحياناً، كان حنوناً ولطيفاً معها، ووالدتها، على الرغم من قوتها، كانت تحمل في قلبها محيطاً من الرحمة.

كانت عائلتها مختلفة. كانوا قريبين منها إلى حد أنفاسها، يعلمون عنها كل شيء، ويثقون بها ثقة عمياء، وللحقيقة، "بسملة" كانت تستحق تلك الثقة؛ فهي لم تخذلهم يوماً.

بينما كانت مستغرقة في دفء اللحظة، تسلل إلى ذهنها لقاءها بـ "تامر" قبل

ساعتين. تلك المكالمة التي وردته أثناء
لقائهما لم تفارق عقلها. لم تعرف
محتواها، لكنها شعرت بأنها تحمل له
خبرًا سيئًا.

اعتدلت في جلستها فجأة، وقالت بصوت
هادئ:

- هـ دخل أتكلم مع واحدة صاحبتني
وراجعة.

ابتسم "علي" موافقًا: روي يا حبيبتني.
لكن "حورية" سألتها بفضول: صاحبتك
مين؟

ترددت "بسملة" للحظة قبل أن تكذب
لأول مرة، محاولة التهرب:

- هـ كلم 'جيهان'، عايزة أسألها على
حاجة.

نظر "علي" إلى "حورية" متسائلاً:
بتسألها ليه؟

أجابت "حورية" ببساطة: عادي،
فضول. روعي يا 'بسملة' وسلميلي
عليها.

ابتسمت "بسملة" بتوتر خفيف: ماشي.
وغادرت إلى غرفتها. دخلت "بسملة"
غرفتها وأغلقت الباب خلفها. بدأت
تجوب الغرفة ذهاباً وإياباً وهي تفكر.
هل تتصل به أم لا؟ لم يكن الأمر سهلاً
بالنسبة لها. شعرت بالقلق والخوف من
رد فعله، لكن رغبته في معرفة ما يمر
به دفعها إلى اتخاذ القرار.

توقفت فجأة، تنفست بعمق، ثم التقطت
هاتفها وضغطت على اسمه في سجل

المكالمات. بينما كانت النغمة تدق في
أذنها، شعرت بتسارع دقات قلبها وكأنها
تنتظر شيئاً مجهولاً.

قبل قليل...

في ممرات المستشفى، كان "تامر"
يركض كالمجنون، لا يصدق ما سمعه
للتو. لم يدرك كيف وصل إلى المستشفى
بهذه السرعة، لكنه وجد شقيقه "كريم"
جالسًا على أحد المقاعد أمام غرفة
العمليات. ركض نحوه بلهفة وسأل
بفزع:

-كريم! في إيه؟ مالها 'ديالا'؟

لم يرد "كريم"، واستمر في التحديق
بشروء في الفراغ. لم يحتمل "تامر"
صمته فصرخ فيه بعصية:
-كريم!

لكن "كريم" لم يُجب، ليقرب منه
"مارس"، هو وصديقه، بحزن واضح،
محاولاً تهدئته:

-لو سمحت، اهدي... هي لسه في
العمليات، محدش خرج يقول حاجة.
نظر إليه "تامر" بقلق وسأله: أنت اللي
كلمتني، صح؟

هز "مارس" رأسه بالإيجاب، ليواصل
"تامر" بصوت متهدج:
-إيه اللي حصل؟

كان "مارس" يحاول تمالك نفسه، لكن صوته خرج مكسورًا وهو يروي ما حدث باختصار، كأن استرجاع التفاصيل يحرق قلبه من جديد.

تراجع "تامر" إلى الخلف، غير قادر على استيعاب الموقف، وبدأ يذرع الممر جيئةً وذهابًا، عاجزًا عن الجلوس بجوارهم. مضت نصف ساعة بدت وكأنها دهور، قبل أن يخرج الطبيب أخيرًا من غرفة العمليات بلامح جديدة. ركض الثلاثة نحوه بلهفة، وبدأ "مارس" الحديث، منتظرًا إجابة الطبيب:

-ظمني يا دكتور، هي كويسة؟

أجاب الطبيب بحذر وهو يختار كلماته
بعناية:

- المريضة تعرضت لحادث اغتـ... صـ..
اب عفيف. جسدياً هي بخير الآن، لكن
هنستى تفيق لنفهم حالتها النفسية،
ونحتاج إلى تدخل طبيب نفسي لأنها
لسه صغيرة، وأعتقد أن الموضوع
هيكون صعب عليها.

سأل "مارس" بألم: هتفوق إمتى؟

- بعد ساعة تقريباً. دلوقتي هتنتقل إلى
غرفة عادية.

قام "مارس" بالاتصال بشقيقه ليطلب
مساعده في المستشفى على وجه
السرعة.

بعد نقلها إلى غرفة عادية...

جلس "تامر" على أحد المقاعد، مستندًا
برأسه على الحائط، وقد غرق في
أفكاره. تذكر حديث "بسملة" معه،
عندما أخبرته بما قد يحدث لو أصاب
شقيقته سوء. الآن، ها هو عاجز عن
فعل أي شيء لها، عاجز حتى عن
مواساتها، وربما هذا عقاب له على كل
ما اقترفه من أخطاء بحق الآخرين. لكنه
تساءل في داخله: ما ذنبها هي؟ هي
التي كانت تخشى الله في كل شيء.

قطع تفكيره صوت هاتفه الذي أضاء
باسم "زوجتي المستقبلية". ابتسم رغم
حزنه حينما قرأ الاسم، ونهض مبتعدًا
قليلاً عن الآخرين للإجابة.

لكن قبل أن يضغظ على زر الإجابة،
استمع إلى صوت "كريم" المتعب
يناديه:

-لو "إيمان" اتصلت، ما تقول لهاش
حاجة، مش هتقدر تستحمل.

هز "تامر" رأسه بتفهم، فهو يعلم جيداً
مدى حب "إيمان" لهم، وخصوصاً
لـ"ديالا"، التي كانت مدلتهم الصغيرة.

ضغظ على زر الإجابة وأجاب بصوت
مرهق:

-ألو.

على الطرف الآخر، استمعت "بسمة"
لصوته الحزين، وتحذت بعد صمت
قصير:

-السلام عليكم ورحمة الله وبركاته.

رد عليها بهدوء: وعليك السلام ورحمة
الله وبركاته.

ترددت "بسملة" قليلاً قبل أن تقول
بصوت منخفض:

-أنا اتصلت عشان... عشان... هو حصل
إيه؟ يعني أنت كويس؟

طال صمته حتى ظنت أنه أغلق الهاتف،
لكنها أعادت النظر إلى الشاشة، ثم
وضعت الهاتف على أذنها مرة أخرى
وهمست بقلق:

- تامر

رد عليها أخيراً بصوت متهدج مليء
بالحزن:

- هي ما لهاش ذنب باللي أنا عملته.
حرام والله اللي حصلها... هي ما
تستاهلش.

ارتبكت "بسملة"، وسألت بحذر:
حصلها إيه؟

رد بصوت مخنوق: في كلاب زيي
نهشوا لحمها من غير رحمة.

صُدمت "بسملة"، وأغرقت الدموع
وجهها، فقد شعرت بآلمه، لكنها تعلم أن
آلمه لا يُقارن بما تشعر به تلك
المسكينة. بصوت مكسور سألته:

- هي مين؟

- أختي الصغيرة

تذكرتها، تلك الفتاة البريئة التي رأتها
مرة في منزلهم. كانت مرحة و بريئة ولا

تستحق أي شيء مما حدث. صمت
الاثنان للحظات قبل أن تقطع "بسملة"
الصمت قائلة:

- هي لسه في المستشفى؟ يعني ينفع
أجي أشوفها؟

همس "تامر" بتردد: ياريت.

شعر للحظة أنه بحاجة لرؤية أحد
يفهمه، أو يخبره أن ما حدث ليس
خطأه. لكنه يعلم في أعماقه أنه المذنب
الوحيد في ما جرى لشقيقته.

- مستشفى إيه؟

سألت "بسملة"، وهي تنتظر إجابته
بفارغ الصبر.

بعد أن أخبرها باسم المشفى، أغلقت
بسملة الاتصال سريعاً وأخذت هاتفها
لترسل رسالة في جروب "فرقة
المجانين"، الذي أنشأته "نور" منذ
سنوات، وكان يجمع الأربعة فقط. دونت
"بسملة" الرسالة:

- "أنا رايحة مشوار ضروري، لو ماما
اتصلت بيكم قولولها إني معكم."
لم يمر وقت طويل حتى ردت "نور"
متسائلة:

-مشوار إيه؟

ترددت "بسملة" للحظة، لكنها اكتفت
بالرد:

-بكرة هقولكم.

لم يرق هذا الرد لـ "نور"، فقالت: طب
أجي معاك؟ أنا مخنوقة ومش عايزة
أقعد في البيت.

ابتسمت "بسمة" لنفسها وأرسلت:

-ماشى، اجهزي وهرن عليك، بس
أوعي تتأخري.

أجابتها "نور" بحماس: تمام!

ارتدت "بسمة" ملابس الخروج
بسرعة، ثم توجهت إلى والديها
لتخبرهما بأنها ستقابل الفتيات في
المقهى الذي يجتمعن فيه دائماً. وبينما
كانت تغادر، اتصلت بـ "نور" لتخبرها
بمكان اللقاء قائلة:

نور، أنا هعدي عليك قدام البيت. جهزي
نفسك عشان متأخرش.

ردت "نور" بحماس: ماشي، أنا هجهز في خمس دقائق.

انتهت المكالمة وخرجت "بسمة" بخطوات سريعة، متوجهة للقضاء صديقتها، وقلبها مثقل بالتفكير فيما ينتظرها في المشفى.

وصل "فارس" و"دعاء" إلى المشفى ليعرفا ماذا حدث لـ "مارس". و"دعاء"، التي أصرت على الذهاب معه بعد أن علمت بوجود "مارس" هناك، أرادت أن تطمئن عليه وتكون برفقة زوجها. "فارس" بدوره استأذن من والدها ليأخذها معه بعد إصرارها.

عندما دخلا، توجه "فارس" نحو أخيه "مارس"، الذي كان يجلس بإهمال

واضعًا يده فوق رأسه، وكان الدنيا بما
عليها تثقل كاهله. سأله "فارس" بقلق:

-مارس؟ مالك؟

رفع "مارس" رأسه ببطء، وعندما رأى
أخاه، وقف ليعانقه بقوة، فيما "فارس"
يربت على ظهره بحنو، غير مدرك بعد
ما يحدث. حاول "مارس" التماسك،
لكنه انفجر حكيًا، يروي كل ما حدث
بوجع واضح. احتضنه "فارس" مرة
أخرى، محاولًا تهدئته بكلمات داعمة.

خلال حديثهما، فهم "فارس" أن أخاه
تعرض لضغوط كبيرة خلال الفترة
الماضية بسبب العمل والدراسة، وأن
هذا الموقف كان القشة التي دفعت له
للانهيار.

بعد وقت ليس بالقليل، قُطع حديثهما بصوت صراخ عالٍ قادم من إحدى الغرف. هرول الجميع نحو الصوت، ليجدوا "ديالا" تصرخ بهستيرية وتبكي بشدة، وهي تقذف كل ما يقع في يدها نحو من حولها.

حاول "كريم" الاقتراب منها، لكنه فشل، بينما لم يستطع "تامر" تحمّل المشهد أكثر، فخرج محطم القلب على حالة شقيقته. حاول "مارس" تهدئتها، لكنها صرخت به بصوت عالٍ:

-إبعد عني! محدش فيكم حاسس بيا!

في هذه اللحظة، اقتحمت "نور" و"بسملة" الغرفة لتجدا الجميع عاجزًا

عن الاقتراب منها. صاحت "دعاء"
بحزن وهي تنظر للجميع:

-لو سمحتم، كلكم اطلعوا بره! أنتم كده
بتخوفوها أكثر.

لكن لا أحد استجاب لها، ما دفعها لأن
تتجه نحو "فارس"، تتوسل له بعينين
غارقتين في الدموع، وتقول ب بكاء:

-فارس، بالله عليك خليهم يطلعوا، وإحنا
هنحاول نهديها.

نظر لها "فارس" بقلق وقال: دعاء،
هي مش في وعيها، وممكن تأذيك.

ردت "دعاء" وهي تبكي: متخفش، بس
خرجهم من هنا عشان خاطري.

أمام إصرارها، انصاع "فارس" لها
وقال بحذر:

-خلي بالك من نفسك، طيب.

اقترب "فارس" من أخيه "مارس" ليقتعه بالخروج، لكن الحزن الذي سيطر على "مارس" جعله يرفض في البداية. بعد محاولات، غادر الغرفة على مضض. بعده، غادر "كريم" أيضًا برفقة "فارس" الذي أقتعه بالخروج بصعوبة.

بقيت الغرفة هادئة نسبيًا، إلا من صوت "ديالا"، التي ما زالت واقفة على الفراش، تحمل بيدها إبرة محقن فارغة. في هذه اللحظة، دخلت الممرضة تحمل حقنة مهدئة.

وقفت "بسملة" أمام الممرضة التي كانت تحمل الحقنة المهدئة، وقالت لها بحزم وهي ترفع يدها:

-لو سمحتي، ارجعي لورا. متخليش
وجودك يخوفها أكثر.

ترددت الممرضة للحظة، ثم تراجععت
ببطء، تاركة المجال لـ "بسملة".

التفتت "بسملة" نحو "ديالا" التي كانت
تجلس على الفراش بحالة من الفوضى
والانهيار، ثم اقتربت منها بخطوات
بطيئة، وابتسامة حزينة تملو وجهها
بينما الدموع تتساقط من عينيها، وقالت
بصوت ناعم:

-فاكراني؟ إحنا اتقابلنا قبل كده، صح؟
وقتها قولتلي إنك حبيتيني أوي وعايذة
نكون أصحاب. أنا هنا، اهو بمدلك
إيدي... تعالي نكون أصحاب.

لكن "ديالا"، التي كانت تراقبها بعينين
مضطربتين، صرخت فجأة بجنون وهي
تتراجع إلى الوراء:

- إبعدي عني! إبعدي عني! محدش فيكم
حاسس بيا!

توقفت "بسملة" في مكانها، بينما
تماسكت "نور" قليلاً رغم غصة البكاء
التي خانتها، وقالت بصوت مليء
بالشجن:

-والله إحنا عارفين إنك موجهة...
ومحدش يقدر يتحمل وجعك... بس إحنا
هنا عشانك.

ردت "ديالا" بانهيار تام، والدموع تفرق
وجهها:

-لأ... متعرفوش! أنا... أنا ضعت...
ضعت خلاص! خدوا كل حاجة مني... أنا
عايزة أموت... يارب أموت... يارب...
يارب!

جلست على الفراش بإهمال، وكان
جسدها لم يعد يحتمل الألم. المشهد حطم
القلوب، لكن "دعاء" لم تستطع الوقوف
مكتوفة الأيدي، فتقدمت نحوها وهي
تمسح دموعها، ثم جلست بجانبها وقالت
ببكاء:

-هما اللي لازم يتمنوا الموت، مش إنتِ.
إنتِ ضحية وحوش مفيش في قلبهم
رحمة.

اقتربت "بسمة" أكثر، ثم انحنيت
لتحتضنها بقوة. تشبثت "ديالا" بها

وكأنها تبحث عن طوق نجاة، بينما بدأت
الدموع تتساقط من الجميع بلا توقف.

همست "بسملة" بصوت ناعم وهي
تربت على ظهر "ديالا":

- أنتِ قوية. لازم تقومي وتأخدي حقك
منهم. متسمحيش لحد إنه يكسرك.

ردت "ديالا" بصوت مكسور، وبنظرة
شاردة:

-بس... هما كسروني خلاص...

هزت "بسملة" رأسها بحزم وقالت: لا،
محصلش. ضعفك هو اللي هيكسرك. ده
ابتلاء من ربنا عشان يختبر إيمانك
وقوة صبرك.

رفعت "ديالا" رأسها قليلاً وقالت
بتشنتت: بس... ابتلاء صعب قوي. مش
هقدر أتحملة.

اقتربت "نور" منها وربتت على كتفها
بلطف، وقالت بصوت هادئ مطمئن:

-هتقدي إن شاء الله. بس إنتِ اصبري،
وربنا هينتقم منهم أشد انتقام.

في تلك اللحظة، تعانق الأربعة في عناق
جماعي، بينما كان بكأؤهم يصل واضحاً
إلى من هم خارج الغرفة.

قالت "دعاء" وهي تمسح دموع "ديالا"
بيدها بحنان:

-عيطي براحتك، وخدي وقتك في
الحزن، بس الحزن ده لازم ميكسر كيش.
خلي اللي دمر حياتك هم اللي يدمروا،

مش أنتِ. بعد لحظات من العناق،
ابتعدوا عنها قليلاً ليجعلوها تستلقي في
منتصف الفراش. قاموا برفع الغطاء
عليها برفق، كأنهم يخشون أن
يزعجوها.

اقتربت الممرضة بحذر، وحقنتها
بالمهدئ بهدوء، ثم خرجت دون أن
تتلق بكلمة.

وقفوا بجوارها لبضع دقائق، يراقبون
وجهها الذي بدأ يهدأ مع تأثير المهدئ.
مسحوا دموعهم بأصابعهم، ثم غادروا
الغرفة بهدوء. كانت ملامحهم تنبض
بالألم، وكان كل منهم يحمل جزءاً من
معاناتها في قلبه.

عندما رأى "كريم" "نور" وهي تخرج من الغرفة، توجه إليها وسأل بقلق:
- عاملة إيه؟

أجابته "نور" بنبرة مطمئنة: خدت المهدي ونامت. إن شاء الله لما تفوق تكون أحسن. إحنا اتكلمنا معاها وياريت محدش يسألها عن تفاصيل اللي حصل، الموضوع صعب عليها أوي. ولو الشرطة طلبت تقابلها يبقى المفروض أمها أو حد قريب منها يكون جنبها ويفكروا في كل كلمة قبل ما يقولوا حاجة، لأن الكلمة ممكن تدمرها.

أشار "كريم" برأسه بتفهم، ثم همس بامتنان:
- شكرًا.

ابتسمت له "نور" بلطف، ثم جلست
بعيداً، تنتظر "بسملة" لتغادرا معاً.

على الجانب الآخر، اقترب "فارس" من
"دعاء" وهو يتفحصها بعينين قلقتين،

وسأل:

-أنتِ كويسة؟

ردت "دعاء" بصوت منخفض وحزين:

-الحمد لله.

ثم عانقته بشدة وهي تضيف: بس هي
تعبانة أوي يا فارس... حرام اللي
حصلها والله.

احتضنها "فارس" بدوره وهو يهمس
بصوت مشفق:

-ربنا يصبرها يا حبيبتي... يلا عشان
أوصلك البيت.

ابتعدت عنه قليلاً وقالت: هشوف البنات
الأول، وبعد كده نمشي.

توجه "فارس" إلى أخيه "مارس"،
الذي كان يجلس مستغرقاً في أفكاره،
وقال:

-يلا نمشي عشان تترتاح شوية.

هز "مارس" رأسه بصمت، ثم وقف
ليخبر "كريم" قبل المغادرة.

قال "مارس" وهو يتوجه نحو "كريم":

-دكتور، أنا همشي وربنا يصبركم.

أجابه "كريم" وهو يحاول التماسك:

-ممكّن رقمك؟ أكيد هحتاجك لأن البلاغ
باسمك.

أعطاه "مارس" الرقم وقال: أنا كنت ناوي أجي بكرة أظمن عليها، بعد إذنيك يعني.

ابتسم له "كريم" بخفوت وقال: تمام، وشكرًا ليك على اللي عملته... وعلى اللي عملوه البنات مع أختي.

رد "مارس" بحزن: مفيش داعي للشكر... وحقيقي أنا آسف لأنني وصلت متأخر.

في زاوية أخرى، كانت "بسملة" تقف بجانب "تامر" الذي بدا محطّمًا تمامًا، تحاول أن تواسيه وهي تقول:

-مش أنت السبب على فكرة.

نظر لها "تامر" متسائلًا، فأكملت بنبرة هادئة:

- هو نصيبها... واختبار ليكم كلكم، مش
ليها بس. هي محتاجة تستمد قوتها
منكم، لكن بالشكل ده، أنتم بتضعفوها
أكثر.

ثم انتقلت بنظرها للجميع وسألت: هي
أمك فين؟ ليه مش موجودة معكم؟

أجابها "تامر" بلهجة متعبة: ماما وبابا
مسافرين مع 'سلمى' في مؤتمر طبي في
دبي. و'عمتو' في البيت، كل شوية ترن
عليها تسأل عن 'ديالا' لأنها متأخرة،
ومتعرفش اللي حصل.

تساءلت "بسمة" باهتمام: هي 'سلمى'
دكتورة؟ وليه 'كريم' مسافرش معاها؟
مش هو جوزها؟

رد "تامر": "كريم" عنده شغل مقدرش
يسافر، وبابا سافر معاها وخذ ماما، لأنه
مبيحبش يروح مكان من غيرها. وطلب
مننا نخلي بالنا من 'عمتو' و'ديالا'، بس
للأسف ميعرفش اللي حصل.

"بسملة" بتفهم: هيرجعوا إمتي؟

"تامر": بعد يومين.

هزت "بسملة" رأسها بتفهم، ثم قالت:
أنا لازم أمشي عشان اتأخرت. هتصل
بيك عشان أظمن عليها.

"تامر": متتعبيش نفسك... كفاية اللي
عملتيه، مش عارف أشكرك إزاي.

ابتسمت له "بسملة" وقالت: أنا
معملتش حاجة. وبعدين، هي زي
أختي... ربنا يكون معاها ويصبرها.

سألها "تامر" باهتمام: هتروحي إزاي؟
أجابته: هشوف 'دعاء'، لو 'فارس' مش
هيوصلها، يبقى هنروح مع بعض. ولو
راحت معاه، أنا و'نور' هنرجع مع
بعض.

"تامر": خلي بالك من نفسك.
ابتسمت له "بسملة" وغادرت لتجد
'دعاء' تقترب من "نور"، ليجتمع
الثلاثة معًا.

سألتها "نور" بفضول: بتعملي إيه هنا
يا 'دعاء'؟

"دعاء": جيت مع 'فارس' لأن 'مارس'
هو اللي شافها في الطريق وجابها
المستشفى.

ثم نظرت إلى "بسملة" وسألتها: لكن
أنتم بتعملوا إيه هنا؟

نظرت "نور" و"دعاء" إلى "بسملة"
منتظرتين الإجابة، لترد بإرهاق:

-بكرة أقولكم بعمل إيه هنا. حاليًا تعبانة
ومش قادرة أتكلم. هتروحي معانا يا
'دعاء' ولا لا؟

"دعاء": تعالي معانا، 'فارس' هيوصلنا
لحد البيت.

رفضت "بسملة" الاقتراح وقالت: لا،
عايزة أتمشى شوية، وبعدين أبقى أركب
سرفيس.

"دعاء": خلاص، هروح أقول لـ
'فارس' ونمشي مع بعض.

مرت دقائق، وخرج الجميع من المشفى
بعد لحظات، وقد بدأ التعب على
وجوههم جميعاً. ولم يتبق في الداخل
سوى "كريم" و"تامر"، اللذين جلسا
بجوار فراش شقيقتهما، يراقبانها وهي
غارقة في نومها.

في الخارج، صعد "مارس" بجوار أخيه
"فارس"، بعد أن شكر "دعاء"
ورفيقتيها على ما فعلته من أجل
"ديالا". وقف "فارس" للحظات ليودع
زوجته، وأخبرها بقلق:

-طمئني لما توصلني البيت، خلي بالك
من نفسك.

هزت "دعاء" رأسها بابتسامة خفيفة،
ثم انصرفت مع "بسملة" و"نور".

أثناء سير الفتيات في طريقهن إلى موقف السيارات، توقفت خطواتهن فجأة عندما لمحووا مشهدًا غير متوقع. تبادلت الفتيات نظرات مذهولة قبل أن تنظر "نور" بتوتر نحو "دعاء"، ثم همست بدهشة:

-خالوا يعمل إيه مع إبراهيم؟

كانت "دعاء" تحديق في الرجلين الجالسين على أحد مقاهي الشارع:
- "عثمان"، و"الغد" "جيهان"،
و"إبراهيم"، الذي يريد الزواج منها، بدا وكأنهما في حديث جاد.

قالت "دعاء" بصوت مليء بالخوف:

-مش عارفة، بس خايفة اللي بفكر فيه يكون صح.

"بسملة" وهي تنظر للرجلين بحذر:

-قصداً إن المقابلة دي عشان يرفض

خطوبة 'جيهان' منه؟

ردت "نور" بتأكيد:

-أكيد. مفيش سبب تاني.

قالت "بسملة" وهي تضع يدها على

قلبها بتوتر:

-ياربي... 'جيهان' هتزععل لو عرفت.

وبعدين هي مش طايفة ابن خالك ده

أصلاً!

"دعاء" وهي تحاول استيعاب الموقف:

-هي بقالها فترة متوترة بسبب

الموضوع ده. ولو عرفت إن أبوها

رفضه، هتتصدم. أنا حاسة إنها اتعلقت

بیه من وقت ما عرفت إنه بيحبها.

ردت "نور" بخفوت: ربنا يستر!

"دعاء" و"بسملة" معًا: يارب!

عادوا يسIRON في طريقهم وبعد دقائق
صعدت الفتيات أخيرًا إلى سرفيس، كل
واحدة منهن غارقة في أفكارها. بينما
غادرت "نور" في طريقها إلى منزلها،
لكنها لم تكن تعلم أنها على وشك
مواجهة صدمة أخرى.

بينما كانت تسير باتجاه منزلها، توقفت
فجأة، وعيناها تتسعان دهشة. في أحد
المطاعم القريبة، رأت "جيهان"،
صديقتها، جالسة مع "أشرف"،
يتناولان الطعام معًا، ويبدوان في غاية
السعادة.

وقفت "نور" في مكانها، غير قادرة
على استيعاب ما تراه. همست لنفسها
بصدمة:

-لا... مش معقول! مستحيل!

سرعان ما فتحت هاتفها لتفحص رسالة
كانت قد استلمتها منذ فترة ولم تفتحها.
وعندما فتحتها، رأت صورة "جيهان"
وهي تقف بصحبة "أشرف"، مما أكد
لها الشكوك.

ما فعلته "بسملة" كان خطأً، ولكن ماذا
ستفعل إن تحول الخطأ إلى جريمة؟

هناك سر يجمع "أشرف" بـ "جيهان"،
ولكن ماذا لو من أجله انتهت علاقة
دامت لسنوات؟

ماذا ستفعل كل واحدة منهن؟ ومن

سيستطيع أن يواجه هذا الجنون؟

"جيهان"... هل ستقبل بما فعله والدها

أم سترفض؟ وماذا ستكون عاقبة هذا

الرفض؟

وما الذي سيحدث إذا أتى مجهول إلى

حياة "دعاء" ليقلبها رأسًا على عقب؟

الفصل السابع عشر

"السلام عليكم ورحمة الله وبركاته"

فُرض غَضُ البصرِ علي الرجال والنساء
سواء

لأن الرجال سريعة الإفتتان؛ ولأن النساء
سريعة التعلُّق 'ف غَضُ البصرِ أُولاً'.

بعد ذهاب "نور"، أتى "المهدي"
وزوجته، وجلسا برفقة "جيهان"
و"أشرف". بدأ "أشرف" الحديث قائلاً
بامتنان:

-مش عارف أشكرك إزاي يا 'جيهان'.

ابتسمت "جيهان" وردت بثقة:

-هقولك إزاي، بس مش دلوقتي... لما

أشوف 'عمتو' هتقدر تقنع 'بابا' ولا لا.

قالت "فايزة" بابتسامة مطمئنة: إن شاء الله هقتعه، وهنفرح بيكم قريب.

ردت "جيهان" بمرح وقد لمعت عيناها بالسعادة:

-يا رب، يا رب.

ضحكت "فايزة" وهي تقول ممازحة:

-شوفي البت هتموت وتتجوز.

نظرت لهم "جيهان" بإحراج واضح وقالت مرتبكة:

-لا مش قصدي!

انفجر الجميع بالضحك على ارتباكها، ثم استأذنت منهم قائلة:

-أنا هقوم أمشي.

ردت "فايزة" بسرعة: استتني، هنوصلك.

قالت "جيهان" وهي تهز رأسها: لا،
أصل رايحة أشترى حاجة قبل ما أرجع.
اردفت "فايزة" بنبرة هادئة: خلاص،
روحي، بس متأخريش.

"جيهان": تمام يا 'عمتو'، سلام عليكم.

"خارج المطعم"

غادرت "جيهان" المطعم وهي تشعر
بالبهجة. أثناء سيرها، تلقت رسالة من
"إبراهيم" يخبرها أن يلتقي بها.
ابتسمت بخفة وكأنها كانت تنتظر هذه
الرسالة بفارغ الصبر. أسرعت
بخطواتها حتى وصلت إلى المكان
المتفق عليه، لتسأله بلهفة قبل أن
تجلس:

-ها... قالك إيه؟

ضحك "إبراهيم" على لهفتها وقال
مبتسماً:

-طيب اقعدى الأول!

جلست "جيهان" وقد ارتسم على
وجهها إحراج واضح، لكنها لم تستطع
إخفاء فضولها:

-هاااا؟

أخذ "إبراهيم" نفساً عميقاً، ثم تحدث
بجدية:

-قبل ما أقولك أي حاجة، خليكى فاكرة
إني مستحيل أبعد عنك مهما حصل. أنا
مصدقت لقيتك، وإنك هتكوني ليا غصب
عن الدنيا كلها، لأن من يوم ما شفتك
وأنا بطلبك من المولى عز وجل مالك
الدنيا وما عليها...

ابتسمت له "جيهان" بخجل واضح،
ليكمل حديثه قائلاً:

- "زي ما اتوقعتي، ابوكي قال إنك
بتحبي ابن عمك وإنك زعانة منه مش
أكثر، وكمان انتم مخطوبين من وإنتوا
صغيرين. وقال إنه موافق على "ابن
أخوه"، وأنه هيعمل خطوبة وكتب كتاب
قريب، والفرح بعد الامتحانات."

صمتت "جيهان" للحظة، وقد بدا الحزن
على وجهها، فهي تعرف هذه التفاصيل
جيداً. لكن "إبراهيم" أكمل حديثه قائلاً:

- جزء من كلامه صح، وهيحصل. لكن
الجزء الثاني... لا.

نظرت إليه "جيهان" بدهشة وتساؤل،
ليخبرها بابتسامة محبة:

-يعني هنعمل خطوبة وكتب كتاب قريب
إن شاء الله، بس خطوبتنا إحننا. أما
الفرح، فده هخليها عليا، واستني الشهر
ونص دول بتوع الامتحانات، وربنا
يصبرني بقى!

قال جملته الأخيرة بمرح جعلها تضحك
رغم خوفها، ثم سأله بنبرة قلقة:

-طيب، هنعمل إيه؟

رد "إبراهيم" وهو يطمئنها: إنتِ مش
هتعملي حاجة، أنا اللي هعمل.

تردد للحظة، ثم قرر أن يسألها: كنتي
بتحبيه؟

صمتت "جيهان" قليلاً وهي تسترجع
ذكرياتها، ثم قالت بصوت يحمل مزيجاً
من الحزن والإصرار:

-كنتش بشوف غيره، كنت بشوف
حياتي كلها فيه. يعني من غيره كنت ولا
حاجة. بس أفعاله حولت حبي ليه لكره
شديد، لدرجة إني مش عايزة أشوفه.
وبعدين بقى وجوده وغيابه واحد.

نظر إليها "إبراهيم" بعمق وسألها مرة
أخرى:

- طيب... وأنا؟

ابتسمت "جيهان" بخجل، ثم نظرت
بعيداً وهمست:

-ينفع مردش؟

ضحك "إبراهيم" قائلاً: مش عارفة
الإجابة؟

قالت "جيهان" بثقة: لا، عارفاها...
وعارفاها أوي كمان.

رد "إبراهيم" وهو يبتسم:

-إذا كان كده، ينفع مترديش. مع إني
كنت حابب أسمعها منك، بس مش
مشكلة دلوقتي.

وقفت "جيهان" فجأة وقالت: همشي
أنا، عشان اتأخرت.

رد عليها وهو ينظر إليها باهتمام: تمام،
بس لما توصلي كلميني، وخلي بالك من
نفسك.

"جيهان" بابتسامة: تمام.

أشرقت شمس يوم جديد بأشعتها
الذهبية، تحمل الأمل للبعض، بينما تحمل
الفراق والحزن للبعض الآخر.
في الجامعة

داخل إحدى القاعات المخصصة للمحاضرات، جلست الفتيات يستمعن إلى الدكتور بتركيز شديد. وما إن انتهت المحاضرة، حتى خرجن معاً ليجدن "نور" تجلس بانتظارهن في الكافيتيريا.

اتجهت "دعاء" لتجلس بجانب "نور"، بينما جلست "جيهان" و"بسمة" أمامها.

بادرت "نور" الحديث وهي تنظر إلى "جيهان" بترقب:

-عرفتي يا 'جيهان' اللي حصل؟
أقلت "دعاء" و"بسمة" نظرة تحذيرية على "نور"، وكأنهما تطلبان منها الصمت، لكن "جيهان" استفسرت بقلق:
-حصل إيه؟

تدخلت "بسملة" محاولة تهدئة الأمور:
رحنا المستشفى امبارح وحكيلاك أنا
اللي حصل.

ردت "جيهان" بتأكيد: أه، 'بسملة'
حكلي.

زفرت "نور" بضيق، قائلة بنبرة
متوترة:

-كنت فين يا 'جيهان' امبارح؟

أجابت "جيهان" وهي تحاول التهرب:
-مكنتش في مكان.

قالت "نور" بحدة: والله؟

"جيهان" مستفسرة بيروود: في إيه يا
"نوره"؟ مالك؟

فجأة، أخرجت "نور" هاتفها ووضعت
أمام "جيهان"، قائلة بغضب:

- عايزة أفهم... إيه ده؟!!

أقلت "جيهان" نظرة على الهاتف، ثم
ابتسمت ببرود:

- حلوة الصورة دي، ابعتيها لي عشان
أحتفظ بيها. كنت عايزة أتصور بالطقم
ده ونسيت.

تدخلت "بسملة" بغضب بعد أن رأت
الصورة:

- بطلي برود يا 'جيهان'، وقولي... إيه
الصورة دي؟

ردت "جيهان" ببرود: صورة عادية.

"نور" بصوت عالٍ: إزاي يعني صورة
عادية؟

"جيهان" بهدوء مستفز: زي الناس.

تسألت "نور" بفقدان أعصاب: جيهان،

كنتِ بتعملي إيه مع "أشرف"؟

فأتاها الرد من "جيهان" بنفس البرود:

-وانتِ مالك؟

وقفت "نور" أمامها بغضب وقالت

بحدة:

-يعني إيه أنا مالي؟ وإيه علاقتك

بـ"أشرف"؟

نظرت إليها "جيهان" بثبات وأجابت:

-بحبه.

تدخلت "بسمة" بصدمة: و"إبراهيم"

و"حمزة"؟

أردفت "جيهان" بنبرة جادة: بابا

رفضه، وفكرت في كلامكم، ولقيت إنه

من الأفضل أتجوز عادي وأجيب بدل
العيل عشرة.

ثم أضافت بكل برود: وأنا بحب "أشرف".

ساد الصمت للحظات، وكان الجميع غير
قادرين على استيعاب الصدمة، حتى
جاءت المفاجأة الكبرى عندما صفت
"نور" "جيهان" على وجهها.

تدخلت "دعاء" على الفور، دافعة
"نور" بعيداً عنها، وصاحت بغضب:

- "نور"، أنتِ مجنونة؟ إزاي تعملي كده؟

ردت "نور" بصوت مرتفع: ويعني اللي
هي عملته صح؟

نظرت إليها "جيهان" بهدوء، ثم أبعدت
"دعاء" برفق وتحدثت بحزم:

-من اللحظة التي شكيت فيها فيّ،
وفكرت ترفعي إيديك عليا، صداقتنا
وعلاقتي بيك انتهت للأبد. أنتِ دلوقتي
مجرد بنت عمتي، لا أكثر. وحتى هكون
حريصة إننا منجتمعش في مكان بعد
اليوم.

تحركت "جيهان" مبتعدة، لكنها توقفت
وعادت لتقف أمام "نور" مرة أخرى،
قائلة بسخرية:

-أوه، صح، نسيت أقولكِ... للأسف
الشديد خسرت الرهان.

غادرت "جيهان" تاركة الجميع في
صدمة. أثناء سيرها، اعترض طريقها
"فارس"، وقال بهدوء:
-تعالى معايا.

ردت "جيهان" ببرود: معلش يا
'دكتور'، مش هقدر حالياً.

قال "فارس" بإصرار: تعالي من فضلك،
دقيقتين عايز أتكلم معاك.

أشارت له بالموافقة وسارت خلفه. أثناء
ذلك، أخرج "فارس" هاتفه وأرسل
رسالة إلى "دعاء" يطلب منها أن تأتي
مع البنات إلى مكتبه.

"في الكافيتيريا"

قالت "بسمة" بغضب: أنتِ إزاي تعملي
كده؟

تنهدت "نور" قائلة وهي تجلس: زي ما
هي عملت. أنتِ عاجبك اللي عملته؟

ردت "بسمة" بحنق: أنا مش شايفة
إنها عملت حاجة غلط، لكن اللي أنتِ

عمليه غلط كبير. إزاي تمدي إيدك
عليها؟

تدخلت "دعاء" متسائلة: إيه اللي زعلك
في إنها تحب "أشرف"؟ أنت بتحبيه؟
صرخت "نور" بعصية بالغة: حب إيه
وزفت إيه؟ يعني أنتم عاجبكم إنها تخبي
علينا؟

هتفت "بسملة" اسمها بتحذير: نور...
صممت "نور" للحظات، ثم همست
بضيق:

-للأسف... بحبه؛ والمفروض إنكم كلكم
عارفين، حتى لو أنا مقلتش.

نظرت لها "بسملة" بحزن: وهنعرف
منين طالما مقولتيش لحد؟ وبعدين،
طالما هو معاها في الصورة، يبقى أكيد

بيحبها. يعني أنت اللي هتكوني الطرف
التالت.

ردت "دعاء" مقاطعة بحدة: بس يا
'بسملة'، خلاص! تعالوا معايا.

"نور" متسائلة: رايحة فين؟

"دعاء": "ة" فارس' عايزنا في مكتبه
ضروري.

قالت "بسملة" بتعجب: عايز إيه؟

"دعاء": "تعالوا نشوف.

تحركن جميعًا باتجاه مكتب "فارس"،
وهن لا يعلمن ماذا ينتظرهن هناك.

في المكتب

جلست "جيهان" على المقعد، بينما

جلس "فارس" في المقعد المقابل لها.

بدأت "جيهان" الحديث ببرود: خيراً
دكتور؟

تتهد "فارس" قبل أن يتحدث:

-من ثلاث سنين شفت موقف غريب...

رفعت "جيهان" حاجبيها باهتمام،
ليكمل:

-أربع بنات واقفين قدام العميد، بيدافعوا
عن بعض وكانهم روح واحدة. وقتها
استغربت: إزاي حد ممكن يعرض
مستقبله للخطر عشان يدافع عن
زميلاته؟ قلت يمكن بسبب تشابه
صفاتهم، لكن اكتشفت بعد فترة إنهم
مختلفين تماماً، وما فيش صفة واحدة
متشابهة بينهم غير نقاء قلوبهم. وقتها
قلت إن صداقتكم هتدوم للأبد.

تتهد مرة أخرى وأردف بنبرة حزينة:
بس شايف العكس دلوقتي. موقف صغير
بيهدد الرابط المقدس اللي بينكم. 'دعاء'
بقالها كام يوم خايفة، ولما سألتها قالت
إن في حاجة هتحصل هتفرق بينكم. لما
شفتكم بتتخانقوا، فهمت إنها كانت
عارفة بس مش راضية تقول. أحياناً
بنحتاج نتنازل شوية عشان ما نخسرش
بعض.

نظرت إليه "جيهان" بحدة وقالت:

-دكتور، أنت متعرفش حاجة. هي اللي
كسرت الرابط ده لما فقدت ثقتها فيّ.
محاولتش تسألني بهدوء، لكن
استجوبتني وكأنها بتحاكمني. أنا عندي
ثقة فيهم كلهم، ولو سمعتهم يقولوا

عني كلام وحش، هكّـب نفسي قبلهم.
مش مجرد صورة تخليها تعمل كده.
على العموم، الموضوع انتهى. ولو
'بسملة' كمان واقفة في صفها، مش
هكلمها.

سألها "فارس" بجديّة: 'ودعاء'؟ دعاء
عارفة اللي أنتِ مش عايزة حد يعرفه.

تهددت "جيهان" وهي ترد: 'دعاء'
سمعتني بالصدفة وأنا بتكلم في التلفون.
وكده كده الموضوع هيتعرف قريب،
ووقتها حقي هيكون رجلي.

"فارس" بنبرة هادئة: لازم تعرف
الحقيقة منك، مش من حد تاني.

قبل أن ترد "جيهان"، تقدمت "دعاء"
إلى الداخل وخلفها "بسملة" و"نور".

ما إن وقعت عينا "نور" على
"جيهان"، حتى شعرت بالغضب. أما
"جيهان"، فوقفت فورًا لتغادر، لكن
صوت "فارس" الحازم أوقفها:

-محدث هيطع من هنا غير لما تصلحوا
اللي بينكم!

ابتسمت "بسملة" و"دعاء"، لكن
"جيهان" ردت ببرود:

- بس أنا مش عايزة أصلح حاجة.

وقبل أن ترد عليها بحديث لازع، دق
الباب، ودخل آخر شخص يتوقع الجميع
رؤيته في هذا المكان.

قالت "بسملة" بسخرية: صدمة أخرى.

ابتسم "إبراهيم" بخفة وهو يعلق: إيه
ده؟ فرقة المجانين هنا؟

تساءل "فارس" باستغراب: أنت
تعرفهم؟

أجابت "نور" وهي تقترب من
"إبراهيم":

-طبعًا. كان بينا أطفال ومشروع جواز.

ارتفع حاجبا "فارس" بدهوة: أطفال؟
جواز؟ مش فاهم!

همست "دعاء" لـ "بسملة" بصدمة: يا
ربي... إيه ده بقى؟

ردت "بسملة" بحماس: اسنتي،
الموضوع بدأ يبقى أكشن!

"دعاء" باستتكار: أنت فرحانة؟

قالت "بسملة" بمرح طفيف: لا والله،
بس مش عارفة أعمل إيه!

قالت "نور" بنبرة غاضبة موجهة
حديثها لـ "فارس":

- أنت متعرفش؟

التفت "فارس" لـ "دعاء"، وقال
باستغراب:

- خير؟

"دعاء" بتحذير: نور، خلاص!

لكن "بسملة"، تدخلت قائلة بنفاد صبر:

- دكتور إبراهيم كان هيخطب 'جيهان'،

لكن والدها رفض وماحصلش نصيب.

ابتسم "إبراهيم" بثقة وأردف: هو

رفض في البداية، بس في النهاية

هيوافق. أنا جيت أشوفك وأقولك

بنفسي، يا 'فارس'، عشان متزعش.

التفتت "بسملة"، "نور"، و"دعاء"
لبعضهن بصدمة، وهن لا يصدقن ما
يسمعن. "دعاء" وحدها كانت تعلم
علاقة "جيهان" بـ"إبراهيم"، لكنها لم
تكن تعرف التفاصيل.

تقدم "فارس" ليعانق صديقه، قائلاً
بحماس:

-مبارك، وربنا يتملك على خير!

ابتعد عنه "فارس"، لكن "نور" قطعت
اللحظة بسؤالها المتوتر:

-أنا مش فاهمة حاجة. أو يمكن أنت
فاهم غلط، لأن 'جيهان' بتقول إنها
بتحب واحد تاني!

التفتت "إبراهيم" إلى "جيهان"، التي
جلست بهدوء على المقعد، تنتظر لهم

وكان الأمر لا يعنيها. ابتسم لها بحب،
وابتسمت له بالمثل، قبل أن يتقدم
للجلوس أمامها. سألها باهتمام:
- عاملة إيه؟

ردت "جيهان" بهدوء: الحمد لله، بخير.
وأنت؟

هممت "نور" بغضب: وبعدين؟
نظر "إبراهيم" إليها بجدية وقال:
- بصي، يا "نور هان". أنا هتجوز
"جيهان"، واللي بتفكري فيه مجرد سوء
تفاهم.

سأله "فارس" باستفهام: "إبراهيم"،
وضح كلامك أكثر.

رد "إبراهيم" بهدوء: الموضوع
ببساطة إننا هنكمل حياتنا سوا.

وبالنسبة للمشكلة بين 'جيهان' و'نور هان'، فهي محتاجة وقت. وهتفهموا كل حاجة بعدين، لأن ما قدرش أدخل في حاجة ما تخصصيش.

نظرت "جيهان" إلى ساعة الحائط، فوجدتها تشير إلى الحادية عشر. وقفت وقالت بهدوء:

-بعد إذنكم، أنا لازم أمشي.

ثم نظرت إلى "إبراهيم" وقالت بخفوت:

-سلام.

وغادرت الغرفة، لتلحق بها "بسملة" و"نور".

اقتربت "دعاء" من "فارس" وسألته بفضول:

-أنت تعرف الدكتور 'إبراهيم' منين؟

ضحك "فارس" بمشاكسة وقال: بعدين أقولك.

نظرت له "دعاء" بغضب قبل أن تتركه وترحل.

في الخارج...

وقفت "بسملة" أمام "جيهان" بعناد، وقالت بحدة:

-جيهان، مش هتمشي غير لما تفسري اللي حصل. أنتِ مش قولتي إنك بتحبي "أشرف"، يعني إيه اللي قاله "إبراهيم"؟

ابتسمت "جيهان" بخبت وردت بثقة:

-اسمعي يا 'بسو'، أنا بكلم الاتنين وبحبهم. وأنتِ عارفة بابا وطريقته،

فهجيبه ثلاثة: ظابط، ودكتور،

ومهندس، وهو اللي يختار!

رفعت "بسملة" حاجبها بصدمة، بينما

أكملت "جيهان" وهي تنظر إلى "نور"

وتبتسم:

-مع إن لو أنا اللي هختار، فطبعا هختار

الظابط. قمر وجنتل وحاجة كده خيال.

لكن 'إبراهيم' طيب وهادي ومش هيقدر

يتحمل مصايبي. بس لو الظابط قمر،

فالدكتور شمس!

تهدت "جيهان" بعمق، ونظرة هيام

تملاً عينيها:

-شمس حياتي.

صاحت بها "بسملة" بغضب: أنتِ إزاي
تفكري كده؟! لا أخلاقك ولا دينك
يسمحوا بكده!

هزت "جيهان" رأسها بابتسامة مأكرة
وقالت:

- 'بسو'، دلوقتي عندي مشوار مهم
أخلصه، ولما أرجع، هخليكي اديني
درس في الأخلاق.

«وتركتها وغادرت إلى المكان الذي
سيكشف الحقيقة كاملة.»
مع "بسملة" و"نور"

تنهدت "بسملة" بإحباط، وقالت: "نور"،
أنا بفكر أروح لـ'ديالا'. تيجي معايا؟
"نور" التي كانت شاردة، لم ترد، فقالت
"بسملة" بغیظ:

- نوررر!

"نور" تنتبه فجأة: هاه؟ في إيه؟

"بسملة" بحدة: بكلمك من بدري!

بقولك:

-تروحي معي المستشفى؟

ردت "نور" ببرود وهي تهم بالمغادرة:

-لا، عندي محاضرة. سلام، هخلص

وأكلمك.

وسارت "نور" إلى العنوان المدون في

الرسالة التي وصلت لها منذ دقائق،

وهي تفكر. ربما ستسعد بما ستعلمه،

وربما سيجن جنونها وتغضب من

الجميع.

وصلت "دعاء" لتجد "بسملة" تقف

بمفردها، فسألت باستغراب:

- راحوا فين؟

ردت "بسملة" وهي تهز كتفيها: مش
عارفة. المهم، هتيجي معايا، ولا أروح
لوحدي؟

"دعاء" بابتسامة: كنت عارفة إنك
هتروحي، عشان كده استأذنت من
'فارس' امبارح.

ابتسمت "بسملة" بسعادة لا تعرف
سببها وقالت:

- اشط! يلا بينا.

سارتا معاً، لكن "دعاء" تساءلت
بجدية:

- "بسملة"، إيه الموضوع؟ أنتِ مش كنتِ
رافضة؟ ليه رجعتي تكلميه؟

توقفت "بسملة" ونظرت إليها بجديّة:

-يعني إيه رجعت؟ أنا مكلمتوش أصلاً

عشان أرجع! كل الحكاية إن "ديالا"

صعبانة عليا، مش أكثر.

نظرت إليها "دعاء" نظرة مشككة

وقالت:

-والله؟ ما تقولي الحقيقة وتخلصي!

زفرت "بسملة" بضيق، ولم تستطع

إخفاء مشاعرها أكثر. اعترفت:

-مش عارفة! بفكر فيه ليل نهار، ومن

امبارح وأنا زعلانة عليه. مش عارفة

أعمل إيه؟ شكله وهو حزين وجع قلبي.

من امبارح وأنا مستتية الشمس تطلع

عشان أشوفه. منمتش ولا ثانية من

زعلي عليه.

ابتسمت "دعاء" بمكر وقالت: حلوا!
يبقى نعمل فرحنا إنا الأربعة مع بعض!

في المستشفى

حمل "تامر" "ديالا" برفق، كأنها قطعة
كريستال يخشى أن تنكسر بين يديه.
وجهه كان مليئاً بالندم، وكأنه يحاول
تعويض ما اقترفه بحقها وبحق الجميع.
كانت "ديالا" تنظر إليه بخجل واضح،
فقد كانت ترفض أن يحملها أمام
الجميع، ولكن إصراره جعلها تستسلم.
أراد أن تكون قريبة من قلبه، ليُشعرها
بندمه وحنانه الذي لم يعبر عنه من قبل.

بجانبه كانت "إيمان" تسير بهدوء،
بينما "كريم" يمسك يدها بقوة، وكان

لمسة يده تخبرها بأن كل شيء سيكون
على ما يرام. وقف "تامر" أمام
السيارة، ليفتح "كريم" الباب الخلفي.
وضع "تامر" "ديالا" بحنان شديد على
المقعد، ثم انحنى ليقبل جبينها بقبلة
امتلت بالاعتذار. نظرت إليه بابتسامة
خجولة، وكأنها تخبره بأنها تفهم
مشاعره.

جلست "إيمان" بجوار "ديالا"، بينما
قاد "كريم" السيارة، و"تامر" جلس إلى
جانبه، شارد الذهن.

بينما كان "تامر" يحدق في الطريق
أمامه، تذكر فجأة "بسملة"، تلك الروح
التي أصبح وجودها بالنسبة له

ضروريًا. مد يده إلى جيبه وأخرج هاتفه، ليكتب لها رسالة نصية:

«ديالا طلعت من المستشفى، وإحنا في طريقنا للبيت. لو تسمح، عايز أتكلم معاك ضروري. وصدقيني، مش هزعجك تاني. ولو مش عايزاني، هختفي من حياتك للأبد.»

ثم توقف قليلاً قبل أن يضيف في نهاية الرسالة:

«ضائع... وجدك ملجأه.»

نظر إلى الرسالة مرة أخرى قبل أن يضغط على زر الإرسال، ثم تنهد بعمق وهو يعيد الهاتف إلى جيبه.

كانت "بسملة" تسير بخطوات مترددة
باتجاه المستشفى، حين صدر إشعار من
هاتفها برسالة نصية. فتحت الرسالة
لتقرأ محتواها بدهشة:

«ديالا طلعت من المستشفى واحنا في
طريقنا للبيت. لو تسمحى عايز أتكلم
معاك ضروري وصدقيني مش هزعجك
تاني ولو مش عايزاني هختفي من
حياتك للأبد. ضائع... وجدك ملجأ.»

توقفت للحظة، مستغرقة في أفكارها:
كيف علم أنني سأذهب؟ هل أنا من
أخبرته؟ لا أذكر ذلك... وماذا يريد مني؟
ولماذا أشعر بالخوف من القادم؟ ظلت
تعيد قراءة العبارة الأخيرة: «ضائع...»

وجدك ملجأه. « كأنها تبحث بين كلماتها
عن معنى خفي.

قطع صوت "دعاء" أفكارها: الرسالة
دي منه! وكان عايز إيه؟

رفعت "بسملة" عينيها نحوها، محاولة
إخفاء ارتباكها:

- أيوة، بيقول إن أخته طلعت من
المستشفى وإنهم راجعين البيت.

ابتسمت "دعاء" بارتياح: الحمد لله إنه
قال قبل ما نروح على الفاضي.

سارت الاثنتان في الطريق للحظات، ثم
تساءلت "بسملة" فجأة:

- هنعمل إيه دلوقتي؟ هنرجع الجامعة
ولا...

توقفت عن الحديث فجأة، وكأنها تذكرت شيئاً، ثم نظرت إلى "دعاء" بنظرة حادة:

-دعاء، إيه اللي مخبياه أنتِ و"جيهان" عننا؟

توترت "دعاء" وهي تهرب بعينيها بعيداً:

-هخبي إيه يعني؟ مفيش حاجة.

اقتربت "بسملة" منها بخطوات ثابتة، وقالت بجدية:

-أنا مش عبيطة عشان مخدش بالي من اللي بيحصل بينا، فنجزي وقولي في إيه.

وقبل أن ترد "دعاء"، رن هاتفها باسم "جيهان". جذبت "بسملة" الهاتف

بسرعة وردت قبل أن تتحدث "دعاء".
جاءها صوت "جيهان" من الجانب
الآخر:

-دعاء، أنتِ فين؟ عايزة أتكلم معاكي
ضروري! تعالي على الكافية اللي بنقعد
فيه دايمًا.

ردت "بسملة" بسخرية: للأسف، أنا
"بسملة" مش "دعاء".

ساد الصمت للحظة، ثم سألت "جيهان"
بارتباك:

-اتأكدت من الاسم قبل ما أرن، ده فون
"دعاء"، صح؟

أجابت "بسملة" بنبرة ساخرة: أيوة،
فون "دعاء"، بس أنا اللي رديت.
قوليلي، إيه اللي مخبياه عني؟

تهدت "جيهان" بضيق وقالت: تمام يا
"بسملة"، تعالي مع "دعاء" وهكياك
كل حاجة. بس أوعي تقولي لـ "نور"
حاجة، حتى ما تقوليهاش إنك جايه.
صح، هي فين؟

-قالت إنها عندها محاضرة.
-حلو. مستنياكم، متأخروش.

في الكافيه
جلست "بسملة" و"دعاء" أمام
"جيهان" التي بدت متوترة قليلاً.
سارعت "بسملة" بالسؤال:
-ها يا "جيهان"، مخبية عني إيه؟ وليه
مش عايزة "نور" تعرف؟

تهدت "جيهان" وقالت بجديّة: اسمعي،
اليوم اللي رجعت فيه "نور" مع
"أشرف" وقالت إنها كانت مخطوفة،
يومها عمو قال كلام محدش فينا صدقه،
صح؟

نظرت "بسملة" لها بتركيز: أيوة، أنتِ
عارفة إيه اللي حصل يومها؟

أومأت "جيهان" برأسها وأكملت: لما
كنا قاعدين كنا، و"نور" بتحكي عن
اللي حصل معاها، قلتكم إني رايحة
أشرب، ووقتها سمعت "أشرف" وهو
بيتكلم مع عمو.

تقدمت "بسملة" بجسدها للأمام، تسأل
بفضول:

-سمعتي إيه؟

الفصل الثامن عشر

كَانَ أَعْرَابِيٌّ عَلَى خِلَافٍ مَعَ زَوْجَتِهِ.

سَأَلُوهُ: مَا السَّبَبُ؟

قَالَ: لَا أَتَكَلَّمُ عَنْ عِرْضِي.

فَلَمَّا طَلَّقَهَا، سَأَلُوهُ: مَا السَّبَبُ؟

قَالَ: لَا أَتَكَلَّمُ عَنْ أَعْرَاضِ النَّاسِ.

في مكتب فارس...

كان "فارس" يجلس على كرسي مكتبه

منشغلاً ببعض الأوراق حين رفع رأسه

ليجد "إبراهيم" يدخل بابتسامة عريضة.

بعدما غادر ليتحدث عبر الهاتف، أشار

له بالجلوس، وبدأ الحديث:

-إبراهيم، أنت بجد هتتجوز "جيهان"؟

رد "إبراهيم" بابتسامة:

-طبعاً! أنا جاي عشان أحكيك...

الموضوع ده في هزار؟

نظر له "فارس" بدهشة: لا، بس مش

عارف أقولك إيه! خايف أقول حاجة

تخرب الدنيا.

ضحك "إبراهيم" وهو يقول: متقلقش،

هي قالتلي على كل حاجة، بس مش

هقدر أقول لحد.

نظر "فارس" إليه بعينين حائرتين. كان

يعلم أن هناك حلقة مفقودة في القصة،

لكنه قرر ألا يضغط عليه الآن، وبدلاً من

ذلك حاول تغيير الموضوع: المهم، أنت

عامل إيه؟ وإيه أخبار...

قاطعته صوت رنين هاتفه، نظر إلى الشاشة ووجد اسم أخيه "مارس". استأذن من "إبراهيم" بابتسامة ورد على الفور:

-مكالمتك زادت، يعني مكنتش بشوف اسمك غير في الأعياد!
رد "مارس" ضاحكاً: محتاجك معاً في مشوار.

تسأل "فارس" باهتمام: مشوار إيه؟

أردف "مارس" بتوتر: عايز... عايز أروح عند "ديالا" بيتها، أظمن عليها، بس مكسوف أروح لوحدي.

تسأل "فارس" مستغرباً: ديالا مين؟

قال "مارس" بخفوت: البنت المريضة التي حصل لها الحادث.

هتف "فارس" بجديّة: وأنت مش عملت
الواجب ورحت المستشفى؟ ملوش
لازمة تروح البيت، وبعدين غلط تروح
عندهم!

تتهد "مارس" وهو يقول: عارف، بس
عايز أظمن عليها عشان خاطر يا
فارس. تعالى معايا!

تتهد "فارس" بضيق، ثم أجاب بعد
لحظة تردد:

-طيب، هتروح إمتي؟

قال "مارس" بفرحة: دلوقتي! هعدي
عليك، أنا عرفت عنوانها من
المستشفى.

رضخ "فارس" له قائلاً: تعال، مستتيك
أغلق الهاتف وألقى به على الطاولة،

متهدأً بتعب. لاحظ "إبراهيم" تغير ملامحه فسأله بقلق:

-مالك؟ في إيه؟

أخبره "فارس" بكل ما جرى، ليرد "إبراهيم" وهو يقف مستعداً للمغادرة:

-خلاص، روح معاه. أنا هسيبك عشان عندي شغل.

ثم غمز له مازحاً وهو يهم بالخروج:

-هنشوف بعض كثير الفترة الجاية، سلام!

ابتسم "فارس" ورد: سلام.

غادر "إبراهيم" المكتب، بينما جلس "فارس" يحاول إقناع نفسه بأن هذا المشوار لن يتسبب بمزيد من التعقيدات.

في أحد المطاعم كان الجميع يجلس حول الطاولة في انتظار أن تُخبرهم "جيهان" بما حدث، بينما كانت "نور" تقف بالقرب منهم، مستمعةً دون أن يلاحظها أحد.

أردفت "بسمة" بنبرة متسائلة وهي تحرك يدها أمام وجه "جيهان":

-ها يا جيهان، سرحتي في إيه؟ انجزي وقولي اللي حصل.

نظرت لها "جيهان" وهي تأخذ نفسًا عميقًا وتبدأ في الحديث:

-أسمعي يا ستي...

"Flash back"

كانت "جيهان" تمشي بتأفف، غير مرتاحة لمشاكل "نور" التي كانت

تفتعلها على ما يبدو، لكنها توقفت
عندما سمعت فجأة صوت "المهدي"
يصرخ في وجه "أشرف".

قال "المهدي" بغضب شديد: يعني إيه
تتجوز بنتي في السر؟ أنت فاكرها إيه؟
تهد "أشرف" محاولاً تهدئته وهو يقف
أمامه:

- حضرتك ممكن تهدأ وتسمعي.

هتف "المهدي" وقد بدأت ملامحه
تعكس الغضب أكثر:

- أهدأ إزاي بعد اللي أنت قولته؟

حاول "أشرف" تبرير الموقف بهدوء
قائلاً:

-حضرتك اتفضل ارتاح، ولو كلامي
معجبكش، همشي من هنا وبعذر على
اللي حصل.

جلس "المهدي" بضيق وهو يحاول أن
يفهم الموقف:

-اتفضل، كمل كلامك.

بدأ "أشرف" يشرح الموقف وملابسات
القضية، نظر له وهو يشرع في الحديث:
شهاب شعبان ده دكتور تجميل، لكن
مريض نفسي. كان متجوز ويحب مراته
أوي، وفي يوم صحي لقيها سابت البلد
وهربت بابنها الصغير لما تعبت من
تصرفاته. هو مقتنع إنها اتخطفت
واتقتلت، ورفع قضية ضد عيلتها
وعيلته، رغم كل الأدلة اللي أثبتت إنها

سافرت. هو مش مقتنع وكم ان اعتبر
الحكومة مشتركة في الجريمة، وهدد
القاضي في المحكمة وتحبس يومين. بدأ
يعمل عمليات تجميل للسيدات اللي
بيجبله في العيادة عشان يبقوا نسخة
طبق الأصل من مراته. مش بس كده،
ده يجبرهم يعيشوا معاه تحت التهديد.

نظر له "المهدي" مرتبًا وهو يحاول
أن يفهم العلاقة بين هذا وبين ابنته
"نور":

-ايوة، برضه مش فاهم إيه علاقة بنتي
في كل ده.

تنهد "أشرف" بضيق: اللي حصل
للأسف إن نور شبه مراته لدرجة كبيرة،
أو بمعنى أصح، نور نسخة تانية منها.

نظر "المهدي" بقلق إلى "أشرف":

-وبعدين؟

رد "أشرف" بحزم: هو دلوقتي بيدور على كل المعلومات اللي تخص نور. ولو عرف إنها متجوزة، أكيد هيبيعد عنها ومش هيأنيها. وكم ان هخلي واحد يكون مع نور خطوة بخطوة من غير ما تحس عشان لو حصل حاجة يتصرف. صدقتي مفيش حل تاني يحميها غير ده، وإلا الله أعلم ممكن يحصلها إيه.

شعر "المهدي" بالارتباك والخوف، كان من الواضح أنه لا يعرف ماذا يفعل. ثم اقترح "أشرف" حلًا آخر:

-ولو حضرتك قلقان مني، أنا هديك وعد أن بعد الفترة دي ما تخلص ونقبض

على الدكتور، لو هي عايزة تطلق لما تعرف هطلقها. وكم ان لو أنت رافضني، أنا شخصياً وعندك حد عايز يتجوزها، تمام. بس أهم حاجة محدش يعرف باللي قولته.

قال "المهدي" وهو يفكر في الموضوع بجدية:

-طيب، ليه محدش يعرف؟ مش المفروض أنت هتجوزه عشان هو يبعد عنها؟

رد "أشرف": هو شخص ذكي جداً، لو عرف من حد إنها متجوزة، هيعرف إنها لعبة، ومش هنتوقع رد فعله؛ عشان كده لازم هو اللي يتأكد بنفسه.

أردف "المهدي" بلهجة مضطربة:
سبني يومين أفكر.

نهض "أشرف" لكي يغادر، ثم قال:
تمام، بس ياريت تعرف إن كل لحظة
تأخير فيها خطر على بنتك. وكم ان لازم
متقولش لحد، ولو قلت لحد المفروض
تكون واثق فيه مية في المية.

في الخارج

كانت "جيهان" تقف مصدومة، تستمع
لكل ما يقال، حتى سقط الهاتف من يدها
فجأة.

في الداخل

نظر "أشرف" إلى "المهدي" بتساؤل
بعدهما سمع صوت شيء يسقط، فقال

"المهدي" سريعًا: هطلع أشوف فيه
أيه.

"Back"

شرحت لهن "جيهان" ما حدث، ثم
صمتت لتلتقط أنفاسها:

ده اللي حصل، ولما وقع مني التليفون،
طلعوا وشافوني وطلبوا مني مقولش
لحد اللي سمعته.

قالت "بسمة" بتساؤل: وبعدين؟

ردت "جيهان": بعد يومين اتصلت
عمتو بيا، وطلبت مني أخلي نور توقع
على قسيمة الجواز من غير ما تعرف.
وبعدين قولت لـ "دعاء" لما سمعتني
وأنا بتكلم في التليفون، وقدرنا نخليها
توقع. وهي دلوقتي مراته.

نظرت لها "بسملة" بدهوة: طيب،
بصمت إزاي؟

قالت "جيهان": عمتو وهي نايمه خلتها
تبصم، ومسحت لها الأثار عشان
متعرفش.

ردت "بسملة" بغضب: مش مصدقة!
إزاي تعملوا معاها كده؟ هي من حقها
تفرح زي باقي البنات! أنتم سرقتموا
فرحتها!

تدخلت "دعاء" محاولة أن تكون
واقعية:

- عملوا كده عشان خايفين عليها يا
بسملة.

هتفت "بسملة" بعصبية:

-ده مش مبرر! ولسه مش فاهمة يعني
إيه مفيش طريقة تحميها بيها غير
الجواز؟

ردت "جيهان" بنفاد صبر: لا مبرر لأنه
مكنش فيه حل تاني عشان ينقذها من
الدكتور...

ثم رن هاتف "بسملة" فجأة برقم
"تامر" الغير مسجل. نظرت إليها
"دعاء" بضيق، بينما "بسملة" أجابت،
مبتعدة عنهم لخارج المطعم، قائلة:
-السلام عليكم ورحمة الله وبركاته.

رد "تامر": وعليكم السلام ورحمة الله
وبركاته. إزايك يا بسملة؟
قالت "بسملة" بحدة: أنسة بسملة لو
سمحت، ديالا عاملة إيه؟

ابتسم "تامر" بحزن: الحمد لله، بخير.
ينفع أشوفك؟

ردت "بسملة" بعصبية: حضرتك
فاكرني إيه؟ أنا مش زي البنات اللي
تعرفهم وبتتسلى بيهم.

أردف "تامر" بأسف: أنا آسف والله،
مقصودش. وعارف كويس أنت مين، وأنا
كمان مكنتش بتسلى. أنا جيتك لحد البيت
ومستعد أجي أطلبك بدل المرة عشرة.

نظرت "بسملة" حولها ثم قالت بهدوء:
-طيب، خير في إيه؟

قال "تامر" محاولاً تجميع جملة لطيفه
لكي لا تنزعج منه:

-عايز أشوفك مرة واحدة، هقولك حاجة.
وصدقيني، لو مش عايزة تشوفيني
تاني، هختفي من حياتك للأبد.

صممت "بسملة" للحظة تفكر في الأمر
قبل أن ترد:

-تمام، أنا موجودة حاليًا مع أصحابي في
مطعم الرحمة في المدينة، هستناك.

ابتسم "تامر": مسافة الطريق وأكون
عندك. سلام.

تهدت "بسملة": سلام.

عادت "بسملة" إلى الطاولة وقالت بلا
مقدمات:

-تامر عايز يتكلم معايا، وأنا قولت له
يجي هنا.

تسألت "جيهان" بتعجب: تامر مين؟

ردت "دعاء" بضيق: الأستاذ اللي
اتقدم لها من فترة ورفضته، ودلوقتي كل
شوية تكلمه.

دافعت "بسملة" عن نفسها بضيق: في
إيه يا دعاء؟ أنا عملت إيه؟ ومالك
مضايقة ليه؟

ردت "دعاء" بجدية:

-بسملة، أنتِ رفضتِيه ودلوقتي بتكلميه؛
طالما عايزة ليه رفضتِيه؟

قالت "بسملة" وهي تتحاشى النظر
لهن:

-أنا مش عايزاه! هو اللي بيكلمني،
وبعدين هو قال إن دي آخر مرة هشوفه.

قالت جملة لها الأخيرة بحزن، لترد
"جيهان" ببسمة:

-شكك عاوزاه ومترددة.

صممت "بسملة" ولم تجب، بينما وقفت
"دعاء" وقالت:

-خلاص، هروح أنا.

ردت "بسملة": خليك، نروح مع بعض.

هزت "دعاء" رأسها بنفي:

-لا، عشان عندي حاجات كتير عايزة
أعملها، وعايزة أذاكر، الامتحانات
قربت.

نهضت "جيهان" هي الأخرى: طيب،
يلا، أنا كمان همشي.

كان "أشرف" يجلس في السيارة أمام
بوابة الجامعة، ينتظر انتهاء محاضرتها
التي أخبرته بها "جيهان". كان ينوي

الاتصال بها ليخبرها الحقيقة كاملة. يعلم
جيدًا أنها ستغضب وتثور، لكنه كان
على يقين أنه سيتوصل إلى طريقة
لتهدئتها. قاطع شروده صوت هاتفه،
ليلاحظ دهشة الاسم المدون على
الشاشة: "مجنونتي". ماذا؟
"المجنونة" تتصل به؟ كيف؟ ولم؟ ومن
أين حصلت على رقمه؟! انتهت المكالمة
وهو ما يزال يفكر في هذه الأسئلة، لكن
قرر أن يبعد تلك الأفكار ليقوم بالاتصال
بها.

بعد لحظات من الانتظار، أجابت "نور"
بصوت هادئ:

- السلام عليكم ورحمة الله وبركاته.

رد "أشرف" وكأنه لا يعرفها متسائلاً
عن هويتها:

-وعليكم السلام ورحمة الله وبركاته،
مين معايا؟

ضحكت "نور" بسخرية وهمست
لنفسها:

-والله مين معايا، عامل أنه ميعرفنيش
تمام.

نظّر "أشرف" للهاتف معتقداً أنها
أغلقت المكالمة، لكنه عاد وسألها بحيرة
من صمتها:

-ألو، مين؟

ردت "نور" بثقة لا تليق إلا بها: معاك
نور المهدي يا كابتن، محتاجة أتكلم
معاك شوية، ممكن؟

رد "أشرف" متسائلاً: تتكلمي معاييا أنا
في إيه؟

أردفت "نور" بثبات: لما أشوفك
هتعرف. أنت فين؟ وأنا جيلك.

ضحك "أشرف" بسخرية وقال: والله هو
مش المفروض أنا اللي أقولك أنت فين
وأنا أجيلك؟

تشكلت بسمة ساخرة على وجه "نور"
قائلة:

-مش هتفرق يا كابتن. على العموم، أنا
في الجامعة.

رد "أشرف" بجديّة: تمام، أنا قريب
عليك. أطلعي هتلقيني مستيكي.

أردفت "نور": أوكي، عشر دقائق
وأكون عندك

تتهد "أشرف" وهو يقول قبل أن تغلق:

-سلام مؤقت.

أغلق الهاتف وهو يشرد بحيرة، يفكر في كيفية تمكن "نور" من التواصل معه

بهذا الشكل. تساءل في نفسه:

- "أكيد عرفت! مستحيل تكون متعرفش

وتتكلم معايا بالطريقة دي!"

ثم تذكر "جيهان"، فأرسل لها رسالة

نصية:

-«أنتِ قولتي لـ نور على اللي حصل، أو

حد قالها؟»

بعد دقيقة، أجابت "جيهان" برسالة

نصية:

-«لا، محدش قالها حاجة. أصلاً مكناش

عارفين نوقلها إزاي. بس بتسأل ليه؟»

رد "أشرف" على الفور:

«مفيش، هو سؤال مش أكثر.»

أغلق الهاتف، وهو في حالة تفكير عميقة، مُنتظراً حربه القادمة مع "المجنونة" الخاصة به.

كانت "ديالا" تسير وسط صحراء كاحلة، تستتجد وتصيح وتبكي، بينما كانت تتمنى أن يأتي أحد وينقذها من هذا البلاء، لكن لا حياة لمن تتادي. اقتربت منها حيوانات مفترسة وهاجمتها، لتصرخ وتصرخ حتى كادت أحيالها الصوتية أن تقطع، ولا يأتي أحد لإنقاذها.

انتقلت صرخاتها إلى الواقع، لتتفضل
"إيمان" من جوارها، وتقول بخوف
وهي تعانقها:

-ديالا حبيبي اهدي؛ ده حلم، متخفيش،
مفيش حاجة.

قالت "ديالا" ببكاء وهي تتمسك بها
بقوة:

-لا يا عمتو، أنا خايفة، خايفة أوي...
أنا... أنا مش عارفة؟... هما... هما
كانوا ماشين ورايا... وبعدين، بعدين...

ازداد بكائها لتصرخ بألم: أنا سببتهم...
سببتهم يعملوا فيا كده وسكت... أنا
السبب... أنا السبب. يارب، يارب
ارحمني، يارب!

ابتعدت عن "إيمان" وهي تعود إلى
هذيانها قائلة بصوت متقطع:

-بابا هيعمل إيه؟ طيب ماما هيعصلها
حاجة بسببي صح... طيب أنا أعمل إيه
دلوقتي؟

صرخت بكل ما فيها وبصوت يملؤه
الألم:

-يارب!

ثم سقطت مغشياً عليها في أحضان
"إيمان"، التي كانت تبكي بوجع على
حالتها، وعلى طفلتها وابنة أخيها.

في غرفة "كريم"...

كان "كريم" يجلس بارهاق وهو يحدث
زوجته عبر الهاتف وهو يقول بضيق:

- خلاص يا سلمى، لما تيجي تعرفي مالي.

ردت "سلمى" بقلق: أسفة يا حبيبي، بس خايفة عليك، صوتك تعبان وأنت مش راضي تقولي مالك.

تههد "كريم" محاولاً التخفيف: خلاص حصل خير، متقوليش لماما إني تعبان عشان ما تقلقش، وعرفيني معاد الطائرة إمتى عشان أجي استقبلكم في المطار.

لكن قبل أن تجيب، ارتفع صوت صراخ "ديالا"، ليقول بسرعة:

-سلام يا سلمى، هكلمك بعدين.

تسألت "سلمى" بقلق: في إيه يا كريم؟
ومال "ديالا"؟

أغلق الهاتف دون أن يجيب، ثم ركض
بلهفة صوب غرفة شقيقته. عندما دخل
الغرفة، وجدها مستلقية على الفراش بلا
حول ولا قوة، وجوارها كانت "إيمان"
تجلس تربت على رأسها بحنان فائق،
ودموعها تسيل على وجنتيها.

تسأل "كريم" بقلق: فيه إيه؟

ردت "إيمان" بكاء: كانت نائمة وشافت
كابوس وصحيت تعيط؛ أنا قلبي واجعني
أوي عليها، هي عملت إيه لكل ده؟

تتهد "كريم" بحزن على ما أصاب
عائلته، وقال:

- استغفري ربك يا عمتو، ده قضاء
وقدر، اللهم لا اعتراض.

هتفت "إيمان" بوجع: يارب، يارب
ارحمها برحمتك.

تساؤل "كريم" باهتمام: عطيتها العلاج؟

هزت "إيمان" رأسها وهي تقول: أيوة
عطيتها، قبل ما تمام كانت كويسة،
والكابوس اللي شافته هو اللي عمل فيها
كده.

أردف "كريم" بحزن عميق: ديالا بتمثل
يا عمتو إنها كويسة، بس هي تعبانة؛
ربنا يكون معها وتمر الأيام دي على
خير. أنا هتصل بدكتور صاحبي يجي
يشوفها، أكيد محتاجاه. خلي بالك منها
يا عمتو، ولو في حاجة رني عليا.

غادر الغرفة بوجع، لا يعلم كيف
سيحتمل المزيد. فما أصاب شقيقته ليس
هيناً.

وقف "كريم" أمام باب المنزل ليفتحه،
فوجد ضيوفاً كادوا أن يطرقوا الباب.
ابتسم لهم في هدوء، ليسمع صوت
أحدهم يقول بحرج طفيف من وجوده
هنا:

-السلام عليكم ورحمة الله وبركاته.

رد "كريم" بابتسامة هادئة: وعليكم
السلام ورحمة الله وبركاته، اتفضلوا.

صافح "فارس" و"مارس"، الذي كان
يقبع خلفه بصمت مقلق، قال "فارس"
معتذراً:

- باعتذر لوجودنا في وقت غير مناسب،
لو حضرتك خارج ممكن نيجي في وقت
تاني.

رد "كريم" مبتسمًا: لا طبعًا، اتفضلوا،
مفيش داعي للاعتذار. تشرفونا في أي
وقت.

كانت "نور" تجلس بصمت أمام
"أشرف" منذ دقائق، وهو يشعر بالتوتر
من هذا الصمت الثقيل؛ كان يحاول أن
يقرأ ما تفكر فيه، ولكن لا شيء كان
واضحًا. هل هي تنتظر أن يتحدث هو
أولًا؟ أم أنها تتردد في طرح ما تود
قوله؟ نظر إليها، ثم أخذ نفسًا عميقًا،
وتتحنن ليافت انتباهها.

فقال وهو يحاول فتح الحوار: مالك؟
مش عادتك إنك تسكتي، في حاجة ولا
إيه؟

رفعت "نور" رأسها ببطء، وتحدثت
بصوت منخفض:

-محتاجة أطلب من حضرتك طلب ومش
عارفة أقوله إزاي.

لاحظ "أشرف" التوتير في نبرتها،
فابتسم بحذر وقال بجدية:

-اطلبي بالطريقة اللي تريحك.

ثم بدأت "نور" في الحديث، وكأنها
قررت أن تكون صريحة، وقد عادت
لهجتها إلى طبيعتها:

-بص يا سيدي، بدون مقدمات، أنا
عندي مشكلة وبما إنك ظابط مال
وهدومك، عايزك تساعدني.

فكر "أشرف" في كلامها لو هلة قبل أن
يسأل بحذر:

-مشكلة إيه؟

ردت "نور": في واحد من فترة بيمشي
ورايا وعمال يضايقتني، وأنا زهقت منه.

أجاب "أشرف" بعصبية، وهو يشعر
بالانزعاج وقد اتسعت عيناه مما قالت:

-مين ده؟! وإزاي تسكتي لحد دلوقتي؟

ثم ضاف بغضب: وربّي لحسابهم الكلاب
اللي ملهمش لزمه

تسألت "نور" وهي تنظر له بخبت:
كلاب مين؟

ولكن رد فعل "أشرف" كان سريعاً
وغاضباً حينما قال بلهجة حادة:

- ملكيش دعوة... انطقي مين ده اللي
بيمشي وراكي؟

بدأت "نور" ترفع حاجبها في تعبير عن
الاستفهام، ثم قالت بهدوء:

- أهدى طيب، أنت متعصب ليه؟ وبعدين
المشكلة مش هنا.

نظر "أشرف" إليها بعينين ملوئهما
الحيرة، مستغرباً:

- إيه؟ طب فين المشكلة؟

ردت "نور" بمرح طفيف: بص يا
سيدي، أنا لما لقيته مضايقتي، عملت
إيه؟

كان "أشرف" يضغط على نفسه ليفهم

الموقف:

-إيه؟

هتفت "نور" بمرح: عديت من طريق

مختصر.

هتف "أشرف" وقد بدأ يشك في

تصرفاتها:

-مش فاهم.

أكملت "نور" بتفاصيل إضافية وهي

تشرح ببطء:

-البت زفته، كل شوية تلاقى طريق

مختصر، ومفيش حد بيعدي منه عشان

نتمشى براحتنا. رحلت أنا عديت من

الشارع ده، ومكنش فيه حد خالص في

الشارع...

كان "أشرف" يراقبها بتركيز، وعيناه
متسعان في تساؤل:

- هااا وبعدين؟

ردت "نور" بثبات: والواد اللي ماشي
ورايا كنت عارفة إنه هيستغل الفرصة
إن مفيش حد ويكلمني.

انفجر "أشرف" في وجهها بعصبية
وهو يتنفس بصعوبة:

- انجزي ومش كل شوية تسكتي!

قالت "نور" بهدوء وهي تبتسم له
جعلت أعصابه تتوتر أكثر:

-إيه، مخدش نفسي. المهم الواد وقف
يكلمني، رحنا أنا عملت إيه؟

أجاب "أشرف" باستياء محاولاً
السيطرة على غضبه:

- يا رب صبرني. إيه؟

ردت "نور" بكل بساطة وهي تبتسم
بسخرية:

- ضربته بحجر على رأسه كنت حاطة
في الشنطة، فالواد أغمى عليه. حاولت
أفوقه مرديش، رحى سبته ومشيت. هااا
هتساعدني؟

نظر لها "أشرف" مذهولاً: في إيه؟؟

ردت "نور" وكان ما قالته كان أمراً
عادياً:

- في اللي قولته؟

نظر إليها "أشرف" بحيرة متسألًا: اللي
هو؟

قالت "نور" ساخرة: مالك أنت عيان ولا
إيه؟

فجأة، انفجر "أشرف" في وجهها
بغضب عارم وهو يلوح بيده:
-بت أنتِ مجنونة ولا غبية ولا إيه؟
وقفت "نور" ببطء، ثم أخذت حقيبتها
بحركة عنيفة وقالت باستخفاف وبنبرة
جافة:

- إلا الغلط يا باشا! مش عايزة منك
مساعدة، بلا مجنونة قال.
بينما كان "أشرف" في حالة من الغضب
الذي يتصاعد داخلة، قال بصوت متقطع
مراعياً لمكان تواجدهم:
-قعدني مكانك، وأيادي تتحركي غير لما
أقولك.

ردت "نور" بعناد شديد: ليه إن شاء الله
ت...

ولكنه قاطعها فجأة بصرخة غاضبة غير
مهتم بمن حوله:

-نوررر!

جلست "نور" أخيراً في مكانها، بينما
كان "أشرف" يضع يده على وجهه،
يتنفس بصعوبة. نظر إليها بحيرة قبل
أن يرفع يده ويتساءل بهدوء:

-أنتِ غبية؟

لم ترد "نور" مباشرة، بل أخذت وقتاً
لتفكر قبل أن تجيب، وهي تحاول
التخفيف من تأثير كلماتها، قائلة ببرود:

-مش ديمًا. يعني أحيانًا البنات بيقولوا
عليا غبية، وأحيانًا لا. بس هما بيقولوا

البت زفته أغبى مني. يعني بصّ، البت دعاء عملانا مستويات. يعني زفته المستوى الأول 'تقصد جيهان'، وأنا المستوى الثاني، والزفته الثانية المستوى الثالث 'تقصد بسملة'. أما الزفته الثالثة فهي ذكية الصراحة، مقدرش أقول عليها حاجة 'تقصد دعاء'.

شعر "أشرف" وكان العالم ينهار أمامه، وكانت هذه الإجابة بمثابة القشة التي قصمت ظهره. همس لنفسه في ضيق:
"يا لله، ستصيبه بالجنون لا محال."

ثم أخذ نفسًا عميقًا قبل أن يتحدث بلهجة محبطة:

-حقيقي، أنا عاجز عن الرد.

لكن "أشرف" لم يستطع أن يترك
الأمور هكذا، فاستمر في محاولته
للسيطرة على الموقف، قائلاً بصوت
هادئ:

- نور، تصرفاتك دي مش طبيعية. يعني
مكنتيش قادرة تقولي لحد يتصرف مع
الواد ده؟ لازم تعمل في فيها المفتش
كونان. افترض حصلك حاجة، لا وكمان
مسهلة عليه مهمته! معدية من طريق
مهجور! والله حرام عليك اللي بتعمله
ده.

صمت للحظة، ثم نظر إليها باستهزاء:
- لا، وأنا اللي خايف عليها وأقول
عملها إيه؟ اتاري المفروض أخاف على
الواد منها.

ابتسمت "نور" ابتسامة مستفزة،
وأجابت:

-سيبك من الكلام ده. أنت لحد دلوقتي
مطلبتش أكل، ولا مش معك فلوس؟
اطلب وأنا اللي هحاسب.

زادت عصبية "أشرف" وهو يقول:
مش عايز أسمع صوتك عشان إحنا في
مكان عام، ومش عايز أعمل حاجة أندم
عليها.

لكن "نور" أجابته بنبرة غير مكرثة:

-يعني هتطلب أكل ولا لا؟

تجاهل "أشرف" حديثها، واستمر في
طرح أسئلته بغضب:

-حصل الكلام اللي بتقوليه ده إمتى؟

والشارع اللي كنتم فيه اسمه إيه؟

وتعرفي اسم الواد؟

عبثت "نور" في حقيبتها، لكنها لم

تجب. نظر إليها بحدة، ثم انفجر:

-هو أنا مش بكلمك؟

ردت "نور" ببرود: مش زعقت فيا

وقولت مش عايز أسمع صوتك تاني.

ضحك "أشرف" وهو يقول: والله؟

ابتسمت له "نور" بتحدٍ: والله.

همس "أشرف" لنفسه، وهو لا يعرف

كيف يتعامل معها:

"المفروض أتعامل معاها إزاي دي يا

ربي؟"

ثم تحدث بضيق، وهو يحاول أن يظل هادئًا:

-أنا آسف يا نور هانم، بس بعد إذنيك لما أسلك تردي عليا لو مش هتعبك.

تتهدت "نور" وهي تقول بتأفف: طيب.

هتف "أشرف" بحدة أكبر: ردي.

نفخت "نور" بضيق وقالت: أنت عمال

تزعق وأنا ساكته، ومش هسكت تاني.

الحوار حصل من ساعة، وهعرف اسمه

مين؟ كنت هطلعوا بطاقة.

تتهد "أشرف" بقلة حيلة: طيب،

والشارع اللي كنت فيه؟

ردت بسخرية: مبرك زش على اسم

الشارع، عشان مش هطلعوا بطاقة

برضه. بس أكيد البت زفته عارفة
اسمه.

قال "أشرف": اتصلي اسألها.

نظرت له بضيق قائلة: مش بكلمها.

تعجب "أشرف" من أجابتها وتساءل

بتوتر:

-ليه؟

نظرت "نور" له وهي ترفع أحد

حاجبيها بمعنى:

- "حقاً؟"، ثم جذبت هاتفها من على

الطاولة، لتفتحه وتضعه أمامه على

صورته برفقة "جيهان".

ابتسم "أشرف" بهدوء: عايزة تعرفي

كنت معها ليه؟ كنت بسألها عنك. نور،

في موضوع هقولك عليه بس حاولي
تشغلي عقلك ولو مرة واحدة...

أتسعت بسمه "نور" ثم قالت كلمة
واحدة:

-طلقتي-

سقطت الكلمة على "أشرف"
كالصاعقة، ليبتلع بتوتر...

الفصل التاسع عشر

"إني يا الله مددت قلبي إليك فلا ترده إلا
مجبوراً."

-طلقتني-

كلمة واحدة تفوهت بها "نور"، سقطت
كالصاعقة على مسامع "أشرف". شعر
بتوتر شديد، ابتلع ريقه بصعوبة قبل أن
يتمكن من النطق:

-نور...

رفعت حاجبيها بتحدٍ، وقالت: طلقتني
بالأدب. أنا بعد سنة وكام شهر هكون
محامية، وعارفة كويس أوي إن اللي
أنتم عملتوه ده مصيبة. ولو رفعت
عليكم قضية، كلكم هتتاسبوا. بس...

توقفت قليلاً، ثم ابتسمت ابتسامة صغيرة
وقالت: -بس عشان خاطر أنا طيبة
وكيوت وقمر، هسكت عن حقي مقابل
إنك تطلقني بهدوء.

ابتسم "أشرف" بهدوء مستفز ورد:
طيب بصي يا وزه... 'طلقني' مش من
ضمن اختياراتك.

نظرت له "نور" بسخرية واضحة
وسأته:

-وأيه هي اختياراتي يا باشا؟
قال بثبات: تزعلي مني، أو تتعصبي
عليا، أو تتخانقي معايا. وأنا مستعد أقبل
كل ده، وهحاول بكل الطرق إنني
أرضيكي وهفهمك اللي حصل. لكن طلاق
وكلام فاضي؟ انس.

اشتعلت "نور" غضباً وردت عليه
بعصبية:

-كلام فاضي؟! وأنكم تضحكوا عليا
وتعتبروني لعبة ده كلام فاضي؟! وكم ان
عايزني أسكت؟!!

حاول تهدئتها، قائلاً: نور، أهدي عشان
خاطري. افهمي الأول اللي حصل
وبعدين اتكلمي.

ردت بصوت مرتفع: مفيش بينا كلام.
اللي بيني وبينك كلمة، انطقها وخلينا
نخلص من الحوار ده.

نظر لها بتصميم وقال: نور، متجبرنيش
أخليكي تسمعي بطريقتي.

ردت بعصبية أشد: مفيش بينا كلام، أنت
مبتفهمش.

ورغم تخطيها للحدود، كان يدرك أنها
تملك كل الحق في ذلك، فسألها بهدوء:
- أنتِ عرفتِ منين؟

ضحكت بسخرية وقالت: مش مهم أنا
عرفت إزاي، المهم إني عرفت أنكم
بتلعبوا بيا.

حاول الدفاع عن نفسه قائلاً: يا بنتي،
هلعب بيك إيه؟ أنا متجوزك عشان...

قاطعت كلامه بحدة وهي تهتم بالمغادرة:
- معاك ٢٤ ساعة تفكر فيها وتيجي
البيت عشان تطلقتي. لو عَدَّت المدة،
هرفع عليكم قضية ونتقابل في المحكمة
يا باشا.

وغادرت المكان بخطوات ثابتة، تاركةً
وراءها صامتاً مشحوناً بالأسئلة
والمشاعر المضطربة.

كانت "بسملة" تجلس على الطاولة
بمفردها، تنظر إلى اللاشيء بقلق وحزن
لا تفهم سببه. بينما كانت شاردة في
أفكارها، سحب "تامر" أحد المقاعد
وجلس بهدوء دون أن تشعر به. مديده
ليزهها برفق، لتتفرض في جلستها
وتصيح بغضب:

-إزاي تتجراً وتلمسني؟!

تراجع "تامر" بسرعة وقال معتذراً:
أسف والله، مقصدش. أنا بكلمك من
شوية ومش بتردي.

اعتدلت في جلستها بضيق، وقالت بنبرة
حادة:

-نعم؟ عايز مني إيه؟

نظر لها بخرج بسبب طريققتها، ثم قال:

-كنت عايز أقولك حاجة قبل ما أسافر.

نظرت إليه بصدمة مشووبة بالحزن
والخوف، وقالت دون وعي:

-تسافر؟

لاحظت ما تفوهت به سريعاً، لتتدرك
الأمر وهي تعبت بزجاجة المياه الفارغة
أمامها:

-قصدي، هتسافر ليه؟ وإزاي تسبب
أختك في الوضع اللي هي فيه؟

تنهد "تامر" بحزن وأجاب: عشان
الوضع اللي هي فيه بسببي. أنا السبب

في اللي حصل، ومغديش القدرة إني
أواجه أبويا. نظرتة ممكن تقتلني، لأنني
متأكد إنه هيلومني على اللي حصلها.
نظرت له "بسمة" بدهوة وقالت
باستكار:

-وأنت إزاي السبب؟ يعني عشان البنات
اللي بتكلمهم ولا إيه؟

أجابها بصراحة: أيوة. هو حاول كثير
يقنعني إن اللي بعمله غلط، بس أنا كنت
مصر على الغلط.

هزت رأسها بحزم وقالت: ده مكنش
غلط، ده ذنب كبير. لازم تتوب عنه مش
تهرب. مش هقدر أقولك إن اللي حصل
لـ"ديالا" بسببك، بس أكيد ده اختبار ليكم
وليك أنت شخصياً عشان تتوب.

قاطعها بسرعة وقال: والله من يوم ما شوفتك وأنا قطعت علاقتي بكل البنات اللي كنت بكلمهم.

نظرت له بجدية وقالت: المفروض تقطع علاقتك بيهم عشان نفسك مش عشاني. لأن لو أنا مش ليك، ممكن ترجعهم تاني. لكن لو سبتهم وأنت مقتنع إن اللي بتعمله حرام، عمرك ما هترجع لهم.

نظر إليها ملياً قبل أن يقول: عارف، وعشان كده عايز أبعد عن هنا. هعيد حساباتي، يمكن لما أرجع أكون شخص تاني وتقبلي بيا.

صمتت للحظات تفكر، ثم سألته بجدية:

-طيب، كنت عايز مني إيه؟

قال وهو يتهد: وعد.

نظرت له بعدم فهم: وعد؟

أجابها بثقة: إنك تستتيني. عارف إن ده
مش من حقي أطلبه، بس عندي
إحساس إنك عايزاني، بس على
شروطك أو إن أكون الشخص اللي في
بالك. وأنا هعمل كل اللي أقدر عليه
عشان أتغير. وصدقيني، لما أرجع،
هكون الشخص اللي بتتمنيه.

تهدت "بسملة" وقالت: متعودتش أوعد
بحاجة مقدرش عليها. سافر وادعي ربنا
باللي أنت عايزه، وربنا قادر على كل
شيء.

ابتسم لها بثقة وقال: إن شاء الله تكوني
من نصيبي.

نهضت لتغادر وقالت: أنا لازم أمشي.
ولو سمحت، متحاولش تكلمني تاني،
عشان مقابلي ليك دي غلط. وياريت
تمسح رقمي دلوقتي.

رد بإذعان: حاضر، بس ممكن أطلب
منك حاجة أخيرة؟
قالت بحذر: اتفضل.

طلب بهدوء: ينفع كل فترة تروحي أنتِ
وصحابك تشوفي "ديالا"؟
أجابته بثبات: من غير ما تقول، كنت
هعمل كده.

ابتسم بشكر وقال: شكراً بجد على
وجودك في حياتي.

قالت وهي تغادر: امسح رقمي قبل ما
أمشي.

أخرج هاتفه وفعل ما طلبت، لكنه يعلم
أن رقمها محفور في قلبه قبل عقله.
وقفت عند الباب والتفتت إليه لتهمس
بخجل:

-خلي بالك من نفسك.

شعرت بالندم فوراً بعد أن غادرت
المكان، تحدثت مع نفسها:

"حمقاء! كيف تجراتِ على تجاوز
حدودكِ معه؟ ما شأنك أن يعتني بنفسه
أم لا؟ فليذهب للجحيم!"

ردت على نفسها:

"بل شأني. إن لم يكن شأني، فشان
من؟"

داهمها صوت داخلي:

"ستقبلين بشخص سيء مثله؟ ربما
يكذب عليك. من اعتاد اللهث خلف
النساء لا يستقيم أبداً."
لكنها أجابت بثقة:

"بل فعلها لأجلي. وسأنتظره حتى يفنى
عمري."

عاد الصوت الداخلي ليحذرها:

"ستندمين."

فردت بتحد:

"لن يحدث. أنا أثق به."

تركت المكان، وفي ذهنها تساؤلات لا
تنتهي: "ماذا سيفعل هذا الدنجوان في
الأيام المقبلة؟"

جلس "فارس" بخرج بجوار أخيه
"مارس"، ينتظران عودة "كريم" الذي

ذهب ليُحضِر القهوة. في محاولة لكسر الصمت، نظر "مارس" إلى أخيه وسأله بهدوء:

-مالك؟

أجاب "فارس" بتوتر: أنا مش عارف إحنا هنا بنعمل إيه!

رد "مارس" بنبرة ساخرة: يعني هنكون هنعمل إيه؟!

عاد "كريم" يحمل صينية القهوة، يبتسم بودّ وهو يقدم الفناجين لهم: -اتفضلوا.

تناول "فارس" و"مارس" القهوة منه وشكراه، ثم جلس "كريم" على المقعد المقابل لهم. قال "فارس" بحرج:

-إحنا جينا نضمن على الأنسة ديالا...

هي بخير؟

رد "كريم" بحزن ظاهر:

-الحمد لله، وإن شاء الله هتكون بخير.

أنا كنت طالع أشوف الدكتور مصطفى

صاحبي يجي يشوفها.

تساءل "فارس" بقلق: دكتور إيه؟

أجاب "كريم": دكتور نفسي، لأنها مش

راضية تتكلم مع حد، بتصحى تعيط

وتنام.

تدخل "مارس" في الحديث قائلاً بجدية:

-معتقدش إنها ممكن تتكلم مع دكتور،

لأن بعد اللي حصل هيكون عندها خوف

من أي راجل غريب. الأفضل تكون

دكتورة.

فكر "كريم" للحظة، ثم قال: معاك حق، هشوف دكتوراة في أقرب وقت.

اقترح "مارس" بحماس: مفيش داعي تشوف حد. بنت خالتي دكتوراة نفسية شاطرة وعندها عيادة خاصة، ممكن أكلمها. وحضرتك ممكن تسأل عنها لو مش واثق في كلامي.

ابتسم "كريم" وقال بارتياح: تمام، مفيش مشكلة. كلمها وشوف ممكن تيجي إمتي. هي اسمها إيه؟ رد "مارس": تقى علي.

قال "كريم" بتذكر: تقريباً سمعت اسمها قبل كده. بجد شكراً ليك على كل اللي بتعمله.

رد "مارس" بتواضع: العفو، مفيش
داعي للشكر. هكلمها وأبلغك. بس أنا
كنت عايز أطلب من حضرتك طلب.

قال "كريم" بجديّة: اتفضل، اطلب اللي
أنت عايزه، ولو أقدر أعمله مش هتأخر.

تحدث "مارس" بثقة: أنا اسمي مارس
ياسر، ٢١ سنة، في كلية آداب الفرقة
الثانية، شغال جرسون في مطعم...
الحمد لله، سمعتي زي الذهب مفيش
فيها غلطة. حياتي عبارة عن دراسة
وشغل، وممكن تسأل عليا وتعرف إنني
مكديتش في حرف.

نظر "فارس" إلى أخيه بدهشة وهو لا
يفهم ما يقوله، ليبتسم له "مارس"
مطمئناً بعينه أن كل شيء على ما يرام.

بعد لحظات من الصمت، قال "كريم"
متسائلاً:

-الحقيقة برضو مفهمتش... أنت عايز
إيه؟

أجاب "مارس" بثبات: أنا بطلب إيد
الآنسة ديالا من حضرتك. وطلبني ده
مش بدافع الشفقة، عشان خاطر
متفهمنيش غلط. أنا شفقتها قبل الحادثة
هي وصاحببتها في المطعم اللي بشتغل
فيه، وأعجبت بيها. ولو حضرتك وافقت
مبدئياً، هجيب بابا وماما ونجي نطلبها
رسمي.

قال "كريم" بعد لحظات من التفكير: بس
أنت مش شايف إن الوقت مش مناسب
للكلام ده؟ وكمان أنت لسه صغير.

رد "مارس" بإصرار: بالعكس، الوقت مناسب جداً. أنا عايز أكون جنبها. وكم ان ٢١ سنة مش صغير، وبرضو مش هتجوزها النهارده. إحنا بس نكتب الكتاب، وبعدين أسنتي أظبط أموري ونتجوز يعني مش أقل من سنتين.

ابتسم "كريم" وقال: مش عارف أقولك إيه، بس حقيقي فخور إن في شباب بتفكر زيك. صدقني، أنا مقدر زعلك على أختي وإنك عايز تساعدها، بس الجواز مش بيجي بالطريقة المندفعة دي. ويمكن لو عملت كده تندم بعدين. لذلك فكر قبل ما تاخذ قرار مصيري زي ده.

رد "مارس" بجدية: أنا فكرت كويس،
وعمري ما كنت مندفع لحاجة، وواثق
إني مش هندم.

سأله "كريم" متعجباً: فكرت إمتى؟!
الحادث حصل من يوم وكام ساعة،
لحقت تفكر؟

أجاب "مارس" بثقة: أيوة فكرت،
وعارف أنا بقول إيه. ومن فضلك، خد
كلامي على محمل الجد ومنتظر ردك
عشان أجي أنا وأهلي.

قال "كريم" بواقعية: بص، بابا هيجي
بعد يومين. هحكيله موقفك وهو اللي
يفكر. وفي النهاية، الرأي الأول والأخير
رأي ديالا، ومستحيل بابا يفتحها في

موضوع زي ده دلوقتي. وأنت ممكن
تفكر في الفترة دي وتراجع قرارك.

أجاب "مارس" بهدوء: تمام، هنتظر
اليومين، وهتصل بيك أفكر
بالموضوع. لأني عارف قراري.

نظر "كريم" إلى "فارس" وسأله: ليه
معترضتش على كلام أخوك؟

رد "فارس" بثقة: لأني معنديش
اعتراض. هو اللي هيتجوز، وطالما
اختار وهيكون مبسوط يبقى أنا تمام.
وربنا يتمله على خير. وصدقني مش
هتدم لو وافقت. أخويا راجل وهيحافظ
على أختك بحياته. وكم ان أخويا مش
متسرع، أكيد فكر كويس. وبابا اتجوز

في نفس عمر مارس يعني مش صغير.
وبتمنى بجد إنك توافق.

صمت "كريم" للحظات ثم قال بابتسامة
صغيرة:

-هنشوف الأيام الجاية.

وقف "مارس" وقال: هنستأذن، وإن
شاء الله متكونش آخر زيارة.

صافحه "كريم" قائلاً: إن شاء الله.

قال "فارس" وهو يهيم بالمغادرة:
السلام عليكم ورحمة الله وبركاته.
خليك، متتعيش نفسك وتطلع.

رد "كريم": مفيش تعب ولا حاجة، أنا
كنت خارج.

سأله "مارس": رايح فين؟

أجاب "كريم" باستغراب: المستشفى

قال "مارس": طيب، اتفضل معنا
نوصلك، كده كده في طريقنا.

رد "كريم" برفض: شكراً، مفيش داعي.

تحدث "فارس" بمرح طفيف:

-مفيهاش حاجة. ده طريقنا، وأنت هتقعد

في العربية مش فوق راسنا.

بعد إصرار من "مارس" و"فارس"،

صعد "كريم" إلى السيارة وجلس في

المقعد الخلفي. جلس "مارس" بجوار

"فارس" الذي كان يقود، وانطلقت

السيارة في طريقها...

في المشفى، كان "إبراهيم" يتابع حالة

طفلة صغيرة تدعى "مريم". جلس

بجانبها بابتسامة حانية وهو يقول:

-شطورة يا مريوم.

ابتسمت الطفلة ببراعة وسألته بتلهف:

-يعني كده مش هاخذ حقنة تاني، صح؟

أجابها مطمئنًا: صح الصح يا مريوم.

ومش بس كده، أنتِ كمان بكرة هترجعي

البيت وتلعبى مع أصحابك برحتك.

قالت بسعادة ولهفة: بجد يعني؟ هلعب

مع ملك برحتي؟

هز "إبراهيم" رأسه مبتسمًا، لكن

ملامحها سرعان ما تغيرت للحزن وهي

تقول:

-وكده مش هشوفك تاني؟ أنت

هتوحشني أوي.

ربت على يدها بحنان وقال:

-وأنتِ كمان يا مريوم، بس لازم ترجعي
عشان أكيد ملك وحشتك. وكم ان ممكن
ترني عليا من عند بابا في أي وقت.
مش إحنا أصحاب؟ والأصحاب مش
بيسيبوا بعض أبداً حتى لو كل واحد في
مكان.

نهضت الطفلة من على الفراش واقتربت
لتعانقه بحب طفولي، وهو يبادلها العناق
بحنان. همست له:

-أنا بحبك أوي يا صاحبي.
أبعدها قليلاً عنه وابتسم قائلاً: وأنا كمان
بحبك يا صحبتي.

قطع حديثهم صوت إحدى الممرضات
التي دخلت الغرفة قائلة:

-في واحدة منتظرة حضرتك في المكتب
يا دكتور.

نظر "إبراهيم" إلى "مريم" وقال
مبتسماً:

-سلام يا مريم. هشوفك بكرة قبل ما
تمشي.

في المكتب...

دخل "إبراهيم" مكتبه وهو يقول دون
أن ينظر لمن تجلس بانتظاره:

- أنا بدأت أحب المستشفى من ساعة ما
بقيت أشوفك فيها.

رفعت "جيهان" نظرها إليه مبتسمة
بخجل، لكنها سرعان ما بدلت تعبيرها
إلى المرح وهي تقول:

-نوره عرفت كل حاجة وطلبت الطلاق
من أشرف.

جلس على مقعده وقال بدهشة: وأنت
فرحانة كده ليه؟! مش المفروض تكوني
زعلانة؟

ضحكت "جيهان" بمرح وهي تجيب:

-أصل كنت متوقعة ده من نوره،
ومخيبتش ظني.

قال "إبراهيم" مستكراً: يعني لو خبيت
ظنك كنت زعلتي؟

أجابت بثقة: طبعاً، دي فيها كلام؟

سألها باستغراب: مين قالك إنها عرفت؟

ردت: أشرف اتصل بيّ، وأنا اتصلت
بعمته وقلت لها. وجيت أقولك.

ظهرت عليه ملامح الانزعاج والغيرة
وهو يقول:

-طيب، طالما كده الموضوع خلص،
بلاش كل شوية تقابلي أشرف وتكلميه.

سألته بحدة: ليه؟

رد بحزم: أنتِ عارفة ليه.

قالت باستتكار: يعني أنتِ عندكش ثقة
فيا؟

أجابها بنبرة هادئة: أنا عندي ثقة فيكِ
أكبر من ثقتي في نفسي. بس خلاص،
الموضوع خلص، هتكلميه تاني ليه؟

نظرت بعيداً عنه وقالت: أنت لو قلت من
البداية متدخليش في الموضوع، مكنتش
كلمته. وأنا كده كده مكنتش هكلمه تاني.

ابتسم لها وقال بلطف: كملني. وبعد ما

نوره عرفت، هيحصل إيه؟

أجابت: أشرف هيقتعها أكيد. نوره

عايزة، بس هتعااند شوية، مش أكثر.

هز رأسه وقال: تمام.

ثم سألت فجأة: هو أشرف ابن خالتك،

صح؟

أجابها مستغرباً: أيوة، ليه؟

قالت: مفيش. بس استغربت من كلامك.

ابتسم قائلاً: إنه يكون ابن خالتي حاجة،

وأنت حاجة تانية.

ابتسمت ولم ترد، فنظر إليها بحنان

وسأل:

-المهم، أنت عاملة إيه؟

قالت بهدوء: أنا بخير الحمد لله. وبأبنا
اتصل وقال إنه عايزني في حاجة مهمة،
بس مش عارفة إيه.

رد مطمئناً: خير إن شاء الله، وابقى
طميني.

وقفت "جيهان" لتغادر وقالت: تمام.
همشي أنا، ولو في حاجة هبقى أقولك.

وقف هو الآخر وقال بابتسامة دافئة:
خلي بالك من نفسك. سلام.

ردت بابتسامة صغيرة: سلام.

في منزل "نور"

كان الجو مشحوناً بالغضب والتوتر،
و"نور" تصرخ بجنون على جميع أفراد
الأسرة:

-تجوزوني من غير ما أعرف؟ طب ليه؟
لدرجة دي أنا ثقيلة عليكم؟
حاولت "فايزة" تهدئتها قائلة بصوت
خافت:

-نور، اهدي وهنفهمك اللي حصل.
لكن "نور" لم تهدأ وزادت حدة صوتها:
-تفهميني إيه؟! إنكم تعبتم مني فبعثوني
لأول واحد خبط عليكم؟!!

قاطعها "المهدي" بغضب: نور!
صرخت "نور" بغضب مماثل: نور إيه
وزفت إيه! الله ياخذ نور عشان ترتاحوا
مني!

تدخلت "ريهام" بحدة ولكن بصوت أقل
حدة من "نور":

- ما خلاص يا نور! اسمعي اللي حصل
وبعدين اتكلمي.

ردت "نور" بعصبية واضحة:

- مش عايزة أسمع حاجة من حد!
وهطلق منه غضب عنه، وإلا هرفع
عليه قضية.

قال "المهدي" بحزم: مش هتطلقني يا
نور.

ردت "نور" متحدية: هطلق يا بابا، ولو
مخلتهوش يطلقتني زي ما اتجوزني يبقى
استحملوا اللي هيحصل.

حملت "نور" حقيبتها بعصبية وهي تهم
بالمغادرة، وعندما سمعت صوت والدتها
تسألها:

-رايحة فين دلوقتي؟

استدارت "نور" ونظرت إليها بنبرة
تحمل الألم والغضب معاً:

-رايحة عند 'بسملة'. طالما وجودي
مضايكم أوي كده، هشوف مكان أعيش
فيه.

ثم استدارت وغادرت المنزل دون أن
تنتظر رداً من أحد. أما أفراد العائلة،
فوقفوا صامتين، يعلمون أن ما تمر به
"نور" صعب عليها للغاية ولا يمكن
تهديتها بسهولة.

بعد مغادرتها، أمسك "المهدي" هاتفه
واتصل بـ "أشرف"، وأخبره بما حدث.
حاول "أشرف" تهدئته قائلاً بثقة: ما
تقلقش، كل حاجة هتكون تمام بكرة.
النهارده سيبها تهدي وتفكر بعقل.
وأنهى المكالمة وهو يخطط لكيفية
التعامل مع "نور" في اليوم التالي.

في منزل "جيهان" ...
كانت "جيهان" تجلس برفقة والدها
وزوجته، تنصت لما يقولانه لكنها لم
تستطع فهم السياق. تجرأت على السؤال
بصوت يحمل الحيرة:
-بابا، أنا مالي بصلة الرحم وترابط
الأسر؟ فيه إيه؟ لأنني مش فاهمة.

رد والدها "عثمان" بنبرة جادة: عمك
كان هنا من شوية.

نظرت إليه تنتظر بقية الحديث، وهي
واثقة أن ما سيقوله لن يسرّها. لم يخيب
والدها ظنّها حين قال بجديّة لا تقبل
النقاش:

- اتفقنا على خطوبتك من 'محمد' بعد
يومين.

ضحكت "جيهان" بسخرية تحاول إخفاء
صدمتها:

- بعد يومين؟ مش كثير... طيب، اليومين
دول أعمل فيهم إيه؟ أجهّز الفستان ولا
أعزم صحابي؟ تفتكر هلق أجهّز
نفسي؟

نظر إليها "عثمان" بغضب وقال: ليه،
إنتِ هتعملي إيه؟

ردت "جيهان" بحيرة حقيقية: مش
عارفة، بس تقريبًا فيه حاجة أنتم
ناسيئها.

تدخلت زوجة أبيها بنبرة حادة: حاجة
إيه؟

قالت "جيهان" بجرأة: رأيي، ولا هو
مش مهم؟

تحدث "عثمان" بغضب يحاول إنهاء
النقاش:

-جيهان، بطلّي دلّع! أنا خلاص اتفقت
مع عمّك.

ردت "جيهان" بغناد يحمل بعض
التحدي:

- خلاص، اتجوزوا أنتم.

قبل أن تنهي جملتها، كانت صفة قوية
قد هوت على وجهها، ليتها سقوط
دموعها بصمت وهي تنظر إلى زوجة
أبيها التي وقفت أمامها غاضبة. ثم قالت
بنبرة قاسية:

- قليلة الأدب! عايزة تصغري أبوكي قدام
عمك؟

ابتسمت "جيهان" بسخرية تخفي
جرحها العميق:

- لأ أزي... أتجوز واحد مش عايزاه
عادي.

ردت زوجة أبيها بحدة أكبر: وماله
'محمد'؟ مش كنت بتلزقي فيه زي

العلاقة؟ ولا عشان رفضك زمان عايضة
ترديها له؟

قالت "جيهان" بجرأة، وكأنها تريد أن
تتهي هذا الحوار بأي ثمن:

-لا، عشان بحب واحد غيره.

لم تمهلها زوجة أبيها فرصة للتفكير، إذ
هوت عليها صفحة أخرى أقوى من
الأولى. تدخل "عثمان" هذه المرة
بغضب شديد وهو يصرخ:

-اخرسي، يا قليلة الأدب! هتجوزيه
غصب عنك.

تحدثت "جيهان" بصوت مكسور يحمل
استسلامًا وحننًا:

-حاضر... ينفع أروح عند 'بسملة'؟
عشان تعبانة... ومتخفش، مش ههرب.

حاولت زوجة أبيها الإشارة لوالدها بأن
يرفض، لكنه نظر إلى ابنته وقال بنبرة
أقل حدة:

- ما تتأخرين.

تركتهن "جيهان" وتوجهت إلى غرفتها
بصمت، جذبت حجابها وارتدت به بسرعة،
ثم غادرت المنزل. كانت خطواتها ثقيلة
وحزينة، تحمل معها ألمًا عميقًا وخيبة
أمل.

هل يمكن أن يتحول مصدر الأمان إلى
خوف وقلق ورهبة؟

كانت "دعاء" تسير في الممر المؤدي
إلى مكتب "فارس" بابتسامة دافئة
تخطف العقول. أرادت أن تفاجئه؛ فقد

أخبرته أنها عائدة للمنزل، لكنها جاءت لتراه لأنها حقًا اشتاقت إليه، رغم أنها كانت معه منذ ساعات قليلة.

وصلت أخيرًا إلى باب المكتب وفتحته دون أن تطرق، لتُصعق بالمشهد الذي أمامها: "فارس" يعانق فتاة بحنان ويقبل جبينها.

انفلتت منها شهقة عالية جذبت انتباهه. ابتعد "فارس" عن الفتاة بسرعة وتقدم نحو "دعاء"، لكنها صرخت بصوت مكسور:

-أوعى تقرب!

تحدث "فارس" محاولاً تهدئتها: دعاء، اهدي وأنا هفهمك... أنتِ فاهمة غلط.

صرخت "دعاء"، ودموعها تساقطت
كأمطار ديسمبر:

- غلط؟ بتحضنها وتقولي غلط؟!!

حاول "فارس" الاقتراب منها بخطوات
حذرة وقال:

-دعاء، اسمعيني الأول، عشان خاطري.

ردت بصوت يختلط بالبكاء: اسمعك؟! أنا
مش عايزة أعرفك تاني!

استدارت وركضت إلى الخارج، تحمل
في قلبها وجعًا عميقًا على ما اعتبرته
نهاية زواجها.

"تساؤلات"

إذا رفض "أشرف" إطلاق سراح
"نور"، ماذا ستكون خطواتها القادمة؟

كيف سيرد "أشرف" إذا قامت "نور"
برفع قضية ضده؟

بعد مغادرة "تامر" للبلد، كيف ستواجه
"بسملة" هذا الفراغ؟

ماذا ستفعل "روبين" إذا علمت أن
"مارس" يريد الارتباط بفتاة تعرضت
لحادث بشع؟

هل "مارس" مستعد لخوض معركة ضد
والدته من أجل من يحب؟

الثقة بين "فارس" و"دعاء" أصبحت
ضعيفة، فهل ستستمر علاقتهم المقدسة
أم ستنتهي إلى الأبد؟

هل انتهت العلاقة بين "نور"
و"جيهان"، أم أن القدر يخبئ لهما
مفاجأة؟

ما الخطوة القادمة التي سيقوم بها
"إبراهيم" ليحل "جيهان" من نصيبه؟

الفصل العشرون

"والدار ليست بالبناء جميلة إن الديار
جميلة بذويها."

وقف ينظر إلى رحيلها بحزن؛ فهو لا
يريدها حزينة، ولكن الأكثر إيلاّمًا أنه
يدرك أنها لا تثق به. لذا تركها تمضي،
على أمل أن يصل تفكيرها العقيم إلى بر
الأمان. استفاق من دوامة أفكاره على
صوت الفتاة التي كانت تعانقه وهي
تسأله بمرح:

-هي دي دعاء؟! حلوة على فكرة.

استدار نحوها، والغضب يتطاير من
عينيه، وقال بحدة:

-يعني عاجبك كدا؟ مش قادرة تستني لما
أرجع البيت؟

اقتربت منه بدلال قائلة: بحبك يا أبو
الفوارس الله!

قال لها بضيق: وأنا بحبك، بس عاجبك
كدا؟ اهي زعلت، أعمل إيه أنا دلوقتي؟
ردت عليه بابتسامة هادئة: حقها يا
فارس، يعني لو أنا مكانها كنت ولعت
فيك وفيها.

قال لها بحزن: بس كان لازم يكون
عندها ثقة فيّ.

هزت رأسها وقالت: في حاجات ملهاش
علاقة بالثقة، دي شافت جوزها بيحضن
واحدة تانية. حط نفسك مكانها وقولي،
لو شفتها كدا هتعمل إيه؟

صمت "فارس" ونفخ بضيق، فلم يجد
ما يرد به. فقالت هي:

-شوفت؟ مجرد تخيل مقدرتش، وبعدين
دي شكلها طيبة. والله لو مكانها كنت
ولعت في المكتب باللي فيه مش أعيط
وأجري.

نظر لها مستكراً وقال: هو كل البنات
بلطجية زيك؟

وضعت يدها على قلبها مدعية الحزن
وقالت:

-كدا غلط يا دوك، أنت بتجرح مشاعري
كأنثى لطيفة بريئة.

رفعت حاجبيها ببراعة مصطنعة وحركت
جفونها قليلاً. فحدّق بها بحنق وقال:

-أنتِ شكك أنثى، لكن لما تتكلمي بحسك
عبده موته. وبعدين من إمتى وانتِ ليك
علاقة باللطافة والبراعة؟

تحدثت بضيق وهي تضع يديها على
خصرها:

-كدا يا فارس؟ أنا غطانة أني جيت من
المطار عليك. أنا هروح لـ (تونزي)،
أكيد قلقان عليّ أني اتأخرت.

رفع حاجبيه مستكراً وقال:

-هو عارف إنك جاية؟

ابتسمت وقالت بثقة: طبعاً ده كلام، دا
الحب كله.

جذبها "فارس" من قبعة ثيابها الرجالية
نحو باب المكتب وهو يقول بتهكم:

-منوش، امشي من هنا عشان مش
ناقص وجع رأس. الحمد لله أنك
متعرفيش الكارثة التانية (يقصد نور).
كنت سبتلكم البلد بالي فيها.

تحدثت "منار" بحماس وقالت: مين دي؟ أوعى تقول صاحبة دعاء اللي ماما حكّلي عنها!

تركها "فارس" وهو يقول بضيق:

-هي ياختي... ويلا سلام!

ردت "منوش" بمرح: اشطأ! هتعرفني عليها.

نظر إليها بجدية وقال بحزم: بتحلمي.

ردت بابتسامة خبيثة: هروح أخلي مارس يعرفني عليها.

قال "فارس" بحزم: منار، انسي أن يكون ليك علاقة بالكارثة دي.

نظرت إليه بدهشة وقالت: إيه ده؟ أنت متعصب لدرجة أنك قلت منار؟ خلاص يا

عم همشي واشوفك بعدين. دي مقابلة
تقابلي بيها بعد كل ده؟!!

اقترب منها "فارس" وعانقها قائلاً
بهذوء:

- متز عيش يا منوش، والله مضايق
بسبب دعاء.

ابتسمت وربتت على كتفه وقالت
مطمئنة:

-ولا يهملك يا حب، كلمة منك تراضيها
ولا تزعل نفسك.

ابتسم لها، فقالت بمرح وهي تهم
بالمغادرة:

-سلام يا حب!

في منزل "بسملة"...

كانت تجلس في غرفتها على الفراش منذ عادت من الجامعة، تبكي بانهايار تام. لم تكن تعلم السبب الحقيقي لبكائها، لكنها شعرت وكأن جزءًا كبيرًا من قلبها قد رحل عندما غادرتة...

ولجت والديتها "حورية" إلى الغرفة، لتجدها في حالة يرثى لها. هرعت إليها بلهفة وسألتها بقلق: حبيبتى مالك؟ فيه إيه؟

انفجرت "بسملة" في البكاء بصوت مرتفع، فاحتضنتها والديتها بحنان وربتت على ظهرها قائلة:

- خلاص يا حبيبتى، اهدي عشان خاطري.

ردت "بسملة" وسط بكائها: أنا تعبانة
أوي يا ماما... قلبي واجعني أوي،
حاسه إني روي هتطلع.

قالت "حورية" بحزن وهي تواسيها:
بعد الشر عليك يا حبيبتى... إيه اللي
واجع قلبك؟ قوليلي.

ردت "بسملة" بوجع، والدموع تملأ
وجهها:

-مش عارفة، المشكلة إني مش
عارفة... حاسة أن قلبي مكسور
وخايفة... خايفة حلمي ميثققش.

تحدثت "حورية" بحنان وهي ما تزال
تربت على ظهرها لعلها تهدئها:

-متخفيش يا حبييتي، كل شيء وله
حل... بس قوليلي، حلم إيه اللي مخليكي
منهارة كدا؟

ابتعدت "بسملة" عن والدتها فجأة بعدما
تداركت نفسها، وكادت أن تعترف لها
بالحقيقة. مسحت دموعها بسرعة وقالت
بتوتر:

-الامتحانات قربت، وأنا خايفة حلمي
ميتحققش. أنا بقالي سنين بتعب بشأن
يتحقق، وخلص فاضل أقل من شهر
على الامتحانات ومش عارفة أعمل إيه.

نظرت "حورية" إليها بتفحص، فقد
علمت أن ابنتها تكذب. هي كتاب مفتوح
بالنسبة لها، والنسخة المصغرة منها
كما يطلق عليها والدها دائماً. أما

"بسملة"، فكانت تعلم أن والدتها كشفت
كذبها، لذا حاولت أن ترسم ابتسامة
مطمئنة وقالت:

-متفكر يش يا ماما، مفيش حاجة. أنا
بس خايفة شوية.

وقبل أن تتمكن "حورية" من الرد، فتح
باب الغرفة على مصراعيه فجأة.
استدارت الأم لتري من القادم، وكذلك
فعلت "بسملة" التي أغضت عينيها
بضيق حين رأت "نور"، الثرثارة التي
لن تهدأ حتى تعرف ما يجري.

صدح صوت "نور" بمرح وهي تقول:
-مرحبًا يا بشر!

دخلت الغرفة وجلست بجوار "بسملة"
على الفراش، ثم التفتت إلى "حورية"
قائلة بمشاكسة:

- عاملة إيه يا حوريتي؟

ابتسمت "حورية" على مشاكسة "نور"
وردت:

- الحمد لله بخير يا نور... حاصل معكم
حاجة ولا إيه؟

نظرت "نور" لها بعدم فهم: حاجة إيه؟
ثم التفتت إلى "بسملة"، التي ما زالت
ملامح الحزن تسيطر على وجهها،
وسألتها بعينيها:

- "ماذا هناك؟"

ردت "بسملة" بإشارة خفيفة أنها
ستخبرها لاحقاً.

قالت "نور" وهي تعود بنظرها إلى
"حورية":

-مفيش حاجة يا خالتو، متشغليش
بالك... دي بتدلع.

ابتسمت "حورية" وهي تدرك أن ابنتها
لا تريد الحديث أمامها. رأت الإشارة
التي وجهتها لـ "نور"، فقررت أن تغادر
الغرفة وتتركهما على راحتهما.

ما إن غادرت، سألت "نور" بفضول:
فيه إيه؟ مالك؟

ردت "بسملة" بتردد:

-مفيش، مضايقة شوية.

سألتها "نور" بالحاح: من إيه يا عسل؟

وقبل أن تجيب، دخلت "دعاء" إلى
الغرفة بهدوء وحزن، أغلقت الباب

خلفها برفق، وصعدت إلى الفراش
لتمدد بجوار "بسملة" دون أن تتطرق
بكلمة واحدة.

نادت "بسملة" اسمها باستغراب: دعاء؟

لكن "دعاء" لم ترد. تدخلت "نور"
بسخرية قائلة:

- الصديقة المخلصة كاتمة الأسرار،
مالك؟

ردت "دعاء" بضيق وحزن: نور، مش
وقتك خالص، سييني في حالي.

سألتها "بسملة" باهتمام: فيه إيه؟ أنا
سيياكي كويسة... اتخانقتي مع فارس
ولا إيه؟

وقبل أن تجيب "دعاء"، فتح الباب بعنف، ودخلت "جيهان" وهي تغلقه خلفها بعصبية.

قالت "بسملة" بضيق: براحه ياختي على الباب، مش قدك هو!

ثم أكملت بتذمر: حاسه إن أوضتي محطة مصر... كل شوية حد يدخل من غير ما يخبط!

اعتدلت "نور" في جلستها وقالت بسخرية:

-نورتي يا أستاذة جيهان!

تقدمت "جيهان" نحو الفراش وجلست بجوار "دعاء"، وقالت بحزن:

-نوره، سبيني في حالي... الله لا يسئلك، عشان مش ناقصة.

ردت "نور" بسخرية: مالك ياختي؟
إيه... في حد جديد ومحتارة تختاري
مين؟

ردت "جيهان" بعصبية: سيبك من
الكلام الفاضي اللي بتقوليه... مش
وقته، ثم إن خلاص الحوار خلاص،
ودول بسملة ودعاء يعني مش هنحور
عليهم.

سألها "بسملة" باستغراب:

-يعني إيه بسملة ودعاء؟ مش فاهمة...
وحوار إيه ده؟

تدخلت "نور" قائلة: خلاص، خلاص،
هقولك بعدين... المهم، حاصل إيه معكم؟
لكم كدا شكلكم ميظمنش.

قالت "جيهان" وهي تنظر إلى
"بسملة":

- عملتي إيه يا بسملة في مقابلتك مع
تامر؟

في منزل "إبراهيم"...

جلس "إبراهيم" أخيراً برفقة "أشرف"
ليحدثا بحرية بعيداً عن والدته التي لم
تعلم بعد أن ابنها قد تزوج. بدأ
"أشرف" الحديث بضيق وهو يقول:

- دل وقتي مش عارف أعمل إيه؟
وأصالحها إزاي؟

رد عليه "إبراهيم" بابتسامة مستفزة:

- قولتك متعملش كده، بس أنت عنيد
ومبتسمعش لحد... فتستاهل.

نظر له "أشرف" بغضب وقال: يا
إبراهيم، مش ناقصك. يا تقول حاجة
مفيدة، يا تسكت خالص!

رد "إبراهيم" بهدوء: خلاص، اهدى.

رد عليه "أشرف" بعصبية: هو أنت
فاكر كل الناس باردة زيك؟

ابتسم "إبراهيم" باتساع وهو يستمتع
بإثارة غضب ابن خالته أكثر:
-وأنت فاكر كل الناس زيك...-

صمت للحظة قبل أن يكمل: مغرور
وعنيد، ولو كنت سمعت كلامي من
الأول، مكنش ده كله حصل.

تنفس "أشرف" بعمق ليهدأ، ثم قال:
-متوقعتش رد فعلها.

رد "إبراهيم" بجديّة: اللي فهمته من
جيهان أنها مش رافضة شخصك، هي
بس رافضة فكرة إنكم ضحكتم عليها.
سأله "أشرف" بقلق: يعني...

قاطعه "إبراهيم" ليكمل:

-يعني، الصبح تروح تشوفها، وتأخذها
في مكان مفهوش ناس كتير عشان
تقدروا تتكلموا براحتكم. لازم تتحمل رد
فعلها، لأنها حقها تزعل. بس أكيد أنت
هتعرف تصالحها بطريقتك.

قال جملته الأخيرة وهو يغمز له بخبث،
مما جعل "أشرف" يضحك بيأس قبل أن
يسأل بعد برهة:

-طيب... وأنت؟ هتعمل إيه؟

رد "إبراهيم" بعدم فهم: في إيه؟

نظر له "أشرف" باستفهام: أنت

متعرفش اللي حصل؟

تغيرت ملامح "إبراهيم" وسأل بضيق:

-حصل إيه؟

توتر "أشرف" وهو يقول: لما كنت في

بيت نور، سمعت أمها وهي بتتكلم عن

خطوبة جيهان بعد يومين على ابن

عمها.

بدت الصدمة واضحة على وجه

"إبراهيم" وهو يرد بعدم تصديق:

-ده بجد؟

أشار له "أشرف" برأسه وقال: افكرت

إن جيهان قالتلك.

تذكر "إبراهيم" أن "جيهان" أخبرته أن

والدها يريد لها لأمر هام. لكنه تساءل:

- "لماذا لم تتصل به لتخبره بما علمت؟
ربما هي حزينة الآن... بل هو يكاد
يجزم أنها تضحك بمرح الآن، وتخفي
حروبًا تشتعل داخلها!"

خرج من أفكاره عندما لاحظ نظرات
"أشرف" المتابعة له باهتمام، ليقول
دون تفكير:

- أشرف، إيه رأيك تحبسه ونرتاح منه؟

رد "أشرف" بعدم فهم: مين ده؟

قال "إبراهيم" بجدية ظاهرة: ابن عمها.
احبسه لحد ما نتجوز وطلعه بعدين.

ضحك "أشرف" من الجدية التي يتحدث
بها "إبراهيم"، ورد بسخرية:

-هي جيهان لحقت تأثر عليك للدرجة
دي؟ أصل الحبس ده بيت أبويا؟ احبس
اللي يعجبك!

رد "إبراهيم" بنبرة دفاعية: أولاً، ملقش
دعوة بيها. وثانياً، ممكن تتهمه بسرقة
أو جريمة قتل مش معروف مين القاتل.
واهو يمكن تترقى بسببي!

ضحك "أشرف" غير مصدق للأفكار
التي يطلقها "إبراهيم"، وقال مازحاً:
-من إمتى وأنت أناني؟ بتفكر توذي حد
لمصلحتك الشخصية؟

رد "إبراهيم" بضيق: أنا مستحيل أوذي
حد! هو شخص بارد، يعني واحدة مش
عاوزه تتجوزه بالعافية.

قال "أشرف" بتردد: بس أنا عرفت إنهم كانوا بـ...

قاطعته "إبراهيم" بسرعة: كان... وده ماضي. المهم دلوقتي...

سأله "أشرف": إيه؟

أجابته "إبراهيم" بنبرة ساخرة: هتحبسه.

رد "أشرف" ضاحكًا: فكر بجديّة، وسبيك من الكلام ده. ونصيحة مني، متتكلمش كثير مع جيهان، عشان هتضيع كل سنين تعبك بأفكارها دي وهتخليك زيها!

رد "إبراهيم" بتهكم: ونفس النصيحة هقولها لك... متتكلمش مع نورهان تاني، لأنها مجنونة أكثر من جيهان!

خطرت فكرة على بال "أشرف"، فابتسم
وقال بحماس:

-جائتي فكرة هتساعدك وتساعدني!

رد "إبراهيم" بلهفة: فكرة إيه؟

قال "أشرف" بابتسامة مكرة: هقولك...

في غرفة "بسملة"

كانت الغرفة هادئة، والجميع مستلقٍ
على الفراش بجانب بعضهم البعض،
يتشاركون لحظات من الحزن والقلق.
تهددت "بسملة" بشدة لتكسر الصمت
قائلة:

-هيسافر.

ردت "نور" بتهكم وهي تقلب عينيها:

في داهية بتاع البنات ده!

قاطعتها "دعاء" بنبرة تحذير: نور،
كفاية بقي!

أخذت "نور" شهيقًا طويلاً قبل أن
تصمت، بينما أكملت "بسملة" بحزن:
-طلب مني أو عده أني أستناه لما يرجع.
نظرت "دعاء" إليها باستغراب وسألت:
-وبعدين؟

هزّت "بسملة" رأسها وهي تتابع
بصوت منكسر:

-ماقدرتش أو عده... بس أنا ز علانة أوي
ومش عارفة ليه؟ أو يمكن عارفة... أنا
مش عايزاه يسافر.

ربتت "جيهان" على كتفها قائلة: لو
بيحبك يا بسملة، هيرجع حتى لو سافر.

نظرت "بسملة" إلى السقف وقالت
بخفوت:

-ويمكن يرجع ناسيني.

ردت "نور" بتلقائية: في داهية! يعني
مفيش غيره؟

قاطعتها "دعاء" بنبرة صارمة: نور،
مش وقته الكلام ده! بس يا بسملة،
يمكن ده أفضل شيء يعمله عشان
تعرفي أنتِ عاوزة إيه فعلاً. حزنك
دلوقتي نابع من لحظة المفاجأة، بكرة
ممكن تكتشفي أنك متعرفيهوش أصلاً.

هزت "نور" رأسها موافقة وأضافت:
أنا كمان شايفة كده، حزنك مش لأنه
بتحبيه، لأنك ملحقتيش تحبيه أصلاً. كل

زعلك عشان صعبان عليك وحاسه
بالذنب بسبب اللي حصل لأخته.

نظرت "جيهان" إلى "بسملة" بابتسامة
مطمئنة وقالت:

-وأنت لو بتحبيه فعلاً، استتية سنة
واتنين وعشرة مش فارقة لو هو
نصيبك. لكن دلوقتي رگزي في
امتحاناتك وربنا يصبر قلبك.

تهدت "بسملة" بارتياح وقالت: الحمد
لله إنكم معايا في حياتي.

ثم نظرت إلى "نور" بجانبها وسألتها
بفضول:

-مالك يا نور؟

ضحكت "نور" بسخرية، بينما نظرت
"دعاء" إليها بامتعاض، واعتدت في
جلستها قائلة:
-أنا؟ زي الفل!

رفعت "بسملة" حاجبيها بتعجب
وسألت: -إزاي؟ مامتك اتصلت بيا وقالت
إنك اتخانقتي معاهم وجاية تنامي عندي،
وإنك متعصبة جدًا.

تهّدت "نور" وقالت ببساطة: اسمعي،
أنا سمعتكم وانتم بتتكلّموا فكلمت
"أشرف" وقابلته، وطلبت منه الطلاق،
وهددته لو مطلقتيش هرفع عليه قضية.
بعدها روجت البيت، اتخانقت معاهم،
وجيتك.

صمتت "بسملة" مذهولة، بينما أخذت
"دعاء" ترمش بعدم تصديق. أما
"جيهان"، فكانت غارقة في الضحك
بسخرية.

نظرت "دعاء" إليها بحدة وسألت: أنتِ
بتضحكي لي؟

همست "بسملة" بدهشة: يعني
هتطلقي؟

ردت "نور" بمرح: بعد الشر يا أختي!
ده تهديد بس!

سألتها "بسملة" بحيرة: أمال إزاي
بتقولي طلبتي الطلاق؟

أجابت "نور" بابتسامة مأكرة: دلع، أو
تقدري تقولي انتقام صغير منهم على
اللي عملوه.

هتفت "دعاء" بصدمة: ده بجد؟

هزّت "نور" رأسها مؤكدة: أيوة طبعا.

ده الحب كله يا أختي.

سألتها "بسملة" مازحة: نور المهدي

بتحب؟ معقول؟

ضحكت "نور" وقالت بفخر: أيوة يا

أختي! ده جوزي، قرّة عيني!

قاطعتها "بسملة" وهي تنظر إلى

"دعاء":

-خلصنا من نور، وأنتِ يا دعاء، مالك؟

تذكرت "دعاء" ما حدث، لتسقط

دموعها بحزن وهي تخبر صديقاتها

بوجع يمزقها:

-فارس بيخوني.

ساد الصمت للحظات قبل أن تظهر
الصدمة على أوجه الجميع، باستثناء
"نور" التي أشرق وجهها بسعادة كأنها
شمس بعد الغروب، لتقول متحمسة:

-بجد؟

نظرت "دعاء" إليها بغضب وأعينها
تتوهج بشرر:

- أنتِ فرحانة كدا ليه؟ هو أنا بقولك إنه
هيتكرم!

ردت "نور" بلا مبالاة: وأنا لو هيتكرم
هفرح برضه. أنا بس زعلانة عليك.

نظرت إليها "دعاء" من أعلى إلى أسفل
بازدراء، وقالت بحدة:

-كدا زعلانة؟ أمال لو فرحانة كنتِ
عملتي إيه؟

ردت "نور" بابتسامة مأكرة: بصي
الصراحة، أنا مبحبش الراجل اللي إنت
متجوزاه. عامل فيها دكتور، وهو شكله
مستفز.

ردت "دعاء" بنبرة حادة:
-نور، يا حبيبي، هو فعلاً دكتور، ولو
هو مستفز يبقى إنت إيه؟

أجابت "نور" بثقة ودلال: قمر وعسل
وقشطة وحلاوة، وتعملهم سندوتش
حكاية!

تدخلت "جيهان" بسخرية: أنا مبحبش
القشطة.

ردت "نور" بمرح: أحسن!
تنفست "دعاء" بعمق وهي تقول بنفاد
صبر:

-يارب صبرني، مش ناقصة الغباء ده.

تحدثت "نور" بجديتها المزيفة: طب يا دعاء، إيه رأيك تطلقني منه وأجوزك أخويا؟ أهو على الأقل ساعات بحبه، بس مش كثير.

نظرت "دعاء" إليها باستغراب وقالت بسخرية:

-نور، متكلميش تاني! وبعدين يا ذكية، أخوكي أصغر منك يعني أصغر مني، يعني مينفعش. يارب نفهم!

ابتسمت "نور" وقالت بلا تردد: أصل أنا مش بحب جوزك.

ردت "دعاء" بثقة: وأنا بحبه، وده مش كفاية؟

هنا تدخلت "بسملة" محاولة تهدئة الحوار الذي لن ينتهي طالما تشاركته "نور": سيبك منها، قوليلي عرفتي إزاي إنه بيخونك؟

أجابت "دعاء" بحزن عميق: رحلت له المكتب، وشوفته وهو بيحضن فيها. نظرت إليها "جيهان" بتعاطف وقالت بحذر:

- يمكن فاهمة غلط. ليه مسألتيهوش؟"

هزت "دعاء" رأسها، والدموع تتساقط من عينيها:

- مقدرتش أسنتي لحظة بعد ما شفتم. حسيت إن قلبي اتكسر. متخيلتش في حياتي إن فارس يعمل فيا كدا. هو

عارف إن حياتي كلها متعلقة بيه. إزاي
قدر يوجعني بالطريقة دي؟

«ما أصعب أن تشعر بالحزن العميق
وكأنه كامنٌ في داخلك ألم عريق، وما
أصعب أن ترى النور ظلامًا، وما أصعب
أن ترى السعادة أوهامًا، ويتحول الأمل
الباقى إلى بريق، وما أصعب أن تكون
المنبوذ من الجميع دائمًا، وتجد وجهك
بين الدموع غريق.»

انهارت "دعاء" في البكاء، ولم تستطع
السيطرة على مشاعرها. جذبتها
"بسملة" إلى أحضانها، تربت على
كتفها بحزن قائلة:

- هتعدى، أحنا معاك.

كان المنظر مؤثراً للغاية لدرجة أن
دموع "جيهان" انهمرت تأثراً بما
يحدث، بينما اكتفت "نور" بالحديث
بقوة:

-أكيد فاهمة غلط. إحنا عارفين الدكتور
فارس مستحيل يعمل كذا. ولو عمل كذا
فعلاً، يبقى تاخدي حقك منه مش تقعدي
تعطي!

ابتعدت "دعاء" عن "بسملة" ومسحت
دموعها وهي تقول بحيرة:
-طب أعمل إيه؟

ردت "نور" بمرح معتاد: تيجي معايا
بكرة نرفع عليهم قضية خلع، وهجوزك
أبويًا طالما أخويا مش عاجبك. مش إنت
دائمًا بتقوليلي "أبوك عينيه حلوة"؟

ضحكت "دعاء" رغم حزنها، وقالت
بيأس:

- أنتِ مبتكلميش جملة جد أبدًا. وبعدين،
أنا موافقة أتجوز أبوكِ عشان عنيه
الحلوة دي!

حاولت "بسملة" إعادة الأمور لنصابها:

- افتحي تلفونك، يا دعاء، وكلميه. أكيد
هيفهمك اللي حصل، لأنه مش معقول
يعمل كدا. وبعدين الوقت اتأخر، مش
هتروحي؟

أجابت "دعاء" وهي تحاول التحكم في
مشاعرها:

- لا، هنام هنا. اتصلت بـ بابا قبل ما أقفل
التلفون وقلت له إنك تعبانة، ومش
هينفع أسيبك.

تدخلت "بسملة" وهي تنظر لـ
"جيهان":

-وأنتِ يا جيهان، هتروحي ولا هتتامي
هنا؟

ردت "جيهان" بهدوء: هو المفروض
أروح، بس طالما كلكم هنا، يبقى مش
هروح. هخلي خالتي "حورية" تكلم ماما
وتقول لها إنك تعبانة وكلنا هنا.

قالت "بسملة" بتردد: بس ماما مش
هترضى تكذب.

غمزت لها "جيهان" بمرح وقالت:

-ملكيش دعوة. هقتعها.

ضحكت "دعاء" لكنها لم تستطع كبح
فضولها:

-وأنتِ يا جيهان، مالك؟

عاد الحزن ليسكن وجه "جيهان" وهي
تقول بصوت متحرج:

- بابا حدد خطوبتي أنا ومحمد بعد
يومين.

تبادلت الفتيات نظرات الصدمة، ثم قالن
جميعاً بصوت واحد:

- إيه؟!!

تحدثت "جيهان" بحزن عميق: اللي
حصل. ومش عارفة أعمل إيه.

تدخلت "بسملة" بعصبية واضحة:

- إزاي يعني يحددوا خطوبتك من واحد
مش عاوزاه؟ هو عبط؟ محدش من حقه
يختارلك، لأنك إنت اللي هتعيشي معاه
مش هما.

تهدت "جيهان" وقالت باستسلام:
عندنا مفيش حاجة اسمها تختاري.
طالما هما موافقين على الشخص، يبقى
رأيك مالوش لازمة. أنا بس كنت
محظوظة شوية لما خلوني أفكر عشان
أوافق، ولما شافوا إن رأيي زي ما هو،
قالوا خلاص زيها زي غيرها. هي مش
أحسن من بنات العيلة اللي اتجوزوا
بالطريقة دي.

ساد الصمت للحظات، فقررت "دعاء"
أن تحاول مواسة صديقتها:

-رب الخير لا يأتي إلا بالخير. يمكن
يكون اتغير وهو نصيبك، لأنك قلتي
زمان إنك كنت بتدعي يكون من نصيبك
ليل ونهار.

هزت جيهان رأسها بيأس: محمد
مستحيل يتغير. محدش يعرفه قدي. وأنا
مش عايزاه، أنا عايزة واحد حنين
يعوضني عن كل اللي عشته. مش واحد
فاكر إنه محور الكون.

علقت "نور" بمرح وهي تحاول كسر
الحزن:

-بسيطة! نطقشوا. سهلة أهي.

أيديها "بسملة" بفكرة ساخرة: معاك يا
سطا. داحنا نطقش بلد، مش حثالة زي
ابن عمك.

ضحكت "نور" وقالت بدلال: بنت!
عيب، ابن خالي ده اللي بتغلطي فيه.

ردت "بسملة" بابتسامة واسعة: أولعي
إنتِ وهو.

وضعت "نور" يدها على قلبها بمبالغة
درامية وقالت:

-حبيبتي! فكري يا بت يا 'بسوا' نعمل
معاه إيه الواد الرخم ده، عشان أنا كمان
محبوش.

ضحكت "دعاء" وهي تقول: ربنا يستر!
أنا كده هيصعب عليّ الواد من دماغكم
إنتوا.

صمتت للحظات، ثم تذكرت ما حدث في
خطبتها، وقررت للمرة الأولى أن تكون
جزءًا من خطط صديقاتها:

- أنا كمان هفكر معاكم نخرب خطوبتها
إزاي. على الأقل آخد جزء من حقي من
اللي اتعمل فيا يوم خطوبتي.

أشارت لهن مازحة: وانتوا دوركم جاي على فكرة.

ضحكت "نور" وقالت بثقة: ياختي اتيلي! أنا هكون معاكم يوم خطوبتي نفكر ننتقم من أشرف إزاي.

علقت "جيهان" بمزاح: يعني هنتوقع منك إيه مثلاً؟ تقعدني في الكوشة عاقلة؟ مستحيل!

ردت "نور" بمرح: طبعاً يا أختي، دي فيها كلام!

نظرت "بسمة" إلى "دعاء" بعدم فهم، فبادلتها دعاء النظرة، ثم قالت بشك وهي تنظر للجميع:

-إنتوا كنتم متخصصين ولا أنا كان بيتهالي؟

اعتدلت "نور" في جلستها ونظرت إلى "جيهان" التي اعتدلت بدورها، لتتبادلا النظرات. ثم فجأة، انطلقت منهما ضحكات ملأت المكان.

جمع أغراضه بعناية في حقيبة سفره، ثم توقف للحظة يتأمل غرفته التي عاش فيها طفولته وشبابه. كانت عيناه مليئتين بالحزن، لكنه لم يستطع مواجهة شقيقه لإخباره أنه سيغادر البلاد. لذا، اختار ترك رسالة وداع على الفراش، كلمات قليلة كافية لتشرح ما لم يتمكن من البوح به وجهاً لوجه.

رغم قراره بالرحيل، لم يستطع منع نفسه من رؤية شقيقته الحبيبة للمرة

الأخيرة. حمل حقيبته بصمت وتركها
أمام غرفتها، ثم ولج بهدوء. كانت
تغرق في نوم عميق بفعل الأدوية التي
تناولتها لتسكين آلامها.

اقترب بخطوات حذرة حتى وقف على
مسافة صغيرة منها. همس بصوت مفعم
بالندم والاعتذار:

-أنا آسف يا حبيبتى... حقك عليا.
سامحيني... اللي حصلك كان بسببي.

ثم انحنى ببطء وقبّل جبينها وكأنه يعتذر
بكل خلية في جسده. وقف للحظة، يأخذ
نفسًا عميقًا، ثم استدار بخطوات ثقيلة.
لم يكن يغادر الغرفة فقط، بل كان يغادر
المنزل، والقرية، والمدينة... بل الوطن
بأكمله.

وداع الوطن...

ها هو الآن يجلس على متن الطائرة،
ينظر عبر النافذة بحزن عميق. بدا
المشهد من الأعلى وكأن وطنه كله
يتلاشى ببطء. هو يعلم في قرارة نفسه
أنه شخص عابث، لم يعرف يوماً قيمة
دينه كما يجب، رغم نشأته في منزل كان
يعج بالدفء والإيمان.

كان صوت والدته الحبيبة وهي تتلو
القرآن كل صباح من أروع ما يوقظه من
نومه، وصوت والده الحازم يحثهم على
قراءة الأذكار لحفظهم من كل سوء. لم
ينسَ كيف كان والده يوقظهم قبل الفجر
رغم تدمره المستمر ليأخذهم للصلاة في
المسجد القريب.

كان والده يملك قاعدة واضحة: العيب مسموح، لكن الصلاة خط أحمر لا يتجاوز.

تذكر عمته الحنونة التي كانت تراه أكثر من مجرد ابن أخ، كان تعتبره طفلها وتدافع عنه دائماً، حتى في أخطائه. وتذكر زوجة أخيه المشاكسة التي لم تتوقف يوماً عن إزعاجه، لكنها كانت تضيف المرح إلى حياته.

أما شقيقته الخجولة، فكانت قلب العائلة. كانت تخجل حتى من إطراء والدها على جمالها وبرائتها. الآن، وهو ينظر عبر نافذة الطائرة، يدرك أنها ستفقد تلك البراءة وستتغير بسبب ما حدث لها.

كان يترك كل ذلك خلفه: العائلة، الدفء،
الذكريات، وكل ما جعله يعشق وطنه.
رغم كل أخطائه وعثراته، لم يتمنَّ يوماً
مغادرة هذا المكان الذي يسكن قلبه.

همس بصوت متهدج وهو ينظر إلى
الأفق البعيد:

- "وللقدر رأياً آخر."

الفصل الواحد والعشرون

ماذا لو أنك أعتقت من النار في رمضان
وأنت الآن تمشي على الأرض وأن
اسمك أُدرج في سجلات أهل الجنة ..
اللهم اجعلنا منهم يا رب العالمين.

"أشرق شمس الحياة" تعلن عن يوم
جديد مليء بالفرص وأحلام لم تكتمل
بعد. نهضت "نور" بنشاط بعد ليلة
ممتعة قضتها مع أصدقائها، مزيج من
البكاء والمرح والجنون ملاً تلك
الساعات. توجهت إلى المرحاض لتغتسل
وتؤدي صلاتها، ثم قررت أن تضع حدًا
لكسل صديقاتها اللواتي أرهقن المنبه
دون أن يرهقهن النوم.

دخلت الغرفة حيث يعم السكون، لتتظر
إليهن بنظرة ساخرة قبل أن تصيح
بصوت عالٍ:

- يا حجة! أنتِ وهي، قومي ياختي،
اتأخرنا! المنبه تعب منكم، وإنتوا لسه
نايمين!

ردت "بسملة" وهي مغمضة عينيها
وتتطق بنبرة نعسة:

- اظفي النور، يا نور، وامشي.

ثم جذبت الغطاء على وجهها بإصرار؛
لم تستسلم "نور" بسهولة، فبدأت تجذب
الغطاء بقوة عنهن وهي تهدد بمرح:

- قومي ياختي، وإلا والله هص بحكم
بحاجة مش هتعجبكم!

ردت "دعاء" وهي تغلق عينيها وتحاول
استعادة الغطاء بيدها:

-نور، امشي الله يحفظك، عايزة أنام.
وبعدين إحنا عندنا محاضرة الساعة
عشرة، مش دلوقتي. يلا، امشي.

أيديتها "بسملة" بنبرة كسولة: ماما أكيد
جهزت الفطار، روعي افطري معاها
وقولي لها متصحيناش.

تتهدت "نور" بحدة وقالت بإصرار: يلا
يا اندال، أنا بحضر معكم على طول.
تعالوا معايا النهاردة، مش عايزة أروح
لوحدي.

ردت "دعاء" بضحكة خافتة: والله إنت
بتحضري غصب عننا، وكل مرة
بتحضري بنطرد شر طردة.

نفخت "نور" بضيق وقالت بتهكم:

-واطين!

أما "بسملة" فقالت وهي تلف نفسها

بالغطاء:

-من بعد ما عندكم، اظفي النور بقى!

ارتدت "نور" حجابها وغادرت الغرفة

دون أن تغلق الإضاءة، وهي تسب

وتلعن فيهم بخفة، متوجهة إلى المطبخ

حيث كانت "حورية" تقف تعد الفطور.

ابتسمت "نور" واقتربت منها قائلة

بحماس:

- صباح الخير يا حوريتي!

استدارت "حورية" إليها وابتسمت

بلطف:

-صباح النور يا نور. كنت لسة جاية
أصحيكم.

ردت "نور" بمرح: خليه نايمين. لسة
بدري على محاضرتهم. أنا بس عندي
سكشن بدري. الله يسامح الدكتور، ولا
لأ؟ حسبي الله فيه! واحد يصحى الساعة
سته عشان ينكد على أهلي!

ضحكت "حورية" وهي تضع طبقاً
أمامها:

-يا بنت عيب، ده الدكتور! يلا، افطري
بسرعة.

جلست "نور" تتناول الفطور معها، ثم
غادرت سريعاً حتى لا تتأخر.

سارت بتأفف صوب موقف السرفيس،
تأمل الطريق بملل، لتجد سيارة تقف

أمامها مباشرة. خفض السائق نافذته
وقال بصوت هادئ ولكن صارم:
-اركبي.

نظرت "نور" إليه بسخرية وقالت بحدة:
-نعم يا عسل؟

رد "أشرف" بنبرة أمرية: اخلصي يا
نور، واركبي.

بدت غير مبالية وواصلت السير بعيداً
عنه، غير مكترثة بما يقول. لكنه لم
يسمح لها بالمضي أكثر، إذ هبط من
السيارة ولحق بها. جذبها من ذراعها
بقوة، وبدأ يسير بها نحو السيارة دون
أن يمنحها فرصة للاعتراض.

حاولت "نور" الإفلات وهي تصيح
بغضب مصطنع:

-إيه ده! إنت بتعمل إيه؟ سييني!

لكن "أشرف" تجاهل كلماتها تمامًا،
أجلسها في السيارة وأغلق الباب خلفها
بحزم. تحرك نحو الجهة الأخرى، صعد
إلى السيارة، وأدار المحرك، كل هذا
وهو صامت تمامًا.

جلست "نور" على المقعد بجانبه، تنظر
من نافذة السيارة وهي تنفخ بغضب،
لكنها كانت تخفي ابتسامة صغيرة تتسلل
إلى وجهها. شعرت بسعادة خفية، لكنها
استمرت في تمثيل الغضب وهي تقول
بحدة مصطنعة:

-إنتَ فاكِر نفسك مين؟!!

في غرفة "بسملة"...

في جو هادئ من الصباح الباكر، صدح
رنين هاتف "جيهان"، الذي كانت تعانقه
وكأنه قطعة لا تُفارقها حتى وهي نائمة.
أما "نور"، فكانت تحتضن هاتفها وكأنه
كنز غالي استُرد بعد طول غياب. على
النقيض، وضعت "بسملة" و"دعاء"
هواتفهما بلا مبالاة على الكمود بجانب
سريريهما.

"جيهان"، بدافع العادة، فتحت الاتصال
دون أن تنظر إلى هوية المتصل، وردت
بنبرة مثقلة بالنوم:

-السلام عليكم.

أتى صوت رجولي قوي بعد ثوانٍ، مليء
بالاستغراب:

-الحج اسمعين معايا؟

نظرت "جيهان" إلى الهاتف بعينين
نصف مفتوحتين، لتكتشف أن الرقم غير
مسجل. نهضت وجلست وهي تقول
بضيق:

- أول حاجة، اسمه "إسماعيل" باللام
مش "اسمعين"، وتاني حاجة
"إسماعيل" ده ذاته لما أبوه نوى
يذبحه، ما صحهوش الساعة ستة
الصبح! وبعدين، يا أستاذ، في حد يرن
على حد في وقت زي ده؟ إيه، رايح
تبيع لبن؟

رد الرجل مرة أخرى، بنبرة أكثر قوة:

-يعني "اسمعين" معايا؟

تهادت "جيهان" بعمق، وهي تفرك
عينها:

- لا، يا حج، مش "اسمعين". الرقم غلط.

ثم أغلقت الهاتف دون انتظار رده.

وضعت الهاتف بجانبها وهي تتأفف، لتلتفت وتجد "دعاء" تنهض من سريرها بملل وتقول:

- هو محدش هينام في البيت ده؟ أنا

هروح بيتي، يا عم!

ردت "بسملة" بصوت مكتوم من تحت الغطاء:

- مش قولتي مش هتروحي؟

قالت "دعاء": آه، بس بما إني مش عارفة أنام، هروح أشوف إيه الأخبار في البيت، وأغير هدومي، ونتقابل واحنا طالعين.

ردت "بسملة" بخفوت: خلاص ماشي.
بس متتأخريش، عشان معيش رصيد
أرن عليك. وأنتِ يا "جيهان"، هتروحي
ولا إيه؟

عادت "جيهان" للاسـتلقاء وغطت
نفسها وهي ترد بكسل:

-لا، أنا مشواري بعيد؛ ألبس حاجة من
عندك، زي ما "نور" عملت.

انتفضت "بسملة" فجأة، ورفعت الغطاء
عن وجهها، تتساءل بدهشة:

-هي "نور" فتحت دولابي من غير
إذني؟!!

هزّت "دعاء" رأسها بالإيجاب قبل أن
تتجه إلى المرحاض، بينما قالت
"بسملة" بحنق:

-ماشي يا "نور"، وتقولِي أنا ألبس من
عامّة الشعب؟ أهَي لبست يعني! والله
لذلك على كلام امبارح لشهرين قدام.
" ذكرى الأمس "

تذكرت "بسملة" ما حدث بالأمس،
حينما اقترحت على صديقاتها أن يرتدين
من ثيابها قبل الذهاب إلى الجامعة. كان
رد "نور" صادمًا ومزاحها جارحًا:

"أنا ألبس من عامّة الشعب؟ زيكم؟ لا،
يا "بسملة"، شكرًا. أفضل ألبس هدموم
متسخة ولا ألبس منك!"

لم يفت هذا المزاح "بسملة"، لكنها لم
ترد وقتها.

"عودة للواقع"

عاد وعي "بسملة" إلى الحاضر على
صوت "دعاء" وهي تقول بحزم: يلا،
أنا ماشية. متأخريش على المعاد.
ردت "بسملة": ماشي، سلام.

غادرت "دعاء"، بينما تمددت "بسملة"
على سريرها، وعقلها مشغول بخطط
الرد على "نور" بطريقة تجعلها تندم
على كل كلمة قالتها بالأمس.

في الخارج، كان "فارس" يقف خارج
سيارته، وجهه متجهم، والغضب يعصف
بملامحه. لم يتمكن من النوم طوال
الليل؛ فالقلق والحزن الذي يعتريها كان
بسببه، ولم يستطع التواصل معها لأن
هاتفها كان مغلقاً. لم يُرد أن يخبر والدها

بما حدث، فهو يكره تدخل الآخرين في حياتهم؛ لذلك استيقظ باكراً وقرر الذهاب إلى منزلها.

عندما وصل، استقبله والدها بابتسامة ودودة، وأخبره أن "دعاء" تقضي الليلة في منزل صديقتها. شعر "فارس" بالإحراج من وجوده في هذا الوقت المبكر، لكنه أخفى انزعاجه بابتسامة مصطنعة. شكر والدها وغادر المنزل، لكن عقله لم يسمح له بالعودة. لم يستطع الابتعاد عنها أو حتى البقاء بعيداً عن القرية.

وقف أمام منزل "بسملة" ينتظرها. قرر أنه لن يذهب قبل أن يراها، وقلبه يشتعل شوقاً وقلقاً. لم يستغرق الأمر طويلاً

حتى رأى "دعاء" تخطو بهدوء من باب المنزل، كعادتها التي تأسره دائماً. بمجرد أن رآته، اتسعت عيناها بتعجب. وقفت للحظة، تتساءل عن سبب وجوده في هذا الوقت. لم يمنحها فرصة للكلام، بل أشار بيده نحو السيارة، ثم تحرك بثقة نحوها.

ترددت قليلاً، ثم تبعته بخطوات ثابتة. صعدت إلى السيارة وجلست بجواره، لتتفاجأ بأنه انطلق بها بسرعة جنونية.

تمسكت "دعاء" بحزام الأمان بكل قوتها، ونظقت بصوت مرتجف مليء بالخوف:

-فارس، بالله عليك سوق بالراحة! أنا خائفة.

ألقى "فارس" نظرة خاطفة عليها، لكن ملامحه لم تُظهر شيئاً سوى التصميم. حاول أن يتماسك، لكنه قال بصوت منخفض مليء بالغضب:

-وأنا كمان خايف، يا "دعاء". خايف عليك، خايف من الفكرة إنك تبعدي عني، حتى لو ليلة واحدة.

نظرت إليه "دعاء" بدهشة، لكنها لم تستطع الرد. اكتفت بالصمت، وعيناها تراقب طريقه، بينما قلبها ينبض بقوة بين خوفها من السرعة وارتباكها من كلماته.

خفض "فارس" سرعته تدريجياً، ثم توقف على جانب الطريق. وضع يديه على المقود وشهق بعمق، وكأنه يحاول

كتم مشاعره. استدار إليها أخيراً، وقال
بصوت خافت:

-مش هقدر يا "دعاء". مش هقدر
أعيش يوم وأنا مش عارف أنتِ كويسة
ولا لا. متعمليش فيا كده تاني.

أرادت "دعاء" الرد، لكنها شعرت أن
الكلمات خانتها. اكتفت بالنظر إليه
بعينين مليئتين بالدموع، بينما ارتسمت
على شفثيها ابتسامة صغيرة تخفف من
توتر اللحظة.

وقف "أشرف" بسيارته أمام إحدى
البنائيات، ينظر إلى "نور" بابتسامة
مُربكة، قبل أن يشير لها بيده ويقول:
-يلا انزلي.

لكن "نور" لم تكن سهلة، فصاحت فيه
بغضب: لا يا باشا! فاكرني من البنات
اللي بيضحك عليهم، وتقولها:

- "أمي تعبانة، تعالي شوفيها"، وبعدين
تسقينني حاجة صفراء وتستفرد بيا؟!
نظر إليها "أشرف" بصدمة ممزوجة
بالاستغراب، وقال:

-إيه الفيلم الهندي ده؟! أنا قتلتك أمي
تعبانة؟! أنا بقولك نزل وناكلم فوق
شوية.

قاطعت حديثه بحدة، وكأنها لم تسمعه:

-عشان تستفرد بيا، صح؟!!

تنفس "أشرف" بعمق محاولاً التماسك،
ثم قال:

-استغفر الله العظيم، يا بنتي استفرد

بيكي إيه؟! أنتِ مراتي!

ضحكت "نور" بسخرية: عارفة أنا

الحركات دي، يا بنت أنتِ مراتي، ومش

عارفة إيه. تضحك عليا لحد ما أطلع

معاك، صح؟!!

ثم صاحت بعصبية أشد: مش "نور

المهدي" اللي حد يضحك عليها، يا باشا!

توقف "أشرف" عن مجادلتها، ونظر

إليها بثقة وهو يقول:

-بس "نور المهدي" فعلاً مراتي، ولا إيه؟

شعرت "نور" بالتوتر من نظرتة

المباشرة، وأخذت تتحاشى النظر إليه.

همست لنفسها بصوت خافت، لكنه كان

واضحًا بما يكفي لسمعه:

- أيوة، صح... أنا مراته.

ابتسم "أشرف" بخبث وقال: شفتي؟!!

انتفضت من شرودها وقالت: بس أنا
مش هطلع معاك. مضمنكش.

رد عليها بابتسامة مأكرة: ليه يا وزه؟
وبعدين، متقلقيش، أنا مكلّم أبوكي
وعارف أنك معايا.

وأضاف بسخرية: ومش هسقيكي حاجة
صفراء، ولا حمراء حتى.

ردت "نور" بضيق: لا صفراء ولا
حمرا. أنا مش هشرب من عندك حاجة!

نظر لها وهو يحاول كتم ضحكته:
حاضر، في أي أوامر تاني؟ استتيني هنا
دقيقة، هروح أجيب حاجة من السوبر
ماركت عشان تطمني.

قالت بتحدٍ: وإيه يضملي إنك متحطش
في اللي تجيبه حاجة؟!!

انفجر "أشرف" بعصبية: يا بنتي، أنتِ
غاوية تعصبيني وخلص! هو أنا جايبك
من الشارع؟! بقولك: أنتِ مراتي! إيه
مش بتفهمي?!!

صاحت فيه بغضب: حافظ على كلامك يا
باشا، وبعدين كفاية بقى "أنتِ مراتي،
أنتِ مراتي"! خلاص عرفنا إنك زفتتي.
ويومين وهبقي ظليقتك، يا رب نخلص.

بعد دقائق، كان "أشرف" يقف أمام شقة
بالبطاق السادس. فتح الباب ونظر إلى
"نور"، التي كانت تتنفس بصعوبة
بسبب صعودها الدرج. ابتسم بتشفي
وقال:

-تسـتاهلي. قولتلك تعالي نطلع
بالأسانسير، مردتيش.

نظرت له بحنق وقالت: أيوة، مدخلش
الأسانسير مع حد غريب.

رد عليها بسخرية وهو يفتح الباب:
طيب، يلا ادخلي.

خطت "نور" إلى الداخل بحذر. بمجرد
أن أغلق "أشرف" الباب خلفها، صاحت
به بفرع:

-متقفلش الباب!

تجاهلها تمامًا، وتوجه للجلوس على
أحد المقاعد. أشار لها بالجلوس وقال
بهدوء:

-تعالي، يا "نور". اقعدي. عايز أتكلم
معكي.

جلست أمامه بتوتر واضح. بدأ حديثه
بلهجة جادة:

-اسألني يا "نور" اللي أنت عايزاه، وأنا
هرد عليك. وسيبك من حوار الطلاق
والكلام الفاضي، لأنني مش متجوزك
عشان أطلقك. صمتت "نور" لدقائق،
وكان يحترم صمتها حتى قالت أخيرًا
بصوت خافت وهي تنظر إليه:

-اتجوزتني ليه؟ وسيبك من حكاية:
'عشان أحملك'. أنت كنت مسافر، وواحد
من رجالتك هو اللي كان بيراقبني، يعني
مش أنت.

ابتسم "أشرف" وسألها بهدوء: تفتكري
أنا اتجوزتك ليه؟

تتهددت بضيق وقالت: متجاوبش سؤال
بسؤال.

نظر لها بحب وقال ببساطة: عشان
بحبك، يا "نوري".

خفق قلبها من صراحته، لكنها قالت
مرتبكة:

-مش فاهمة.

رد عليها بابتسامة: إيه اللي مش
فاهمة؟

قالت بتردد: حبيتي إمتى؟ ولو بتحبني
ليه ما تقدمتليش عادي زي أي حد؟

صمت "أشرف" قليلاً قبل أن يعترف
بجزء من الحقيقة:

-من أول لحظة شفتك فيها. كنت
عجباني، لكن ماكنتش جاهز أفكر في

الارتباط؛ لأن الشغل وموازن كانوا
واخذين كل وقتي. ولما حصل موضوع
الدكتور، لقيتها فرصة إنك تكوني ليا.
تجنب النظر إليها ثم أضاف بصوت
هادئ:

- وخصوصًا بعد ما استفزتيني في
المستشفى باللبس اللي كنتي لابساه.
وقتها قررت إنني أتجوزك.
حاولت "نور" أن تخفي توترها، لكنها
لم تستطع منع الدموع من ملء عينيها.
سألها بخوف:
- بتعيطي ليه؟

بدأت تبكي بصوت مرتفع وهي تقول:
- حرام عليكم. ظلمتوني! كان نفسي
أفرح زي أي حد. يبجي شخص

يخطبني، وأفكر أوافق ولا لا. لكن أنتم
فرضتوا كل حاجة عليا!

اقترب منها "أشرف" بسرعة، وجذبها
إلى حضنه بحنان، وهمس بصوت
خافت:

-يعني أنتِ مش عايزاني، يا "نوري"؟
تشبثت به بقوة دون أن تجيب. ابتسم
وهو يشعر أنها تريده وقال بحب:

-حقك عليا يا روعي. أنا آسف. ماكنتش
أعرف إنك زعلانة كده.

ابتعدت عنه بخجل وهمست: روحك؟
ابتسم "أشرف" وقال بثقة: أيوة، طبعًا
روحي. عندك مانع؟

ضحكت بخفة وقالت:
-عايزاك تجيبلي حوشي.

نظر لها بدهشة وقال: عايزاها إيه؟!!

ردت بمرح: حوشي!

مسح وجهه بإحباط وقال: أبو شكك،

فصلتيني!

ضحكت بمشاكسة وقالت: ليه، أنت فون

عشان أفصلك؟

نظر إليها بضيق وقال: بس يا 'وزه'

اسكتي. كلامك بيعصبي.

ناولها الحقيبة التي أحضرها من

الماركت وقال:

-اتفضلي.

أخذتها منه وبدأت تتناول محتوياتها

بدون أي اكتراث. ضحك وقال:

-مش خايفة أكون حاطط حاجة فيها؟

ابتسمت وهي تتذكر ما قالت له سابقًا،
وضحكت. أما هو، فنظر إليها بحب
وابتسامة هادئة، بينما قلبه يرفرف
كالعصفور.

ارتبكت "دعاء" وأبعدت جسدها عن
قربه بعدما التصقت به دون وعي، ظل
يقود بهدوء حتى وصل إلى أحد المطاعم
القريبة من الجامعة. أوقف السيارة
وترجل منها، فتبعته "دعاء" بخطوات
مترددة. دخلا معًا إلى المطعم وجلسا
على طاولة في زاوية هادئة. طلب
"فارس" الطعام، ومرت دقائق من
الصمت الثقيل بينهما.

قطع "فارس" هذا الصمت وهو ينظر
إليها بملامح حازمة:

-مش هحاسبك على أنك نمتي بره البيت
من غير إذني؛ حتى لو زعانة مني،
كان ممكن تبعيلي رسالة وتقفلي
التليفون بدل ما تسيبيني مش عارف
أنتي فين.

رفعت "دعاء" رأسها بخجل، تدرك أنها
أخطأت. حقه كزوجها أن يعلم أين كانت.
لكنها لم تجد الكلمات للدفاع عن نفسها.

تابع "فارس" بنبرة صارمة: بس
هحاسبك على شكك فيا.

شعرت "دعاء" بالتوتر، خاصة مع
نظراته الغاضبة، لترد بضيق:

- هو أنت زعلان ليه؟ مش المفروض أنا
اللي أزعل؟

نظر إليها "فارس" بجديّة، ثم رد بنبرة
جافة:

- والله؟

صرخت "دعاء" فجأة وهي تشعر بغيرة
وحزن يخنقانها:

- والله، أنا مش شفتك بعنيا وأنت
بتحضنها؟ أيه، كنت بحلم؟

زجرها "فارس" بحدة وهو ينظر حوله
محاولاً تهدئة الأجواء:

- وطي صوتك!

وضعت "دعاء" يدها على وجهها،
وأجهشت بالبكاء بصوت مكتوم. همست
من بين شهقاتها:

-كنت فاكرة أنك بتحبني...

بدا الحزن واضحا على وجه "فارس"

وهو يرد بصوت هادئ:

-وظلعت أيه؟ أنا اللي كنت فاكرا أن

عندك ثقة فيا.

نظرت إليه بدهشة وقالت: يعني إيه؟

تتهد "فارس" قليلا ثم تابع: يعني هكلم

عمي مصطفى...

قاطعت "دعاء" حديثه وهي تصيح

بخوف:

-هتطلقتي؟!!

ابتسم "فارس" بحب وهو ينظر إلى

عينيها المليئين بالخوف، مستمتعا بردة

فعلها:

-مقدرش يا حبيبتى. حياتي كلها متعلقة
بيك؛ لأنك كل حياتي.

ابتسمت له بتأثر، لكن "فارس" لم يكن
لينسى غضبها بسهولة، فأكمل جملته
السابقة بهدوء:

-هكلمه عشان أستاذن منه أجي عندكم
في الليل وأعرفك عليها، عشان بس
تأكدني أنك غلطتي، وبعدين نتحاسب.

شعرت "دعاء" بغيرة تتصاعد في قلبها
وهي تقول بغضب:

- أيًا كانت هي مين، مش من حقها أنها
تقرب منك كده!

رد "فارس" بمكر: لا يا حبيبتى، من
حقها، أمال من حق مين؟

اشتعلت عينا "دعاء" بالغضب، وقالت
بصوت عالٍ دون أن تهتم بمن حولها:

-حقي أنا! مش من حق أي حد يلمسك
أو يقرب منك غيري!

تفاجأ "فارس" من ردها المباشر، لكنه
ابتسم بحب وسألها بمرح:

-ومين عطاك الحق ده؟

أشارت "دعاء" إلى الدبلة التي ترتديها
وقالت بثقة:

-دي يا حبيبي.

ضحك "فارس" من عبارتها الأخيرة
التي أثارت مشاعره، ثم قال وهو يعبث
بهاتفه:

-أنا هتصل بـ'منوش' أشوفها فين.

نظرت "دعاء" إليه باستغراب وسألت:

-مين 'منوش' دي؟ وليه؟

رد "فارس" ببرود:

-عشان أحضنها تاني، هي السبب في

أنك تقوليلي يا حبيبي لأول مرة.

صرخت "دعاء" بغضب: فارس،

متعصبينش! مين الزفتة دي؟!

قال "فارس" بنبرة مصطنعة الجدية:

-دعاء، عيب تغلطي فيها. وبعدين لما

تعرفيها، هتعرفي أنك غلطانة.

تمتت "دعاء" بضيق وهي تنظر بعيدًا:

-غلطانة وزفت، لما نشوف آخرتها.

حاول "فارس" كتم ضحكته، لكنه تابع

بنبرة هادئة:

-يلا ناكل، الأكل برد"

تناولت "دعاء" الطعام بصمت، لكن عقلها كان مشغولاً بكل ما قاله "فارس". عندما انتهت، قالت بهدوء:

- فارس... أنت ممكن تخوني؟

رفع "فارس" حاجبه بدهشة وقال:

-تفتكري؟

ترددت "دعاء"، لكنها قالت بنبرة متحفظة:

-معرفش... بس كل الرجالة بتخون.

ضحك "فارس" ساخرًا وقال: اللي بيخون اسمه ذكر، مش راجل. الراجل ميخونش.

شعرت "دعاء" بالخرج، لكنها لم تستسلم، وقالت: نزار قباني قال: "أنا

وكل الرجال خائنون. ' وكم ان آجاثا
كريستي قالت:

- 'ان تهجري رجلاً لأنه يكذب، هو
بمثابة مغادرة وطنك لأنها تمطر. أين
تذهبين؟ إنها تمطر في جميع الأوطان.'
ثم نظرت له بثقة وهي تقول: يعني كلكم
كذابين وخائنين.

نظر "فارس" إليها بدهشة وقال: من
إمتى وأنتِ مثقفة يا حبيبتى؟
نفت "دعاء" بتوتر وقالت: ولا مثقفة
ولا نيئة، بس 'نور' كل شوية تقول
اقتباس جديد.

ضحك "فارس" وقال مماًزحاً:

-طيب أنا هرد عليكِ. دوستويفسكي قال
لحبيبتة: 'في الشارع الذي تقيمين فيه

تسع نساء أجمل منك، وأخرى تحبني
أكثر مما تفعلين، وفي العمل هناك امرأة
تبتسم لي دائماً، والنادلة في المطعم
تضع لي عسلاً بدلاً من السكر. ولكنني
أحبك أنتِ!

صمت لحظة قبل أن يكمل بحب: لكنني
أحبك أنتِ.

ردت "دعاء" بضيق بعدما تذكرت حديث
"نور" السابق عن هذا دوستويفسكي
المخلص:

-وأنت مصدق الكلام ده؟ ده بيقولك
تسعة أحلى منها! أمال لو خانها كان
عمل إيه؟

تتهد "فارس" بيأس وهو يتمتم: لا
تعليق.

تناولت "دعاء" الطعام بصمت، لكنه ظل
ينظر إليها بحب، يهمس لها بعبارات
بسيطة جعلت قلبها يخفق من جديد.

في منزل تامر...

كانت أجواء المنزل هادئة إلا من أصوات
خطواتهم التي قطعت هذا الصمت،
وقالت "عايدة" بضيق وهي تنظر إلى
"سلمى":

-دلو وقتي أول ما ندخل، هيقلقوا
وهيفتكموا إن في حاجة.

ردت "سلمى" وهي تدير المفتاح في
باب المنزل:

-ليه بس يا خالتو؟ النهارده من بكرة
مش حاجة.

ثم أضافت بمشاكسة وهي تبتسم بخفة:

-ولا أنتِ عاجبك وجودك مع عمو
لوحدكم؟

ضحك "حسني" بخفة وقال: خلاص يا
أم كريم، وصلنا أهو. وهي خلصت
شغلها، هنقعد ليه؟

ردت "عايدة": لسه باقي يوم.

فتحت "سلمى" الباب ودخلت المنزل
أولاً، تسحب الحقيبة خلفها وتتنظر بلهفة
في أرجاء المكان وكأنها تبحث عن
شيء. لم تمضِ إلا لحظات حتى وجدته
يهبط الدرج... "كريم"، بهيئته المعتادة،
ولكن وجهه؟ كان شاحباً وكأنه لم ينم

منذ أيام، أو كأن هموم الكون تثقل
كاهله.

شعرت "سلمى" بالذنب فجأة، همومه
وحده بينما هي غارقة في عملها! دون
تفكير، ركضت نحوه بلهفة، ثم ارتمت
في حضنه تربت عليه بحنو كما لو كان
طفلاً صغيراً.

تفاجأ "كريم" من وجودهم في هذا
الوقت، وأكثر من عناقها أمام الملائ. هي
التي دائماً ما تخجل من إظهار
مشاعرها. لكنه لم يستطع إخفاء
سعادته، وابتسم بحب وهو يطبع قبلة
خفيفة على جبينها. أبعدها برفق وقال:

-مش قولتي معاد الطيارة بكرة؟

أرادت أن ترد، لكن صوت "عايدة" قطع حديثهما وهي تقول بخبت:

-لوقتي عرفنا مستعجلة ليه على الرجوع.

تراجعت "سلمى" بخجل لتقف خلف "كريم"، الذي ابتسم بخفة على خجلها المبالغ فيه، ثم قال:

-حمد لله على سلامتكم.

رد "حسني": الله يسلمك.

قالت "عايدة" بابتسامة: الله يسلمك يا حبيبي. إخوانك نايمين؟

أجاب "كريم" بارتباك: آه يا ماما. حتى إيمان جهزت الفطار وقالت إنها هتروح تنام.

قال "حسني" بهدوء: تعالي يا أم كريم،
نرتاح شوية ونشوفهم على الغداء.

غادرا إلى غرفتهما، بينما بقي "كريم
وسلمى". نظرت "سلمى" إليه بقلق
وسألته:

-في إيه يا كريم؟ مالك؟

اقترب "كريم" منها وجذبها برفق وهو
يقول:

-مفيش حاجة يا حبيبتى. اطلعي ارتاحي
شوية. أكيد تعبانة من السفر.

ازدادت ملامح القلق على وجهها وقالت
بجدية:

-مش هطلع غير لما أعرف مالك.

تنهد "كريم" بحزن، أمسك بيدها
وسحب الحقيبة بيده الأخرى وقال:

-طيب، تعالي فوق، هقولك.

صعدت معه باستسلام، تعلم أن ما سيخبرها به لن يكون سهلاً. ولما دخلا الغرفة، وقفت أمامه وسألته بحنان:

-ها... مالك يا حبيبي؟

كانت نبرتها كفيلة بأن تُسقط قناع الثبات عن "كريم"، فانفجر باكياً فجأة. جذبها إلى عناق ساحق، بكى كطفل صغير، وكان هذا الحزن هو ملاذه الوحيد.

بكى على شقيقته "ديالا"، وعلى شقيقه الذي يلوم نفسه على ما حدث، وبكى خوفاً على والدته التي تعلم أنها لن تتحمل الحقيقة.

في المقابل، بكت "سلمى" على بكائه، قلبها يتألم عليه دون أن تعلم بعد ما

الذي حدث. حاولت الابتعاد عنه قليلاً، لكنه تشبث بها كالطفل الذي يخشى فقدان أمه. دفعت جسده برفق لتجلسه على الفراش، لكنها لم تتركه، ظل يحتضنها وكأنها طوق النجاة.

أبعدته "سلمى" قليلاً، وضمت وجهه بين كفيها وقالت بصوت متحشرج بالبكاء:

-أنا آسفة.. والله آسفة. كريم... حقا عليّ. والله مش هبعد عنك تاني، ولا هروح مكان من غيرك. بس بالله عليك، متوجعش قلبي أكثر من كده. وقولي مالك، عشان خاطري.

أحست بالعجز، فعدم معرفتها بما يجري يزيد من ألمها. هداً "كريم" قليلاً عندما

رأى دموعها، وجذبها إلى حضنه مجدداً
وقال بهدوء:

-هقولك، بس بالله عليك تهدي. مش
هتحمل أشوفك زعلانة.

قالت بصوت متهدج: طيب، قول عشان
خاطري.

حاولت أن تبتعد مرة أخرى، لكنه رفض،
وقال بصوت مكسور:

-ديالاً... اتعرضت لغت. ص. اب من
يومين.

وقعت كلماته كالصاعقة عليها. تجمدت
في مكانها، صدمت، عقلها يرفض
التصديق. ردت بعصبية وهي تهز
رأسها:

-مستحيل... لا، لا، أنت بتهزر، صح؟
لكن صمته أكد لها الحقيقة. عادت تعانقه
وهي تكتم بكاءها، لا تريد أن تزيد ألمه.
شعرت فجأة بثقل همّاه، وأدركت حجم
المعاناة التي مرّ بها في غيابها.

كان "كريم" يحتضنها بشدة، وكأنها
الملاذ الذي يخفف من آلامه. تتم
بشروء:

-ريحتك حلوة أوي.

ابتسمت رغم دموعها. كان دائماً يقول
ذلك لها، رغم أنها لم تضع عطرًا.
بالنسبة له، رائحتها تشبه المسك، أروع
من أي شيء آخر.

وفجأة، قطع صوتهما المتهدج صوت
والدته وهي تصرخ باسم شقيقته:

- ديالالا!!!

انتفض "كريم" من مكانه، وركض
خارج الغرفة بخوف، يعلم أن شيئاً قد
حدث. وجد والدته ممددة على الأرض
وقد فقدت الوعي.

الفصل الثاني والعشرون

"ليجمع الله بينك وبين مرادك كما جمع
موسى بحضن أمه، وجمع يعقوب
بيوسف بحق قوله..

"وَهُوَ عَلَى جَمْعِهِمْ إِذَا يَشَاءُ قَدِيرٌ"

ولج "كريم" إلى الغرفة، ووقف مذهولاً
للحظة عندما رأى والدته تفتش
الأرض. هرول سريعاً نحوها، رفعها
برفق وأسندها على الفراش بجوار
"ديالا" التي كانت ما زالت تغط في نوم
عميق، غير شاعرة بأي شيء بسبب
تأثير العلاج.

التفت "كريم" بقلق إلى "إيمان" التي
كانت تجلس على الأرض باكية، وسألها

بخوف، وهو يخشى أن تكون قد أخبرتها
بما حدث:

-مال ماما يا عمتو؟

بكت "إيمان" وهي تجيب بصوت
متقطع:

-كانت بتحاول تصحي ديالا، بس هي
مش حاسة بسبب العلاج، فقلقت
وفضلت تسألني مالها. أنا رحنت
قولت لها... بس والله مكنتش أقصد
يحصلها كده.

ربت "كريم" على كتفها بحزن وهو
يحاول تهدئتها وقال:

-حصل خير يا عمتو، هي كده كده كانت
هتعرف.

اقتربت "سلمى" من "إيمان" وعانقتها
تهوّن عليها، بينما جلس "كريم" بجانب
والدته يفحصها بحرص. ما لبثت أن
استعدت وعيها، فنطقت أول كلمة
خرجت من بين شفتيها بصوت مرتجف:

- ديالا...

اعتدلت "عايدة" بتعب واضح، ثم جذبت
رأس "ديالا" بحنان إلى صدرها وبكت
بحرقة وهي تقول:

-ليه؟ ليه بنتي يحصل فيها كده؟ طول
عمرها مله اش دعوة بحد، وعمرها
مأذتش حد. ليه يحصل كده؟ والله
حرام... حرام يا رب.

عمّ الحزن الغرفة، وبكى الجميع بحرقه
على مصاب "ديالا". تساؤلات كثيرة
مزقت قلوبهم؛ ما ذنبها أن تقع فريسة
لذئاب بشرية بلا رحمة؟ ما ذنبها في
قانون يتهاون مع من فقدوا إنسانيتهم؟

وفي الخارج، وقف "حسني" بجانب
الباب، يستمع لكل ما يجري داخل
الغرفة. كان حزنه أكبر من أن يوصف،
ذلك الرجل الذي لم ينحن ظهره طوال
حياته إلا لربه، ها هو اليوم ينحني أمام
ثقل المصائب. مسح دموعه سريعاً
بأنامله، تلك الدموع التي كانت أغلى
وأثقل من أن تسقط. بصوت متهدج،
تمتم بحوقلة: إنا لله وإنا إليه راجعون.

تتهد "حسني" بحزن، ثم دخل الغرفة
واقترب من الفراش. نظر إلى صغيرته
"ديالا"، التي كانت مستلقية بلا حراك،
وقبل جبينها بحنان. دثرها جيدًا بالغطاء،
ثم التفت إلى زوجته التي ما زالت تبكي
بحرقة، وقال بصوت مختق:

-قومي يا أم كريم، ارتاحي شوية، ولما
تصحى شوفيها.

رفضت زوجته وهي تبكي بحرقة: مش
هتحرك من مكاني غير لما أظمن على
بنتي.

تتهد "حسني" بصوت عالٍ وقال: لا
حول ولا قوة إلا بالله العلي العظيم.

كان يعلم جيدًا عنادها، ويعرف أنها لن
تتحرك من مكانها، لذلك تركها وبقي

بجانبيها. نظر إلى "سلمى" التي كانت
تعانق "إيمان" وتحاول تهدئتها، وقال
بنبرة آمرة:

-سلمى، خذي إيمان واطلعوا فوق.

أومأت "سلمى" برأسها دون أن تنطق
كلمة، وخرجت برفقة "إيمان" بهدوء.
ثم التفت "حسني" إلى "كريم"، ونظر
إليه بغضب، وقال بحدة:

-فين أخوك؟

أجاب "كريم" بصوت خافت يحمل
الحزن:

-أكيد في أوضته. آخر مرة شفته كانت
امبارح بالليل.

سأله "حسني" بصرامة: مرحش صلي
الفجر، صح؟

أطرق "كريم" برأسه خجلاً. كان يعلم أنه مخطئ، فهو أيضاً لم يصل، إذ لم ينم منذ يومين، وعندما غلبه النوم، لم يسمع الأذان. فهم والده صمته وقال بسخرية مريرة:

-يومين غبنا عن البيت، حصل كده؟
روح شغلك، ولما تيجي، لينا كلام.

حاول "كريم" الاعتراض وقال بحزن:
-بابا، أنا...

قاطعته "حسني" بصرامة: سمعت أنا
قلت إيه؟

نظر "كريم" إلى والده بحزن، لكنه أطاعه وغادر الغرفة. جلس "حسني" بجانب "ديالا" على الفراش، وضع يده على رأسها وبدأ يمسد خصلات شعرها

بحنان. ثم همس بصوت متهدج، مليء
بالوجع: حقك عليا يا حبيبتي. حاولت
أحافظ عليك، بس اللي حصلك غصب
عني... سامحيني.

في الجامعة...

انتهت المحاضرة، وتحركت "بسملة"
برفقة "جيهان" خارج المدرج. تطلعت
"بسملة" حولها بتعجب، ثم قالت
مستغربة:

- غريبه... نور مظهرتش لحد دلوقتي.

ردت "جيهان" بنبرة غير مكرثة: يمكن
عندها محاضرة ثانية.

هزت "بسملة" رأسها بالنفي وقالت: لا،
مغدهاش حاجة غير بعد ساعة.

ابتسمت "جيهان" بقلق خفيف وهي
ترد:

-ربنا يستر... لما بتختفي كده يبقى في
مصيبة.

ضحكت "بسملة" وقالت بخفة: آه والله،
المهم رني على دعاء شوفيا خلصت
مع الدكتور ولا لسه.

أخرجت "جيهان" هاتفها وهي ترد:
-ماشى، وأنتِ ابعتي لـ نور رسالة
شوفيا فين.

أجرت "جيهان" اتصالها بـ "دعاء"،
التي أخبرتها بأنها ما زالت مع الدكتور
لكنها ستتضم إليهن في المطعم بعد
دقائق. وفي هذه الأثناء، فتحت

"بسملة" هاتفها لتتواصل مع "نور"،

لكنها وجدت رسالة منها تقول:

- "أنا في المطعم، تعالي بسرعة. عايزة

أقولك حاجة مهمة."

التفتت "جيهان" إلى "بسملة" وقالت:

- دعاء قالت هتيجي ورانا.

أومأت "بسملة" وأجابت: ونور قاعدة

مستنيانا هناك.

ابتسمت "جيهان" وقالت بحماس وهي

تسير بجانبها:

- طيب، يلا بينا.

بادلتها "بسملة" البسمة وهي تتذكر

حديثها الأمس عن كيف تصالحت هي

و"نور" بعد كل ما حدث، قائلة بخفة:

-إزاي يا بنتي كنتوا متخاصمين وبعد
كده رجعتوا أحباب؟ القصة مش داخله
دماغي.

ضحكت "نور" وهي تجيب:

-مش قصة كبيرة زي ما أنتِ فاكرة،
بس خليني أحكيك من الأول.

Flashback

كان الجو في الغرفة مشحونًا بالتوتر،
وكل واحدة منهن تحمل في قلبها
تساؤلات لم تجد لها إجابة بعد. جلست
"بسملة" واضعة يديها على فخذيها،
وهي تنظر بعينين متسائلتين إلى "نور"
و"جيهان"، تنتظر تفسيرًا لما يحدث.

فقالت بعدم فهم: إنتوا كنتم متخاصمين
ولا أنا كان بيتهيألي؟

تبادلت "نور" و"جيهان" النظرات بصمت، ثم انفجرتا في ضحك عفوي كسر حدة الأجواء. فقالت "جيهان" بثقة وهي تميل بجسدها للأمام:

-يعني أنتم يا أذكياء فاكرين إني ممكن أعمل حاجة زي دي في نوره؟
استفسرت "بسمة" بعدم فهم: مش فاهمة.

ردت "جيهان" وهي تعتدل في جلستها:
-اسمعي يا ستي. اليوم اللي أشرف وعمو طلبوا مني أخلي نوره تمضي قسيمة الجواز، نوره شافتني وأنا خارجة من بيتها، بس عملت إنها مشافتنيش وكلمتني عادي. فأنا فكرت إنه مينفعش أخليها تمضي من غير ما

تعرف الحقيقة. لما جت عندي بالليل،
قلت لها كل حاجة بصراحة.

قاطعتها "دعاء" بدهوة: ووافقت
بسهولة؟

أومأت "جيهان" برأسها وقالت: وافقت،
بس بشرط.

اتسعت عينا "دعاء" وهي تسأل: شرط
إيه؟

تهددت "جيهان" وقالت: إن محدش
يعرف إنها عارفة حاجة، كانت عايزة
تتصرف على إنها متفاجئة بكل اللي
هيحصل، عشان تعرف تاخد حقها من
أشرف لما زعق فيها.

هتفت "بسملة" بدهوة: يعني وافقتي
عالجوازة عشان زعق فيكي؟

أجابت "نور" بابتسامة: أيوة، وقتها كنت عايزة أضايقه زي ما ضايقتي. بس مكنتش أعرف إني هحبه.

قالت "دعاء" بضيق: وأنا ليه معرفش الكلام ده؟

ابتسمت "جيهان" وقالت وهي تشير إلى "نور":

-ميش دعوة. نوره قالتلي متقوليش لحد، حتى لما قلتها إنك ممكن تعرفي، رفضت وقالت نشوف هتصرفي إزاي لو عرفتي.

نظرت "بسمة" لهما بعصبية وقالت:

-والله يعني أنتم بتلعبوا علينا.

ردت "نور" بجديّة: هي لعبة فعلاً، بس مش عليكم.

استفسرت "بسملة" بنفاد صبر: أمال
على مين؟

قالت "نور" وهي تتذكر: علا. كانت
بتبعثلي رسائل مجهولة بتقول إن جيهان
مش صديقة حقيقية، وإنها بتلعب بيا.
في البداية ما كنتش فاهمة، لكن كنت
محتارة.

قاطعتها "جيهان" وهي تنظر نحو
"دعاء":

-الرسائل كانت من علا. ولما قابلتها
بالصدفة عند الجامعة، خبطت فيها،
واتخانقتا. وقتها قالتلي إن علاقتنا مجرد
تمثيل وإننا بنكره بعض، وبعدها عرضت
عليّ رهان.

تساءلت "دعاء" بدهشة: رهان إيه؟

ردت "جيهان" بجديفة: لو أنا خسرت،
أعتذر لها وأقول إنها صـحـ. ولو هي
خسرت، تعتذري بنفس الطريقة.
ضحكت "بسملة" وهي تهز رأسها
بيأس:

-حتى الرهانات داخلة في صداقتكم؟
ردت "نور" وهي تشير بعينيها نحو
"بسملة":

-الرهان كان لإثبات أننا أقوى من إنها
تفرق بينا.

نظرت "دعاء" بتعجب إلى "نور"
و"جيهان"، وقالت بعد لحظة صمت:

-يعني كل ده عشان تردوا على علا؟
قالت جيهان "بابتسامة واثقة:

-مش بس عشان علا. كان عشان نثبت
لأنفسنا إن صداقتنا حقيقية وما تتهزش.

ضحكت "بسملة" وهي تميل برأسها:

-حقيقي أنتم أبطال مسلسل تركي. بس
المررة الجاية دخلوني في الدراما من
الأول!

أردفت "نور" بابتسامة خفيفة: ولا
يهمك، بس المررة الجاية هتكون القصة
أمتع.

ضحكت "بسملة" وهي تميل برأسها
قائلة بخفة:

-أنا فاهمة إنكم أبطال مسلسلات، بس
المررة الجاية حاولوا تخلوني في الصورة
من الأول!

ردت "نور" بابتسامة خفيفة: ولا يهملك،
بس المرة الجاية هتكون دراما جديدة،
استعدي!

وعلى الرغم من المزاح، كانت كل
واحدة منهن تدرك أن هناك المزيد مما
تخفيه الأيام

Back

ولكن وراء هذا المزاح، كان الصراع مع
"علا" ما زال يشتعل في الكواليس،
و"نور" تعرف أن المواجهة الحقيقية لم
تنتهِ بعد.

في أحد شوارع المدينة كانت "نور"
تسير بخفة ومرح، بعدما رفضت عرض
"أشرف" لإيصالها. كان قد تلقى اتصالاً

هأمًا، فطلب منها السماح له بالمغادرة،
لكنها أصرت قائلة بخفة:

- ما تقلقش عليّ، أنا كبيرة وكفاية عليك
اللي عندك!

ورغم ترده ورفضه الشديد، استسلم
في النهاية أمام إصرارها. وها هي الآن
تتهادى بخطوات واثقة، تتنفس الحرية
وتبتسم بعدما حُلت مشكلة زواجها
وأخيرًا تقبلتها بصدر رحب.

وفجأة، قطعت عليها سيدة خمسينية
الطريق، صاحبة صوت جهوري ناداتها
بحزم:

- إنتِ يا بت!

توقفت "نور" في حيرة، وأشارت
لنفسها متسائلة بمرح:

- أنا؟

أومأت السيدة برأسها واقتربت منها وهي تسلمها هاتفًا قديمًا بأزرار بارزة،
قائلة بجدية مفرطة:

-خدي، اتصلي بـ "نعمة" عشان أقولها
'سميرة العقربة' عملت إيه!

حاولت "نور" كتم ضحكة كادت أن تفلت
منها وهي تسمع هذه الجملة غير
المألوفة. تناولت الهاتف من السيدة
وبدأت بالبحث في قائمة الأسماء، لكنها
لم تجد اسم "نعمة". رفعت رأسها
وقالت بتردد:

-مفيش حد مسجل باسم نعمة هنا.

تأففت السيدة ووضعت يديها على
خصرها، قائلة بضيق:

-أكيد العقربة هي اللي مسحتها عشان
مكلمش نعمة. طيب شوفي مين اللي
موجود عندك!

بدأت "نور" تقرأ الأسماء بصوت عالٍ:
أم أحمد... أم سيد... و... أم خالد.
فجأة، انتزعت السيدة الهاتف منها
بعصبية وقالت:

-هاتي بلا نيلة! رايحة فين؟ رايحة
المدرسة، جاية منين؟ جاية من
المدرسة، وفي الآخر مش عارفة إن
"نعمة" هي "أم خالد"!

ثم ابتعدت وهي تتم بضيق، تاركة
"نور" تقف مذهولة في مكانها، لا تفهم
ما حدث للتو. تمتت لنفسها بشردود
وهي تتابع السيدة بنظراتها:

- هو أنا كنت غائبة يوم ما خدوا درس
إن نعمة هي أم خالد؟ طيب بس يا ترى
خدوا الدرس ده في سنة كام؟"
أطلقت زفرة صغيرة وابتسمت وهي
تهمس لنفسها:

-يلا يا نور، اسألني البنات عن نعمة دي.
شكلي فعلاً طلعت فاشلة في فهم العلاقات
الاجتماعية!

وأكملت طريقها، لكنها لم تستطع كتم
الضحكة التي ظلت تتردد في عقلها وهي
تتذكر حكاية "سميرة العقربة".

زفر بضيق وهو يجلس على المقعد
بعدها يئس من أن تجيب على الهاتف.
كان يشعر بالقلق عليها، يعلم أنها

حزينة، لكنه عازم على فعل المستحيل
ليجعلها من نصيبه.

طرقات خفيفة على باب مكتبه قطعت
تفكيره، تبعها دخول الممرضة التي قالت
بلهجة عملية:

-فيه واحدة عايزة تقابل حضرتك يا
دكتور.

رفع "إبراهيم" عينيه نحوها باستغراب
وسأل:

-مين؟

ردت الممرضة وهي تهز رأسها:
مقلتش اسمها.

أشار بيده وقال: خليها تدخل.

دخلت الزائرة بهدوء يشوبه الحزن. كان
هو منشغلاً بترتيب بعض الأوراق

أمامه، وحين رفع رأسه ورآها، نهض
من مكانه واقترب منها بقلق وهو يسأل:

-فيه إيه يا 'جيهان'؟ وليه مش بتردني
على الفون؟

نظرت إليه بعينين تحملان مزيجًا من
الحزن والفرحة بسبب اهتمامه وخوفه
عليها، ثم قالت بصوت خافت:

-السلام عليكم ورحمة الله وبركاته.

أجابها وهو يشير نحو المقعد لتجلس:

-وعليكم السلام ورحمة الله وبركاته.
اتفضلي اقعدي.

جلست على الكرسي، وبدا عليها التردد

قبل أن تقول بحزن:

-أنا جاية أقولك...

توقفت ولم تكمل حديثها، فنظر إليها
بابتسامة مشجعة وقال:

-كملي يا 'جيهان'، أنا سامعك.

رفعت عينيها نحوه، وتعلقت بنظراته
السوداء الكحيلة للحظة قبل أن تنتهد
وتقول:

-أنا آسفة، بس مش هينفع أكلمك تاني.
من فضلك، امسح رقمي ومتحاولش
تتصل بيا.

وقفت استعداداً للمغادرة، لكنها حين
وصلت إلى الباب استدارت لتتظر إليه
نظرة أخيرة. كادت تخرج حين سمعت
صوته يناديها:

-استني!

اقترب بخطوات ثابتة ليقف خلفها
ويسأل:

-معلش، قلتي إيه؟ عشان مسمعتش.

التفتت إليه بتوتر وقالت: أنا خطوبتي
بكرة... على ابن عمي.

صمت قليلاً قبل أن يرد بكلمة واحدة:
-وبعدين؟

نظرت إليه بحيرة وانهارت أخيراً، عادت
إلى الكرسي وجلست عليه، ثم همست
بحزن:

-إحساس الخيانة وحش أوي. أنا بكره
الخيانة وبكره أي حد بيخون.

جلس على كرسيه المقابل لها، مستمعاً
لكل كلمة تقولها. تنهدت بصوت مرتفع
وأكملت:

- أنا مش موافقة على "ابن عمي"، وهو عارف، بس بابا وافق. حاليًا مقدرش أعمل حاجة، لكن كده كده خطوبتي هتتفش كل سواء طولت أو قصرت. ومع ذلك، ده ميعطنيش الحق إني أخونه وأكلمك.

رفعت رأسها لتواجهه، وعيناها تلمعان بالدموع. ثم قالت بصدق:
- مجرد التفكير فيك خيانة، وأنا هكره نفسي لو خنته. عشان كده، مش هينفع يكون بينا أي تواصل غير لما خطوبتي منه تنتهي.

نظر إليها بفخر وابتسم كابتسامه أب يرى نجاح ابنته، ثم قال:

- أنا فخور بيكِ وبتفكيرك. حاضر، مش هرن عليكِ تاني. بس عايزك متزعليش وتطمني، لأنني مش هسمح للخطوبة إنها تتم.

نظرت إليه بتساؤل، لكنه ابتسم بخبث ونهض من كرسيه ليجلس على كرسيه الرئيسي، قائلاً:

- تقدرني تمشي دلوقتي، عشان مشغول. ونتقابل بكرة.

لم تتحرك، بل ظلت تحديق فيه بضيق قبل أن تسأله:

- أنا مش فاهمة... إزاي الخطوبة مش هتم؟

أجابها بهدوء وهو ينظر إلى ساعته: والله لولا إني عندي شغل، مكنتش قاتلك

امشي. لأن مفيش حاجة أحب على قلبي
من وجودك.

احمر وجهها خجلاً، وغادرت دون أن
تضيف كلمة أخرى.

صرخاتها ملأت المنزل، رافضة رفضاً
قاطعاً أن يرتبط ابنها الصغير بواحدة
ملوثة كهذه. أما هو، فكان يجلس أمامها
بلا مبالاة، وكان صراخها لا يعنيه؛ فقد
اتخذ قراره، وانتهى الأمر.

حاول "ياسر" التدخل لتهدئة الوضع
بين زوجته العنيدة وابنه الذي ينافسها
في العناد:

-اهدي يا 'روبين'، المواضيع متحلش
كده.

صرخت "روبين"، وقد فاض بها الكيل:
-اهدى؟ اهدى إزاي؟ وابني عايز يتجوز
واحدة رخيصة زي دي!
وهنا لم يستطع "مارس" الاستمرار في
التزام الهدوء، فانتفض من مكانه
صارخاً في وجهها، متناسياً تماماً أنها
والدته التي يجب عليه احترامها:
-ماما! إياكي تقولي عنها إنها رخيصة
تاني! ذنبها إيه في اللي حصلها؟ ردي!
كان ممكن اللي حصلها يحصل مع
حضرتك أو مع 'منار'، يا ترى كان
كلامك هيختلف؟
اقتربت منه "روبين"، وصرفته على
وجهه صفة دوى صوتها في الأجواء،
وجعلت الجميع في حالة صدمة.

ركضت "منار" بلهفة نحو "مارس"،
وأمسكت بذراعاه، تحاول جذبها بعيداً عن
المواجهة خوفاً من أن تتفاقم الأمور
أكثر، وهي تقول معتذرة:

-حقك عليا يا 'مارس'، عشان خاطرني،
تعالى معايا وبعدين نتكلم.

أبعدها برفق، ثم اقترب ليوقف أمام
والدته، ينظر في عينيها بتحدٍ:

-هستنى لما أخوها يرد عليا ويقول
إنهم موافقين عشان نروح نخطبها. ولو
حضرتك رفضتني تروحي معايا، أو
حاولتني تبعديها عني، هيكون ده آخر
يوم ليّا هنا. يومها، اعتبرني إن ابنك
مات، وأنا كمان هعتبر إن ما عنديش أم.

تركها تستوعب كلماته بصدمة، وصعد إلى غرفته، تتبعه "منار" بصمت.

وقف "ياسر" في مكانه، ينظر إلى "روبين" بضيق، ثم قال بحدة:

-عاجبك كده؟ متعرفيش تتكلمني براحة أبدأ!

غادر المنزل دون انتظار ردها، وصرع الباب خلفه بقوة. التفتت "روبين" نحو "فارس"، الذي كان يجلس بهدوء وكأن ما يحدث لا يعنيه، وقالت بعصبية:

-وأنت كمان مستتي إيه؟ قول كلمتين وامشي زيهم! مانت السبب، لما اتجوزت واحدة من المستتقع ده! أكيد شافها يوم خطوبتك من "السنيرة"! ابتسم "فارس" بهدوء، ورد بعقلانية:

-سيبك من "السنيرة" لأنها خلاص بقيت
مراتي، وأكيد أنتِ عارفة إن مفيش قوة
على الأرض هتبعدي عنها إلا لو ربنا
ليه حكمة في كده. عشان كده، خينا في
المهم.

نظر إليها بثبات وأكمل: البنت من عيلة
محترمة، وأخلاقها مفيش حد يقدر يقول
عليها كلمة. أنا سألت عنها بنفسي، ده
أولاً. ثانيًا، اللي هيتجوزها هو 'مارس'،
مش حد فينا. هو اللي هيشيل نتيجة
اختياره، سواء كان صح أو غلط.

تتهد، ثم أردف: وثالثًا، أنا عمري ما
أقبل على أخويا إنه يرتبط بواحدة
رخيصة زي ما بتقولي. ولو فيه نسبة
١٪ إنها مش كويسة، كنت وقفت قصاده

ومنعته بكل الطرق. بس الحقيقة إن
البت كويسة جداً، وأنا فخور باختياره.

صرخت فيه بجنون: فخور؟ فخور إنه
يتجوز واحدة زي دي؟

رد عليها بتتهد ضيق: ماما، اللي حصل
للبت خارج عن إرادتها، وكلامك ده
هيكليك تخسري 'مارس'. وإنت عارفة
إنه طول عمره ما بيعتمدش على حد،
يعني ممكن يسيب البيت ويعيش لوحده.
وأظن إنك مش هتكوني مبسوطة لو
حصل كده.

وقف ليستعد للمغادرة، ثم قال قبل أن
يتركها:

-راجعني نفسك يا ماما، عشان ده حقه
إنه يختار البنت اللي عايزها. بعد إذنك.

غادر المكان وصعد إلى غرفة شقيقه،
تاركًا "روبين" في مواجهة أفكارها.

كانت فرقة "المجانين" تجلس على
إحدى الطاولات في المطعم، يتناولون
الطعام بهدوء غير معتاد، قبل أن تقطع
ذلك الهدوء "بسملة" بسؤالها:

-كنتي فين يا "نور"؟

ردت "نور" بعد لحظات من الصمت:
كنت مع "أشرف".

ضج تصفيق حار من "بسملة"، وهي
تهتف بحماس:

-اشطأ! كنتي بتعملي إيه بقى؟

بدأت "نور" تسرد ما حدث بتفاصيلها،
وهي تشعر بالحماس:

- اسمعي يا ستي، لما نزلت من عندك
لقيته واقف مستتيني. في الأول مردتش
أركب معاه، بس بعدين قعد يتحايل شوية
فصعب عليا وركبت. وقف قدام عمارة
وقال لي: "انزلي". في الأول مردتش،
بس بعدين نزلت وطلعت معاه الشقة.

- طلعتي معاه الشقة؟!

سؤال خرج بصدمة من "دعاء"، لترد
"نور" بضيق واضح من مقاطعتها
وصدمتها المبالغ فيها:

- أيوة ياختي، ده جوزي على فكرة.

ردت "دعاء" بحدة: ولو! برضو أنت
اتجننتي طلعتي معاه الشقة؟

نظرت "بسملة" إلى "دعاء" بسخرية،
ثم وجهت حديثها إلى "نور":

-إزاي يعني تطلعي مع جوزك الشقة،
عشان عايز يتكلم معاك ويفهمك اللي
حصل؟ أكيد كان عايز يخلص من حوار
الطلاق اللي أنتِ ماسكة فيه.

ثم تجاهلت "دعاء"، التي تنتظر إليها
بعدم تصديق، وقالت بجديّة:

- كملّي يا "نور"، وسبيك من الشيخة
"دعاء".

ابتسمت "نور" عندما رأت وجهه
"دعاء" يشتعل غضبًا، وقالت وهي
تستأنف:

-وبس ياسستي، طلعت وفضل يتحايل
ويبوس إيدي ويقول لي: "أنا آسف".
صعب عليا وقلت أكسب فيه ثواب.
-كذابة!

قاطعتها "جيهان"، التي أكملت
بسخرية:

- هتموتي عليه، وتقولي صعب عليا؟

اشتعلت نظرات "نور" بالغضب، وهتفت
بين احتكاك أسنانها:

- أنت مالك يا باردة؟ وبعدين كنت معايا
عشان تقولي كدابة؟

أجابت "جيهان" باستفزاز وهي تكذب:
- أيوة، كنت معاك.

تجاهلتها "نور"، ووجهت حديثها إلى
"بسملة" لتكمل:

- وبعدين يا بت يا 'بسوا'، سامحته وقال
لي إنه هيجي يخطبني من جديد، ويعملي
أحلى خطوبة عشان مزعلش.

قالت الجملة الأخيرة بحماس، ففرح الجميع بالخبر، وتمنوا لها السعادة.

نظرت "جيهان" إلى "دعاء"، وسألتها:
-وانتِ يا 'دعاء'، عملتي إيه؟

أنصت الجميع باهتمام، لترد "دعاء"
بضيق:

-طلعتني غطانة، وقال لي إنه جاي عندنا
في الليل وهي جيبها معاه، وبعدين
يحاسبني على إني شكيت فيه.

قالت "نور" بتفكير: تفتكري تطلع مين؟
ممكّن تكون أخته.

نفت "دعاء" هذه الفكرة: معندوش
أخوات غير 'مارس'.

همّت "جيهان" أن تتحدث، ولكن قاطعها صوت خلفها يقول بعدم تصديق:

-جيهان عثمان!

وقفت "جيهان" لتري من المتحدث، لتصيح بفرحة عندما رأتها. دفعت المقعد بعيداً وعانقتها بسعادة، وهي تهتف:

-منوش! وحشتيني يا بنتي! مختفية فين كل ده؟

ردت "منار"، وهي تبادلها العناق: أنا برضو يا واطية اللي مختفية؟ مش أنت اللي غيرتي رقمك ومكافتيش نفسك ترني عليا؟

ابتعدت "جيهان" عنها وقالت باعتذار:

-والله، الأرقام كلها اتمسحت من عندي ومعرفتش أوصلك.

ابتسمت "منار" باشتياق، وقالت:

-وحشتيني والله. إيه ده؟ "نور المهدي"

كمان هنا؟

وقفت "نور" ترحب بها، فهي صديقة

"جيهان" منذ الطفولة، و"نور" بالطبع

تعرفها جيدًا:

-أخبارك إيه يا "منار"؟ وحشاننا أيامك

والله.

صافحتها "منار" بسعادة: الحمد لله

بخير. وإنتم والله كلكم واحشيني.

ثم قالت بمرح: إيه؟ مش هتعرفوني

على الحلويات وتقولولي اتفضلي يا

برنسيسة؟

ضحكت "جيهان" وقالت بمشاكسة: هي

لسه حكاية البرنسيسة شغالة؟

ردت "منار" بجديّة وغمزة: طبعاً، دي
فيها كلام!

أشارت "جيهان" إلى "بسملة": دي
'بسملة علي'، صاحبتني.

تبادلت "منار" و"بسملة" السلام
بابتسامة هادئة.

ثم أشارت "جيهان" إلى "دعاء"، التي
تجلس مصدومة منذ أن رأت "منار"، لا
تصدق أن "جيهان" و"نور" يعرفونها.
كيف؟ وهي نفس الفتاة التي عانقت
زوجها ولم يخبرها أحد عنها.

قبل أن تتحدث "جيهان"، قالت "منار"
بحماس:

-مش معقول! 'دعاء' كمان هنا؟ دي
احلوت أوي!

نظرت لها "دعاء" بحاجب مرفوع،
وردت بضيق:

-والله؟

نظرت "نور" إلى حماس "منار"
واشتعال غضب "دعاء"، التي بدأت
تطرق الطاولة بضيق، وقالت بعدما
فهمت:

-أوعي تقولي إنك الشريرة في رواية
'دعاء'!

سحبت "منار" مقعدًا واقتربت من
الطاولة وهي تبتسم وتومئ برأسها
موافقة.

ابتسمت "جيهان" بسخرية بعدما فهمت
الموقف؛ فهي الوحيدة التي تعرف

الرابط الذي يجمع "منار" بـ"فارس".
ثم قالت مازحة:

-معقول يا 'دعاء'؟ أنتِ مريضة بالدكتور
'فارس' لدرجة إنك تعلمي حداد طول
الليل وتصحى الصبح تلبسي أسود،
عشان شفتيه بيحضن أخته؟
-أخته؟

طرقت الباب برفق، وانتظرت حتى سمح
لها بالدخول. ولجت بخطوات واثقة
تعكس كبرياءها المعتاد، وجلست على
المقعد أمامه واضعةً قدمًا فوق الأخرى،
تتظر إليه بثقة جمّة، قبل أن تقول:
أخبارك إيه يا 'إبراهيم'؟

رفع "إبراهيم" نظره نحوها، ورد
بعملية واضحة:

-بخير يا دكتورة 'هاجر'. قلت إنك عايزة
تتلمي معايا في حاجة مهمة. خير؟

لم تتردد "هاجر" في الرد، بدا صوتها
واثقًا، بل وأقرب إلى الغرور، وهي
تقول:

-أنت زمان طلبت إيدي، وأنا رفضت.
دلوقتي أنا جاية أقولك: تتجوزني.

الفصل الثالث والعشرون

وخوفي منك يا الله.

كان يدفعني لتصديق كل من يحلف

باسمك، كنت اظنهم يخافون مثلما افعل!

توقفت "دعاء" للحظة، ثم همست

بصدمة وهي تنظر إلى "منار":

-أخته؟

انفجرت "منار" ضاحكة، ومالت نحوها

وهي تهمس بمرح:

-يعني اتصدمتي كده؟

لم تستوعب "دعاء" ما سمعته، فتمتمت

بعدم فهم:

-أخته إزاي يعني؟ مش فاهمة.

هدأت "منار" من نوبة الضحك،
واستقامت في جلستها وهي تقول بجديّة
وكأنها تشرح أمرًا مهمًا:

-بصي ياستي، من ٢٢ سنة ونص،
اتولدت، ولما فتحت عيني لقيت ولد
صغير شايطني. لما سألت ده مين؟
قالولي إنه أخوكي. والوالد الصغير ده يا
ستي هو الدكتور فارس، أخويا.

نظرت "دعاء" إليها بدهشة بالغة،
وكأنها تحاول استيعاب ما قيل للتو.
تدخلت "جيهان" وهي تبتسم:

-أنا مش عارفة إزاي أنتي متعرفيش،
بس أنا عارفة إن منار أخت الدكتور
فارس.

لاحظت "منار" الحزن الذي بدأ يتسلل إلى وجه "دعاء"، فقالت بهدوء:

-لما فارس قرر يخطبك، كنت مسافرة.
كلمني وقالي، وأنا قولتله ميتكلمش عني
قدامك لحد ما أرجع وأشوفك بنفسي.

شعرت "دعاء" بالإحراج، خاصة بعدما اتهمت "فارس" بالخيانة. تمتت بخجل:

-يعني أنتي أخته بجد؟

تدخلت "بسمة" بسرعة، محاولة تخفيف الأجواء:

-خلاص يا جماعة، حصل خير.
كان الجميع يتابع الحديث بتركيز، لكن "نور" قررت تغيير الأجواء لتقول بابتسامة مشاكسة:

-بت يا منار، إيه رأيك تيجي معانا حفلة
تكرية؟

نظرت "جيهان" إليها بعدم فهم: حفلة
إيه؟

ردت "نور" بمشاكسة: حفلة خاصة
برفقة المجانين، باستثنائك طبعًا.

أصرت "جيهان" بغناد: ليه يعني؟
هحضر معاكم طبعًا.

غمزت لها "نور" بخفة: انسي يا
حبيبتي. المهم يا منار، إيه رأيك؟

ردت "منار" بحماس: طبعًا يا باشا، دي
فيها كلام؟ أنا أموت في الحفلات
الخاصة.

ضحكت "نور" بخبيث وقالت: رقمك
بقي، عشان الحفلة سرية ومينفعش حد
يعرف عنها.

تبادلت "منار" و"نور" الأرقام وسط
ضيق "جيهان"، التي صاحت بغضب
مصطنع:

-ماشي يا نوره.

كادت "نور" أن ترد، لكن صوت هاتف
"بسملة" قاطعها. صدح الهاتف بنغمة
أغنية مميزة، جعلت "نور" و"جيهان"
و"دعاء" ينفجرن ضاحكات، بينما
نظرت إليهن "بسملة" بغضب وأغلقت
الهاتف بعصبية، ثم وضعتة على
الطاولة.

رددت "نور" بمرح وهي تدق على
الطاولة بنفس إيقاع النغمة:

-خائفة لما تسافر على البلد الغريب...
تتسى إنك سايب في بلدك حبيب.

أكملت "جيهان" وهي تقلدها: مسنتي
بأشواق... تعباه تعباه.

اندمجت "منار" معهما قائلة: كان نفسي
أكون جنبك حبيبة... حبيبة من بلدك.

شاركت "دعاء" بابتسامة خجولة: لما
تجيني تاني تاني... آه تاني تاني تاني
من البلد الغريب.

ضحكن جميعًا معًا وبدأن التصفيق، إلا
أن "بسمة" صاحت بسخرية:

-خلصتم؟ هنطرد من المطعم بسبب
خفتكم!

نظرت "نور" إليها بخفة وابتسمت
قائلة:

- ما تخافيش يا بسوا، كل اللي هنا
عارفين إنا مجانيين.

تدخلت "دعاء" بجديّة، محاولة تهدئة
الموقف:

- فيه إيه يا بسملة؟ مش كنا اتفقتا إن
الموضوع انتهى؟

ردت "بسملة" بعصبية وهي تحاول
التظاهر باللامبالاة:

- موضوع إيه؟ دي مجرد أغنية والسلام.
أنتم اللي مكبرين الأمور.

ضحكت "نور" وقالت بمكر: إحنا
مكبرينها ولا أنتي اللي زعلانة بسبب
اللي حصل امبارح؟

صاحت "بسملة" بحدة: نورهان!
خلصنا.

اتسعت عينا "نور" بصدمة، وقالت
بدهشة مصطنعة:

-نورهان؟ والله!

حاولت "دعاء" التهدئة وقالت بلطف:

-خلاص يا نور. وأنتِ يا بسملة، ملوش
لازمة تزعلي على حاجة فاضية.

تهدت "بسملة" بحزن وقالت بصوت
منخفض:

-فعلاً... ملوش لازمة.

ساد الصمت للحظات، ثم تحدثت "نور"
و"دعاء" في نفس الوقت، بلهجة مليئة
بالاعتذار:

- آسفين يا بسملة، متزعليش.

ابتسمت "بسملة" ورفعت رأسها لترد
بمرح:

-ولا يهتمكم يا حلويات.

عاد الجميع إلى حديثهم وضحكاتهم،
بينما كانت "منار" تندمج معهم، وكأنها
جزء من هذا الجنون منذ البداية

لم يتفاجأ "إبراهيم" من صراحة
"هاجر"، بل اعتدل في جلسته ورد
بابتسامة هادئة:

-آسف، بس أنا تقريبا خطبت.

رفعت "هاجر" حاجبها بكبرياء، وسألته
بنبرة تحمل بعض التحدي:

-البنيت اللي كل يوم تجيك المستشفى،
صح؟

ابتسم "إبراهيم" بحب حين مرّ طيفها
في ذهنه وهمس:

-جيهان.

نظرت إليه "هاجر" بنظرة مستفهمة،
ليضيف بتوضيح:

-اسمها جيهان. وحاليًا، أنا منتظر
والدها يرد عليا.

نهضت "هاجر" وهي تمسك بحقيبتها،
وقالت بنبرة خافتة:

-مبروك يا دكتور.

رد عليها بابتسامة هادئة: الله يبارك
فيك، عبقالك.

غادرت المكتب بخطوات هادئة، بينما
تتهد "إبراهيم" واستسلم لذكريات
الماضي. تذكر أيام الجامعة، حين كانت

"هاجر" زميلة مجتهدة لا تهتم بأحد، وهذا ما جذبته إليها. في أول فرصة سنحت له، تقدم لخطبتها، لكنها رفضته بلباقة. لاحقًا، علم أنها كانت تحب شخصًا آخر وتزوجته أثناء دراستهما.

تتهد مجددًا وحدث نفسه: في الحقيقة، أنا مكنش بحبها. كنت شايفها مناسبة وبس.

عاد بظهره للخلف، وجذب هاتفه ليعث برسالة قصيرة إلى أحدهم:

-إيه آخر الأخبار؟

لم يمر سوى دقيقتين حتى جاءه الرد: كله تمام، اظمن يا دوك.

ابتسم وهو يتذكر أول لقاء له بـ "جيهان" منذ عامين...

Flashback

كان يسير باتجاه مكتب الدكتور
"فارس" في الجامعة عندما اصطدم
بفتاة ترتدي فستانًا سماويًا مع حجاب
أبيض. كانت تبدو كزهرة حمراء وسط
باقة من الزهور البيضاء.

كانت تحمل بعض الكتب التي سقطت
منها أثناء الاصطدام. كاد "إبراهيم" أن
ينحني لمساعدتها، لكنها جذبت كتبها
بسرعة وابتعدت دون أن تعيره اهتمامًا
أو حتى تسمع اعتذاره.

وقف في مكانه ينظر إليها وهي تبتعد
بخطوات مسرعة، ثم ابتسم وهو يهمس
لنفسه: إيه الصباح الجميل ده!

أما "جيهان"، التي كانت تركض بلهفة للحاق بمحاضرتها، فلم تهتم بمن اصطدمت به، إذ كان كل ما يشغلها إلا يرفض الدكتور دخولها بسبب تأخرها.

Back to Present

عاد "إبراهيم" من شروده بابتسامة واسعة وهمس لنفسه:
- هي جميلة أوي... وأجمل هدايا القدر يا قدرتي.

انتهى اليوم وجاء المساء في منزل "دعاء". جلس "فارس" و"مارس" و"منار" مع والدها، "مصطفى"، يتحدثون عن مواضيع عامة كالسياسة وكرة القدم. كانت الأجواء هادئة إلى أن

قطعت حديثهم "دعاء" بدخولها، ترتدي
فستاناً أنيقاً أخضر اللون يبرز جمال
عينيها الخضراوين. ألقى التحية بتردد
قائلة:

-السلام عليكم.

رد الجميع بصوت واحد: وعليكم السلام
ورحمة الله وبركاته.

حاول "فارس" أن يتجاهل وجودها، لكن
عينية خاتناه، فالتفت نحوها بابتسامة
خفيفة وعينين تتلألآن كنجوم الليل. لم
يستطع مقاومة تأمل ملامحها الساحرة؛
عيناها الخضراوان تشبهان غابة هادئة،
وحجابها الأبيض الذي يغطي خصلات
شعرها يضيء عليها طابعاً ملائكياً. تتم
في داخله:

"هذه الفتاة فتنتني الوحيدة... أتمنى أن لا يراها أحد غيري."

اقتربت "منار" من "دعاء" وعانقتها وهمست لها بشيء لم يسمعه أحد. ثم قالت بمرح:

-والله وحشتيني!

ضحكت "دعاء" بخجل وهي ترد: وأنتِ أكثر.

رفع "فارس" حاجبيه باستغراب، ونظر نحو "دعاء" متسائلاً بسخرية خفيفة:
-وأنتِ أكثر؟ أزاى يعني؟

أجابت "منار" بدلاً عنها بابتسامة ماهرة:

-إيه ده؟ هو أنت متعرفش؟

قال بنبرة حادة قليلاً: لا، معرفش!

جلست الفتان معًا، بينما ظل "فارس"
يراقبهما بشك، فقالت "منار" وهي
تضحك:

-مش أنا ودعاء طلعتنا أصحاب.

رد بتوجس: اللي هو أزاى؟

أوضحت "منار" بابتسامة: النهارده
وأنا رايحة أشوف فريدة، قابلت جيهان،
صحبتي القديمة، وطلعت دعاء معاها.
واتعرفنا، وجيهان قالتها إننا أخوات.
وبس يا سيدي.

تنهد "فارس" وقال بنبرة هادئة: حصل
خير.

ثم التفت إلى "دعاء" ونظر إليها نظرة
مليئة بالعتاب، وكأنه يقول بعينه:

- "علمت الآن ما علاقتي بـ'منار'؟" بدت
"دعاء" خجولة وهي ترد بابتسامة
اعتذار صامتة.

قاطع حديثهم صوت "منار" التي
تساءلت بمرح:

-مش هتوريني هتلبسي إيه بكرة، يا
دعاء؟

تساءل "فارس" بحدة وهو يوجه حديثه
نحو "دعاء":

- ليه؟ رايحة فين بكرة؟

حاولت "دعاء" أن ترد، لكن "منار"
سبقها قائلة:

-بكرة خطوبة جيهان، والبنات كلهم
رايحين من أول الصبح.

أشاح "فارس" وجهه عنها وهو يضغط
على يده بوضوح. كانت "دعاء" تدرك
من صمته أنه غاضب لأنها لم تخبره
مسبقًا. حاولت التبرير بعينيها، لكن
الحديث قُطع بصوت والدها:

-ربنا يتملها بخير.

أردف "مارس" مبتسمًا: ربنا يتملها
بخير وعقبال فرحكم، يا فارس.
ابتسمت "دعاء" بخجل وقالت: وعقبالك
يا رب.

رد "مارس" بابتسامة حاملة: إن شاء
الله قريب.

صاحت "منار" ضاحكة: مش عارفة إن
مارس كمان هيخطب قريب؟
اتسعت عينا "دعاء" بفرح: بجد؟

ابتسم "مارس" وهو يجيب: إن شاء
الله، وهي من البلد هنا.

تساءل "مصطفى": بنت مين؟

أجاب "مارس" بهدوء:

-بنت حسني محمد أبو بكر.

ردت "دعاء" بحماس عفوي: أخت
تامر؟

على الفور، تحول وجه "فارس" إلى
الغضب، ونظر إليها نظرات نارية قائلاً:

-تعرفيه مين؟

ارتبكت "دعاء" وقالت بتوتر: هو... هو
كان... كان هيخطب بسملة.

قال "مصطفى" وهو لم يرَ النظرات
المتبادلة بين "فارس" و"دعاء":

-يلا يا دعاء، جهزي العشا.

وقبل أن يعتري "فارس"، رد
"مصطفى" بحسم:

- عيب يا بني. ده بيتكم، وإحنا مستنيينكم
من بدري.

ابتسم "مارس" مازحًا: أنا عن نفسي
مكنتش همشي من غير عشا. واقع من
الجوع!

نهضت "دعاء" و"منار" لتحضير
العشاء...

وبعد دقائق وضعوا الطعام على طاولة
صغيرة (الطباية)، وجلس الجميع لتناول
الطعام بهدوء. الرجال في المنذرة، بينما
البنات جلسن في الداخل. بعد الانتهاء
من العشاء، استأذن "فارس" للحديث
مع "دعاء" بمفردهما.

دخلت "دعاء" غرفتها وترك "فارس"
الباب مفتوحًا خلفه. جلست على فراشها
بتوتر، بينما جلس هو على المقعد
المقابل للطاولة التي تستخدمها للدراسة.
ظل ينظر إليها بصمت حتى قطع هو
الهدوء بقوله: قولي لي يا دعاء،
غلطتي في حقي كام مرة النهارده؟

رفعت عينيها إليه بصدمة، قائلة: أنا
مغلطش ولا مرة!

رد بعصبية واضحة: والله؟ تحبي أقولك
أنا كام مرة؟

وحينما وجدها صامته أكمل حديثه
بغضب، ونبرة قوية:

-أول غلطة لما شكيتي فيا واتهمتيني
إني بخونك، ومستتتيش لحظة تعرفي

مني الحقيقة. الثانية لما مقتلش إنك
رحتي مع أصحابك مكان من غير علمي.
وكم ان رايحة بكرة عند جيهان
ومكفتيش نفسك تقولي لي. والتالته،
والأهم، إنك تنطقي اسم راجل قدامي ولا
كأنه واحد صاحبك!

لم تستوعب "دعاء" كلماته بالكامل،
لتهمس بغصة بكاء:

- أنا آسفة... مقصدش أشك فيك، بس
لما شفتها في حضنك خفت تسبني بعد
ما تعلقت بيك.

تحدث بعصبية أكبر وهو ينهض من
على المقعد:

- أسيبك إيه يا مجنونة؟ هو أنا عندي
أغلى منك؟

لم تتحمل "دعاء" صراخه، فانهمرت
دموعها كالشلال، قائلة بصوت متقطع:

-أنا طول الوقت مستتية اللحظة اللي
هتسبني فيها... لسه مش مصدقة إنك
بقيت ليا لوحدى!

بدأ "فارس" يتحرك في الغرفة بضع
خطوات ليهدأ، ثم عاد إليها وجذبها
لتقف أمامه. همس لها بنبرة هادئة
ليطمئنها:

-بصي في عينا يا دعاء، وقولي لي...
دي نظرة عينين ممكن تشوف غيرك؟
أنا متمنتش في حياتي حاجة قد ما
تمنيتك.

ردت دون وعي وهي تحلق في عينيه:
-عينيك حلوين.

ابتسم "فارس" بتأثر، وقبل جبينها برفق. جعلها تجلس مجدداً، ثم عاد إلى مقعده. لكن الغضب عاد ليسيطر عليه حينما تذكر خروجها دون إذنه. قال بحزم:

-أنا آسف لأنني محكتك إيش عن منار.
بس خروجك من غير إذني ده غلط!

عادت "دعاء" تبكي وهي تتجنب النظر إليه، ثم ارتفعت شهقاتها قائلة:

-أنا متعودة أروح أنا والبنات المطعم ده، وبابا عارف، عشان كده نسيت أقولك.
والله كنت هقولك إني رايحة عند جيهان، بس أنت عرفت قبل ما أقول.

تنهد "فارس" بضيق وهو يحاول السيطرة على غضبه:

- زمان أنا مكنتش موجود، لكن دلوقتي
المفروض أكون عارف كل خطوة
بتخطيها. تخيلي أكون داخل المطعم
وأشوف مراتي هناك بالصدفة وأنا
معرفش!

ثم تساءل بصوت خافت لكنه مليء
بالعتاب:

- هو أنا مش من حقي أعرف مراتي
فين؟ وبعدين يا دعاء، أنا مش كل شويه
برن عليكى وبقولك أنا فين... المفروض
أنتِ اللي تعملى كده، مش أنا.

مسحت "دعاء" دموعها بيديها
المرتعتين، كالأطفال، وقالت بخجل:

- أنا آسفة... والله ما هروح مكان من
غير ما أقولك.

تتهد "فارس" بعصبية، لكنه لا يريد
أن تبكي أكثر. قال بهدوء:

-آخر حاجة... أوعي يا دعاء تنطقي اسم
راجل تاني قدامي بالهفة دي.

رفعت "دعاء" نظرها إليه، وقالت
ببراءة وهي تمسح دموعها:

-أمال أقول إيه؟ مش هو اسمه كده؟

لم يحتمل "فارس" نظراتها ووجهها
البريء الممتلئ بالدموع. تقدم منها
وعانقها بقوة، وصاح بها بضيق يناقض
حنانه وهو يربت على ظهرها:

-أنتِ مستغلة يا حبيبتى عشان عارفة إن
دموعك دي بتوجعني!

ثم همس برفق وهو يقبل جبينها مرة
أخرى:

-حَقِّكْ عليا يا حبيبتي. أنا آسف على كل
دمعة نزلت من عنيني.

مرَّ اليوم مرور الكرام، وأتى اليوم
المنتظر، يوم خطبة "جيهان". اجتمع
الجميع في منزلها، والكل يعمل لتجهيز
خطبة تليق بالعائلة. الشباب في الخارج
يضعون الزينة في الشارع، والبنات
يجهزن الضيافة في المطبخ ومنهم
صديقاتها، أما هي فتجلس في غرفتها
بحزن. الجميع سعيد حولها، فلماذا لم
يسألها أحدهم إن كانت سعيدة أم لا؟
لماذا لم يشعر بها أحد؟ ألم يكن من
المفترض أن تكون أكثرهم سعادة؟!!

ما بالها الآن تبكي كأن اليوم هو
نهايتها؟ نعم، هي ترى أن اليوم نهايتها،
فأي شيء سيأتي بعد ما حدث؟ ستزف
لرجل لا تريده. سينكسر قلبها اليوم
حينما تجلس برفقة شخص آخر، شخص
غير الذي سكن فؤادها. يالها من سوء
حظًا! تبكي وما يفيد البكاء؟ تصرخ، وهل
هناك من يسمع؟ فالجميع أصيب
بالصمم. ستستسلم لهم ليفعلوا ما يحلو
لهم، وهل بيدها شيء آخر غير
الاستسلام؟

ابتعدت "جيهان" عن المرأة التي تقبع
أمامها، لا تريد أن ترى وجهها الآن، لا
تريد أن ترى دموعها التي تهبط
كالسيول ولا أحد يشعر. وضعت يدها

على قلبها، تتهدد بوجع وهي تهمس
لنفسها بكلمات داعمة:

- كل شيء هينتهي، وجعك هينتهي،
اصبري متز عيش. حقك عليا أنا آسفة
إني ضعيفة ومش قادرة أتكلم ولا أدافع
عن أبسط حقوقي.

بكت بقوة وهي تحاول مواساة نفسها:

- حقك عليا يا جوجو، أنتي أغلى حاجة
عندي، متز عيش، كله هيعدي.

ظلت تنفس بصوت مرتفع لكي تهدأ
ويدها تربت على الأخرى بحنان، وما
زالت تردد:

- اهدي، اهدي، بسيفة، خلاص حصل
خير، متز عيش.

ولجت "نور" إلى الداخل وهي تردد
بصوت مرتفع لتدرك "جيهان" وجودها،
فتمسح آثار الدموع وتبتسم وتردد معها
الأغنية وقلبها ينزف وجعًا:

-افرحي يا عروسة، أنا العريس!

ولجت خلفها "دعاء" و"منار"
و"بسملة"، هاربات من المطبخ لكي
يجلسن برفقة صديقتهن التي يعلمن
حالتها جيدًا حتى وإن أخفت ذلك.

ابتسمت "منار" وهي تقول: يلا يا
بنات، البسوا عشان نمشي.

تساءلت "جيهان" باستغراب: رايعين
فين؟

ردت "بسملة": فارس عطى لـ دعاء
فلوس وأصر إنها تجيب فستان جديد،

وإحنا هنروح معاها عشان إحنا كمان
هنشتري.

صاحت بهم "جيهان" بعصبية: والله
رايحين تجيبوا فساتين يعني فرحانين
فيا؟

أرادت "نور" أن تستفزها لتقول: قصدك
فرحانين ليكي، هو مش النهاردة
خطوبتك والمفروض كله يفرح؟ وبعدين
أشرف حبيبي جاي ولازم يشوفني
بفستان جديد!

صرخت بها "جيهان" بغضب: نوره،
مش ناقصاكي!

اقتربت منها "دعاء": معش يا جيهان،
والله مش هنتأخر.

ابتعدت "جيهان" عنها لتجلس على
الفرش بحزن:

- براحتكم.

نظروا لبعضهم لتغمز "نور" لهم، وتفهم
"بسملة" إشارتها لتقترب من "جيهان"
وتدغدغها هي و"نور، لتطلق "جيهان"
ضحكات صاخبة، وكذلك فعلت "منار"
و"دعاء". لتنقلب الغرفة من الحزن إلى
مرح وضحكات تهز الجدران.

وبعد دقائق، غادرن الثلاثة، ولم يبق
سوى "بسملة" التي رفضت أن تترك
"جيهان" بمفردها.

حل المساء وحلت معه أجواء تبعث
السعادة في القلوب، تصدح الأغاني

بدون موسيقى التي أصرت "جيهان"
على تشغيلها، فتملاً الأجواء بهجة حتى
لو كان الحزن يثقل قلبها. جلست
"جيهان" بجوار خطيبها المزعوم،
وأمامها أصداؤها يتراقصون بفرح
غامر. نظرت إليهم بحنق وهمست:

-أبو شكك أنتي وهي، مش عارفه
فرحانين على إيه وهما عارفين اللي
فيها.

سألها خطيبها بابتسامة واسعة، لم
تفارق وجهه:

-بتقولي حاجة يا حبيبتني؟

التفتت إليه بنظرة تحدّ، وردّت بتلقائية:

-حبك برص وعشرة خرص.

أخفى غضبه ببراعة، واقترب منها
وهمس بنبرة تهديد خافتة:

-ألفاظك يا حبيبتني، عشان لسانك الحلو
ده مقطعهوش.

ابتسمت بسخرية وقالت بنفس التحدي:
-حبك برص مرة تانية، وابقى ورّيني
هتعمل إيه.

لم يرد على حديثها، بل أشار لوالدته أن
تأتي بالشبكة لتضعها في يد العروس.
استجابت والدته وتحركت لتأتي بها،
لكن قاطعها صوت "نور" وهي تقول:

-رايحة فين يا مرات خالي؟
توقفت زوجة خالها، ونظرت إلى
الصينية التي تحمل الذهب ثم نظرت إلى
"نور" بسخرية:

- رايحة أدي الشبكة للعريس.

لم تخف نبرة السخرية على "نور"،
لكنها تجاهلتها وقالت بابتسامة ودودة:

- استتي خمس دقائق، واحدة صاحبتنا
جاية في الطريق، وهتزعل لو وصلت
ولقت جيهان لابسة الشبكة.

نظرت إليها زوجة خالها بضيق، لكنها
لاحظت نظرات الرجاء في عيني "نور"،
فتهدت وأعطتها الذهب لتضعه في
الداخل. أخذت "نور" الذهب بصدر
رحب، لكن قبل أن تتحرك، غمزت
بعينيها لرفيقاتها اللواتي كن يراقبنها
بصمت.

لحسن الحظ، رأت "جيهان" تلك الغمزة،
فأشارت إلى "دعاء" التي كانت قريبة
منها وسألتها بفضول:

-نوره كانت بتغمزلكم ليه؟

همّت "دعاء" أن تجيب، لكنها تراجععت

حين أكملت "جيهان" بحزم:

-من غير كذب يا دعاء!

تهدت "دعاء" وأجابت ببساطة:

-فاكرة عملتي إيه في خطوبتي؟

نظرت إليها "جيهان" بترقب، لتكمل

الأخرى بمرح:

-كما تدين تدان.

فهمت "جيهان" المغزى، فصاحت

بحماس:

-أجي معاكم؟

لكن "دعاء" رفضت بحزم: جيهان،
مينفേഷ. استتي أنتي بس.
ثم غادرت "دعاء" مسرعة خلف
أصدقائها الذين سبقوها بمجرد إشارة
من "نور".

"في منزل تامر حسني"...

جلست أمام "الدكتورة تقى" التي
أرسلها "مارس" لمعالجة "ديالا".
حالتها كانت بخير أو هي كانت توهمهم
بذلك، إلى أن أتت والدتها واحتضنتها
حضنها الدافئ فنهارت حصونها،
والتزمت الصمت مع بكاء حار. كانت
تبكي فقط، وبكائها مزق قلوبهم.

ابتسمت "الدكتورة تقى" ابتسامة تبعث
في النفس الراحة وقالت بمرح: ب

-صي بقى يا للى اسمك جميل شبهك، أنا
محببش حوار إن حد يتعامل معايا على
أني دكتورة، أنا بحب نكون أصحاب.

فإيه رأيك بقى نبقى أصحاب؟

وحينما رأت شبهه ابتسامة تظهر على
وجه "ديالا"، أكملت حديثها:

-هعرفك بنفسي، أنا اسمي تقى وبحب
اسمي أوي. هتسأليني بحبه ليه؟ هقولك
معرفش. المهم هما بيقولوا إني دكتورة،
بس الحقيقة إني مكنتش عايزة أبقى
كدا، بس الحجج الله يسامحه كان مطلع
عيني في الثانوية عشان أبقى زييه.
وأهو، يستي بقيت أجمل وأشيك دكتورة.

تحدثت "سلمى" التي كانت تجلس
بهدوء بعيداً عنهم:

- هو مش المفروض تقولي أشطر
دكتورة مش أجمل؟

نفت "تقى" هذا الحديث الغير صحيح
بالنسبة لها:

- أشطر دكتورة دي قدمت، المهم أكون
الأجمل. يرضيك أكون دكتورة ومش
حلوة؟

ضحكت "سلمى" بمرح: لا طبعاً ده
كلام.

عادت "تقى" تتحدث بعدما نجحت في
جذب اهتمام "ديالا" بما تقول:

- المهم ياسستي، أنا عرفت إنك في
ثانوية. المرة الجاية هجباك أسماء كل

الكليات عشان نشوف أنتِ شكل أي كلية
ونذاكر على الأساس ده. اتفقنا؟
أخذت نفسًا عميقًا ثم قالت وهي تنظر
إليها:

-ها، هتقبلي نبقي أصحاب ولا أروح
أصاحب البنت اللي شبه دبلوم صنایع
اللي هناك؟

أشارت على "سلمى"، التي نظرت إليها
بحنق، فاجتهدت "ديالا" في الضحك
بشدة وقالت:

-نبقي أصحاب، وسيبك من دبلوم صنایع
اللي هناك.

ردت "سلمى" بتذمر وهي تنهض:
ماشى يا ديالا، أنا غلطانة إنى سايبه
جوزي وجاية أقعد معاكم.

وقبل أن تغادر الغرفة، استدارت لتتظر إلى "تقى" بحنق وقالت:

-وعلى فكرة، أنتي محصلتيش تبقي شبه محو الأمية.

وتمتت وهي تغلق الباب: قال دبلوم صنایع قال.

سقطت "ديالا" في نوبة ضحك عارمة، وشاركتها "تقى" بسعادة لنجاحها في أول خطوة.

هدأت "تقى" من نوبة الضحك، لتتحدث بجدية:

-اللي عده يا ديالا انتهى ومش هنقدر نغيره، ولازم نرضى بيه أيّا كان. بس نقدر نغير اللي جاي، أو على الأقل نحاول يكون مناسب لينا مهما مر من

مشاكل هنتتهي حتى لو كانت صعبة.
فعايزاك تبصي لأي مشكلة من الجانب
الإيجابي مش السلبي.

رأت نظرات التشبتت والخوف في وجه
"ديالا"، فربتت على يدها بحنان:

-هنتخطي كل حاجة، متخفيش. المهم
إحنا المفروض نتقابل كل أسبوع مرة
بس، لكن لأنك جايلك توصية من فوق،
هنتقابل يومين في الأسبوع.

صمتت لحظة ثم ابتسمت لها: النهاردة
حابة اتعرف عليك، يلا بقى احكي لي
عاملة إيه في الثانوية وعايزة تدخلي
كلية إيه؟

نظرت إليها "ديالا" لعدة دقائق،
فاحترمت "تقي" صمتها ولم تتحدث،

إلى أن بدأت "ديالا" تسرد لها بحماس
ما تتمنى، وقد تناست ما حدث معها.

الكل يعلم أنهم مجانين، ولكن لم يتوقع
أحد أن يصل جنائهم لهذا الحد، الذي
جعل الجميع في حالة صدمة ولم يصدر
من أحدهم رد فعل واحد يوقف هذا
الهرءاء. والمجانين على المسرح كانوا
يتوقعون صدمتهم ولم يهتموا، كل ما
يهمهم الآن هو أن تتأخر هذه الخطبة
بضع دقائق...

وقفت "نور" على المسرح ترتدي
جَلَابِيَّةَ رجالي بألوان الأسود وعمامة
فوق الحجاب ("الجَلَابِيَّةُ هو ثوب
فضفاض يلبسه الرجال في الصعيد")،

وكذلك فعلت "منار" و"بسملة"، لكن
"دعاء" رفضت ذلك وارتدت عباءة
سوداء لا تناسب بأي شكل من الأشكال
هذه الخطبة، ولكنها مناسبة لما يحدث
الآن.

تحركت "نور" برشاقة وفي يدها عصا
تغني وتحرك قدمها بحركات متتالية
للأعلى والأسفل:

-كان ليا في يوم حبيب يا خسارة باعني
بالغالي اشتريتو وبالرخيص باعني.

ابتعدت "نور" عدة خطوات تتراقص مع
"منار" التي أخذت منها المايك
لتشاركها الغناء:

-وأنا لا ندمان عليه ولا هبكي في يوم
عليه وأنا... إيه... أنا... إيه.

يتراقصون رقصًا صعيديًا لا يناسب ما
يتفهون به، لتقول "بسملة" بحماس
وهي تدور حول نفسها:

-أنا لا مسطول ولا بطوح، أنا جاي
أجامل ومروح، واشوف اللي باعني
وسابني وخاني، خلى قلبي بيتمطوح.

تركت "نور" العصا وجذبت يد "دعاء"
تتراقص معها، واليد الأخرى بها المايك
تتشارك هي و"دعاء" الغناء:

-اه ياما اه واه يابا، دي عيلة واطية
ونصابة.

قهقهت "منار" وهي تتراقص مثلهم
وتشاركهم الغناء:

-والليلة جينا نهنيكم، هاتو الفلوس اللي
عليكم.

أشارت "نور" على العريس وهي تقول:
- خطب خطيبي ده واد منحوس، خطبها
وهي عليها فلوس.

انتقل المايك من يد لأخرى لتقول
"بسملة" وهي تصفع وجنتها بخفة:
- ده الفقري فقري لو حتى علقوا على
دماغه فانوس.

تشاركوا الأربعة الغناء: أنا لا مسطول
ولا بطوح... أنا جاي أجامل ومروح،
واشوف اللي باعني وسابني وخائني،
خلى قلبي بيتمطوح.

ابتعدوا عن "نور" يترقصون، والتي
أخذت الدور الرئيس لتشير لزوجة خالها
وابنها: ودولا ناس ملهاش عزة بفلوسي
أنا، عملوا جوازه. والكل فرحان بيهني،

وأنا يعني ملياش عزة. اه ياما اه واه
يا بيا، دي عيلة واطية ونصابة. الليالة
جينا نهنيكم، هاتوا الفلوس اللي عليكم.

بضع دقائق يتراقصون أمام الفتيات
ونساء العائلة والجيران، إلى أن انتهت
الرقصة وعم الصمت المكان. ليتحرك
"عثمان" والد "جيهان" نحوهم بعدما
أتى من الخارج عندما استمع إلى
غنائهم. فترك خيمة الرجال وجاء ينهي
هذه المهزلة التي تحدث في خيمة
النساء. صرخ بغضب:

-نور!

نظرت "نور" له بخوف، وقبل أن
تتحدث قاطعها شقيقها الذي كان يركض

نحوهم بلهفة وهو يخبرهم بقلق وينظر

جهة العريس:

-فيه بوليس بره وطالبين محمد-

الفصل الرابع والعشرون

"ولعلّ ما تُلحِين على الله به، كَتَبَهُ اللهُ

لِكَ وَعَسَى أَنْ يَأْتِيكَ بِهِ قَرِيبًا"

تحرّك العريس ليقف أمام "محمد"
متسائلاً:

- هما قالوا طالبين أنا؟

رد "محمد" عليه: أيوة، الظابط قال
عايز محمد جمعة.

صاح العريس باستتكار وغرور: من
غير مهندس؟!!

صُدم الجميع من رد فعله؛ فهل هذا ما
يشغل تفكيره؟ أن الشرطي لم يُضف

رتبته قبل الاسم؟! ولكن "جيهان"
صاحت بحماس وهي تقترب منهم:

-بجد؟

انتقلت النظرات إليها، وقال "محمد"
بشك:

- أنتِ فرحانة؟

ردت بتلقائية: جداً!

زجرها والدها بنظراته الحادة لتتراجع
خطوة قائلة بتوتر:

-مش قصدي أنا...

قاطعها دخول الشرطة وصوت الضابط
يتحدث بجدية وهو يشير إلى "محمد":

- أنت محمد جمعة؟

تحدث "محمد" بثقة: أيوة، خير؟

قال الضابط: اتفضل معانا.

لم تتلاش ثقة "محمد" مقدار شعرة وهو
يتحدث بقوة:

-السبب؟ لأنني أكيد مش هسيب خطوبتي
وأنا مش فاهم حاجة!

أردف الضابط بحدة وهو يشير إلى أحد
العساكر:

-اتفضل معانا، وهناك هتعرف.

سحب أحد العساكر "محمد" إلى سيارة
الشرطة، وركض خلفه والده وعمه
وباقى رجال العائلة.

ولجت "جيهان" داخل المنزل ثم إلى
غرفتها بعدما انتهت خطبتها، وخلفها
صديقاتها. أغلقت "نور" الباب خلفها
ونظرت لتجد "جيهان" تدور حول
نفسها بسعادة بالغة، وكأنها فراشة
تحلق بين الأزهار.

ابتسمت "نور" وهي تجذب يدها وتدور
معها، والاثنتان تضحكان بشدة، بينما
"بسمة" تصفق لهما بحماس،
و"دعاء" تجلس بهدوء، و"منار"
تخبرهن بسعادة:

-ياااه، الخطوبة كانت تحفة جدا! ياريت
يا نور تعزميني على خطوبة زي دي
كثير.

ردت "نور" بتعب وهي تجلس
بجوارها:

-فاتك خطوبة أخوكي، كانت أحلى!
نظرت لها "دعاء" بحنق: هيجي لك
دور، وساعتها أنا بنفسى هنتقم من اللي
عملتية في فارس يوم الذهب!

أرسلت لها "نور" قبلة في الهواء وهي
تغمز:

-براحتك يا حبي!

تحدثت "بسملة": عارفة يا بت يا نور،
لو هو سمع كلامنا ورضي يجي، كانت
الخطوبة هتكون أحلى.

تساءلت "جيهان" بعدم فهم: مين ده؟

تجاهلتها "بسملة" لترد "منار"
بصدمة:

-معقول عرضتوا عليه يجي يشارك في
المهزلة دي؟!!

التوى ثغر "نور" بحنق: أيوة ياختي،
وكان نفسي ياخد البطولة وحاولت
أقنعه، بس هو مرضيش! خايف على
شكله، فإكر نفسه مهم.

ضحكت "منار" وشاركتها الضحك
"بسملة" التي قالت:

- كان هيبقى شكله تحفة لوجه، ومتأكدة
إن جيهان كانت غيرت رأيها لو شافته
كده.

وأشارت إلى ثيابها الرجالية، لتقول
"جيهان" بضيق وقد نفذ صبرها:

- فهموني بتكلموا على إيه عشان مش
فاهمة حاجة!

ردت "نور" وهي تنهض وتقترب من
"دعاء" التي تجلس على الأرض وتدون
شيئاً بالهاتف، والابتسامة لم تفارق
وجهها. أدركت "نور" أنها تتحدث مع
ذلك البغيض الذي لا تعلم لماذا تنزعج
كلما رآته:

-استتي أنتي! لما نشوف روميو
وجولييت اللي مش مبطلين حب في
بعض كأن محدش اتجوز غيرهم.

ضحكت "دعاء" لتزيد من حنق "نور":

-اللي غيران منا يقلدنا، وبعدين مكناش
بنحب في بعض ولا حاجة.

نظرت لها "نور" بشك وأردفت: أمال
بتضحكي ليه؟

ازدادت ضحكات "دعاء" لتقول
بصعوبة:

-والله خايفة أقولك بضحك ليه تزعلي.

جذبت "نور" منها الهاتف: وريني كده،
بيتكلم عليا صح؟

نظرت للهاتف لتجد آخر رسالة منه
تخصها، فاشتعل غضبها وهي تقرأها
بصوت مرتفع بعض الشيء:

«حبيبتي، ابعدني عن نور ومنار، عشان
دول كوارث متحركة، بيعشقوا المصايب
قد عنيتهم. النهارده بيفشكوا خطوبة
جيهان، بكرة لو لقوا نفسهم فاضين
هيجاولوا يعملوا مشاكل بينا، وأنا
مصدقت أمورنا بخير.»

كانوا يستمعون لها بتركيز، لتبتسم
"جيهان" عندما لم يذكر اسمها بينهم،
وتشير لهن بغرور. لكنها سرعان ما
تلاشت ابتسامتها عندما أكملت "نور"
قراءة الرسالة بعصبية:

«وكم ان ابعدي عن جيهان دي كمان
نفس النوع. بصي خليكى مع بسملة،
تقريبًا هي أفضل الوحشين.»

ضحكت "بسملة" بعدما نظرت لمامحهم
الغاضبة، لتتهد براحة مصطنعة:

-الحمد لله، ظهر الحق وطلعت أحسن
واحدة.

سخرت منها "نور" ثم قرأت الرسالة
الأخيرة:

«ولا أقولك، اقطعى علاقتك بالشلة دي،
صاحبيني أنا أحسن.»

صاحت "منار" بضيق: ماشي يا فارس،
لما أروح لك بقى أنا كارثة متحركة!

خشيت "دعاء" أن تحدث مشكلة بينهم
بسببها، فقالت بلهفة:

- هو ميقصدش والله، هو بس بيهزر!
اعترضت "نور" على حديث "منار":
هو أنا لسة هستتى لما تروحي له؟ أنا
هرد دلوقتي.

حاولت "دعاء" جذب هاتفها، وعندما لم
تستطع ناداتها بتحذير:

- نور!

ردت "نور": بلا نور بلا بتاع، مش
هسكت!

ودونت رسالة له:

«مالها نور إن شاء الله، بتعض ولا
بتعض؟»

جاءها الرد فوراً لأنه كان ينتظر
"دعاء" لتجيب، ولكن عندما تأخرت
استنتج سبب تأخرها:

«كارثة متحركة، ورجعي التليفون

لصاحبه لو سمحتي.»

ابتسمت "دعاء" وهي تقول بهيام:

-ياربي، عسل يا ناس! شوف بيحترمك

إزاي، بيقولك لو سمحتي.

ثم نظرت لـ "نور" المصدومة: أنتي في

حد احترمك قبل كده وقالك لو سمحتي؟

لا، صح؟ عشان تعرفي إن فارسي

الحبيب مفيش منه.

صاح صوت "نور" الحانق الساخر:

-والله!

انتقلت "نور" بنظراتها بينهم كإشارة،

لترى "دعاء" نظراتهم المشتعلة تجاهها

لتقول وهي تعود للخلف بريية:

-فيه إيه؟ بتبصولي كده ليه؟ هو اللي
غلط مش أنا!
تقدموا منها ببطء كذئب يترصد فريسته،
وهي ابتلعت ريقها بتوتر لينقضوا
عليها...

"منزل تامر..."

كانوا يجلسون يتناولون وجبة العشاء
بحزن يغلف قلوبهم، ولا أحد يتحدث
بكلمة، حتى قطع حالة السكون صوت
"كريم" الذي قال بهدوء وهو ينظر
لوالده: بابا، في واحد عايز يقابل
حضرتك.

نظر له "حسني" بتساؤل: واحد مين؟

تتحنح "كريم" وقال بخفوت: مارس
اللي حكيتك عنه إنه ساعد ديالا، كلمني
وعايز يطلب إيدها. هو كل شوية يكلمني
ومصر إنه يقابل حضرتك.

صمت "حسني" لدقيقة كاملة يفكر في
الأمر، ثم قال:

-قوله يجي الخميس الجاي لوحده.

رد "كريم" بجدية، فهو لا يقبل أن يُقلل
من شقيقته:

-هستى لما يرن عليا هو، وبعدين
أقوله.

عاد الصمت ليخيم على الأجواء حتى
قالت "إيمان" بحزن وهي تحرك الملعقة
بشروء:

-تامر وحشني أوي.

تذكرت "سلمى" شجارها الدائم مع

"تامر"، فتمتت بحزن:

-وأنا كمان، والله يا عمتو.

مسد "كريم" على رأسها بحنان، متذكراً

رسالة الوداع التي تركها "تامر".

Flashback

بعدما غادر "كريم" غرفة شقيقته، ذهب

يبحث عن شقيقه الذي لا يعلم أين اختفى

منذ أمس، وكيف نسي وجوده؟ صعد

للأعلى، ثم إلى غرفة "تامر" ليجد الباب

مفتوحاً. ولج للداخل ليجد زوجته تجلس

على الفراش وببيدها شيء تبكي بصوت

مكتوم. ركض لها بلهفة متسائلاً عما

حدث، وهي ارتمت في أحضانه تبكي

بشدة وتهمس بكلمات غير واضحة.

أبعدها قليلاً وسألها بحنان:

-حبيبتي، فيه إيه؟

لم تتحدث، فقط ناولته الورقة التي كانت

تقبض عليها، ليبدأ في قراءتها بهدوء:

«أنا آسف يا كريم. حقا عليا. متزعش

مني إني مقلتش لك إني مسافر، بس

غصب عني. مش هقدر أقابل بابا

وأشوف في عينه نظرة اتهام إني السبب

في اللي حصل لديالا. عارف إنك هتقول

عني ضعيف، بس والله مش هقدر

أستحمل نظرتة ليا. خلي بابا وديالا

يسامحوني وخلي بالك منهم. وقول لماما

متزعش إني مشيت من غير ما

أشوفها. وقول لإيمان إني بحبها أوي

وخلي بالك منها. وسلملي على المصيبة
اللي متجوزها، وقولها إنها هتوحشني
أوي. خلي بالك منهم يا كريم لأنني
هستقر هنا ومش عارف هرجع تاني ولا
لا. سلام.»

"تامر"

طوى "كريم" الورقة وهو يتهد بحزن،
ليسمع "سلمي" تتساءل:
-مش هيرجع تاني، صح؟
ابتسم لها وهو يجذبها إلى أحضانه،
عالمًا بحزنها لغياب "تامر". فقد أخبرته
كثيرًا أن "تامر" هو عائلتها الوحيدة،
فهي ليس لها أحد غيره، وتتمسك به
لأنه شقيقها في الرضاعة:

- هيرجع يا حبيبتني، متقلقيش. وبعدين

أنا موجود، مش ده كفاية؟

بادلتته العناق وهي تهمس: كفاية طبعًا.

Back to present

عاد "كريم" من شروده على صوت

والده الذي صاح بغضب:

- مسمعش حد فيكم جايب سيرته تاني!

تحدثت "عايدة" بحزن:

- هو عمل إيه يعني؟ ده ابني اللي مش

عايزنا نجيب سيرته!

قال "حسني" بحدة: ابنك مات!

بكت "عايدة" بصوت مرتفع وهي

تنهض لتغادر:

- بعد الشر عليه!

راقبها "حسني" وهي ترحل بحزن، ثم
نهض خلفها، فهو يعلم أنها لم تعد
تحتمل المزيد من الحزن.

"منزل إبراهيم"

كان يجلس على أحر من الجمر، يخشى
أن يخلف بوعده لها ويخسر لها، بل
سيخسر حياته، فهي منذ رآها أصبحت
أغلى من حياته.

أجاب بلهفة عندما صدح رنين الهاتف:

- عملت إيه؟

رد الطرف الآخر بحنق: طيب قول

السلام عليكم الأول!

تنفس "إبراهيم" ليهدأ وقال: وعليكم

السلام، ها يا أشرف، حصل إيه؟

صمت "أشرف" عمدًا ليثير غضبه، فهو يعلم أنه نادرًا ما يغضب، وحدث ما أراد في ثوانٍ، حين صاح "إبراهيم" بنفاد صبر:

- ما ترد يا زفت! حصل إيه؟

ابتسم "أشرف" بتكبر وأردف: لما تكلمني باحترام هرد.

بكل غضب يمتلكه، صاح باسمه: أشرف!

رد "أشرف" عليه بجديّة: الخطوبة توقفت، وهو اتقبض عليه.

تهد "إبراهيم" بسعادة: الحمد لله... طيب، انت فين.

أجاب "أشرف" بعدما تحدث مع أحدٍ بجواره:

-أنا في المركز معاهم. في النهاية مش
هينفع أسيبهم عشان نور.

تفهم "إبراهيم" الأمر وقال قبل أن يغلق
المكالمة:

- تمام، بس لازم تجيني الصبح عشان
تقولي التفاصيل.

بعدها ترك الهاتف على الطاولة، عاد
ليجذبه ويدون لها رسالة:

«أول مرة أكون سعيد لدرجة دي، رغم
التصرف اللي عملته، اللي بعيد عني كل
البعد، وخلاني أحس إنني شرير. دي أول
مرة أأذي حد، بس أنا ممكن أكون أسوأ
من كده لو حد قرب منك أو حاول
يبعدني عنك، بحبك.»

-تفتكروا اللي إحنا عمناه صبح ولا
غلط؟ سؤال تحرر على لسان "منار"
بعدهما قصت "نور" عليهم ما اتفقت
عليه مع "أشرف" و"إبراهيم". ردت
"دعاء" بجدية:

-طبعًا غلط، دي فيها كلام؟

تساءلت "منار" مرة أخرى بحيرة:
طيب طالما عارفين إنه غلط، ليه بتعملوا
كده؟

ردت "نور" بجدية: لأن مفيش حل
تاني. أحيانًا بيكون لازم نغلط عشان
نصلح الغلط.

قالت "منار" بتعجب: إزاي؟ مش
فاهمة.

وضحت لها "بسملة" مقصدها: يعني
مثلاً لو عمرو "عثمان" رفض الخطوبة
دي، إحنا كنا هنعمل كده عشان نوقفها؟
أكيد لا. إحنا بس بندافع عن حقتنا. هما
اللي علمونا إننا منسكتش لو حد ظلمنا.
فتفتكري لما هما يظلمونا هنسكت؟
عادي؟ طبعاً لا. عشان كده غاظنا عشان
نصلح الغلط الأكبر.

كادت "منار" تتساعل، ولكن قاطعتها
"نور":

- أكيد حاولنا نتكلم معاهم، بس هما
رفضوا.

وأردفت "جيهان" بحزن: كل الناس
بتشوف الصورة من بعيد، بس محدش
فكر يقرب ويشوفها على الحقيقة. يعني

كله شايفنا مجانين، بس محدش يعرف
الحقيقة.

صممت "جيهان" تنفس بهدوء، ثم
نظرت إلى "بسمة" وقالت:

- عندك مثلاً "بسمة"، ربنا رزقها بأب
وأم في غاية الجمال، وكان الحنان اللي
في العالم كله اتزرع في قلوبهم. بس
اتحرمت من إنها يكون عندها إخوات.
فهي حاسة طول الوقت إنها وحيدة.
بصي في عندها وإنت بتتكلمي عن
أخوكي أو أختك، هتشوف فيها إزاي
موجوعة. كان نفسها يكون عندها
إخوات تتخانق معاهم، وتتصالح. حد
يشاركها حياتها كلها من يوم ما فتحت
عينها على الدنيا. أخ يزعل لما تتجوز

رغم خناقه معها الدائم ودعائه عليها
إنها تتجاوز بسرعة عشان يرتاح منها.
بس لما تيجي اللحظة دي، يبقى كاره
الدنيا كلها عشان ما تبعدهش عنه. كان
نفسها يكون عندها أخت حنونة تتخاطق
معها ليل نهار وتحلف بأغظ الإيمان
إنها مش هتكلمها تاني، وبكلمة واحدة
يتصالحوا وكان ما حصلش حاجة.
حاجات محدش هيفهمها ولا هيحس بيها
غير اللي جربها وجرب إحساسه الدائم
بالوحدة.

أغمضت "بسمة" عينيها بوجع
لتشاركها الحديث:

- أنتي ما تعرفيش حاجة عنا يا "منار".
يعني عندك "نور"، الكل بيقول عليها

مجنونة، بس هي جواها طفلة اتحرمت
من إنها تعيش طفولة طبيعية. فلما
بتسمح لها الدنيا بفرصة تعيش
طفولتها، مش بتقصر. هي محتاجة
شخص يحبها بجد، ووقتها هيشوف
تصرفاتها قمة العقل. هي مش مجنونة.
كل واحد بيشوفها حسب عقله، مش
حسب تصرفاتها.

ابتسمت لها "نور" بحب، ثم قالت
بحزن:

-و"دعاء"، اللي الكل شايفها عاقلة
وهادية، وهي أصلاً مش كده. الحكاية
إنها خيفة. خيفة تقرب من حد
يرفضها. خيفة تتكلم مع حد يقولها:
"ما تدخليش". خيفة حد يتريق عليها

أو يوجعها بكلمة. تصرفات "دعاء"
مش عقل، ده خوف من المجتمع الظالم
اللي عايز الكل كامل، ونسي إن الكمال
لله وحده.

خيم الحزن عليهم. اقتربت "جيهان" من
"دعاء" لتعانقها بعدما رأت دموعها
التي تكاد تسقط تأثرًا بحديث "نور".
بادلتها "دعاء" العناق، ثم ابتعدت قليلًا
وقالت بصوت مختنق:

-و"جيهان" طول الوقت بتضحك
وتهزر، وأغلب البنات بيلقبوها بـ"أم
ضحكة جنان". بس يا ترى دي
حقيقتها؟ للأسف لا. هي بس بتمثل إنها
فرحانة عشان ما تحبش حد يشوفها

زعلانة. ومحدث شاف ولا عاش اللي
عشته بسبب مرات أبوها.

تهدت "نور" لتتتهي هذا الحوار الذي
جعلهم يحزنون:

- كل واحدة فينا ليها حكاية مختلفة،
وجرح محفور جوه قلوبنا، ومحدث
يعلم بيه غير ربنا. رغم ضحكنا وهزارنا
طول الوقت، بس إحنا مقتنعين إنها دنيا
فانية، وهيجي اليوم اللي هيتهي فيه كل
ده. يبقى طظ في الدنيا، ونعمل اللي
يرحنا طالما ما ظلمناش حد وما
تخطيناش حدودنا.

حزنت "منار" مما استمعت إليه لتقول
بأسف بعدما رأت الحزن الذي خيم على
الجميع:

- أنا آسفة، ما قصدش أز علمكم.

ابتسمت "نور" بمرح:

-بس يا أخت البروفيسور المعفن!

انتفضت "دعاء" في جلستها تصرخ في

وجه "نور":

-نور، إلا "فارس"!

غمزت لها "نور" بمشاكسة وكادت أن

تجيب، لولا سؤال "جيهان":

-المهم، أنتم مش هتروحوا؟ الوقت

اتأخر.

تحدثت "نور" وهي تتمدد على الفراش:

-أنا هنا هنا.

وكذلك جلست "بسملة" بجانبها: وأنا

كمان. ماما عارفة إني هنا هنا.

اقتربت "دعاء" من خزانة الثياب
لتجذب ثيابها وثياب "منار" وهي
تتفوه:

-فارس جاي في الطريق يروحنا.

ثم ألقت الثياب لـ "منار"، التي قالت
بضيق:

- كنا قعدنا معهم ومشينا بكرة.

قالت "دعاء" وهي تبدل ثيابها: أخوكي
مش هيرضى، واحمدي ربنا إنه سابنا
لحد دلوقتي. يلا عشان هو زمانه على
وصول. وبعد دقائق معدودة، جاء
"فارس" لتغادر "دعاء" برفقة "منار"
على وعد بأن يلتقوا غدًا في الجامعة.

غاب القمر لـ تُشرق الشمس بعد ليلة
حين أخرى، ليلة قضائها وحيداً يشعر
بالندم على تركه موطنه وجميع من به
ضعفاً منه أنه لأنه يستطيع المواجهة...

في إحدى الشركات الخاصة بمجال
التصميم وإدارة المشاريع في بيروت،
كان يجلس في مكتبه الجديد يتابع العمل
بتركيز شديد، إلى أن قاطع تركيزه دخول
السكرتيرة التي تسير بفننج، لتجذب
نظراته وتحرك مشاعره اتجاهها. أبعاد
نظراته عنها سريعاً، لكنها قالت بدلال:

-المدير طالب حضرتك يا بشمهندس.

تتهد "تامر" وأبعد عينيه عنها، ثم قال
بحدة:

-تمام، اتفضلي.

بعدها غادرت، جذب هاتفه ليرى
صورتها. نعم، لديه صورة لها التقطها
دون أن تعلم. تحدث إلى الصورة
بشتياق:

- أنا آسف لأنني بصيت عليها، بس أقسم
لك إنني بحاول... لأنني مصر إنني أتغير
عشان تكوني ليا. أنتي وحشتيني أوي،
على فكرة.

ثم أدار الصورة ليرى صورة جماعية
تضم عائلته، وهمس بحب وحنين:
-وحشتوني أوي.

في إحدى الكافيهات الراقية، كانت
تجلس بتأفف وضيق، ليبتسم "أشرف"
ويتساءل باهتمام:

-مالك يا وزه؟ من ساعة ما قعدتي وأنتِ
مش طايقة نفسك.

كانت "نور" تنتظر سؤاله لتفجر فيه
بضيق:

-أنت ليه طلبتلي عصير وطلبت لنفسك
قهوة؟ هو أنا مش قلت عايزة أطفح
قهوة؟ ولا هنبداً من أولها تمشي كلامك
علياً!

لم يغضب منها رغم نبرتها المرتفعة
بعض الشيء، بل ابتسم كي تهدأ وقال:

-لا يا حبيبتي، مش بمشي كلامي
عليكي، بس أنتي لسه مفطرتيش،
فمينفحش تشربي قهوة على الريق.

أجابت بعناد: يعني أنت فطرت؟

رد عليها بمشاكسة: لا، أنا راجل.

تحدثت "نور" بعصبية: نعم يا خويا،
حتى القهوة فيها راجل وست!

حدّق في وجهها بغیظ وقال: أخوكي؟!
أنا اللي جبته لنفسی.

كادت أن ترد عليه ليوقفها بإشارة من
يده وهو يقول:

-كنت بهزر معاك يا قلبي. طلبتلك
عصير عشان لو شربتي قهوة على
الصبح هتتعبی، وأنتی لسه قدامك يوم
طویل.

ابتسمت بخجل من تصرفها المبالغ فيه
وتلك الكلمة التي يرددها بتلقائية ولا
يعلم تأثيرها عليها:

- أنا... كنت...

قاطعها "أشرف" بجديّة: ولا يهملك يا
وزه. المهم، في حاجة مهمة كنت عايز
أحكملك عليها، بس عايزك تفهميني يا
نور من غير تسرع.

نظرت "نور" له بجديّة، تفكر فيما يريد
قوله ويطلب منها ألا تتسرع، ولكن
قاطع أفكارها صوت امرأة تقف أمام
الطاولة وتصيح في وجه "أشرف":

-فين مازن يا أشرف؟

رد "أشرف" بغضب مكتوم:

ميخصكيش، وياريت تمشي من هنا.

ضحكت المرأة ضحكة لا معنى لها ثم
قالت بسخرية:

-ميخصنيش؟ آمال يخص مين يا روعي؟

نهضت "نور" من على مقعدها بغضب
وهي تنظر للمرأة:

-طلعت روحك يا بعيدة! أنتي مين أصلاً؟

جذب "أشرف" يد "نور" وهو يتحدث:

-اهدي يا نور، واقعدي.

ثم نظر لمن تقف تنتظر إجابة سؤالها
وقال بحزم:

-وأنتي، أظن إني قلتك ميخصكيش،
فتفضلي من غير مشاكل.

تجاهلت المرأة حديث "أشرف" وقالت لـ
"نور" التي جلست بهدوء:

-أنتي اللي مين يا حبيبتي؟ أوعي تقولي
إنك مراته!

نظرت لها "نور" بتحدي: حبك برص
وعشرة خرص! أيوة، مراته، عندك
اعتراض؟ أنتي بقي مين؟
تحدثت المرأة باستفزاز وهي تجلس أمام
"أشرف" الذي أغمض عينيه بقوة:
-طليقته.

همست "نور" بصدمة: طليقته؟

الفصل الخامس والعشرون

سوريا جرحها ينزف كل يوم
والسودان تباد سرًا وغزّة تحترق.

إييه يا أمّة المليار مسلم!

ستسألون، والله وبالله وتالله

ستسألون!..

رددت الكلمة أكثر من مرة بعدم فهم
وهي تنظر إلى "أشرف" الذي حاول أن
يتحدث ويخبرها بما حدث، لكن قاطعته
بضحكة ساخرة رنت في المكان، لتجذب
انتباه الجميع.

وضعت "نور" يدها على فمها تمنع
نفسها من الضحك، ثم قالت بهدوء:
-أسفة، افكرت حاجة ضحككتي.

أردف "أشرف" بعد صمت طال، عندما
رأى "نور" تنهض من على المقعد:

- نور، اسمعيني الأول.

لم تهتم به وهي تجذب حقيبتها وتضع
بها الهاتف، وتتحرك خطوتين، ليمسك
"أشرف" يدها وهو يقول:

- عشان خاطري، اسمعيني.

جذبت "نور" يدها منه وهي تقول بحدة
يراها منها لأول مرة:

- لو اتحركت ورايا خطوة، هتخسرني
بجد.

غادرت المكان، ليعود "أشرف" إلى
مقعده، ثم تذكر من تجلس أمامه، تبتسم
بشماتة، ليصيح بها بغضب:

- هَدَفِكَ التَّمَن غَالِي عَلَى الَّتِي حَصَلَ
دَلُوقَتِي.

ضَحَكَت "هَاجِر" بِسَعَادَةٍ، لَتَهَمَس بِثِقَةٍ
وَنظَرَاتِهَا مَثْبِتَةٌ عَلَيْهِ:

- أَحِبُّ أَشُوفٍ. فَيُنِ ابْنِي بَقِي؟

قَالَ "أَشْرَف" بِغَضَبٍ: انْسِي، دَهْ مَشْ
ابْنِكَ.

رَدَّتْ "هَاجِر" بِتَحَدِي: ابْنِي غَضَبٌ عِنْدَكَ
وَعَنِ الدُّنْيَا كُلِّهَا.

سَخَّرَ "أَشْرَف" مِنْهَا:

- ابْنِكَ الَّتِي سَبَيْتِيهِ وَهُوَ عِنْدَهُ سَنَتَيْنِ
وَمَهْتَمِّيشْ إِيَّاهُ الَّتِي مُمْكِنٌ يَحْصُلُ لَهُ؟
أَهْمُ حَاجَةٌ عِنْدَكَ إِنَّكَ تَكُونِي حُرَّةً، وَهِيَ
أَنْتِ حُرَّةٌ. مَا لَكَ بَقِي بَابْنِي؟

قالت "هاجر" بانفعال: أنت إزاي نسيت
اللي حصل؟ واحد زيك محدش يقدر
يستحمله يوم واحد، وأنا استحملتك أربع
سنين. لما سبت ابني كان غصب عني،
مكنش بإرادتي.

لم يهتم "أشرف" بما تفوهت به، ليقول
بحزم لإنهاء النقاش:

-اسمعي يا دكتورة هاجر، ابنك تتسيه،
لأن أنا مستحيل أسويه مع واحدة أنانية
زيك.

غضبت "هاجر" من سخريته ولا مبالاته
تجاهها، وقالت بغضب:

-اسمع، أنا جيت أتكلم معك بالحسنى،
وأنت رفضت. أنا رفعت عليك قضية

حضانة، وهاخذ ابني من المحكمة
غصب عنك وعن الدنيا كلها.
نهض "أشرف" لكي يغادر وهو
يخبرها:

-مازن عنده خمس سنين وعارف هو
عايز يعيش مع مين، لأنه مستحيل
يختار يعيش مع واحدة ميعرفهاش.
أنهى حديثه، ثم دفع الحساب وغادر،
محاولاً الاتصال بـ "نور" لكنها لا ترد.

سقطت دموعها التي حاولت إخفاءها
عليهم. يا الله! هو يكذب، هو كاذب،
كذب مرة واثنين، وهي حمقاء لا تفهم
ما حدث. أخبرها أن زوجته "رحمها
الله"، والآن ترى المرحومة أمام

عينيها. وهو، هو ماذا؟ هو لم يخبرها
الحقيقة. إذن ماذا تفعل الآن؟ هي تحبه،
بل تعشقه. متى وكيف أحبته لهذه
الدرجة؟ لا تعلم، لكن قلبها الأحمق يتألم
بشدة...

جلست على جانب الطريق تضع يدها
على وجهها، وهي تبكي بعنف. دقائق
مرت عليها وهي تبكي بانهيار ولا تهتم
بالمارة، ولا بالفتيات اللواتي جلسن
بجوارها يحاولن معرفة ما حدث لها.
تساءلت إحدى الفتيات التي كانت تجلس
بجوارها، تربت عليها بحنان:

-أنتِ كويسة؟

رفعت "نور" وجهها للفتاة، لترى فتاة
ترتدي زيًّا شرعيًّا وتضع نقابًا يظهر منه

عيناها التي تبتسم بتشجيع أن تخبرها
ما حدث. انتقلت الابتسامة إلى "نور"
وهي تمسح دموعها:
- أنا كويسة.

نهضت "نور" لتنهض الفتاة معها،
وتحاول ترتيب مظهر "نور" الذي
أصبح فوضوياً بسبب ما حدث. لتقول
"نور" بخرج:
- شكراً... بعد إذنك.

تحركت "نور" بعيداً عن التجمع، لتجد
نفس الفتاة تسير خلفها. وقفت لتقترب
الأخرى منها:
- أنتِ رايحة فين؟

أجابت "نور" بخفوت: الجامعة.

تحدثت الفتاة بمرح: حلو، يبقى طريقنا واحد.

ثم مدت يدها لتصافحها: أنا مريم، وأنتِ؟

صافحتها "نور" بهدوء: أنا نورهان، بس أصحابي يقولولي يا نور.

ابتسمت "مريم" وهي تسير بجانبها:
-ماشي يا نور.

نظرت لها "نور" من أعلى للأسفل، ثم نظرت لنفسها وقالت بتردد:
-ينفع أسألك على حاجة؟

ردت "مريم" بجدية: طبعًا يا بنتي، اتفضلي.

ترددت "نور" ثم تساءلت بخجل من تدخلها فيما لا يعنيها:

- هو أنتِ إزاي لابسة كده في الحر ده؟

وعلى عكس المتوقع، شعرت "مريم"

بالسعادة من سؤالها، لتجيب:

- "فَرِحَ الْمُخَلَّفُونَ بِمَقْعَدِهِمْ خِلَافَ رَسُولِ

اللَّهِ وَكَرِهُوا أَنْ يُجَاهِدُوا بِأَمْوَالِهِمْ

وَأَنْفُسِهِمْ فِي سَبِيلِ اللَّهِ وَقَالُوا لَا تَنْفِرُوا

فِي الْحَرِّ قُلْ نَارُ جَهَنَّمَ أَشَدُّ حَرًّا لَوْ

كَانُوا يَفْقَهُونَ."

ثم أضافت: ركزي معي يا نور. مفيش

خلاف إن الجو حر، المشكلة كانت لما

واحد قرر ما يجاهدش نفسه ويستحمل

الحر ده. هي دي. ربنا يا نور، عمل

الدنيا كده، صعبة وفيها مشاكل. وعمل

الطاعة كده، ساعات ثقيلة ومحتاجة

قوة. وعمل المعاصي كده، فيها لذة

وجاذبية نحو شهواتك. وكل ده عشان
يبان... مين لما يشوف "الحر" ده هيجي
على نفسه، ومين هيفكس ويقرر يقعد
في الظل ويريح دماغه. هتلاقي "الحر"
ده في الحجاب وفي الصدقة، هتلاقيه في
الفرجة على الحرام والغيبة والشتيمة،
في كل صغيرة وكبيرة.

ثم قالت بابتسامة: فهمتي يا نور إنك
لازم تجاهدي نفسك عشان الجنة
تستاهل.

ابتسمت "نور" وقد تناست سبب
حزنها:

-فهمت.

قالت "مريم" بعدما انتهى طريقها لتتظر
إلى "نور":

-مش هسأك عن المشكلة اللي خلتك
تقعدني تعيطي في الطريق لأنها حاجة
خاصة، بس هقولك آية قرآنية
المفروض تردديها كل ما يحصلك حاجة،
لأنك متعرفيش فين الخير. كمان ما
تاخذيش بظاهر الأمور، لأن أكيد في
حاجات مخفية وراء كل حاجة بتحصل.
وخدي عبرة من قصة الخضر مع موسى
عليهما السلام

'وَعَسَى أَنْ تَكْرَهُوا شَيْئًا وَهُوَ خَيْرٌ لَكُمْ
وَعَسَى أَنْ تُحِبُّوا شَيْئًا وَهُوَ شَرٌّ لَكُمْ وَاللَّهُ
يَعْلَمُ وَأَنْتُمْ لَا تَعْلَمُونَ.'

أنهت "مريم" حديثها ثم استأذنت، تاركة
"نور" تعيد حساباتها.

كانت "مريم" كعابر سبيل ترك أثرًا
جميلًا في قلب "نور" لا يزول ورحلت،
لتتطبق عليها المقولة:

"فما نحنُ في الدُّنيا إلا ضُيوف، وما
على الضيف إلا الرحيل."

انتهت المحاضرة الأخيرة ليتحرك
الجميع للخارج، ولم يتبق إلا القليل،
ومنهم ثلاث أفراد من فرقة "المجانين".

انتقلت نظرات "بسملة" في المدرج،
تقول بحزن:

-خلصنا-

تساءلت "دعاء" بشرود في ذكرياتها
معهم:

- تفتكروا هنتقابل تاني؟

ردت "جيهان" عليها: إن شاء الله، بس
مش زي الأول، لأن كل واحدة فينا
هيكون ليها حياة تانية. ممكن نتقابل في
المناسبات.

اقتربت "بسمة" من "دعاء"، تضع
رأسها عليها، تهمس بحزن:

- أنا مستعدة أعيد السنة مرة واثنين،
المهم إنكم تكونوا معايا، لأنني مش
عايزة أسيبكم.

ردت "نور" مازحة: بسمة اللي من
يوم ما عرفتها عايزة تتخرج وتحقق
حلمها بتقول كده؟

ظهرت شبه ابتهامة على وجهه
"بسمة"، لتعدل وهي تنظر إلى "نور"

التي أتت لتو وتحركت لتجلس بجانب
"دعاء":

-لو حلمي هيبعدني عنكم يا نور، أنا
مش عايزاه.

ربّيت "جيهان" عليها بحنان: مفيش
حاجة هتبعنا عن بعض.

ثم أكملت بمرح: وبعدين لسه فيه
امتحانات، استني يمكن نعيدها كلنا.

سخرت "نور" منها: ليه ياختي، هما
فاشلين زيك؟

(مشيرة إلى "دعاء") دي واحدة جوزها
دكتور، طول الليل يذاكرها ويجي عندها
يشرح لها اللي مش فاهما.

(ثم مشيرة إلى "بسملة") ودي واحدة
بتذاكر ليل نهار، فأكرة نفسها حفيذة
"عبد الرزاق السنهوري".

(عبد الرزاق السنهوري: رجل القانون
وواضع صياغة القانون المدني المصري
قديمًا).

تذمرت "بسملة" منها وهي تضربها
بخفة على وجهها:
-الله أكبر الله أكبر في عينك.

نظرت لها "جيهان" بحنق: لما نشوفك
إنتِ يا نوره هانم.

ردت "نور" بتكبر وغرور مصطنع:
-هتشوفي، استتي وشوفي أشهر محامية
في التاريخ.

قاطعت "دعاء" حديثهم وهي تتساءل:

-آمال كنتِ فين يا نور؟

تذكرت "نور" ما حدث، لكنها لا تريد أن
تخبرهم الآن وتزيد حزنهم عليها، فكل
واحدة منهن تحمل همًّا، لتجيب
باقتضاب:

-كنت مع "أشرف". المهم، امتحاناتكم
امتى؟

ردت "بسملة": بعد أسبوعين.

تهددت "نور" تقول بشرود: ياااه،
معقول السنة خلصت بسرعة كده؟

ردت "دعاء" بمـرح: الحمد لله،
وهخلص منكم وأتجوز.

اشتعلت النظرات بينهم ليحدقوا بها،
وهي تتساءل بخوف:

-إيه؟ مش هتجوز؟

أردفت "جيهان" بتحذير، وهي تنظر إليهم:

-محدث هيتجوز من غيري.

غمزت لها "بسملة" بمشاكسة: ولا غيري يعني. هتستتوا لما أدور على فارس أحلامي.

رفضت "دعاء" هذا التحذير الذي ينبثق من أعين "جيهان":

-انسى. أنا هخلص الامتحانات وأتجوز. ولو 'فارس' ما اتجوزنيش، هتجوزه أنا.

صفعتها "نور" على رأسها تصيح بحنق:

-اتقلي شوية ياختي، وخلي عندك كرامة.

ردت لها "دعاء" الصفة:

- اتقلي إنتِ. أنا هتجوز بعد ما أخلص،
اللي عايز يتجوز معايا ينجز، قدامكم
شهر. وأنتِ يا جيهان، مقولتيش
هتعملي إيه؟

تتهدت "جيهان" ثم أخبرتهم بعد تفكير:
- محتارة وخايفة بعد اللي حصل... صح،
أنا ما أعرفش "إبراهيم" كويس، بس ما
توقعتش يعمل كده.

دافعت "نور" عنه: هو ما كانش موافق
على فكرة، بس إحنا اللي أقنعناه.

صاحت "جيهان" بضيق: وتقنعوه ليه يا
مصيبة؟ اللي محبوس ده ابن خالك!
ردت "نور" بلا مبالاة:

- ياختي هيطع يعني. هيحصلوا إيه؟

أردفت "جيهان" بجديّة: هو ده اللي
هيحصل. اتصلي بـ "أشرف" وهو
يتصرف بسرعة.

ردت "نور" بغضب: لا!

نظر لها الجميع بتساؤل، لتجيب بخفوت:

-قصدي، لسه قافلة معاه. كلمي
"إبراهيم" إنت، وهو يكلمه.

تساءلت "بسمة" بشك: إنت متخاف
معاه ولا إيه؟

ردت "نور" بهدوء: لا... هو... بس...

قاطعتها "دعاء" بتحذير: نور؟

أغمضت "نور" عينيها بقوة:

- هقولكم بعدين. الموضوع كبير ومش
حابة أتكلم دلوقتي.

تفهموا ما تمر به، لتتحدث "بسمة":

-المهم كده إحنا خلصنا، الحمد لله. فأنا
عايزة أروح مشوار مهم قبل ما أرجع
البيت، عشان كده مش هطلع من البيت
غير لما تبدأ الامتحانات.

يعلمون أين تريد أن تذهب، ومع ذلك
تساءلت "نور":

-مشوار إيه؟

أجابت "بسملة" ببعض الحرج: عايزة
أظمن على 'ديالا'. هتيجوا معايا؟

نفت "جيهان" برأسها وقالت:

-أنا لازم أتكلم مع 'إبراهيم' ضروري.
فخدي 'نور' و'دعاء'.

رفضت "نور" هذا الاقتراح: لا، أنا
هروح معاك إنت، و'دعاء' تروح مع
'بسملة'.

نظرت "بسملة" إلى "دعاء" لتضحك
الأخيرة: هتصل بـ 'فارس' وأقوله...

وصلت "جيهان" و"نور" إلى المشفى
وتحركتا نحو الطابق المنشود، لتقول
"نور":

-حاولي مترغيش كثير، عشان عايزة
أرجع البيت وأنام.

نظرت لها "جيهان" وتساءلت بحيرة:

-من إمتى وإنتِ بتتامي في النهار؟
وبعدين مقولتيش مخبية إيه؟

كادت "نور" أن تجيب برد مقتضب،
ولكن قاطعها اصطدامها بجسد امرأة
أثناء سيرهما باتجاه مكتب "إبراهيم"،
لتسقط أرضاً بسبب عدم توازنها.

اعتدلت "نور" وعدلت ثيابها لتنهض،
ولكن أثناء ذلك سمعت صوت السيدة
التي اصطدمت بها تعتذر بلباقة:

-آسفة، كنت مركزة في التقرير
وماشفتكيش.

نهضت "نور" ونظرت إليها لتخبرها أنه
لا بأس، فهي أيضاً مخطئة. لكنها
صُدمت... تلك السيدة لم تكن سوى
"الدكتورة هاجر"، طليقة زوجها!

يا الله، من بين جميع من في المشفى، لا
أصطدم سوى بها؟

ابتسمت "هاجر" بسخرية من صدمتها
لتتساءل:

-مالك، اتخضيتي ليه؟

نظرت لها "نور" بتحدٍ وغضب خفي:

-وهتخض ليه؟ شوفت عفريت؟

اقتربت منها "هاجر" وربتت عليها
بحنان كأنها صغيرتها، وقالت:

-اسمعيني يا حبييتي، دي نصيحة لوجه
الله: ابعدي عن "أشرف". ده أسوأ
شخص ممكن تشوفيه في حياتك. أنا
مش هقولك تفاصيل، بس إنت لسه
صغيرة على الهم اللي هتشيله لو كملتي
الجوازة دي.

حدقت بها "نور" بتشتت وخوف من
نبرتها ونظراتها التي لا تمت للحقد
والكره بصلة:

- ليه؟

ابتسمت "هاجر" بوجع حينما مر شريط
حياتها أمامها، وغادرت دون كلمة.

شعرت "نور" بالوجع الذي تسرب من نظراتها ولا تعلم الآن ما عليها فعلة.

كانت "جيهان" تتابع ما يحدث بصمت إلى أن غادرت الطيبة بعد حديث لم تفهم منه شيئاً. فسألت "نور" التي تتنفس بصعوبة:

-مين دي يا نوره؟ وليه بتقول كده عن "أشرف"؟ أنا مش فاهمة حاجة! وإنّ ليّه خايفة كده وزعلانة؟ فهميني، فيه إيه؟

لكن "نور" كانت في عالم آخر، لم تستمع لشيء ولا تفهم شيئاً. خائفة، بل تكاد تموت رعباً من أن تكون الطيبة على صواب. ولكن قلبها ما زال ينبض باسمه، يكذب كل ما يحدث، ويبرر له

إخفاء أمر طلاقه، ويضع له أسبابًا
منطقية.

هي تثق به، تثق أنه شخص رائع لم
يكن سيئًا معها أبدًا.

مع ذلك، تكاد تقسم أن الطيبة لا تكذب.
حديثها الذي يقطر حنانًا، ونظراتها التي
تتوسل لها أن تبتعد، خوفًا عليها من
تجربة مرّت بها قبلها، كلها أمور
أربكتها.

فاقت من شرودها على يد "جيهان"
التي تسألها بخوف عما حدث لها:
-نوره، فيه إيه؟

ابتسمت لها ابتسامة باهتة وقالت:
مفيش. ويلا نروح للدكتور بتاعك عشان
نخلص.

وعلى بعد صغير، كان يسير كعادته بين
طرقات المشفى بابتسامة تأسر القلوب،
فرأى "إبراهيم" "جيهان" تتحدث مع
صديقتها، فتقدم منهما بسعادة ظاهرة،
وقال عندما اقترب:

-السلام عليكم ورحمة الله وبركاته.

انتقلت ابتسامته إليهما وهما تردان
السلام:

-وعليكم السلام ورحمة الله وبركاته.

ليقول "إبراهيم" وما زالت الابتسامة لم
تغادر وجهه كالمعتاد:

- المستشفى نورت بوجودكم.

خجلت "جيهان" بشدة وهي تنظر بعيداً

عنه، لترد "نور" عليه:

-منورة بوجود حضرتك.

ثم وجهت حديثها إلى "جيهان":

-أنا هنزل أشترى حاجة عبال ما

تخلصي، عشان ما نتأخرش.

تساءلت "جيهان" بشك: حاجة إيه؟

أخبرتها "نور" وهي تبتعد عدة

خطوات:

-هشترى حاجة آكلها، عشان جعانة.

كانت تكذب، و"جيهان" تعلم ذلك،

لتقول:

-استني يا نوره، أنا هروح معاك.

قاطعتها "نور" بجديّة: لا، شوفي إنت

جايه هنا تعملي إيه لحد ما أجي.

وغادرت لتظل "جيهان" تنتظر لأثرها
بقلق. فسألها "إبراهيم" باهتمام:
- فيه إيه؟

صرفت نظرها عن "نور"؛ فيجب أن
تتهي ما جاءت لأجله، وبعدها تتفرغ لـ
"نور" وتعلم ما بها. فقالت:
- كنت عايزة أتكلم مع حضرتك.

أشار صوب مكتبه وهو يخبرها بصدق:
ده شيء يسعدني.

وصلت "بسملة" و"دعاء" إلى منزل
"تامر"، لتدق جرس الباب. وبعد دقيقة،
أتى "كريم" ليفتح الباب ليتفاجأ
بوجودها.

قالت "بسملة": السلام عليكم، "ديالا"
موجودة؟

فهم "كريم" سبب وجودها، هي جاءت
لتطمئن على شقيقته وربما شقيقه هو
من طلب منها ذلك. تتحجج بعدما ظل
واقفاً في مكانه ولم يرد عليها:

-و عليكم السلام ورحمة الله وبركاته.
اتفضلي.

تركهما عند الباب ودخل ليخبر "سلمى"
أو والدته لاستقبالهما.

وبعد دقيقتين، أتت "سلمى" ترحب بهما
ودلتهما على غرفة الاستقبال، لكنها لم
تتعرف على "بسملة" لتسألها بتساؤل:

- هو أنا شفتك قبل كده؟

ردت "بسملة" عليها باقتضاب: أيوة.

تساءلت "سلمى" مرة أخرى: فين؟

يا الله، هذه السيدة تريد إحراجها! ردت
بخفوت:

-في بيتنا لما جيتي مع الجماعة تطلبوا
إيدي.

تذكرتها "سلمى"، وتذكرت حزن
"تامر" في ذلك اليوم، لتقول بحزن:

- أيوة... وإنّ رفضتي مع إن "تامر"
كويس مش وحش زي ما إنّي فاكرة.

انتقل الحزن إلى "بسملة"، لترد
باختصار:

-نصيب.

ابتسمت "دعاء" وهي تسأل: آمال
"ديالا" فين؟

بادلتها "سلمى" الابتسامة وقالت:

- شوية وجاية لأنها كانت نايمة، وأكيد
'كريم' قالها إنكم هنا. وأنت مين؟
أجابت "دعاء": أنا 'دعاء'، صاحبة
'بسملة' واتعرفنا على 'ديالا' من فترة
قريبة.

صممت "دعاء" للحظة وهي ترى
نظرات صديقتها التي تبحث عن شيء
في المنزل كأنها لا تصدق أن "تامر"
غادر البلد. فسألت:

- هو الأستاذ 'تامر' مسافر، صح؟
حدقت بها "سلمى" بشك: وأنتِ عرفتي
مين؟

ردت "دعاء" بهدوء:
-من 'مارس'، أخو جوزي. أكيد عارفه
إنه طالب إيد 'ديالا'.

المفاجأة لم تكن من نصيب "سلمى"
فقط، بل من نصيب "بسملة" التي لم
تكن تعلم أن شقيق "فارس" يريد
الزواج من "ديالا". نظرت إلى "دعاء"
التي فهمت نظراتها، وأشارت إليها
بمعنى: "سنتحدث لاحقاً."

قالت "سلمى" بمرح: يعني أنتِ هتكوني
سلفة 'ديالا'.

ابتسمت لها "دعاء": إن شاء الله.

همست "سلمى" باشتياق: تامر وحشني
والله... يا رب يرجع بسرعة.

وقحة! نعم، كيف تتجرأ وتقول هذا
أمامها؟ ألا تخجل؟ هي زوجة أخيه!
نظرت لها "بسملة" بشر، ثم قالت بحدة
مقصودة:

- "ديالا" فين لو سمحت؟ لو لسه نايمة
يبقى نجيبها وقت تاني.

نظرت لها "سلمى" بخرج من طريققتها،
وقبل أن ترد سمعت صوت "ديالا" تقول
بهدوء:

- السلام عليكم.

نهضت "دعاء" لتعانقها وهي ترد
السلام، وكذلك فعلت "بسمة" التي
تناست ما قالت "سلمى" وردت عليها
السلام بمرح:

-و عليكم السلام يا جميلة الجميلات. كله
ده تأخير؟

أجابتها "ديالا" بخرج: معش، كنت
نايمة. "نور" مجتش معاكم ليه؟
ردت "بسمة": عندها مهمة وطنية.

ضحكت "ديالا": يا خوفي من وطنية
"نور".

"بسملة" أضافت "ديالا" في جروب
"فرقة المجانين"، ودائمًا تتصل بها
وتتحدث معها. وهذا أحد الأسباب
الرئيسية التي جعلت "ديالا" تشفي مما
حدث لها.

شاركتها "دعاء" الضحك وهمست:

- أنت لسة في البداية، مشفتيش الوطنية
اللي بجد.

توقفت "ديالا" عن الضحك وقالت: لا يا
عم، كفاية اللي شوفته في اليومين اللي
فاتوا.

تساءلت "بسملة" بحنان وهي تربت
على يدها:

-المهم طمني علك يا قلبي.

تهدت "ديالا" وأجابتها بشبه ابتسامة:

-الحمد لله على كل حال.

واستمر الحديث بينهن لما يقارب

الساعة بين مرح وجد، ونظرات

"بسملة" المصوّبة نحو "سلمى" التي

لا تفهم لماذا هي غاضبة منها.

نظراته تابعتها باهتمام وهي تجلس

بتوتر وخجل شديد منه. تتحنج بخرج

ليسأل باهتمام:

-قلتي إنك عايزة تتكلمي معايا، أنا

سامعك.

تمالكت نفسها لتقول بجديّة: متوقعتش
منك اللي حصل، مكنتش أتوقع إنك تعمل
كده. خيبت ظني فيك.

كلماتها سقطت عليه كالنيران، ليدافع
عن نفسه:

-أقسمك إني كنت رافض، بس مكنش
فيه حل تاني.

تهدت وهي تتحاشى النظر له ولم تقبل
ما قال:

-فيه ألف حل إلا إنك تظلم شخص بريء
بتهمة زي دي.

يعلم أنه مخطئ ولا يوجد مبرر لما
ارتكبه بحق نفسه قبل حقها وحق من تم
اعتقاله بسببه. قال بصوت منخفض:

-أنا عارف إني غلطان، بس صدقيني
مكنش فيه حل تاني عشان الخطوبة
تتلغي.

نظرت له برفض:

-حتى لو، مكنش ينفع تعمل كده. لأن
اللي في الحبس ده ابن عمي، وتحبس
بسببنا.

نهض ليجلس في المقعد المقابل لها،
يتوسلها بنظراته أن تغفر له:

-أنا آسف... بس فكرة إني أخسرك كانت
أقوى من كل حاجة، أقوى من مبادئني
وكل اللي اتربيت عليه. عشان كده
اتنازلت عن كل ده ووافققت على
اقتراحهم.

تتهدد وهو يقول: صعب عليا جدًا إن
أخسرك. إنتِ لحد اللحظة دي متعرفيش
إنك أغلى عندي من الدنيا وما فيها. أنا
عارف إنني غلطان، بس مكنش ينفع إنك
تكوني لحد غيري.

رغم انزعاجها الشديد مما حدث، لكنها
ابتسمت له، وشعور السعادة يزداد
داخلها كلما التقت به. هذا الرجل هدية
القدر لها. قالت بعفوية:

-حصل خير. المهم قولي حصل إيه
بالظبط، ومحمد هيطلع إمتي؟

انزعج من اهتمامها بإبن عمها، لكنه
تغاضى عن ذلك وهو يتذكر ما حدث
ويرد عليها:

Flashback

كعادتها، اتخذت "نور" دور القائد رغم

أنها أصغرهم:

-الحل عندي!

نظر لها الثلاثة بترقب، فقالت وهي تنظر

لـ "أشرف" الذي يجلس أمامها:

-اسمع يا "أشرف باشا"، أنت هتستغل

معارفك وتلبسه قضية وتقبض عليه،

وبعدها...

قاطعتها "بسملة" بصفحة على رأسها

وهي تصيح بحنق:

-قضية إيه يا مصيبة! عايزة تودي ابن

خالك في داهية؟!!

أردفت "نور" بتذمر وهي تنظر لها:

-عشان أنقذ صحتك! وبعدين اصبري

عشان أفهمكم.

نظر "إبراهيم" إلى "أشرف"، ليراه
يبتسم بسمة سوداوية وكأنه يوافقها
الرأي. فاعترض:

- لا طبعًا! فكري في حاجة تانية.
مستحيل نظلم حد حتى لو شخص حقير
زي ابن خالك.

رد "أشرف" عليه: اسمعها الأول. كملني
يا 'نور'.

قال جماته الأخيرة وهو ينظر لـ "نور"،
لتكمل:

- كده كده هيطلع، بس لو ما عملناش
كده يبقى انس 'جيهان'. أنا سمعتهم
بيتكلموا عن كتب الكتاب مش بس
خطوبة، و'جيهان' حتى ما تعرفش!

ما زال "إبراهيم" معترضًا رغم صدمته
مما تقول. هل سيتم عقد قرانها
ويخسرها للأبد؟! قال:

-ماشي، بس أكيد فيه حل تاني غير ده.

نفت "نور" برأسها: لا. مفيش غير
الحل ده. لازم 'محمد' ما يكونش موجود
بكرة.

اعترض وأصر، لكن في النهاية رضخ
لاقتراحهم خوفًا من أن يفقدها.

تحدث "أشرف": ما تقلقش يا 'إبراهيم'.
هو يومين وهيطلع.

تساءلت "بسمة": طيب يعني حضرتك
هتتهمه بايه؟

رد "أشرف" عليها:

-فيه قضية ماسكها واحد صاحبي عن بنت تم الاعتداء عليها. هخليه متهم فيها، وبعدها البنت لما يتعرض عليها أكيد مش هتعرفه وقتها وهيطلع. الموضوع كله هياخد يومين مش أكثر. وضعت "بسملة" يدها على فمها بصدمة:

-يا ربي! هتودوا الراجل في داهية عشان هيخطب؟!!

زجرتها "نور": بس، إنت مالكيش دعوة. وأنا و'بسملة' و'دعاء' هنحاول نخليهم ما يلبسوش الشبكة لحد ما تيجي الحكومة.

ثم صفتت بحماس: كده كله تمام، وكل واحد عارف هيعمل إيه!

نظرت لها "بسملة" بضيق، و"إبراهيم"
بعدم فهم لما تفعل. هل هي سعيدة بما
ستفعله باين خالها؟! أما "أشرف"،
فكان ينظر لها بابتسامة وحب.

Back

بعدها قص عليها ما حدث، أخبرها:
-اطمني، ابن عمك هيطلع بكرة. وحقك
عليا... مكنش قصدي أزعلك.
ابتسمت له بامتنان وقالت بصدق: أنا
مش زعلانة منك. بالعكس، أنا مبسوطة
جدًا إنك متمسك بيا، بس مكنتش عايزة
إنك تتصرف تصرف زي ده بسببي.
يا الله! ابتسامتها تجعله يفقد صوابه.
هذه الفتاة بكل ما فيها لعنة أصابته منذ
رأها. قال:

-مستعد أعمل أي حاجة عشائك.

ولجت إلى مكتبها ثم جلست على أقرب
مقعد بإهمال، تتذكر كيف واجهت الجميع
وتزوجت من شخص لا يرحم. عائلتها
كلها رفضت زواجها منه، ولكن مع
إصرارها رضى والدها للأمر. وليته لم
يقبل.

Flashback

صرخت بألم مما يفعله بها، لتتراجاه
ببكاء:

-أشرف، أنا أسفة! حقك عليا، والله ما
هعمل كده تاني. بس كفاية... مش هقدر
أتحمل أكثر من كده!

انطلقت منه ضحكات ساخرة وهو يقول
بغضب، ويده ما زالت تجذب شعرها
بقوة:

-ده لو أنا سببت فيك نفس، تعلمي كده
تاني!

عاد يضربها بقوة وغضب، كأنها عدوة
له وليست زوجته، وهي ما زالت تصرخ
بوجع وقلّة حيلة. عادت لتترجأه لعله
يرحمها ويتركها تذهب لطفلها الصغير،
الذي يبكي منذ ساعة ويكاد يلفظ أنفاسه
الأخيرة:

-خلاص، والله هسمع كلامك! ولورن
عليامش هرد! بالله عليك، سبني...
'مازن' هيموت من العياط، عايزة
أسكته.

صفعها على وجهها بغضب: قاتلك مائة
مرة، أنا بكره أبوكي ومش عايزك
تكلميه! وحذرتك، بس إنت غيبة
مبتفهميش!

بكت وجعًا، بكت ندمًا، بكت خذلانًا، بكت
ظلمًا. فإن كان هو ظالمًا، فهي كذلك.
وأول من نال ظلمها طفلها الحبيب، الذي
ابتلّي بأب كهذا.

ظل يوجه لها الضربات لوقت لا تعلم
عدده، ثم تهد وهو يضربها بقدمه مرة
أخرى ويبصق في وجهها بتقزز قبل أن
يغادر:

-جاكِ الهم... تعبتيني.

تحاملت على نفسها لتنهض وتتجه
صوب طفلها بلهفة وألم. جذبتة من

الفراش لتحتضنه وهي تجلس به على
الأرض، وتهمس له ببقاء:
-حقك عليا... سامحني.

Back

مسحت دموعها بأنامل مرتجفة وهمست
لنفسها بكلمات داعمة:
-انتهى كل ده... دلوقتي ميقدرش يعملك
حاجة.
اعتدت في جلستها وهمست مرة أخرى
بوجع:
-حقك عليا يا 'مازن'... يارب تسامحني.

الفصل السادس والعشرون

يموتُ الإنسانُ حزناً إذا خذله أحدُهم
فما بالك بمن خذلتُهُ أمّة !

رفع  PS 

عادت إلى المنزل لتجد والدها وزوجته
يجلسان أمام التلفاز برفقة شقيقاتها.
سخرت داخلها من هذا الوضع، لماذا
هي الوحيدة المنبوذة بينهم؟ لماذا زوجة
أبيها تبغضها؟ لماذا لم تجلس معهم يوماً
لتضحك وتمرح برفقتهم؟

تغاضت عن كل ذلك، وتنفست بعمق كي
تهدأ، ثم ألقت السلام عليهم بهدوء:
-السلام عليكم ورحمة الله وبركاته.

رد الجميع عليها: وعليكم السلام ورحمة
الله وبركاته.

اقتربت بخطوات من والدها، وقالت
برسمية:

- عايزة أتكلم مع حضرتك يا بابا.

نظر لها "عثمان" باهتمام: خير؟

نظرت لزوجها أبيها لتجدها تنتظر لها
برفض، كأنها تحذرها من الحديث، ولكن
لم تستسلم لنظراتها، وقالت باقتضاب:
- محمد.

أجابها والدها كي يطمئنها، إذ ظن أنها
تقلق بشأنه:

- متقلقيش، المحامي طمني وقال هيطلع
النهارده، وبعدها أبقى نشوف يوم نكتب
الكتاب على طول.

توترت قليلاً، ولكن تماكنت نفسها،
وهزت رأسها نافية:

- أنا مش قلقانة عليه... أنا مش عايزاه أصلاً.

انتفض والدها صارخاً في وجهها، لتعود خطوات للخلف بخوف:

-بتقولي إيه؟"

ردت "جيهان" ببكاء: بابا، حرام عليكم! أنا مش عاوزة أتجوز 'محمد'!

صفعها والدها صفعه دوى صوتها في الأجواء. وضعت يدها على وجهها، وأكملت حديثها بوجع:

-إشمعنى أنا اللي أجبر على واحد مش عايزاه! مين اللي اختارك يا بابا أو جبرك تتجوز ماما؟

جذبتها زوجة أبيها بعيداً، تحثها على المغادرة:

- امشي دلوقتي!

رفضت "جيهان" وهي تبعد يدها عنها:

-مش همشي! يعني هيرضيكم لما

أتجوزه وأرجع مطلقاً بعد شهر ولا

اتنين؟

عاد والدها يجلس مكانه، يسمع صوت

بكائها، وقال بهدوء لا يناسب ما حدث

منذ ثوانٍ:

- يعني أنتِ عايزة إيه؟

كفكفت دموعها، وقالت برجاء: بالله

عليك يا بابا، أنا مش عايزة أتجوزه.

سألها والدها وهو ينظر لها بدقة: وابن

عمك هنقوله إيه؟

تحدثت بلهفة، وصوتها يحمل آثار

البكاء:

-أنا... أنا أول ما يطلع هتكلم معاه.

أردف "عثمان" بجديفة لا تقبل النقاش
بعدهما رأى نظرات زوجته:

-اعتبري الموضوع خلص، أنا هكلم
عمك وهقوله.

ابتسمت بسعادة تصل عنان السماء:

-شكرًا... شكرًا أوي يا بابا!

تحركت خطوتين لتغادر، لكنها عادت
تنظر لهم بخجل وتوتر، ليبتسم والدها
وهو يقول ليرفع عنها الحرج:

-هتصل بيه عشان أحدد معاه ميعاد يجي
يتقدمك.

همست بصدمة مما قال: بجد؟

أخبرها بصدق: هو شخص كويس
ومحترم، وأنا مكنتش رافضه. أنا كنت

عايزك تتجوزي 'محمد'، بس طالما أنت
مش موافقة يبقى براحتك.

اقتربت منه وعانقته بفرحة لا توصف.
يا الله، هل يعقل أن يتحقق حلمها بهذه
السرعة؟ والداها وافق ببساطة دون
جدال ولا صفعات! فهي الآن كل ما
تمنته أن تنهي هذه الخطبة، ولم تفكر
حتى بشأن الزواج.

دقت "نور" باب منزلها، لتقوم والدتها
بفتح الباب، فدخلت خلفها وهي تتسائل:

-آمال بابا فين؟

ردت والدتها وهي تشير إلى غرفة
الاستقبال:

-في الصالون مع 'أشرف'.

اشتعلت حدقتا "نور" غضبًا، واندفعت لترى ما الكذبة الجديدة التي أتى بها. دخلت الغرفة لترى والدها وشقيقها يتحدثان معه بتلقائية وكأنه فرد من العائلة. إذًا، هو لم يخبرهم ما حدث! لا بأس، ستخبرهم هي.

انتبه لوجودها شقيقها، ليقول بمشاكسة وهو يشير لها بالاقتراب:

- إيه؟ أول ما عرفتي إنه هنا جيتي جري؟ تعالي.

لم تهتم بما قال، فألقت السلام بهدوء واقتربت لتقف أمام "أشرف" مباشرة، وقالت والغضب يسيطر عليها:

- إيه اللي جابك هنا؟

تفاجأ والدها وشقيقها من طريقتها.
وقبل أن يتحدث أحدهما، نظر "أشرف"
إليهما وأردف بهدوء:

-بعد إذنك يا عمي، ممكن أتكلم معها
لوجدنا؟

ردت بعصبية بالغة: مفيش بينا كلام!
اتفضل من هنا، وابعثلي ورقتي، وإلا
قسماً بالله هخليك تندم!

صاح والدها بغضب وكاد أن يصفعها
لتجاوزها الحدود مع زوجها، لكن
"أشرف" وقف أمامها ليمنعه من
صفعها. ثم عاد يقول طلبه مرة أخرى:

-حقك عليا يا عمي، بس مينفمش تمد
إيدك على مراتي. معلش، سبني معها
خمس دقائق، وكل حاجة هتتحل.

صاحت "نور" بعصبيه: مفيش حاجة
هتت...

قاطعها "أشرف" بنظرة حادة وهو
يهتف:

-نور، خمس دقائق، لو معجبك ميش
كلامي همشي.

ثم نظر لوالدها الذي بدوره نظر إلى ابنه
الذي يتابع بصمت، وقال وهو يخرج:
-سيب أختك مع جوزها يا 'محمد'.

نظر "محمد" لشقيقته، يعلم أنها لن
تغضب من أجل لا شيء. ربما فعل لها
شيئاً سيئاً جعلها تثور هكذا. ورغم
اعتراضه الشديد على تركهما، إلا أنه
تركهما مجبراً. وقبل أن يخرج، ألقى

نظرة مهمة لشقيقته ونظرة حادة
لزوجها، وكأنه يحذره في صمت.

وبعدما غادر وأغلق الباب، نظرت
"نور" إلى "أشرف" وقالت بسخرية:

-بسرعة كده لقيت كذبة جديدة؟

لم يهتم بسخريتها، وهو يقترب منها:

-اقعدي يا "نور"، نتكلم بهدوء.

انتفضت "نور" للخلف عندما اقترب
منها، ورفعت يدها كتحذير ألا يقترب:

-إياك تلمسني! ومتقوليش يا "نور"،

اسمي "نورهان" لأن "نور" دي بيقولها

أصحابي أو الناس اللي بحبهم... مش

أنت!

تتهد بضيق وهو يبتعد عنها، ثم جلس

ينظر لها وأشار إلى المقعد:

-اقعدي-

نظرت له بغضب وهي تلقي حقيبة يدها
على المقعد:

-مش هقع مع واحد كداب!

لم يتحمل طريقتهما الفظة، فظل دقيقة أو
اثنتين صامتاً كي يهدأ. ثم ألقى لها
بعض الأوراق على المقعد وهو ينظر
لها بدقة:

-شوفيهم-

لم تتحرك "نور" وظلت تحديق به: إيه؟
دي لعبة جديدة عشان تضحك عليا؟

"يا الله! هذه الفتاة كارثة بكل المقاييس،
أعاني الله عليها."

هذا كان حديث "أشرف" بينه وبين
نفسه، ليتهد وهو يتسم لها:

-شوفي يا "نور" الورق اللي قدامك،
وبعدين اتكلمي.

ظلت "نور" تنظر له وهي تفكر... هل
هذه ورقة طلاقها؟ أيعقل أن يكون فعلها
بهذه البساطة؟ لم يهتم بها وبما ستشعر
به بعد هذه الورقة؟ عادت تنظر إلى
الأوراق بحزن.

-والله مقدر أستغنى عنك، ولا يهون عليا
زعلك.

كان يتابع نظراتها للأوراق وله بشرود،
فعلم بما تفكر. تحدث "أشرف" بنبرة
حنونة أيقظتها من شرودها وكأنه
استمع لأفكارها.

نظرت له لبيتسم وهو يشير إلى
الأوراق:

-اقعدي يا "نور"، شوفيهم ومتخافيش،
مش هكذب عليكِ تاني. كده كده كنت
هقولك، بس نصيب تعرفني بالطريقة
دي.

عاد يخبرها بعتاب: وأنا مقدر زعلك،
عشان كده مش هعاتبك على طريقتك
قدام أهلك.

جلست "نور" بعد تفكير، وجذبت
الأوراق لترى شهادة ميلاد وبطاقة
شخصية قديمة وشهادة ثانوية وشهادة
جامعية. جميعها تحتوي على صورته،
إذا هذه الشهادات تعود له. ولكن ما لفت
انتباهها وأدهشها أن الاسم المدون لم
يكن اسمه. نطقت الاسم باستغراب وهي
تنظر له:

"شريف أبو السعود محمود
المصري؟!!"

وقف "فارس" يتابع العمال بجديّة برفقة
شقيقه، ليجد والدته تدخل إلى الداخل
وتقترب منهم بخطوات واثقة، تنظر
يمينًا ويسارًا، ثم قالت بضيق وهي ترى
تصميم الشقة وما فعله "فارس" بها:
-خسارة فيها.

نظر لها "فارس" بتأفف: ماما!
لتبادلته النظرة بسخرية وهي تشير إلى
العمال:

-نعم يا روح ماما، كل دول عمال عشان
شقة السنيورة؟

مسح وجهه لكي يهدأ، ثم أردف: ماما،
هي مش هتاخذ الشقة معها وتمشي،
وأنا قلت لحضرتك لو مش عايزنا نعيش
معاكم، ممكن أوقف الشغل في الشقة
عادي.

لم ترد عليه وهي تنظر إلى "مارس"،
ليتحدث الأخير بسرعة:

-ماما بالله عليك مش وقت كلام في أي
موضوع دلوقتي، وخصوصاً إن فيه
ناس غريبة في البيت.

أشاحت بوجهها عنهم، ورفعت رأسها
بشموخ وغادرت بثقاة، ليت نفس
"مارس" براحة وهو يستند على أخيه:

-أمك دي غريبة يا أخي، فيه كده؟

ابتسم "فارس" وهو يمسد على شعره
بحنان:

-هي لو سمعتك هتقول أمك هتعملك بان.
ضحك "مارس" وهو يبتعد عنه:
الحمد لله إنها مش بتسمعي وأنا بتكلم،
كانت اتبرّت مني.

رد "فارس" وهو ينظر له ويتابع لمعة
عينيه التي تحكي الكثير:

-متهونش عليها، دأنت الغالي. المهم،
احكي لي، طالع تساعدني ومش بتذاكر
ومش مبطل ضحك، أنت وأصحابك اللي
جابرهم يشتغلوا مع العمال، إيه اللي
حصل خلاك مبسوط بالشكل ده؟

لم يستطع "مارس" أن يخفي سعادته
التي حصل عليها من مكالمة لا تتعدى

الصدقيتين، فرد على شقيقه بحماس:
كلمت الدكتور 'كريم' وقالي أجي أقابل
أبوه يوم الخميس. فقلت إنها ردة إجازة
من الدراسة بمناسبة الخبر الحلو ده.
ولما لقيتك جايب عمال في الشقة، قلت
أجيب العيال وأجي نساعدك.

- عيال في عينك!

تفوه بها أحد أصدقائه الذي استمع إليه
وهو يقترب منهم.

عدل "مارس" حديثه بضحكة: أجدع
رجالة يا باشا.

رفع "فادي" رأسه بغرور مصطنع: أيوة
كده، اتعدل.

ثم وجه حديثه لـ "فارس": ربنا يتم
على خير يا دكتور.

ابتسم له "فارس": اللهم آمين،
وعقبالكم يا شباب.

أنهى حديثه، ليرتفع رنين هاتفه. نظر
إلى الشاشة ليرى اسمها مدوناً "الدنيا
وما فيها"، لتتسع ابتسامته وهو يبتعد
عنهم ليقف عند الشرفة ويرد عليها
بحب:

-السلام عليكم يا حبيبي.
خفق قلبها بعنف إثر تلك الكلمة التي
خرجت منه بتلقائية، لترد بخجل:
-وعليكم السلام ورحمة الله وبركاته.

سأل باهتمام: وصلت البيت يا حبيبي؟
ابتسمت وهي تجيب عليه، فهو طلب
منها أن تهاتفه عندما تعود للمنزل
ليطمئن:

- أيوة، لسه واصله، ورنيت عشان أقولك
زي ما قلت.

صوتها الخجول جعله يحلق في السماء،
ليقول:

- حمد الله على سلامتك يا حبيبتي. معلى
مش هقدر أجي أشوفك اليومين دول،
لأنني مشغول في تجهيز الشقة. هخاصها
وهنروح مع بعض نشترى كل حاجة
عايزاها.

شعرت بالحرص والحزن، فهو أخبرها أنه
سيتولى تكاليف كل شيء ينقصها. ورغم
رفض والدها طلبه، لكنه أقنعه بكل
الطرق أن كل شيء سيأتي لمنزله في
نهاية الأمر ولا فرق بينهم، فهو لا يريد
سوى قلبها. ردت بصوت خافت:

-أنا مش عايزة حا...-

قاطعها بجديفة لا تقبل النقاش: دعاء،
إحنا أتكلّمنا في الموضوع ده كتير،
فبلاش تفتحيه تاني عشان كلامك ده
بيز علي.

ردت عليه بخفوت: مقصدش أزعلك،
بس... قاطعها مرة أخرى: مفيش 'بس'
يا حبيبتى، أنا فاهم قصدك كويس، بس
عشان خاطر، بلاش تفتحي سيرة
حاجة تزعلي منك.

همست بحياء: حاضر.

أردف بحب: وحشتيني أوي.

ارتفعت دقات قلبها، وهمست له بحب:

-وأنت وحشتني أوي.

«شريف أبو السعود محمود المصري.»

تفوهت بالاسم مرة أخرى وهي تترقب

ما يقول، ولم يتأخر لثوانٍ، فقال:

-الحاجات اللي في إيدك دي بتاعتي، أنا

اسمي كان 'شريف' مش 'أشرف'.

تساءلت "نور" بتردد: إزاي؟

تهد "شريف" وهو يخبرها بما أخفى

عنها وعن الجميع:

- 'أشرف' أخويا التوأم، نسخة طبق

الأصل مني، مفيش اختلاف بينا غير

شخصيتنا. كل واحد فينا شخصية

مختلفة.

نظر لها وجدها تتابع باهتمام شديد،

ليكمل:

-من سنين كنا عيلة سعيدة، بس في يوم
بابا قال لـ'ماما' إنه هيخدنا معاه القاهرة
لأنه معزوم على فرح واحد صاحبه، بس
أنا رفضت أروح من غير 'ماما'. فسافر
هو و'أشرف'... ومرجعوش.

تساءلت "نور" وهي تتابع نظرات
الحزن التي علت وجهه:

- أنتم كنتم ساكنين فين؟

أجاب وهو يتحاشى النظر لها:
بور سعيد.

عادت "نور" لتسأل: كان عندك كام
سنة؟ وليه مرجعوش؟

رد عليها بشرود: خمستاشر سنة.

وأردف بعد برهة: بابا كان متعرف على
واحدة أجنبية، وطلبت منه إنه يروحها

ويعيش معاه، وهو وافق وباع التلات
محلات اللي كانوا عندنا. ولأنه متعلق
بيننا، كان عايز ياخدنا معاه، وده اللي
حصل. لما سافر القاهرة، فضلوا أسبوع
هناك، وقدر يقتع "أشرف" إنه يسافر
معاه. و"مي" كانت صغيرة يعني كلمتين
سهل يقتعوها بيهم. وسافر بيهم
واتقطعت أخباره عننا. "ماما" دورت
عليهم ومعرفتش حاجة. فدخلت كلية
الشرطة مخصوص عشان أدور عليهم،
وطلبت من "ماما" نعيش في القاهرة
عشان جامعتي. ومن وقتها واحنا هنا.
صمت ليت نفس بهدوء. لتسأل "نور"
وهي تقترب لتجلس بجواره:

-وبعدين حصل إليه؟ عرفت هما فين،
صح؟

ابتسم عندما اقتربت، ليرد عليها: عرفت
هما سافروا فين، وحاولت التواصل مع
"بابا" أكثر من مرة، لحد ما رد. تقريبًا
كان قاطع علاقته بكل الأرقام المصرية.
المهم، كلمته واقنعتة إنه ينزل وإني
مسامحة. وهو، لأنه كان ندمان على
اللي حصل، رضي وقالي إنه هينهي
شغله وهيسحب ورق 'مي' من الجامعة
وهينزل. يومها كنت فرحان أوي. 'بابا'
هيرجع، وأخويا اللي كنا بنتشارك كل
حاجة مع بعض، وكان حلمنا نكون
دكاترة وفي نفس المجال، هتقابل معاه
بعد كل السنين دي. وأختي الصغيرة

اللي كنت بعترها بنتي رغم إني كنت
صغير، مش كبير أوي. فرحتي يومها
مكنش ليها حدود.

عبثت "نور" في الحجاب بضيق،
ليقترب هو منها عندما لاحظ انزعاجها.
جذب الدبابيس ووضعهم في يدها، ثم
جذب الحجاب ووضعها بجواره. لتضع
"نور" رأسها على قدمه وهي تتسائل:

-ولما نزلوا حصل إيه؟

بعثر شعرها بحنان وهو يخبرها بحزن:

-يومها كانت صدمة ليا لما شفتم. 'بابا'
شكاه كبير مية سنة بسبب الهم،
'أشرف' حقق حلمه وبقي دكتور، لكن
بقي صايع، بيشرب، وكل يوم مع بنت،
وبقي عصبي وعنيد.

أكمل بحسرة بعدما صمت للحظات:

-تخلي "أشرف" اللي كان بيتخايق معايا
لما نتأخر على الصلاة، بقى شخص
مدمن. أما بقى الصدمة الأكبر لما عرفت
إن أختي الصغيرة حامل من غير جواز.
جات تسألني ببساطة لو أعرف دكتور
عشان ينزل البيبي. يومها جن جنوني
وأنا بصرخ في "بابا" وفيها. وأجبرتها
تتصل باللي غلطت معاه وتخليه ينزل،
وأجبرته يتجوزها وكتب عليها وبعدين
طلقها وسافر.

ربتت على ظهره بمواساة، وكادت أن
ترفع رأسها من على قدمه، ليرفض
بإشارة من يده. عاد للعبث في شعرها
وهو يسمعها تهمس بخفوت:

-طيب فين 'أشرف' وإزاي بقيت 'أشرف'
وأنت 'شريف'؟

رد عليها وهو يميل ليقبل جبينها: بعد ما
'مي' اتطلقت، 'بابا' مات. لكن قبل ما
يموت، وصاتي ماقلش لـ'ماما' إنه مات
ولا رجع أصلاً.

تساءلت "نور" بضيق وحيرة: أبوك ده
رجل ظالم! ليه مرضيش يخليك تقولها؟
يعني بعد ما حرمها من ولادها سنين،
مش عايزها تعرف إنهم رجعوا؟

دافع عن والده بحب فطري: 'بابا'
مكنش يقصد يظلمها مرة تانية. هو بس
مكنش عايزها تعرف عشان ما تزعلش.
قال إنها أكيد نسيتهم، فحرام تعرف

ويكون سبب في حزنها. وخصوصًا إن
إخواتي مكنوش حاجة تشرف.

تابع بعد تهيئة: المهم، انشغلت عنهم
فترة، وبعدين رحيت أشوفهم. لقيتهم
الاتنين متجوزين ومش معترفين
بوجودي، فزعلت وقلت خلاص ماليش
دعوة بيهم. وبعد ثلاث سنين، كنت بتكلم
مع واحد صاحبي وعرفت إن 'هاجر'
مرات 'أشرف' رافعة عليه قضية خلع
وسافرت، والمحامي كسب القضية.
سألت على 'أشرف'، عرفت إنه اتقبض
عليه بتهمة تعاطي، وابتقل لمصحة
لعلاج الإدمان. يومها كنت ضايع، مش
عارف أعمل إيه، فقررت أقول لـ 'ماما'
يمكن يسمع كلامها ويقبل العلاج لأنه

كان رافض الكلام معايا. المهم وصلت
البيت، وقبل ما أقول لـ'ماما' حاجة، رن
التليفون برقم المستشفى وبلغوني إن
'أشرف' انتحر.

تفوه بجملته الأخيرة بوجع شديد: يومها
مات 'شريف' وعاش 'أشرف'.

وبعدها دخلت في حالة انهيار ووقف
معي 'إبراهيم' و'مصطفى' صاحبي لحد
ما عدت الفترة دي. وكنت حاسس
بالذنب إنني السبب في اللي حصله.
واتفاجأت لما رحت لـ'مي' إن معها طفل.
سألتها:

-ابن مين؟ قالت إنه 'مازن' ابن
'أشرف'. يومها أخذته منها وأقسمت

أني ها اعتبره ابني وهتكفل به. يمكن
"أشرف" يسامحني لما يجي يومي.

رجعت به وقلت لماما إنه ابني وكنت
متجوز في السر وأمه ماتت.

اعتدلت "نور" في جلساتها تتساعل
باستغراب:

-لحظة بس، بعد كل اللي حصل أمك
معرفة؟

رد عليها بجديّة: ماما عارفة إن بسبب
شغلي بغيب عنها كثير. ولما غبت الفترة
دي مستغربتش لأنني بغيب دايمًا. زعلت
شوية إني خبيت عنها، وبعدين تقبلت
الموضوع وبقت تحب "مازن" أكثر مني.
وده شيء فرحني.

أخذ نفسًا عميقًا وتابع: ورحت أنا غيرت
اسمي في السجل وبقي 'أشرف' بدل
'شريف'.

لم تتوقف 'نور' عن طرح أسئلتها:
وأماك إزاي معرفتش إن 'مازن' اسمه
'مازن أشرف' مش 'شريف'؟

ظهرت شبه ابتسامة على محياها أبعدها
يكون عن السعادة:

- 'أشرف' كان دائمًا متعلق بماما ومش
بيروح مكان من غيرها. واليوم ده كان
فرحان ونفسه يسافر، بس مكنش عايز
ماما تزعل منه. فقلت له: روح أنت على
أساس أنا. وماما افكرت إن 'شريف'
هو اللي سافر مش 'أشرف'. بس بابا
كان عارف لأنه سمعنا وإحنا بنتكلم.

استمعت له "نور" بتركيز وهي تقول:
-إزاي أمك معرفتش إن اللي قاعد معها
"شريف" مش "أشرف"؟ وخصوصًا إن
الأم هي الشخص الوحيد اللي مستحيل
يغلط في ابنه وأكد عارفة تفرق بينكم.
نظر لها وهو يخبرها: كنا نسخة واحدة،
فصعب تفرق بينا. وأنا كنت بتعامل معها
بنفس طريقة "أشرف"، عشان كده
معرفتش إني مش هو.
هزت "نور" رأسها بتفهم، ليجذبها إليه
ويقبل جبينها ويخبرها بصدق:
- قسماً بربي مكذبتش عليك في حرف،
ومستعد أثبتك كل كلمة في كلامي.
هي ما زالت لم تستوعب كل ما قال.
لينهض ويعدل ثيابه ويقول:

- هسنتي رذك، وأتمنى تكوني واثقة إنني
معرفتش ولا واحدة قبلك ولا بعدك، وإنك
أول بنت تلفت انتبهاهي وأول واحدة
سكنت قلبي.

عندما وجدها صامته، تحرك إلى الباب
وفتحه لكي يغادر، لكن توقف مكانه
عندما استمع لصوتها تنطق اسمه
الحقيقي لأول مرة:
- 'شريف'.

استدار لها ليجدها تهزول اتجاهه
وتعانقه بحب. ليبادلها العناق وهو
يتنفس رائحتها ويهمس في أذنها:
- 'شريف' مات يا 'توري'. بلاش تقولي
حاجة من اللي قلتهاك لحد.
همست له بعشق: بحبك أوي.

أبعدها عنه ليقبل وجنتها ويهمس: وأنا
محبتهش ولا هحب حد قدك. أنتِ عمري
يا "نوري".

في الساعة الثانية عشرة، وبعدها أغلقت
الأضواء، جذبت هاتفها وفتحت تطبيق
خاص بالدردشة «الواتس آب». بدأت
تتحدث مع أصدقائها لتخبرهم بما تريد
فعله غدًا. وجدتهم ما زالوا مستيقظين،
فكتبت ما تريد قوله ولم تنتظر طويلًا.

-انسي يا "جيهان"، مش هيحصل.

جملة دونتها "بسملة" بضيق في جروب

فرقة المجانين

لتعود "جيهان" تكتب بتوسل:

-عشان خاطري يا "بسو"، آخر مرة،
ومش هتشوفي وشي تاني غير يوم
الإمتحان.

ردت "دعاء" على "جيهان":

-خلاص يا بنتي، بطلي زن، قلنا لا.

عادت "جيهان"، تكتب"، بضيق:

-عشان خاطري، آخر مرة والله، وإنتم
هتكونوا معايا يعني مش هشوفه
لوحدي.

انزعجت "نور" من عدد الرسائل التي
تحتوي نفس الكلام منذ المساء:

-هو مش بعد يومين جاي يقابل أبوكي؟
اهدي ياختي، وهتشوفيه في بيتكم.

- "جيهان":

قلتكم آخر مرة، عايزة أقوله حاجة
ضروري.

رفضت "دعاء" هذا الهراء الذي يحدث
وقالت بجدية:

- "جيهان" فيه إيه؟ ومن إمتى وأنت
كدا؟ أنتِ قابلتيه مرة واثنين وإحنا سكتنا
رغم إنه غلط ومكنش ينفع تقابليه
أصلاً؛ فكفاية كدا، لما يجي بيتكم ابقي
قوليله الحاجة المهمة اللي أنتِ عايزاها.

ردت "جيهان" عليها:

- عارفة إني اللي عملته حرام، بس والله
ما تخطيت حدودي معاه بحرف، ودي
هتكون آخر مرة أشوفه بره البيت، وإنتم
هتكونوا معايا.

لم يرد عليها أحد لتتهد بيأس من
اقتاعهم وكادت أن تغلق الشات لتجد
رسالة من "منار"، بعد قليل:

-روحي يا "جيهان"، وأنا هاجي معاك.
دول عيال معقدين.

ردت عليها "دعاء" بانزعاج طفيف:

-إحنا مش معقدين يا "منار"، إحنا
خايفين عليها وهي عارفة كدا كويس.
ثم إن الحلال بين والحرام بين، وهي
واثقة إن اللي هتعمله حرام.

تهدت "جيهان"، بحزن:

-عارفة طبعًا، بس قولتكم آخر مرة.

ردت "منار"، باقتراح:

عندي فكرة ونخلص الموضوع. إحنا
نعمل تصويت، لو الأغلبية قالوا

متروحيش يبقى خلاص واقفلي على
الموضوع. ولو العكس يبقى نروح معاك
كلنا، وبالمرّة نشم هوا.

وافقت "دعاء" بسرعة:

-فكرة حلوة، عملها أنا وأحط
الاختيارات.

(بعد دقيقة.)

"دعاء"، تكتب السؤال:

"جيهان تروح تقابل إبراهيم ولا لا؟"

ثم وضعت أربع اختيارات:

١. تروح (محدش يختار دي عشان
حرام).

٢. متروحيش (اللي يختار دي ليه عندي
هدية).

٣. حرام يا مصيبة (واللي يختار دي ليه
مني بوسة).

٤. متروحيش واتقلي لأحسن يفكر
واقعه.

قرأت "جيهان" الاختيارات بضيق ثم
دونت:

-وعلى إيه الاختيارات وتعبه نفسك؟

ضحكت "بسملة"، وهي ترد:

-الديمقراطية في أبهى صورها.

ضحكت "نور" كذلك:

-إيه يا "دعاء" يا حبيبتى، حد مسأطك
عليها؟

شاركت "ديالا" في الحوار والتي كانت
تتابع في صمت:

-أنا اتصدت من الاختيارات دي، بس
كنت متوقعة إن "دعاء" مش هترضى
بسهولة.

- "منار":

أنا كمان اتصدت فعلاً، مكنتش متوقعة
الاختيارات دي.

ردت "دعاء"، بجديّة:

-يعني أمال عايزني أرضى كدا بسهولة؟

كتبت "جيهان"، باختصار:

-خلاص، مش رايحة.

"دعاء"، بابتسامة انتصار:

-أحسن.

كتبت "بسملة" بتعجب:

-إيه يا "دعاء"؟ أنتِ جايله تبقي زي

"نور" بعد ما خلصنا؟ أمال لو مكنش

الدكتور موصّيك تبعدني عنها كنت
عملتي إيه؟

ردت "نور"، بحنق:

-ومالها "نور" إن شاء الله يا أستاذة
"بسملة"؟

ابتسمت "بسملة"، بمشاكسة:

-أحدهما قال إنك كارثة أو مصيبة، أيهما
أقرب.

ردت "نور"، بغضب:

-ماشني يا "بسملة"، لما أشوفك.
وأحدهما ده هيجيله يوم وهطلع عينه.
هخليه يشوف المصيبة على حق.

(تقصد "فارس")

"دعاء": خلاص بقى أنتِ وهي.

"جيهان"، نمتي؟

أجابت "جيهان"، باقتضاب: لا.

ردت "دعاء": طيب، لو الحاجة اللي أنتِ عايزة تقوليها لـ "إبراهيم" مهمة، ممكن تتصلي بييه وتقوليهالو. بس المكالمة متزدش عن خمس دقائق.

ردت "جيهان"، بسرعة وفرحة: بجد؟ أنتِ أحلى "دعاء" في الدنيا. "نور": مادية حقيرة.

(ضحكت "جيهان" ولم تهتم بالوصف، وأغلقت المحادثة مطمئنة.)

الفصل السابع والعشرون

قال حذيفة: دخلت على عمر فرأيتُه
مهمومًا حزينًا، فقلت له:

- ما يُهمُّك يا أمير المؤمنين؟

فقال: إني أخاف أن أقع فـ مُنكر فلا
ينهاني أحدٌ منكم تعظيمًا لي!

فقال حذيفة: والله لو رأيناك خرجت عن
الحق لنهيناك

ففرح عمر وقال: الحمد لله الذي جعل لي
أصحابًا يُقومونني إذا اعوججت.

"اللهم صحبًا ك صاحب عمر"

كأسير تم إطلاق سراحه بعد أعوام لا
يعلم عددها، ليرى أخيرًا شمسًا تضيء
الحياة وتضيء كل شيء داخله، وتجعل
دموعه تنهمر بسعادة لا يستطيع

وصفها. هذا هو شعور "مارس" بعدما أتى موعد المقابلة مع "حسني"، والد "ديالا". وها هو يجلس برفقته في أحد الكافيهات، ليسمع صوت "حسني" الذي سأله بجديّة وهو ينظر له بدقة يدرس كل همسة منه:

- أنت عايز تتجوز 'ديالا' شفقة منك لأنك كنت موجود يوم الحادثة وشفقت اللي حصلها؟

انتفض "مارس" ينفي هذه التهمة الموجهة إليه وهو يقول بصدق:

- أقسمك بالله إن ده مش السبب، ولو ده السبب كده يبقى أنا بظلمها معايا مش بساعدها، لأن مشاعر الشفقة مع الوقت هتروح.

تساءل "حسني" مرة أخرى وهو يرى
صدق ما يقول الآخر:

- وإيه السبب اللي يخلي شاب في بداية
عمره يتجوز واحدة...

صمت للحظات بحزن، ثم أكمل بقوة
بعدما تغاضى عن وجعه على صغيرته:

- رغم إنك تقدر تتجوز أي بنت تتمناها
وتكون عذراء؟

صاح "مارس" به وهو يظن أنه يرى
ابنته جانية وهي المجني عليها:

- حضرتك ليه بتتكلم وكأنها هي المذنبه؟
هي معملتش حاجة وملهاش ذنب في كل
اللي حصلها. هي أحسن بنت في الدنيا
وأنا هكون محظوظ لو اتجوزتها. الناس

المتخلفين بس هما اللي بيفكروا
بالطريقة الرخيصة دي.

أخفى "حسني" ابتسامته ببراعة. فهذا
الشباب الذي يقبع أمامه مثال للأخلاق
والشهادة. يا لحظ عائلته به، ويا ليت
ابنه مثله. ولكنه عاد يسأل بجمود فهو
يخشى على صغيرته من أن تقع في
زواج فاشل يدمرها أكثر:

-السبب؟

تنفس "مارس" بهدوء ثم قال: أنا شغال
في مطعم وشفت بنت حضرتك أكثر من
مرة فيه، وكنت معجب بيها وبأخلاقها.
كنت أتمنى أتجوزها بس أنا لسه قدامي
مشوار طويل فكنت بدعي إنها تكون من
نصيبي.

تتهد "حسني" براحة شديدة وهو يقول:

-أنت بتقول إن قدامك مشوار طويل، إيه
اللي جد؟ ليه مستنتش تخلص مشوارك
وبعدين تيجي تتقدملها؟

أردف "مارس" بحزن: اللي حصلها
خلاني عايز أكون معاه في الظروف
دي وأشاركها كل وجع هتخفيه عن اللي
حواليها. ولأني لو استتيت مشواري
يخلص وجيت متأخر وهي بقيت كويسة
لوحدها يبقى وجودي وغيابي واحد.

يا الله! هذا الشاب مثال للرجولة بكل ما
تحمله الكلمة من معنى. ابتسم "حسني"
له وقال:

-طيب، هتقدر تصرف عليها ولا هتخلي
أبوك يصرف عليكم؟

لم يقبل "مارس" هذه الإهانة ليقول
بجدية وحدة غير مقصودة:

- أنا بابا مصرفش عليا جنيه من يوم ما
خلصت الثانوية، ومستحيل أقبل إن حد
يصرف على مراتي جنيه.

لم يخف "حسني" ابتسامته هذه المرة،
وقال بمشاعر أب صادقة:

-المستحيل بجد هو إني الأقي واحد زيك
تاني. أنت راجل بجد ويبخت أبوك بيك.
أنت هتكون عوض ربنا لبنتي الوحيدة،
فأوعى تكسر ثقتي فيك.

ابتسم "مارس" براحة وقال: مستحيل
أكسر ثقتك فيا، وشرف ليا إنها تكون
من نصيبي.

لم تُبِنَ ثقة "حسني" بـ"مارس" على
حديثه فقط؛ بل بُنيت على سيرته
الحسنة. فهو سأل عنه الكثير، والكل
أخبره أنه فتى رائع لا غبار عليه.

-مارس... مارس... مارس!

فاق "مارس" من شروده على صوت
صديقه المزعج، ليرد عليه بضيق:

- فيه إيه؟

رد "ربيع" بمشاكسة: كنت سرحان في
إيه يا جميل؟

ابتسم "فادي" بخبث وهو يغمز للآخر:

- هيكون في إيه يعني؟ أكيد في مرات
أخونا يا غالي.

حدّق بهم "مارس" بشر، ليضحك
الاثنان بمرح، ويقول "ربيع":

- خلاص يا عم بنهزر. المهم، اتفقتوا

على إيه لما العيلة كلها راحت؟

رد عليه "مارس": بعد ما راحت قابلت

عمي 'حسني' يوم الخميس، قالي:

- هات عيالك وتعال اتقدم لها بشكل

رسمي. رحناء، وطبعًا ماما مكنتش

موافقة، بس مش مشكلة. المهم عمي

قال نتخطب لحد ما أخلص دراستي، لكن

أنا اعترضت على الخطوبة. أنا عايز

كتب كتاب...

قاطعه "فادي" بكلمة مشاكسة: طماع!

رد "مارس" وهو يعتدل في جلسته:

مش طماع والله، بس عايز أكون قريب

منها. والخطوبة مش هتسمح بكده.

كمان أنا راحت عندهم مرتين وفي

المرتين مشفتهاش، وهما بيقولوا إنها
نايمة بسبب الأدوية. بس واثق إنها
خايفة تقابل حد، عشان كده عايز أكتب
الكتاب عشان أقدر أتعامل معاها بدون
خوف.

تفهم أصدقائه ما يقول، ليقترب منه
"ربيع" ويربت على كتفه بحنان:

-ربنا يكتبلك كل الخير ويسعدك يا
صاحبى.

ابتسم "مارس" له وهو يهتف بتمنى:

-اللهم آمين، أنا وإنتوا. بس يا رب
أبوها يرضى لأنه قال: هفكر وأرد عليك.

اقترب "فادي" من الجهة الأخرى وقال
بتفاؤل:

- إن شاء الله يرضى ونفرح بكم قريب.

المهم، أنت هتعمل إيه بعد الامتحانات؟

أخبره "مارس" بما يريد فعله: عايز

أدور على شغل تاني ضروري.

تساءل "ربيع": طيب، والامتحانات؟

قال "مارس": باقي مادتين ونخلص.

وأنا هحتاج مصاريف كتير الفترة

الجاية، وكمان أنا قلت لعمي 'حسني'

إني همضي على شريك بتمن المهر

عشان كتب الكتاب.

أردف "فادي" بجديّة وخوف على

صديقه الذي يحمل نفسه فوق طاقتة:

- اسمعني يا صاحبي. أنت مش هتقدر

على شغل تاني في الوقت ده. ازاي

هتخلي بالك من الدراسة والشغل في

المطعم؟ ولا هتخلي بالك من خطيبتك
اللي هي أهم حاجة عندك دلوقتي؟
وكم ان نفسك ليها عليك حق. لو تعبت،
مش هتعرف تعمل أي حاجة.

فكر "مارس" لدقائق، ثم قال بثقة:
سيبها على الله وربنا سهل الحال.
عاد كل منهم يتابع دراسته بتركيز، فقد
تبقى مادتان فقط وينتهي العام الدراسي
على خير.

في غرفة بسمة...

تجلس على مكتبها تذاكر بتركيز شديد،
تحفظ القوانين بدقة، وتضع أمثلة
للأقضايا وتقوم بحلها بمهارة اكتسبتها
من والدها ودراساتها. مرت دقائق،

ساعات، لا تعلم وهي ما زالت منهكة في
دراساتها، لتجد والدتها تلج إلى الداخل
وتقول بضيق:

-يا بنتي يا حبيبتي، كفاية كده، متعبتش؟
قومي كلي حاجة وتعالى اقعدى معايا
شوية.

رفعت "بسملة" رأسها من على الأوراق
وهي تقول بارهاق:

-شوية بس يا ماما، هخلص اللي في
إيدي وهاجي.

اعترضت والدتها على ما تقول بعصبية:
-أنتِ كل شوية تقولي نفس الكلام!
قومي نتعشى وبعدين كملى.

ابتسمت لها "بسملة" لكي تهدئها:

-حاضر يا ماما، خلاص قريت أخلص
و...و

قاطعتها والدتها حديثها المتكرر: دلوقتي
تقومي وبعدين تخلصي براحتك. حرام
عليك نفسك! أنتِ مش بتقومي من على
الكرسي ده ليل نهار. تذاكري مش
هتستفيدي حاجة لو تعبتي. وازني يا
حبيبتي الأمور. الدراسة مهمة ومهمة
جدًا كمان، بس برضو لازم تدي نفسك
راحة عشان جسمك وعقلك يستوعب
كمية المعلومات اللي بتذاكريها.

نهضت "بسمة" من على المقعد تقترب
من والدتها لتعانقها، ثم همست بتعب
واضح في صوتها:

-معاك حق، هحاول أوازن الأمور،
وهرتاح شوية عشان خاطر عيونك. أنتِ
بس تأمري.

بادلتها والדתها العناق وهي تربت عليها
بحنان وحب وقالت:

-أنا معنديش غيرك يا حبيبتني، ومش
عاوزاك تتعبي نفسك عشان خاطر أي
حاجة.

ابتعدت "بسملة" عنها لتخبرها: التعب
خلاص خلص. أنتِ جايلة تعترضني على
الكام يوم اللي قاعدين. وبعدين أنا
برضو ماليش غيرك. ادعيلي أنتِ بس
إن حلمي يتحقق، لأن هو ده اللي
هيتعبنى.

ابتسمت لها والدتها بقلق وتمنت داخلها
أن يتحقق حلم صغيرتها في بلد يسير كل
شيء به بالواسطة. تثق في قدرة
صغيرتها على التفوق، فهي منذ الصغر
تحتل المركز الأول في كل الاختبارات،
والمرة الوحيدة التي احتلت المركز
الثاني في المرحلة الإعدادية قامت
بسجن نفسها في غرفتها لمدة أسبوع
دون طعام، وصوت بكائها كان يصلهم
بالخارج. حاول والدها بكل الطرق
الممكنة أن يجعلها تتقبل الأمر. فماذا لو
لم يتحقق حلمها؟ تقسم أنها ستنتهار
كلياً.

هتفت والدتها بهدوء:

-ربنا يكتبك كل الخير ويبعد عنك كل الشر.

ولج والدها إلى الغرفة حينما وجدتهما تأخرتا على العشاء وهو يتساءل:

- بتعملوا إيه كل ده؟ أنا هموت من الجوع!

ردت "بسملة" بلهفة عندما رأته: تعالى يا بابا، عايزة أوريك حاجة مش فاهمها.

زجرتها والديتها، وضحك والدها وهو يقول:

-نتعشى الأول وبعدين نشوف إيه اللي مش فاهمها.

نظرت له وهي تهمس بضيق: حتى أنت يا بابا؟ شكل ماما ثبتتلك وعاملة أكل بتحبه.

جذبها "علي" له وهو يضحك: في دي
معك حق، هي عاملة محشي وأنا
بضعف قصاده. يلا بسرعة قبل ما يبرد!
تحركت معهم بسعادة، وجلست تتناول
الطعام في أجواء مليئة بالبهجة، وهي
تحمد المولى على نعمة وجودهم في
حياتها.

وعلى عكس "بسملة"، كانت هي
تستلقي على الفراش بهدوء وتنعم
بنومة هائلة، لا يعكر صفوها شيء ولا
يشغل تفكيرها أحد، وكان وزير التعليم
والدها. تقلبت يمينًا ويسارًا بانزعاج
عندما صدح رنين هاتفها، لترد بنعاس
دون أن ترى من المتصل:

- عايز إيه؟

تفاجأ من ردها وعلق بدهشة: فيه

واحدة تقول لخطيبها عايز إيه؟

ردت عليه بنعاس وهي تغمض عينيها:

ما أنت اللي رنيت متأخر.

نظر إلى ساعته وجدها تشير إلى

التاسعة مساءً، ليرد بسخرية:

- الساعة تسعة متأخر؟ وليه نايمة بدري

كده يا جيهان؟

ردت "جيهان" باقتضاب وهي تعتدل من

نومها وتجلس:

- مفيش.

تساءل "إبراهيم" باهتمام: مالك يا

جيهان؟

انتقل لها إحساسه واهتمامه عبر الهاتف
لتقول بحزن:

-مش عارفة، حاسة إني زعلانة، ولما
بكون زعلانة بنام ومش بحس بالدنيا،
ولما بصحى بنسى كل حاجة.

أردف بحزن وهو يسمع صوتها الحزين:

-مفيش حاجة في الدنيا كلها تستاهل
زعلك، قوليلي إيه اللي مزعلك.

عدلت من وضع ثيابها التي تأثرت
بالنوم، ثم نهضت وهي تقول بمرح
ينافي ما كانت عليه منذ قليل:

-مفيش يا دوك، أنا بس نكدية شوية.
المهم، فيه حاجة؟ مش متعود ترن عليا
في وقت زي ده.

رد عليها بابتسامة وهو يستلقي على الفراش:

- بكرة عندك امتحان، فقلت أطمّن.
بتعملي إيه؟ بس اتفاجأت إنك نائمة.

جذبت كتاب "أصول الفقه" لتقوم بمراجعة ما درسته طوال الفترة السابقة، وقالت:

- خلاص، صحيت وهراجع وربنا يستر بقى.

ابتسم ورد لكي يشجعها: متقلقيش، إن شاء الله خير. وربنا يوفقك ويعوض تعبك خير. هسيبك أنا عشان تذاكري وهتصل بيكي الصبح. تصبجي على خير.

ردت عليه بانزعاج واضح: أنت اللي

هتنام، مش أنا!

رد "إبراهيم" بمرح: وأنتِ كنتِ نائمة

وأنا لا.

ضحكت وهي تتحدث: أيوة، صح. تصبح

على خير.

تههد "إبراهيم" ثم قال بحب: وأنتِ من

أهلي، سلام.

أغلقت الهاتف وبدأت في مراجعة المادة

بتركيز. وبعد مرور ساعة، تركت الكتاب

لتأخذ قسطاً من الراحة. هذه عادة لديها،

تقوم بوضع تنبيهه أنها أتمت ساعة

دراسة لتأخذ هدنة عشر دقائق. جذبت

الماء من على الطاولة لترتوي، فهي

تشعر بالعطش الشديد بسبب هذه
الأجواء الحارة.

تسطحت على الفراش مرة أخرى بعدما
كانت تجوب الغرفة ذهابًا وإيابًا وهي
تحفظ القوانين. وهذه عادة أخرى لديها؛
لا تستطيع أن تدرس وهي جالسة.

تذكرت مكالمتها مع "إبراهيم" منذ عدة
أيام بخصوص "رحيم" أو "حمزة"، هذا
الطفل الصغير الذي جمعها القدر به
لتصبح أمًا أخرى له. فطلبت من
"إبراهيم" أن يطلب من والدها عندما
يلتقي به أن يتم عقد قرانهما لكي
يستطيع تجهيز الأوراق المطلوبة لتبني
الصغير. لكن رد "إبراهيم" فاجأها
عندما قال بجدية:

ربنا سبحانه وتعالى حرم التبني عشان
اختلاط الأنساب. فالتبني هو نسبة
الإنسان إلى غير أبيه، بحيث يأخذ أحكام
الابن من الصلب، في المحرمية، والإرث
والصلة، وكده بيترتب عليه الوقوع في
الكثير من المخالفات الشرعية كالخلوة
والمصافحة والرؤية لمن لا يحل له.
وعشان كده حرم التبني. قال تعالى:
«ادْعُوهُمْ لِآبَائِهِمْ هُوَ أَقْسَطُ عِنْدَ اللَّهِ فَإِنْ
لَمْ تَعْلَمُوا آبَاءَهُمْ فَاِخْوَانُكُمْ فِي الدِّينِ
وَمَوَالِيكُمْ».

سرد لها الموضوع باختصار وبدأ يذكر
قصة سيدنا زيد بن حارثة.
فتساءلت بحزن بعدما علمت أنه لا يجوز
أن تنسبه لها:

-يعني إيه؟

ابتسم بحنان رغم أنها لا تراه، لكنه يثق
أنها تشعر به، وقال:

- متقلقيش. هنتكفل بيه، والكفالة بديل
التبني، وقد حث عليها الإسلام، ودعا
ليها، ورتب عليها أجر عظيم، ورفع
مرتبة الكافل إلى درجة تُقارب درجة
الأنبياء في الجنة. قال النبي - صلى الله
عليه وسلم -: «أن وكافل اليتيم في
الجنة هكذا»، وأشار بالسبابة
والوسطى.

تساءلت باستغراب من معلوماته
الدقيقة:

-أنت عرفت الكلام ده منين؟

ضحك بخفوت وهو يرد عليها بمرح:
إيه ده؟ أنت متعرفيش إني أزهرى ولا
إيه؟

عادت من شرودها على صوت إشعار
رسالة. جذبت الهاتف وقرأت محتوى
الرسالة التي أرسلها لها:

-«دي منى عشان تذاكري كويس.
متقلقيش ولا تتوترى، أنتِ عملتي اللي
عليكِ وربنا مش هيضع تعبكِ.
بالتوفيق، وانجزي عشان الجواز واقفة
عليكِ.»

ضحكت بسعادة وعادت تدرس بحماس
ونشاط.

أن أخبرها أحدهم من قبل أنه سيكون رفيق دربها والضلع الحامي من حياة أهلك روحها، لسخرت منه. ولكن الآن، يجلس بجوارها حقيقة ملموسة؛ إنه هنا، زوجها وحياتها بأكملها.

ابتسمت حينما رآته ينظر إليها ويعانق عينيها بعينييه بدفء خاص به. حركت أهدابها عدة مرات وتحاشت النظر له، ليبتسم على خجلها ويقول بنبرة حانية:

-كده تمام يا حبيبي؟ في حاجة تاني؟

هزت "دعاء" رأسها نفيًا، ليضيف هو وهو يبعد الأوراق عنه:

-تمام. همشي أنا عشان تقدرني تمامي شوية وتصحي فايقة.

تتحننت "دعاء" بخفوت وهي تقول
بخجل:

-شكرًا لأنك جيت وتعبت نفسك عشان
تشرحلي اللي مش فاهمة.

ابتسم وهو يحرق بها، ثم اقترب ليقبل
عينها وهمس:

-عشان عيونك، أجيلك من آخر الدنيا.

ابتعد عنها ليراها تتنفس بصعوبة إثر
فعلته، وضربات قلبها مرتفعة. أخبرها
بحب:

-لو جودي معاك تعب، فأهلاً بالتعب.
ويا ريت كل التعب يكون حلوكده...
زيك.

-فارس...

نطقت اسمه برجاء أن يتوقف عن حديثه
الذي يصيبها بقشعريرة تسري في
جسدها. ورغماً عنها، تعشق اقترابه
منها. تعشق كل شيء يقترن به، وكيف
لا تعشقه وهو نصفها الآخر؟ المعجزة
التي أتت من السماء، ولو ظلت طوال
عمرها تشكر الله عليه، لن يكفي.

ابتسم "فارس" عندما رأى تأثيره
عليها، وقال بعيون صادقة وحب نابع
من الروح لرفيقة الروح:

- عيون 'فارس' وقلبه وروحه ودنيته
كلها.

انهمرت دموعها بفرحة حينما رأت
صدق عينيه وحديثه الذي يجعلها تحلق
في السماء كما الطيور. وبدون سابق

إنذار، وجدت نفسها تبادر بمعانقته
وتتشبث به بقوة، وكأنها تخشى أن
يختفي من أمامها.

-بص يا باشا، سلامة في خير وخير في
سلامة. اتجنبني لحد ما أخلص امتحانات
عشان أنا ببقى واحدة تانية في الأيام
دي.

حديث أحرق تفوهت به "نور"، هذه
المجنونة، لزوجها الذي أتى ليطمئن
عليها ويكون بجانبها في اختبارات
نهاية العام. كان اليوم أول اختبار لها،
لكنها لم تكن تريد شيئاً سوى النوم.
سخر منها ومما تفوهت به، ورد بتهمك:

- أنتِ على طول واحدة ثانية، يعني
اطمني.

انطلق الشرار من عيني "نور" بسبب
سخريته، وهتفت بعصية:

- أنت عايز إيه دلوقتي؟ جاي تعصبي
وخلص؟

نظر لها ببراعة مصطنعة كنظرات
الأطفال عندما يخطئون، ثم قال وهو
يشير إلى نفسه:

- أنا؟ أبداً... أنا جاي أطمّن على مستقبل
ولادي وأشوف أمهم بتعمل إيه في
امتحاناتها.

لاح على وجهها ابتسامة حنين بسبب
حديثه ونظراته، ولكن تلاشت ابتسامتها
بعدما فهمت مغزاه. هل يشكك في

تفوقها؟ إذن عليها الدفاع عن نفسها
بجدية:

-أنت فاكرني فاشلة ولا إيه؟ وضح
كلامك يا كابتن، لأن مش أنا اللي دخلت
الشرطة بوسطة!

أقلت حديثها في وجهه بعصبية، مذكرة
إياه بما أخبرها سابقاً عن أن عمه
ساعده في بداية عمله لأنه يتولى منصباً
هاماً في الشرطة. لكنه على عكس
المتوقع، ابتسم ببرود وهو يعود برأسه
للخلف على المقعد الذي يجلس عليه، ثم
قال:

-مش هنكر إن عمي ساعدني في
البداية، بس مركزي دلوقتي وصلت له
بتعبني. وبرضه، ماجبتش في الثانوية

خمسين في المية زي ناس، ودخلت
حقوق انتساب بالعافية.

يا الله، إنه يرد لها الضربة بضربة
أقوى. اشتعل الغضب داخلها لتنهض
وهي تصيح: أنت مش طبيعي على
فكرة! جاي تقولي سايب شغلك وتاعب
نفسك علشان تعصبي!

نهض "أشرف" من مكانه، واقترب
منها، وبحركة مفاجئة قَبَّل وجنتها قبلة
خاطفة جعلت جسدها يرتجف من هول
المفاجأة. زاد الطين بلة وهو يهمس
بنبرة خافتة أفقدتها صوابها:

-مقدرش يا 'وزة' أعصبك... أنا جيت
عشان وحشتيني، وأقولك إني بحبك.

كادت أن تسقط من تأثير قربه وصوته
الذي جعلها تنسى من تكون. أدرك هو
الأمر، فأمسك يدها وأجلسها، وسألها
بجدية:

- بكرة ما عندكش امتحان، صح؟

نظرت له بتشيتت، ولم تستوعب سؤاله،
فما زالت تحت تأثير فعلته. همست:
- هااا؟

ضحك بصوت عالٍ، واقترب منها ليقبل
وجنتها مرة أخرى:
- هااا إيه يا 'وزة'؟

انتفضت من مقعدها وسألته بتوتر ونبرة
مهتزة دون انتظار الجواب:
- أنت بتعمل إيه؟

أجاب ببساطة، وكان ما فعله شيء

عادي:

-بب...-

قاطعته بجنون قبل أن يكمل: اوعى

تنطقها!

نظر لها "أشرف" بعدم فهم، فهتفت

"نور" بضيق بعدما استعادت ثباتها:

-أنت قليل الأدب.

ضحك بشدة وقد أدرك أن صراخها نابع

من خجلها بسبب قربه منها. قال بعدما

هدأ من نوبة الضحك:

-عارف... شوفي حاجة جديدة.

لم تُجب، بل ابتعدت وجلست على مقعد

بعيد عنه. عاد ليسألها عن موعد

اختبارها القادم، فأجابت باقتضاب:

-بعد يومين.

ابتسم لها بحب، واقترح:

-حلو. بكرة هعدي عليك الساعة أربعة
ونتغدى برة، تغيري جو شوية.

بادلته البسمة بأخرى حانقة، وهتفت: يا
راجل، ده أنا لو عدوتك مش هتقولي
أستتاك لحد أربعة عشان أتغدى! وبعدين
هو في غداء الساعة أربعة؟

ثم همست بصوت واضح كأنها ترثي
حالتها:

-يا عيني عليك يا 'نور'، يا بنت أم
'نور'... آخرتك هتتجوزي واحد يموتك
من الجوع! وأنتِ اللي بتحبي الأكل أكثر
من نفسك وبتاكلي في الساعة خمس
مرات وبتكوني جعانة.

وقف مصدومًا مما سمعه، لكنه تدارك
الصدمة بسرعة وهو يقترب منها:
- خلاص يا حبيبتي، اتغدي في معادك
بألف هنا، وناكل تاني مع بعض.
ثم نظر في ساعة يده، ووجدها تشير
إلى العاشرة مساءً، فقال:
- همشي أنا يا 'وزة' عشان الوقت اتأخر،
وهشوفك بكرة
نهضت واقتربت منه، وألقت نفسها بين
ذراعيه. بادلها العناق، وربّت على
ظهرها بحنان وحب، وهمس:
- بحبك، وبحب كل تصرفاتك المجنونة.
ابتعدت عنه وهمست بخجل فطري:
- أنا آسفة لو تصرفاتي بتزعلك، بس
والله بحبك.

قبّل قمة رأسها وقال بصدق:

-مستحيل أزعل منك. أنتِ حبيبة قلبي.

أشرقت شمس يوم جديد تعلن عن بداية تحقيق الأحلام. وصلت "جيهان" إلى المبنى الذي تُقام فيه الاختبارات، تبحث بعينها عن صديقاتها. لم يطل البحث كثيرًا حتى وجدت "دعاء" تقترب منها مبتسمة، فقالت "جيهان" بضيق:

-بتضحكي على إيه يا حزينة؟ فيه حد عنده امتحانات ويضحك؟

ضحكت "دعاء" عليها وهتفت بمرح:

-طيب استني، أصبّح عليكِ الأول!

حدقت "جيهان" فيها بحنق، وقالت:

-صّبّحي يا أختي، صّبّحي!

وقفت "دعاء" أمامها والسعادة ترتسم
على وجهها بوضوح كوضوح الشمس،
وقالت: -مبسوطة أوي، أول مرة
أحس إن حد مهتم بوجودي. "فارس"
طول الليل يراجع معايا، والصبح جه
بدري فطر معانا وجابني هنا.

انتقلت السعادة منها إلى "جيهان"، التي
ابتسمت وهي تتمنى في سرها أن يديم
الله عليها السعادة، ولا يجرمها من
زوجها الذي يمثل مفهوم السعادة
بالنسبة لها. لكنها أخفت ابتسامتها
ببراعة وقالت بحقد مصطنع:

-أيوة يا عم، حد قدك؟ أكرمنا يا رب!
تلاشت ابتسامه "دعاء" وكادت أن ترد

عليها، ولكن قاطعتها تحية "بسملة"،
التي أتت في تلك اللحظة تلقي السلام:

-السلام عليكم ورحمة الله وبركاته يا
حلويات! عاملين إيه؟

ردت "دعاء" السلام بهدوء، وهي تنظر
لها:

-وعليكم السلام ورحمة الله وبركاته.
الحمد لله، في نعمة.

وكذلك فعلت "جيهان"، وهي ترد
السلام، ثم سألت:

-تأخرتي ليه يا 'بسملة'؟ وليه مجيتيش
مع 'دعاء'؟

سخرت منها "دعاء"، التي تنظر كل
ثانية وأخرى في ملخص المادة الذي
تحمله بيدها:

-يا ذكية، هو أنا مش لسه قايلالك إني
جاية مع 'فارس'؟

صفت "جيهان" رأسها بخفة وهي
تضحك:

-آه، صح! نسيت.

دارت بينهم أحاديث كثيرة ومناقشات
عديدة وهم يراجعون المادة قبل موعد
الاختبار. وها هو الموعد المنتظر قد
أتى، بمثابة نقطة النهاية لتحقيق أحلام
جميع الطلاب الذين ينتظرون أمام
المدرجات. منهم المبتسم، ومنهم
المتوتر، ومنهم الخائف، ومنهم غير
المبالي بما يحدث وكأنه يعلم النتيجة
مسبقاً. تحرك كل واحد إلى مكانه،

وكذلك فعلت الفتيات، وهن يتجهن نحو

المدرج. تحدثت "جيهان" بهدوء:

-هتخطي المذكرات فين يا 'دعاء'؟

أجابت "دعاء"، وهي تجذب منها

الملخص:

-هوديهم بسرعة مكتب 'فارس' وأجي.

أردفت "بسملة": طب بسرعة، مش

هندخل غير لما تيجي.

تحركت "دعاء" بعيداً عنهما، لتقول

"بسملة" لـ "جيهان":

-شوفي كده معاك قلم خطه حلو؟ لأنني

نسيت قلم بابا اللي بمتحن بييه على

المكتب، والقلم اللي معايا خطه وحش.

نظرت لها "جيهان" بعدم فهم، وهي

تتساءل:

- هو مش المفروض الامتحان ده بابا
شيت؟ يعني مش هنكتب أصلاً!

ردت "بسملة" بجديّة مطلقّة: أيوة، بس
هنكتب اسمي يعني. يرضيكي اسمي
يتكتب بخط وحش؟

سخرت منها "جيهان": لا طبعًا، ده
كلام!

ثم جذبت حقيبتها تبحث بها عن قلم
إضافي. لكنها أسقطت الحقيبة، لتصطدم
بجسد صلب، وتسقط خلف الحقيبة
بسبب فقدانها للتوازن. بدأت تسب
وتلعن من اصطدمت به.

-أنا حاسس إني اتسرعت...

الفصل الثامن والعشرون

ثم قالت:

إن أبي أعز و أغلى من أن يذوق عذاب
القبر بسبب ضيق ملابسي

جذبت حقيبتها تبحث فيها عن قلم
إضافي، لتسقط الحقيبة وتصطم بجسد
صلب، وتسقط خلف الحقيبة بسبب
فقدان توازنها، لتبدأ في السب واللعن
لمن اصطدمت به.

-أنا حاسس إني اتسرعت-

صاح صوت "إبراهيم" الساخر، وهو
يعلق على "جيهان" التي لم تتوقف عن
سبّه ولعنه، رغم أن الاصطدام كان
بالخطأ.

رفعت عينيها له بخرج بسبب لسائها
السليط، وصادمتها من تواجد ههنا.
تحركت "بسملة" بسرعة لمساعتها
على النهوض، بينما ظلت "جيهان"
تتظر له دون أن تتحرك.

تتحنت بخرج، وهتفت بخجل واضح:
-أسفة، مقصدش.

ابتسم "إبراهيم" بخفة، ولم يرد
إحراجها أكثر، فقال:

-ولا يهملك، أنا جيت أشوفك قبل ما
تدخلي الامتحان وأطمئن عليك. وعلى
فكرة، اتصلت بالأساتذ "عثمان"
واستأذنت منه.

شعرت "جيهان" وكأنها تريد القفز إلى
السما والتحليق كالطيور من شدة

سعادتها. لم تخفِ ابتسامتها، بل أطلقت
ابتسامة واسعة، وهي تنظر له بتساؤل:

-جاي عشاني؟

أشار برأسه موافقًا على كلامها، لتتسع
ابتسامتها أكثر وتهتف:

-شكرًا أوي إنك جيت، بجد دي أول مرة
في حياتي حد يهتم بيا للدرجة دي.

لمعت عيناه بحنان، وأخبرها بصدق:

-مستعد أعمل المستحيل عشانك، مش
حاجة بسيطة زي دي.

في تلك اللحظة، أتت "دعاء" التي
تعجبت من وجوده، ورغم ذلك، نظرت

لصديقتها وقالت:

-يلا، اتأخرنا.

سارت أمامهم، وخلفها "بسملة"
و"جيهان". وبعد أن خطت "جيهان"
خطوتين، عادت لتسأله بجديّة:

-أنت دخلت هنا إزاي؟

أجابها بمشاكسة: معايا واسطة.

كان يقصد "فارس"، لتتذكر أنه أخبرها
أن "فارس" صديقه منذ أعوام. ابتسمت
وأشارت له بيدها قائلة:

-سلام.

غادر "إبراهيم" الجامعة، بينما ولجت
"جيهان" اللجنة لتجلس في مكانها.
على يمينها جلست "بسملة"، وفي
اللجنة المجاورة جلست "دعاء" في
الأمام.

الجميع يتضرع إلى الله بقلب خائف على مستقبله المعلق بتلك الورقة التي تقبع أمامهم. وكان سعادتهم متوقفة على تلك الشهادة. لكن الحقيقة أن من يعتقدون أن السعادة مرهونة بالشهادة الجامعية مخطئون، بل حمقى. هؤلاء يظنون أن من ليس لديه شهادة فاشل، ولا يصلح لشيء، وليس له الحق في إبداء رأيه.

أعذر لوقاحتي، لكنك أحمق يا عزيزي إن كنت تظن ذلك. لن تشعر بالسعادة إن لم تدخل مجالك المفضل، والقليل منا فقط يصادف القدر بدخول مجاله المفضل. إن كانت السعادة تعتمد على هذه الورقة، فكيف عاش "أديسون" سعيدًا؟ لقد صنع السعادة بيديه، وجعل

اسمه يخلد في التاريخ. لذلك لا تخشى شيئاً، سيحدث لك أفضل مما تريد. ثق بالله فقط، ولا تهتم بشيء آخر.

بعد مرور أكثر من نصف الوقت، وضعت "جيهان" يدها فوق رأسها، تفكر في حل الأسئلة التي لم تجب عليها. همست بتضرع: يارب، سترك.

أما "بسملة"، فسقطت دمعة هاربة من عينها عندما عجزت عن تذكر حل إحدى النقاط الهامة. همست بخوف: - يارب.

لكن "دعاء" كانت هادئة. لديها يقين أن الله لن يضيع تعبها، لذلك جلست تفكر بتمعن قبل أن تضع القلم على الورقة، ومع كل إجابة تهمس:

- يارب.

تصاح صوت الموسيقى العالية، تزعج
أصحاب المنزل، لكنها لا تهتم. تتحرك
بحركة شبابية، تتراقص وتدندن معها
بصوت مرتفع ينافس صوت المغني:

"ولو في يوم لبست قضية...

في ناس ميزتها هي إيه؟

ميزتها إنها تجيب براءتك...

بس ركز في اللي جاي... ركز!

محدث عاجبه حاله، حالة غيره اللي
بتحلاله...

دائمًا شرقي بيغرب، وأيسر نفسه يبقى
أيمن،

تخين بيخسس، والتاني رفيع نفسه
يتخن،

أسمر بيفتح، وأبيض نفسه يبقى black
فحمًا...

من خلفه بتّ بيزعل، نفسه يخلف
ولد... أيوه، أيوه، أيوه!

إنسان ما بيرضى بحاله، دايماً عاجبه
حال الغير...

مهما تكون حالتك، دايماً باصص
للتغيير.

صدقني لو بصيت جواك، هتلاقي ياما
كثير...

قدرات، مميزات، إن كنت غني أو فقير.
متقلش من نفسك، ده انت لنفسك طاقة
خير...

هتحقق اللي في نفسك، واللي يمسك
خليه يطير.

ارضَ يا ابن آدم بالي اتقسم عليك،
ولو إني عارفك مش هترضى غير
بتراب في عينيك.

ربك ميز كل واحد منا بحاجة،
فالناس فعلاً لبعض، دائماً محتاجة.
دور، والقي ميزتك، حاول حافظ عليها،
طورها، اتميز بيها، حياتك هتلاقيها.
ما هي الأول ماشية صح طول ما انت
راضي بيها،

ارضَ بحياتك انت، واقبلها بالي فيها.
ده الرضا نعمة كبيرة، احمد ربك عليها.
وخدها مني كلمة: مافي حاجة بتساويها،
بيها"

وقفت للحظة تسأل نفسها بسخرية:
- حد يترجم لي؟ يقول إيه الواد ده؟

ثم أجابت نفسها بضحكة خفيفة:

-أنا أقولك... عيقول:

متحاولش تبقى حد تاني، غير نفسك...

خليك واثق في نفسك، واه، واه، واه،

ولاااا!

قوم دور بنفسك جوا نفسك،

هتلاقي حاجة محدش فيها ينافسك...

سواه، سواه، واهاه يا بوي!

لو ملكش عازة، مكنتش اتخلقت،

ولا اتحسبت من الناس، ولا اترزقت."

كعادتها، عاشقة لـ "مكي"، تستمع

لنصائح وتنفذها كأنه والدها. منذ

صغرها، وهي لا تستمع لأي هراء، بل

تبحث عما يفيدها بين كلمات الأغاني.

دفعت والدتها الباب بعصبية، ثم ولجت
إلى الداخل وهي تصيح:

-اقفلي أم الزفت ده، وشوفي لك حاجة
نافعة تعملها!

توقفت "نور" عن الرقص، وتفحصت
والدتها بنظراتها لتكتشف سبب عصبية
والدتها الحبيبة. جذبت الهاتف، أوقفت
الأغنية، وسالت:

-حصل إيه مخليكي متعصبة كده؟

جلست والدتها، ثم أخبرتها بقلق: أشرف
كلم أبوكي عشان يحدد معاد الفرح،
وأنت لسه ناقصك حاجات كتير في
الجهاز.

جلست "نور" بجوارها وربتت على
يدها، قائلة:

-سيبها على الله يا ماما، وبعدين كل
الناس بتجيب بالقسط. هنجيب الحاجات
المهمة، والحاجات اللي ملهاش لازمة
بلاش منها.

ردت والديتها بجديّة: لازم نجيب كل
حاجة زي الناس. مينفعش تكوني أقل
من حد.

أردفت "نور" بيأس من هذا التفكير
السطحي:

- يا ماما، احنا مالنا وما مال الناس؟ كل
واحد يجيب على قد قدرته. الناس دي
هي اللي خلت الشباب تضيع، والعنوسة
تزيد.

ردت والديتها بعصبية: أيوه، عايزة
الناس تجيب سيرتنا وتقول:

-بصي جايبية إيه، ومجبتش إيه؟
وبعدين، سيبك من الشعارات بتاعتك
دي، متكلش معانا! كلمي جوزك، خليه
ياجل شوية.

جملة سخيفة تفوهت بها والدتها، تعكس
اهتمامها بكلام الناس. فقالت "نور"
بضيق:

-يا ماما، احنا اتفقنا أنا والبنات إن كلنا
هنتجوز في نفس اليوم. يعني مينفعش
يتأجل. وكلام الناس مش فارق لي. مش
عايزة حاجة غير إن فرحي يكون مع
صحابي.

نظرت لها والدتها بحنق قبل أن تغادر،
قائلة:

-قولي كده: عايزة تتجوزي مع
أصحابك، وإحنا نشيل الهم!
وقفت "نور" تنظر في أثرها، تفكر ماذا
تفعل.

جلس في غرفة الاسـتقبال ينتظر
خروجها بفارغ الصبر، إلى أن طلـت
عليه بهيئتها البريئة، تقدم قدمًا وتؤخر
الأخرى، حتى وصلت أمامه. ألقى
التحية بتوتر ونبرة مهتزة: السلام عليكم
ورحمة الله وبركاته.

كانت ترفض مقابـلته، لكن "تقى"
أقنعتها بضرورة ذلك، وأن تخرج من
فوقعتها. فهي، منذ الحادثة، لم تتحرك

من المنزل ولم ترَ أحدًا سوى أفراد
عائلتها.

رد "مارس" عليها بهدوء: وعليكم
السلام ورحمة الله وبركاته.

أشار "حسني" إلى ابنته أن تجلس،
فجلست بجواره. تحدث وهو يمسد على
رأسها بحنان:

-مارس عايز يتكلم معاكي، هسيبكم
شوية وهقعد بره. متخفيش، الباب
مفتوح وأنا هنا.

نظرت له برفض، لكنه أشار لها بعينه
أن تطمئن وغادر. عادت بنظرها
للأرض، تتجنب ملاقاة عينيه المراقبتين
لها.

تتحنح ليلفت انتباهها وقال: أنا آسف
إني أصريت أقبالك، بس أنا عايز أسمع
رأيك.

رفعت "ديالا" عينيها لتتقابل مع عينيه
البنيتين الشبيهتين بكوب قهوة دافئ،
وقالت بعدما أبعدت نظرها عنه:

-مش عايزة أتجوز.

أخبرته "تقى" أنها مشتتة، ولا تعلم
الصواب من الخطأ، لذلك عليه أن يتقبل
كل أفعالها. فسألها برفق:

-مممكن أعرف السبب؟

ظلت ثواني، أو ربما دقائق، صامتة
تستجمع قوتها، لكن محاولاتها تلاشت
عندما نطق اسمها بنبرة حنونة تحثها
على التحدث. قالت بارتباك بعدما تذكرت

حديث الجميع عنه وعن صفاته، التي
باتت نادرة بين شباب الجيل:

-خايفة-

ابتسم لها بحب يلمع في عينيه وأخبرها
بصدق:

-أول مرة شفتك كنتِ داخله المطعم. بنت
هادية، جميلة، خجولة، خطواتها
مدروسة. لا بتبصي يمين ولا شمال.
لابسة فستان أزرق واصل للأرض،
وخمار أبيض جميل. كنتِ شبه الفراشة،
ملفتة للأنظار. عشان كده وقفت أبص
عليكي من بعيد لحد ما قعدتني على
تربييزة عليها بنت. رحنت أشوفك تطلبني
إيه. رديتي برقة واحترام، لدرجة إني
فضلت واقف شوية، ومتحركتش غير

لما صحبتك اتكلمت. صوتك كان حلو
ودافني. كل حاجة فيكي جميلة. يومها،
أول ما روحت، صليت ركعتين واتمنيت
أشوفك تاني وتكوني ليا.

تتهد، ونظر لها ليري وجهها يشع
ضوءًا من الخجل. ابتسم وهو يكمل
حديثه:

-بعدها بيومين شففتك، فرحت قوي،
وعرفت إني حبيتك من أول نظرة. ومن
ساعاتها، في كل صلاة، أدعي إنك تكوني
ليا وتستيني لحد ما أخرج وأظبط
أموري.

تساءلت "ديالا" وهي تنظر إلى الأرض:

-طب ليه اتقدمت لي دلوقتي؟

أجاب "مارس" بتلقائية: عشان أكون
جنبك.

سألته بارتباك وبصعوبة، كأنها طفل
يتعلم النطق:

-هما... هما قالوا إنك... إنك أنت اللي
وديتني المستشفى... بس أنا مش
فاكرة، لأنني أغمى عليا...

قالت جملتها الأخيرة بنبرة باكية
ودموعها تنهمر. قاطعها بسرعة قبل أن
تخوض في الموضوع:

-أحسن إنك مش فاكرة، ووعد مني
هخليكي تنسي كل اللي حصل. بالله عليك
وافقي على كتب كتابنا، وأقسمك بالله
إنك مش هتتدمي لحظة. خوفك ده

طبيعي، بس والله هعمل المسـتحـيل
عشان تظمني ومتخفيش.

حديثه زرع الراحة في قلبها. تهدت
ونظرت له. ابتسم لها بسمة مهلكة،
وكان بسمته عدوى انتقلت لها في
اللحظة نفسها. قالت بخجل:

-ماشي.

دخل في هذه اللحظة والدها، جلس
بجوارها، ووضع يده عليها، يجذب
رأسها لتتوسط صدره. تابع بعينيه
حركات ابنته الخجولة.

تتحنح "مارس" وقال باحترام شديد:

- ديالا وافقت يا عمي. فبعد إذنيك تحدد
معاد كتب الكتاب، وبابا هيكلم حضرتك
ويجي يتفق مع حضرتك على كل حاجة.

ربت "حسني" على حجابها بحنان،
وقال لـ "مارس":

-بص يا بني، أنا بنتي طول عمرها ست
البنات، ويبخت أي حد بيها. واللي
حصلها كان غصب عنها.

كاد أن يقاطعه، لكن "حسني" أشار له
بالتوقف:

-عارف هتقول إيه. أنا هسلمك بنتي
بأيدي. أكيد مش هبص على فلوس
ملهاش لازمة. وأنا راجل ابن أصول،
مينفعلش يمضي جوز بنته على شيكات.
والدهب اللي أنت عايز تمضي شيك
عشان نضمنه، هو المفروض هدية من
العريس للعروسة. أهم حاجة تخلي بالك

من بنتي، لأن لوز علتها هتشوف وش
تاني عمرك ما تخيلته.

رد "مارس" بلهفة: وأنا عمري ما
أزعلها. حياتي كلها فداها. ووالله يا
عمي، عمرك ما هتندم على ثقتك فيا.

ابتسم له "حسني" براحة وهو ينظر
لابنته، ثم قال:

-تقدر تيجي أنت وعيلتك يوم الجمعة
نحدد كتب الكتاب.

انتهى الاختبار، وتم تسليم الأوراق
للمراقب. لم تكن مجرد أوراق فارغة،
بل أوراق تحمل مجهود عام كامل.
ورقتان تحملان آمال وأحلام الطلاب
الذين ينظرون إليها بحسرة وخوف،

وكانهم يودعونها الوداع الأخير برفقة
أحلامهم، متمنين من المولى أن يفرح
قلوبهم.

عندما خرجت الفتيات، تبادلن النظرات
بصمت. تحركت "بسملة" لتعانق
"جيهان" بخوف على حلمها. ربتت
"دعاء" على رأسها لتطمئنها قائلة:

-إن شاء الله خير يا بسوا، اطمني. ربنا
هيعوض تعبك خير وحلمك يتحقق.

ربتت "جيهان" فوق ظهرها بحنو،
عندما شعرت بأنها تكتم بكاءها ولا تريد
الابتعاد عنها، كأنها طفلة صغيرة تخشى
مغادرة والدتها. قالت بحنان:

-اتفائي يا بسملة. كل اللي ربنا هيجيبه
خير. وبعدين لما أنت بتعيطي أنا أعمل

إيه؟ أجيب شوية تراب وأدفن بيهم
نفسى!

اختتمت جملتها الأخيرة بمرح جعل
"بسملة" تضحك بخفوت وتبتعد عنها.
نظرت إلى "دعاء"، لكنها قاطعتها بلهفة
قبل أن تبدأ بالحديث، لأنها تعرف ماذا
تريد:

-لا بالله عليك! لو راجعت معاك هكتشف
إن كل اختياراتي غلط. يبقى سبيني على
عمايا وربك يستر.

نظرت "بسملة" لها بحنق، ثم وجهت
نظرها إلى "جيهان" وسألتها:

-وأنت يا جيهان، عملتي إيه؟

ردت "جيهان" بمزاح، وهي تصفحها
بخفة على رأسها:

-اخترتهم كلهم غلط، لأنه هو الحاجة
الوحيدة الصح في حياتي. وللأسف،
مكنش من ضمن الاختيارات.

حدقت بها "دعاء" بتشنج وهتفت بنزق،
وهي تلوي فمها بحركة شعبية متعارف
عليها:

-ياختي على المحن. الله يرحم!

بينما هتفت "بسملة" بسخرية: ومن
أمتي الرومانسية دي ياختي؟

نظرت إليهما "جيهان" بهيام مصطنع
وابتسامة واسعة:

-من يوم ما قبلته... دكتور قلبي.

نطقت "دعاء" اسمها بتحذير من
تماديها في الحديث عنه:

-جيهان!

لكن "جيهان" أصابت الهدف ببراعة،
ونجحت في تشتيت تفكيرهما عن
الاختبار ومراجعتيه، لأنها تعلم أن
"بسملة" إذا اكتشفت أخطاءً، فقد تنهار،
مما يؤثر على أدائها في باقي
الاختبارات.

قالت "جيهان" بسرعة: قلب جيهان!
روحي بس شوفي الدكتور اللي بقاله
ساعة يبص عليكى ومستتى تحنى
وتيجي تظمنيه.

التفتت "دعاء" على الفور لتجد
"فارس" ينظر إليها من بعيد، ويشير
بعينه لتلبية نداءه. سارعت نحوه دون
أن تهتم بأصدائها، رغم أن صوت
"بسملة" وصلها وهي تقول بسخرية:

-البِتِ واقعة خالص!

ردت "جيهان" بهيام: الحب وسنينه.

ابتسمت "بسملة" عندما مر بخاطرها

طيف شخص تعرفه. تذكرت مشاكسته

وغمزاته، فهتفت همساً وصل إلى

"جيهان":

-وقح!

تساءلت "جيهان" بتعجب:

-مين ده اللي وقح؟

توترت "بسملة" وهي تنفي برأسها: لا

لا، مش حد. يلا نستنى دعاء بره لحد ما

تيجي.

ردت "جيهان"، وهي تنظر إلى

"دعاء":

- لا، اسنتي دقيقة وهتيجي. نمشي مع
بعض بدل ما تمشي وحدها.

عند "دعاء"، وقفت أمام "فارس"
بفرحة لاهتمامه بها. سألتها بابتسامة
عندما اقتربت:

- ها يا حبيبتى، عملتي إيه؟
ردت بثقة:

- الحمد لله، كله تمام وإن شاء الله خير.
بس ادعيلي.

ابتسم لها بحنان وهو يربت على يدها:
- الحمد لله يا حبيبتى. أنا على طول
بدعيلك. خلي بالك من نفسك وأنتِ
مروحة. هتروحي مكان ولا هتروحي
على طول؟

بادلتَه ابتسامة ممتة وهتفت: هروح
على طول، لأنني هموت وأناام.

قال بلهفة: بعد الشر عليكِ يا حبيبتي.
خلاص، يلا روحى عشان أصحابك
مستنيينك. واتصلي بيا أول ما توصلي.
بحبك يا دودو.

نظرت له بخجل وهتفت برقة: وأنا بحبك
أوي.

تركته وعادت إلى أصدقائها. خرجن من
الجامعة، وتوجهت "بسملة" و"دعاء"
إلى مكان السرفيس الذي ينقلهما إلى
قريتهما، بينما "جيهان" سارت إلى
منزلها. أثناء سيرها، جاءها اتصال من
"إبراهيم" ليطمئن عليها.

في أحد المطاعم الراقية في المدينة،
جلس "أشرف" ينتظر قدومها بعد أن
رفضت أن يأتي ويصطحبها بنفسه.
مرت أكثر من نصف ساعة منذ أن
أخبرته أنها على وشك الوصول. تهد
بضيق من هذا التأخير ورفع هاتفه
ليعاود الاتصال بها، لكنها رفضت
المكالمة. ظن أنها قريبة، لكنها لم تصل.
زفر بعصبية وأعاد الاتصال مرة أخرى،
لكنها رفضت المكالمة مجددًا.

قرر أن ينهض للبحث عنها، بعدما
ساوره القلق من أن يكون قد حدث لها
شيء. وقبل أن يخرج من المطعم،
اصطدم بها وهي تولج بسعادة، تحرك
حقيبتها في الهواء بحماس. رغم الضيق

الذي كان يعتلي وجهه، إلا أنه ابتسم
لسعادتها وأشار لها بهدوء نحو
الطاولة.

تحركاً معاً، وسحب لها المقعد برُقي
لتجلس، ثم جلس أمامها متسائلاً عن
سر سعادتها.

أجابته "نور" بحماس: كلمت البنات
وقالوا إن الامتحان كان سهل الحمد لله،
وعدى على خير. عبال الباقي يا رب.

نظر إليها بإعجاب. لم ير فتاة نقية القلب
مثلها، تضع سعادة الآخرين قبل سعادتها
دون تفكير. همس لها بحب:

- أنتِ جميلة أوي يا 'وزة'.

أجابته "نور" بمرح: مش أجمل منك يا
حب.

ضحك عليها بشدة وهو يقول بيأس من
أفعالها:

-يا بنتي، اتقلي شوية، وخليكي زي
البنات. فين الكسوف والخجل؟

حركت يدها بلا اهتمام وردت بغمزة
وهي تمزح معه:

-اتقل إيه؟ دانا واقعة يا باشا في العيون
السود!

صدمت ضحكات "أشرف" ومالات
المكان، وشاركته الضحك. لكنه سرعان
ما توقف ليسألها بجدية:

-المهم، اتأخرتي ليه كده؟ وليه مردتيش
لما رنيت عليكي؟

تنهدت "نور" وأجابت باقتضاب: كنت
بصفي حساب قديم.

سألها "أشرف" باهتمام: حساب إيه؟
أوعي تكوني بتعملي حاجة...

ردت "نور" بمشاكسة: قصدك حاجات؟
وبعدين بستغل إن جوزي ظابط! أنا
زمان كنت بعمل تلات أربع خناقات،
وأبويا كان راجل عادي. دلوقتي جوزي
ظابط، يعني هنرفع مستوى الخناقات!

نظر إليها بتركيز محاولاً فهم ما تخفيه:
-طب يا 'وزة'، احكي لي عملتي إيه عشان
أعرف أتصرف لو حصل حاجة.

ردت "نور" بلا اهتمام: حصل خير. ده
موضوع خاص وحساب قديم.

أصر "أشرف" على معرفة التفاصيل
وقال:

-مفيش حاجة اسمها خاصة بينا. وبعدين
أنا مش زي أصحابك اللي أكيد قولتي
لهم. اعتبريني يا ستي صاحبك!
ابتسمت له وقالت بمرح: إيه ده؟ أوعى
تكون بتغير من أصحابي! أزعل يا باشا.
ثم تنهدت وهتفت عندما رأت نظرتة التي
تنذر بالخطر:

-بص، الموضوع حوار كده حصل معايا
أنا وصحابي وكام بنت تاني. وبعدين
مش هينفع أقولك. لو خاص بيا كنت
قولتك.

رغم القلق الذي اعتلى وجهه، تنهد
وقال:

-مع إني مش مقتنع بكلامك وحاسس
إنك بتتهربي، بس تمام. المهم إنك بخير.

ولو فيه أي حاجة، تيجي تقوليلي، لأن
مفيش أسرار بينا. وأكيد لو قولتي مش
هروح أقول لحد. بس أنا هسيبك على
راحتك.

اتسعت ابتسامتها وهتفت بمرح لتغيير
الموضوع:

-باشا، أنا شكلي استعجلت واخترت
غلط. أنت بخيل وهتجو عني، وهتفرح
فيا الحاجة لما قولت لها محدش بيموت
من الجوع. وأنا أهو هموت!

لم يجبها، بل أشار للنادل ليأتي. وعندما
حضر، طلب لها طعامها المفضل. بعدما
غادر النادل، تساءلت باهتمام:

-عرفت منين إني بحب الأكلة دي؟

غمز لها وهمس: ده سؤال تسأله واحدة
كتومة، مش واحدة كل ما تشوف وشي
تقول عايزة أكل!

نظرت له بغضب ظنت أنه سيهدئها بكلام
معسول عندما اقترب منها وهمس،
لكنها تفاجأت. هتفت بضيق:

-طب، أكذب عليا وقول مقدرش أنسى!

رد "أشرف" باستفزاز: الكذب حرام يا
'وزة'.

في منزل "تامر حسني"، كانت "إيمان"
تجلس مع "ديالا" في غرفتها حتى
داهمها النوم وراحت في ثبات عميق.
استغلت "إيمان" الفرصة، جذبت هاتفها

واتصلت به. بعد ثوانٍ، جاءها صوته
المحبيب لقلبها وهو يهتف بحب:

-أمنيّتي، وحشتيني أوي.

ردت عليه "إيمان" بلهفة وحب يضاها
حبه أضعافاً:

-حبيبي، وأنت وحشتني أكثر. كده من
امبارح مش سامعة صوتك!

أردف بأسف: حقك عليا يا أمنيّتي، أنا
كنت مشغول. بس كنت هكلمك. طمنيّني،
"ديالا" عاملة إيه؟ وماما والكل عندك
أخبارهم إيه؟

أجابته لكي يطمئن قلبه: الحمد لله كنا
بخير. والنهارده "ديالا" وافقت على كتب
كتابها. والصراحة الواد عاجبني وشكله
محترم. بس أمك على طول زعلانة

عليك، وأنا عايزاك تكلمها. حرام هي
تعبانة.

تتهد "تامر" بحزن واشتياق لوالدته
الحبيبة:

-مش هقدر أكلمها. هتفضل تعيط وتوجع
قلبي، وأنا أصلا مش متحمل. بالله عليك
يا عمتو، خلي بالك منها عشان خاطري،
وظمنيها إنه هيجي يوم وأرجع. والحمد
لله إنكم بخير، و"ديالا" هتكون بخير مع
"مارس"، أنا واثق.

ردت عليه "إيمان" عبر الهاتف بحنان:

-حاضر يا حبيبي، متقلقش. أنا مش
بسيبها لحظة، و"سلمي" طول الوقت
معاها. المهم، أنت خلي بالك من نفسك
عشان خاطري.

قاطعهما صوت "فارس" الذي ولج

للغرفة وتسال بفضول:

-مين ده اللي يخلي باله من نفسه؟

الفصل التاسع والعشرون

“يكفيك عاراً يا تارك الصلاة بأن العلماء
أختلفوا أنت فاسقٌ أم كافر...”

ردت عليه عبر الهاتف بحنان: حاضر يا
حبيبي، متقلقش. أنا مش بسببها لحظة،
و"سلمي" طول الوقت معاها. المهم أنت
خلي بالك من نفسك عشان خاطري.

-مين ده اللي يخلي باله من نفسه؟

سؤال خرج من "كريم" بتعجب بعدما
ولج غرفة شقيقته ووجد عمته تتحدث
في الهاتف.

توترت "إيمان" وهي تقول بعدما
خفضت الهاتف عن أذنها لكنها لم تغلق
المكالمة:

-ده... ده مش حد.

تفحص توترها بنظرات خبيرة وهو يقول
بجدية:

-سلميلي عليه، وقوليله إني زعلان منه،
ولما يجي فيه بينا حساب.

أخفضت رأسها بخجل منه؛ فمنذ أيام
سألها عنه، وأخبرته أنها لا تعلم شيئاً
ولم يتواصل معها. لكنهما استمعا
لصوت "تامر" يصدح من الهاتف
بجدية:

-قوليله إن دي أول مرة أكلمك.
استمع "كريم" للصوت، ف جذب الهاتف
من "إيمان" برفق وهو يقول:
-أهلا بالبشمهندس الجبان اللي أضعف
من مواجھتي.

تتحنح "تامر" بحرج وهتف بشوق:
عامل إيه يا 'كريم'؟ طمني عليك.

رد "كريم" بتهمك رغم اشتياقه الشديد
لأخيه:

-بخير يا خويا، المهم أنت عامل إيه؟
وجاي إمتي؟ ولا مش ناوي تيجي كتب
كتاب أختك؟

تههد "تامر" بحزن وهو يهتف: حقك
عليا يا 'كريم'، متزعش مني. أنا مليش
غيرك، بس مش هقدر أجي. البركة فيك
وفي بابا. أنا مش هقدر أواجه أبوك؛
لأنني عارف إنه هيخليني أحس إنني
السبب في اللي حصل لـ'ديالا'. وأنا والله
بحاسب نفسي كل يوم على اللي حصلها
بسببي.

رأف "كريم" بحال شقيقه بعدما استمع
لصوته الحزين، فزفر بقوة ثم قال:
-أنا مش زعلان منك، أنا زعلان عليك
لأنك شايل هم أكبر منك. اللي حصل
لـ'ديالا' نصيب، وربنا يجزيها على
صبرها خير. وأنت مش ذنبك. 'وما كان
ربك بظالم للبيد'. ربنا مش هيحاسبها
هي على ذنبك. ده اختبار ليها، وربك
غفور رحيم. استغفر عن ذنوبك وربك
هيعفرك ويراضيك. وبالنسبة لأبوك،
فهو أكيد مش هيحاسبك على اللي
حصل. هو بس زعلان إنك مشيت من
غير ما حد يعرف وفي وقت زي ده.
فأنت لو رجعت، كل حاجة هترجع زي
الأول بإذن الله.

كم أراد أن يشكر القدر على دخول شقيقه غرفة عمته، ليعلم أنها تحدثه لكي تظمن عليه. فهو قال لعمته ألا تخبر أحداً أنه يحدثها؛ لم يكن لديه القدرة على مواجهة أحد. لو كان يعلم أن شقيقه سيقول هذا الحديث، لكان تواصل معه منذ مغادرته البلاد. ابتسم براحة وهو يقول بصدق:

-أنت وحشتني أوي يا "كريم". وكان نفسي تكون معايا دلوقتي. أنا من يوم ما سافرت ما حسيتش بالراحة غير لما كلمتك. أنت غالي عندي أوي والله العظيم، متزعش مني.

رد عليه "كريم" بحنان: بس يا أهبل. أزعل منك إيه؟ هو أنا عندي أغلى منك؟

أنت سندي في الدنيا. لو أنت محتاجني،
فأنا محتاجك أكثر منك. أنا ببقى ماشي
رافع رأسي ومظمن عشان أنت في
ضهري. تعالى يا "تامر". وكلمة مني:
مش هخلي أبوك يقولك حاجة تزعلك.
وأنت عارف إني قد كلمتي.

اطمان "تامر" كثيرًا أن علاقته بشقيقه
على ما يرام، وأنه لم يغضب منه بل هو
غاضب لأجله. لذلك ابتسم وهو يقول:

- عارف، بس خليه شوية لأنني مش
هقدر أنزل دلوقتي. خلي بالك من ماما
وعمتي و"ديالا". وسلملي على "سلمي".
هي كويسة؟

كما هو دائماً، رغم مشاغبه، لكنه
حنون للغاية. ابتسم "كريم" وهو
يخبره:

- هي كانت زعلافة شوية لما مشيت،
بس هي بخير الحمد لله. المهم خلي بالك
أنت من نفسك، وما تشغلش بالك بينا.
إحنا كويسين، ورن عليا يا هندسة
عشان ما أزعلش.

قال جملته الأخيرة بمرح، فرد "تامر"
بنفس المرح قبل أن يغلق المكالمة:

- أنت توامر يا دوك. هو إحنا عندنا كام
"كريم"؟ هقفل دلوقتي عشان مشغول
وهكلمك تاني. سلام.

ودعه، ثم أغلق الهاتف وناوله
لـ "إيمان". اقترب من شقيقته الغافية

بسلام، وقبلها من جبينها، ثم نهض
ينظر إلى عمته التي بادلتها النظرة بأسف
وهي تقول:

-متزعش يا 'كريم'، بس 'تامر' قالي
ماقولش لحد إني بكلمه.

تفهم "كريم" ما تقوله. اقترب منها
وربت على رأسها بحنان:

-أنا عارف يا 'إيمان' إنك بتكلميه من
يوم ما سافر. ومش زعلان منك إنك
خبيتي؛ لأنني عارف إن 'تامر' اللي قالك
ما تقوليش لحد.

ارتمت عليه تعانقه وهي تقول بكاء: أنا
زعلانة أوي على اللي حصلنا. 'ديالا'
طول الوقت ساكته، و'تامر' سابني
ومشى، وأنت دايماً مشغول، و'سلمي'

يعيني متفرقة بينا. كل شوية تروح تقعد
مع حد فينا عشان تظمن عليه.
بادلها العناق وهو يهتف: كل حاجة
هتعددي، وهنرجع زي الأول وأحسن.
سببها على الله.

في المساء، كانت تجلس على الفراش،
وبيدها اليسرى كتاب "قانون
المرافعات"، بينما يدها اليمنى تدق على
الدَّف وهي تحفظ القوانين:
"من قتل يُقتل ولو بعد حين

لا أما ياخذ عشر سنين

المادة ٤٧ صفحة ٨ على اليمين

المادة ٤٧ صفحة ٨ على اليمين

المادة ٤٧ صفحة ٨ على اليمين."

ظلت تردد رقم المادة بسرعة، وما زالت
يدها تدق على الدف بقوة، إلى أن قاطع
مجهودها المبذول رنين هاتفها. نظرت
إلى الشاشة لتجد اسم "دعاء". ما إن
أجابت، حتى صرح صوت "دعاء"
الغاضب:

-إيه اللي أنتي عملتيه ده يا مصيبة؟

ردت عليها "نور" ببرود، وهي تعلم
جيدًا عن ماذا تتحدث الأخرى:

-عملت إيه؟

بنفس الغضب، ردت "دعاء": نور!
متستعيطيش. 'بسملة' قالتلي.

هتفت "نور" بصدمة مصطنعة، فهي
كانت تعلم أن "بسملة" ستخبرهم:

- آه يا فتانة يا 'بسملة'! وربّي لأربيها.
أقولها ما تروحش تقول لكم، وهي
تروح تقول!

زاد غضب "دعاء"، فصاحت بها: نور!
اخلصي وقولي عملتي كده ليه؟
تهدت "نور" بضيق واضح، ثم أخبرتها
باختصار:

- هما اللي عصبوني. أنا كنت رايحة
أشوفكم قبل ما أقابل 'أشرف'.
ملقتكمش. كلمت 'بسملة' قالت إنكم
روحتموا. كنت ماشية، فوقفت 'نرمين'
'و'علا' قصادي، وقعدوا يقولوا كلام
سخيف عنك وعن الدكتور. رحّت جبتها
من شعرها عشان تعرف الله حق.

حاولت "دعاء" أن تهدئها، فتحدثت
بهدوء لتخبرها أن تتحكم بنفسها:

-يا بنتي، مش كل حاجة تتحل بالضرب.
ربنا خلق العقل عشان نفكر ونتصرف
صح. إحنا مش عايشين في غابة.

لم تهتم "نور" بما قالتها "دعاء"، فردت
بلا مبالاة:

-فك مني يا 'دعاء'. اتصرفي أنت
بعقلك. دي أشكال مينفعش معهم غير
كده. وبعدين أنا رببتها وخلص
الموضوع خلص.

ردت "دعاء" بيأس: مفيش فايده فيكي
يا 'نور'.

قالت "نور" بمرح: قلب "نور" أنت! المهم، رني على 'بسملة' و'جيهان' شوفيهم مختلفين فين.

أجابت "دعاء" بهدوء: هرن أنا على 'جيهان'، وأنت رني على 'بسملة'.

ما هي إلا دقيقة، واجتمع الأربعة في مكالمة جماعية، لتقول "جيهان" بمشاكسة:

-هاه؟ في حد اتضرب تاني ولا كفاية مرة في الأسبوع؟

ردت "دعاء" ساخرة وهي تقلد "نور":

-أنا كنت بعمل مصيبتين ثلاثة وأنا واحدة عادية. دلوقتي جوزي ضابط، ماعملش ثلاثة أربعة. فتفتكري هكتفي بمرة في الأسبوع؟

ردت عليهم "نور" بضيق: أنا غلطانة
إني بدافع عنكم. المرة الجاية هشاركهم
الكلام عليكم!

سألت "جيهان": جبتي الفستان لـ'نونه'
يا 'بسملة'؟

ردت "بسملة": آه، وطلعت عيني عشان
يعجب ماما. كل ما أوريها واحد تقول: لا
مش حلو، عايزة واحد أحلى. لحد ما
تعبت وقلت لها تجيب هي، راحت قالت:
خلاص هاتي أي واحد.

سألت "نور": ابن مين النونة ده؟

سخرت "بسملة" منها: يا ذكية! بقلك
فستان يعني لبنوتة. بنت عم ماما خلفت
بعد سنين. عشان كده ماما كانت عايزة
تجيب لها فستان هدية.

ردت "دعاء" بهدوء: ربنا يبارك لها
فيها، ويرزق كل محتاج بالذرية
الصالحة. أمّن الجميع على الدعاء، ثم
قالت "بسملة" بعدما تذكرت الفتاة التي
جلست بجوارها في وسيلة المواصلات:

-النهارده في المواصلات، فيه بنت كانت
راكبة جنبي وبتخبّي الموبايل وهي بتكلم
حد على الواتس. مش عارفة دي هبله
ولا إيه؟

أكملت بضيق: قال يعني أنا هبص
عليها! مالي أنا وما "أحمد" بتاعها ده
اللي هتقابله بكره الساعة ٤ بعد درس
الفرنساوي، علشان تديه هدية وتصلحه.
أصله كان زعلان منها علشان هزارها

مع 'محمد' اللي بياخد معاها في درس الكيمياء.

صدحت ضحكات الفتيات بعدما صدقن أسلوبها الغاضب وهي تحكي، وكأنها لا تعلم لماذا كانت الفتاة تخفي الهاتف عنها.

شاركتهم "بسملة" الضحك وهي تقول:

-مش عارفة ليه كان عندي فضول أعرف هتصالحه إزاي!

بعد مرور أسبوعين، عاد "إبراهيم" إلى المنزل في الصباح بعدما قضى الليلة السابقة في المشفى. وجد شقيقته تجلس أمام التلفاز تتابع مسلسلها المفضل

"التفاح الحرام". تتحنح كي ينتبهها، ثم

وقف أمام الشاشة ليزعجها قائلاً بمرح:

-يلدز في الليل والنهار؟ ارحمي نفسك يا

ماما!

ضحكت عليه وهي تحاول النظر خلفه

لتتابع المشهد المحبب لقلبها، ثم قالت

بحماس:

-اوعى! 'دوغان' هيعترف لـ'يلدز' إنه

بيحبها.

جلس بجوارها متسائلاً بتعجب: هو أنا

مش كلمتك بالليل وقلتي إنك بتسمعي

'يلدز'؟

ردت دون اكتراث: أيوة.

سألها باستنكار: أمال إيه ده؟

أجابت ببساطة: الإعادة.

حذق بها بنظرات غاضبة وهو يقول:

ولما هي إعادة، بتسمعيها تاني ليه؟

ابتسمت بفرحة، كأن "دوغان" نفسه

اعترف لها بحبه، وقالت:

- أصل المشهد ده فرحني أوي! أنت

مش وفتش "دوغان" وهو بيمسك إيد

"يلدز" ويبصها بنظرة مليانة حب

ويقول: 'حبك يا يلدز'!

ثم عانقته بحماس وقالت: ياااه، مشهد

حلو أوي!

ابتسم لها وبادلها العناق وهو يربت

على كتفها بحنو، لكنها انتفضت فجأة

عندما رأت "دوغان" يدخل المنزل في

المشهد، فوثبت على الأريكة تتوسل كأن

"يلدز" تسمعها:

-يلا يا يلدر، وافقي! يلا عشان خاطري!
انتهت الحلقة عند هذا المشهد قبل أن
ترد "يلدر"، لتجلس "حنان" بإحباط
وحزن. ضحك "إبراهيم" بشدة على
وجهها الحزين، وقال بصعوبة بسبب
ضحكه:

-يا بنتي أنتي مجنونة؟ مش سمعتها في
الليل وعارفة إنها هتخلص كده؟ زعلانة
ليه دلوقتي؟

ردت عليه "حنان" بحزن: كنت عايزاها
ترد عليه.

قربها منه وربت على رأسها بحنان:

-هترد عليه في الليل، متقلقيش.

تشبثت به قليلاً قبل أن تسأله بتردد:

-إبراهيم، هو أنت بتحب 'جيهان' زي ما
'دوغان' بيحب 'يلدز'؟

أبعدها عنه قليلاً لينظر إليها، ثم أجاب
بعدهما تجاهل الجزء الثاني من سؤالها:

-آه، بحبها. بتسألني ليه؟

أجابت ببراعة وحب صادق: عشان لو
بتحبها هتبقى فرحان، وأنا عايزاك تكون
فرحان ومش عايزاك تزعل أبداً. الزعل
بينقص العمر، وأنا مليش غيرك ومش
عايزاك تسييني.

قالت جملتها الأخيرة وهي تبكي،
ليجذبها إليه مرة أخرى ويربت على
ظهرها ليهدها، ثم همس بصوت
مختق:

-وأنا كمان مليش غيرك. أنتي عيلتي
كلها وأغلى ما ليا. أنتي الحاجة الوحيدة
اللي طلعت بيها من الدنيا... أنتي بنتي
وأختي وصحبتني وحببية قلبي.

ابتسمت ومسحت دموعها بيده، فهي لا
تريده أن يراها تبكي. لقد تحمل الكثير
معها، وكان دائماً سندها، حتى في أحلك
لحظاتها، خاصة عندما كانت تبكي لرؤية
فتيات مع أمهاتهن. كان يواسيها دائماً،
ولا يتركها إلا بعدما يضحكها.

أبعدت عنه بحركة خفيفة، ثم سألت
بمرح لتخفي آثار الحزن على وجهها:

-طول عمرك بتقول إن الدنيا حلوة
وتتحب، وإن الناس هي اللي بتصعبها.
طيب بتحب 'جيهان' أكثر ولا الدنيا؟

رد عليها بحب: أنا محبتش الدنيا غير
بوجودها. هي أجمل ما مر في العمر.

نظرت له بسعادة، لكنه تتحنح فجأة
وكانه تذكر شيئاً وقال:

-شوفتي؟ بسبب "يلدز" نسيت أقولك
حاجة مهمة.

سألته باهتمام: حاجة إيه؟

أجاب بجدية:

-خدت إجازة أسبوع، وهنروح إسكندرية
نقضي يومين حلوين مع بعض ونرجع.

قفزت بسعادة وقبلته على وجنته، ثم
بدأت تدور حول الأريكة وهي تردد

بحماس:

-يحيا إبراهيم! يحيا إبراهيم!

ابتسم إبراهيم بهدوء وهو يتابعها، ثم
قال قبل أن يذهب إلى غرفته: جهزي
نفسك، هنطلع بعد العصر.

انتهت اختبارات الفتيات، وتبقى فقط
آخر اختبار لـ "نور" لينتهي العام
الدراسي. لذلك، اقترحت "نور" أن
يخرجوا معاً بعد الامتحان. وهما هي
تدخل المدرج بخطوات واثقة، كأنها
تملك العالم، ثم جلست في مكانها تنتظر
ورقة الامتحان، وهي تهمس بدعاء
خافت للمولى أن يوفقها.

بعد مرور بعض الوقت، سقط قلمها على
الأرض. وعندما انحنت لتلتقطه، اقترب

منها المراقب ونظر إليها بشك، ثم سألها
بجدة:

-بتعملي إيه؟

أجابت باحترام: القلم وقع مني يا دكتور،
وكنت بجيبه.

رد بثبات ونبرة صارمة: اقعدني مكانك،
ولما القلم يقع تقولي لحد مش تتحركي
لوحديك. أنت قاعدة في لجنة.

نفخت وجنتيها بضيق وقالت باقتضاب:
-حاضر.

انتهى الوقت، وسلمت ورقتها وغادرت
المدرج. أثناء خروجها، اصطدمت بفتاة
كانت تدخل ولم تعتذر الفتاة، فتأففت
"نور" بامتعاض وهي تقول بصوت
منخفض:

-التعليم على اللي هيتعلموا!
توجهت إلى مكان تجمع الفتيات،
فوجدتهن في انتظارها. وعندما اقتربت
منهن، سمعت "دعاء" تقول بنبرة
ضيق: -خلاص يا 'بسملة'، سببها على
الله، وإن شاء الله تعبك مش هيضع.
خلتينا كلنا قلقنا بسبب توترك.

نفخت "بسملة" وجنتيها بضيق، ثم
قالت بقلة حيلة:

-ربنا يستر.

جلست "نور" دون أن تلقي التحية،
فبادرتها "دعاء" بحنق:

-طب ارمي السلام ياختي وأنتِ قاعدة!

أقلت "نور" السلام سريعًا، فسألتها
"بسملة" باهتمام:

-ها يا "نور"، طمئني. عملت إيه

لكن قبل أن ترد، قاطعتها "دعاء"

بيأس:

-يا بنتي، اتهددي! هو مفيش غير

الامتحانات في حياتنا؟ طالعين نتنفس

شوية بعد ما اتخنقتنا، نتكلم في

الامتحانات برضه؟

زفرت "بسملة" بضيق، بينما ردت

"نور" أخيراً على سؤالها قائلة:

-الحمد لله، عدى على خير. لكن الدكتور

المراقب ضايقتي.

سألتها "دعاء" بفضول: ليه؟ عمل إيه؟

ردت "نور" بضيق: القلم وقع مني،

ولما نزلت أجيبه من الأرض شافني. من

وقتها وهو داير حواليا، فاكرني بغش.

حتى وأنا بأتنفس، كان يبصلي كأني
عاملة جريمة، وأنا أصلاً مكنتش بغش
ولا حاجة.

علقت "دعاء" بهدوء:

-حصل خير. الحمد لله خلصنا. يلا بقى
نتكلم في حاجة تانية غير الامتحانات،
أنا خلاص هتجنن منكم!

ابتسمت "نور" بحماس وقالت: طب
هنجيب لبس التخرج منين؟

ردت عليها "جيهان" بسخرية: هنجيب؟
قصدك هتجيبوا. أنت لسه قدامك سنة
ياختي!

نظرت "نور" إليها بغضب مصطنع
وقالت بتحدي:

-ها! هنجيب منين؟

قالت "بسملة" بلا مبالاة: مش لما تظهر
النتيجة الأول وبعدين نفكر؟
تهدت "دعاء" بخوف على "بسملة"،
فهي تعرف مدى خوفها من النتائج.
حاولت طرد تلك الأفكار من رأسها
وقالت:

-سيبك من النكديّة دي. سمعت عن مكان
البنات بيقلوا إنه يفصل روب التخرج
بشكل حلو، وممكن يكتبوا عليه أي
حاجة. 'جيهان' تعرف المكان.
أضافت "جيهان" بجديّة: بس فيه
مشكلة.

سألت "بسملة": مشكلة إيه؟

أجابت "جيهان" بهدوء: الواد اللي في
المحل ابن عم 'علا' وخطيبها. وعلا

بتقف هناك كثير، يعني ممكن نشوفها
وتحصل مشكلة.

تحدثت "نور" بلا اكتر اثار: وإيه يعني؟
إحنا هنروح ننفعهم. ولو اتكلمت، يبقى
تتربى. يلا بس نروح، أنا متحمسة أوي.

سألتها "جيهان" بشك: أنت متحمسة
عشان لبس التخرج ولا عشان 'علا'
هناك؟

ضحكت "نور" وقالت بمرح: لما عرفت
إنها هناك، طبعًا! دي فيها كلام.

ضحكت "دعاء" بيأس، وشاركتها
"بسملة"، بينما بقيت "جيهان" صامته.

لاحظت "بسملة" صامتة، فسألتها
باهتمام وهي تغادر الكافيه معهن:

-مالك يا 'جيهان'؟ من ساعة ما جينا
وأنت ساكتة. فيه إيه؟

ردت "جيهان" بحزن لم تستطع إخفاءه:

-إبراهيم' كلمني الصبح وقال إنه
مسافر. وأنا زعلانة إنه هيسيني.

توقفن عن السير ونظرن إليها بدهشة.
سألته "نور":

-هيسافر فين؟ وهيسيبك إزاي؟ مش
فاهمة.

أجابت "جيهان" بحزن: إسكندرية.

صاحت الثلاثة بدهشة: نعم؟!!

نظرت "جيهان" إليهن بتعجب وسألت:

-إيه مالكم كده؟

صرخت "نور" بغضب مصطنع:

-إسكندرية وهيسيبك، وزعلانة؟ أمال لو
سافر الصعيد كنا هنجي نعزي فيك!

تهدت "دعاء" وقالت: يا رب صبرني
على الجنان ده. يا "جيهان"، هو مش
مهاجر. إسكندرية بينها وبين القاهرة
ساعتين ونص. لو حصل أي حاجة
مهمة، هيبقى عندك بسرعة. وبعدين،
أنت محتاجة منه إيه؟ ده خطيبك مش
جوزك!

ردت "جيهان" بخوف: أنا خايفة
وزعلانة ومش عارفة ليه. مش عايزاه
يسافر، ولولا إنه وعد أخته كنت طلبت
منه ميسافرش.

ابتسمت "بسملة" وهي الوحيدة التي
شعرت بما تمر به "جيهان". فقالت
بهدوء:

-مز عيش. إن شاء الله خير. إحساسك
طبيعي لأنك اتعودتي عليه، لكن
الموضوع أبسط مما تظني. هيروح
ويرجع.

ابتسمت "جيهان" وردت: طب يلا نروح
نشوف هنجيب إيه.

هتفت "نور" بمرح: سيبولي نفسك
خالص، وأنا هفسحكم فسحة تحلفوا
بيها!

في منزل "أشرف"

كان مستلقيًا واضعًا رأسه على قدم والدته، وهي تعبت بخصلات شعره بحنان، قبل أن تسأله بابتسامة:

- ما قلتيش، حددت معاد الفرح مع حماك ولا لسه؟

ابتسم "أشرف" بشوق عندما مر طيفها في خياله، ثم قال:

- آه، يا ماما. بعد حفلة التخرج بتاعت أصحابها، لأنهم متفقين يعملوا فرحهم مع بعض.

نظرت إليه والدته باستغراب:

- وأنت تعرف أصحابها متجوزين مين عشان تعمل فرحك معاهم؟

رد عليها "أشرف" بهدوء: "إبراهيم" هيتجوز بنت خالها، وصحبتها هتجوز

الدكتور "فارس"، صاحب "إبراهيم".
اتقابلنا مرة قبل كده. يعني مفيش
مشكلة.

قبّلت جبينه بحنان، ثم قالت متمنية:

-ربنا يتملكم على خير ويسعدكم يا
حبيبي. أنا كنت زعلانة منك، كان نفسي
أشاركك أول فرحتك في جوازتك الأولى،
وأشوفك عريس زي القمر. بس الحمد
لله، ربنا كتب لي أشوفك عريس مرة
تانية.

شعر بالخوف من أن يخبرها بالحقيقة،
فتصدم وتتدهور صحتها، فالتزم الصمت
وقال: "

-إبراهيم" سافر هو و"حنان" من نص
ساعة، وقال هيكلّمك ويسلم عليك.

كادت أن ترد، لكن قاطعها صوت طرقات
على الباب. اعتدل "أشرف" في جلسته
وسألها باستغراب:

-مستتية حد يا ماما؟

هزّت رأسها نافية: لا... هستتى مين؟
يمكن حد من الجيران.

قام "أشرف" ليفتح الباب، لكنه فوجئ
بشخص لم يتوقع رؤيته. ذلك الشخص
نظر إليه بسخرية، ودفعه بعيداً عن
الباب ودخل دون إذن. وقف "أشرف"
مذهولاً، وضع يده على وجهه محاولاً
استيعاب الموقف، ثم أغلق الباب والتفت
بحدة وهو يسأل:

-أنت عايزة إيه؟

تسألت والدته بحيرة: أنت مين؟

نظرت "هاجر" إليها بتفحص، ورأت الشبه الواضح بين "أشرف" ووالدته. بدت عليها الطيبة، مما جعلها تتساءل كيف أخبرها "أشرف" أن والدته توفيت بعد ولادته؟ قاطع أفكارها صوت "أشرف" الغاضب:

-هتفضلي ساكتة كثير؟ عايزة إيه؟

ردت والدته بخرج: عيب يا "أشرف".
دي ضيفة. اتفضلي يا بنتي.

تحركت "هاجر" مع والدة "أشرف" بشموخ إلى مكان الجلوس وجلست بثقة، بينما والدته قالت بابتسامة هادئة:

-تشربي إيه؟

رد "أشرف" بغضب، رافضاً وجودها:

-هي كمان هتشرب!

لكن "هاجر" لم تبالِ بغضبه، وقالت
بابتسامة مستفزة:

-شكرًا يا طنط، أنا مش جاية أضايف. أنا
جاية أشوف ابني.

نظرت إليها والدته بعدم فهم: ابنك؟

حدقت "هاجر" بـ "أشرف" قائلة
بسخرية:

-آه، معلش نسيت أقولك. "مازن" ابني،
وأنا مرات ابنك سابقًا.

تفوهت والدته بصدمة: المرحومة؟

صرخ "أشرف" غاضبًا في وجهها:

-اخرسي بقي واطلعي بره! إلا وقسم
بالله هطلعك على نقالة! أنتي إيه يا

شيخة؟ معنديش دم؟

وقفت "هاجر" أمامه تصيح: مش
هخرس! ده ابني اللي أنت حرمتني منه
سنين، ومش هخرج من هنا من غيره!
رد "أشرف" بكل غضب: نجوم السماء
أقربك!

قاطعتهم والدته بصوت مرتفع: بس!
ثم نظرت إلى "أشرف" متسائلة بحدة:
أنا عايزة أفهم، مين دي؟ مش كنت
بتقول إن مراتك ماتت؟

مسح "أشرف" وجهه بعنف، وهو
يشعر أن اللحظة التي كان يخشاها قد
وقعت. وقبل أن يجد الكلمات المناسبة،
تولت "هاجر" المهمة وهي تبكي:

-حضرتك عندك بنت، وأكيد مش
هترضني يحصل فيها اللي حصل معايا.

ابنك المحترم كان مدمن، وكل يوم كان
بيض ربني ويذلني، ومعيشني في جحيم.
لحد ما هربت منه وسافرت أتعالج نفسيًا
وجسديًا. قعدت فترة لحد ما رجعت
كويسة، وبابا رفع قضية خلع وكسبتها.
وبسبب اللي كان حصلي، ما فكرتش في
"مازن"، لأنني كنت في مستشفى
الأمراض النفسية. وممكن أديكم عنوان
المستشفى وتتأكدوا. وأول ما بقيت
كويسة، رجعت أدور على ابني.

أخذت نفسًا عميقًا وأكملت: لكن ابنك
المحترم مش عايز يخليني أشوف ابني،
وبيتهمني إنني فكرت في نفسي وسبته
ومشيت. طيب لو حضرتك مكاني، ولا
"مي" بنتك، هترضي يحصل فيها كده؟

صدمة...

لم تقع فقط على والدته، بل على
"أشرف" نفسه. كان كالنيران تشتعل
داخله، لا يصدق أن شقيقه فعل ذلك،
وأنه شارك في ظلمها حينما ظن أنها
تركت ابنها. هز رأسه بعنف، رافضاً
التصديق:

- أنتي كدابة! "أشرف" مستحيل يعمل
كده!

مسحت "هاجر" دموعها بأناملها، ثم
أخرجت هاتفها من الحقيبة، وفتحت
لتعرض الصور عليهما:

- شكك نسيت أنت عملت فيا إيه؟
اتفضلي يا طنط، شوفي بنفسك. ابنك
كان بيصـورني وهو بيضـر بني

ويبعثها لي. وكان يقول: "عشان لما تشوفهم تخافي تغلطي".

تناولت والدته الهاتف بيد مرتعشة، وما إن رأت الصور حتى اتسعت عيناها بدهشة وصدمة. الصور كانت تُظهر "هاجر" مقيدة ووجهها ملطخ بالدماء، ترتدي ثيابًا منزلية، تبكي ودموعها تنهمر على وجهه منتفخ من الصفعات، وشعرها مشعث. وتبع الصور فيديو يظهر "أشرف" وهو يضربها بلا رحمة، وعنف شديد، بينما صوت بكائها مكتوم بسبب اللاصق على فمها. في الخلفية، كان صوت بكاء الصغير يقطع القلوب.

جذب "أشرف" الهاتف من يد والدته عندما سمع صوت بكاء الصغير. رأى ما

جعلته يغلق عينيه بقوة، رافضاً
التصديق. هبطت دموعه بوجع، ثم فتح
عينيه بتردد، يتمنى أن يكون ما يراه
مجرد كابوس.

قطع صمته صوت والدته وهي تشير إلى
غرفة بجانب المطبخ:

-ابنك في الأوضة اللي جنب المطبخ. هو
نومه ثقيل، عشان كده مسمعش اللي
حصل.

ابتسمت "هاجر" بسخرية، ونظرت إلى
"أشرف":

-زي أبوه، لو اتقتل قتيل جنبه مش
هيحس.

ركضت بلهفة لتري طفلها، أما
"أشرف" فراقب تحركها بحزن. تحرك

خطوة نحو والدته، لكنها رفعت يدها
لتوقفه وهي تقول بصوت مكسور:

-فين "أشرف"؟ مات، صح؟

نكس رأسه ولم يُجب. انهمرت دموعها
كالأمطار بعدما استوعبت الحقيقة. من
كان بالفيديو ليس "شريف" الذي كان
يخدعها طوال الوقت ويدّعي أنه
"أشرف"، بل هو "أشرف" الحقيقي.
كانت النظرات في عينيه تؤكد لها أنه
هو من فقدته منذ أعوام بسبب رجل كان
يلقب بزوجها.

وعند هذه اللحظة، سقطت والدته مغشياً
عليها، فاقدة لكل معاني الحياة.

هرع إليها "أشرف" وهو يصرخ

برعب:

-ماما!

الفصل الثالثون

يقول شمس التبريزي :

"البشر يميلون للإسـتخفاف بما لا
يمكنهم فهمه"

ولهذا عندما سُئِل تلميذه جلال الدين
الرومي:

"نراك تقرأ وتكتب كثيرًا ، فماذا
عرفت؟"

فردّ قائلاً : "عرفت حدودي"
وما أجملها من معرفة!

جمعت "روبين" أغراضها في حقيبة،
وقررت أن تترك المنزل بعد أن علمت
أن صغیرها قد عُقد قرانه دون أن
يخبرها أحد. واليوم، اكتشفت بالصدفة
أن الأمر قد انتهى، وأصبحت زوجته

رسميًا، ولن تستطيع تغيير الحقيقة.
شعرت بأنها فقدت صغيرها بسبب تلك
الشمطاء، لكنها لن تستسلم وستجعلهم
يندمون على إخفاء الحقيقة عنها.

تحركت بخطوات غاضبة لتتزل درجات
السُّلم، ممسكة بالحقيبة، لتجد "منار"
واقفة عند نهاية الدرج.

سألتها "منار" باستغراب: رايحة فين يا
ماما؟

تجاهلتها "روبين" وهي تتابع طريقها
نحو الباب دون إجابة. كانت غاضبة من
الجميع، حتى من فئاتها التي كانت تعلم
بالأمر ولم تخبرها. أمسكت "منار"
بيدها لتوقفها قائلة برجاء: عشان

خاطري يا ماما، متزعليش. إحنا عملنا
كده عشان "مارس" ما يزعلش.

التفتت إليها "روبين" غاضبة، وهتفت
بحدة:

- ما يزعلش "مارس" وأنا أولع؟! يعني
إيه ابني يتجوز من غير ما أعرف؟!
يعني إيه تخبّوا عني كلكم!؟

حاولت "منار" الرد، لكن والدتها
قاطعتها بصياح غاضب:

- يومين! يومين بس اللي غبتهم، أرجع
ألاقيكم كاتبين كتابه من غير علمي؟!
وقلتوا لهم إيه؟ أمه ميتة!؟

قالت الجملة بتهمك وسخرية، فأجابتها
"منار" بنبرة هادئة:

يا ماما، هي ظروفها خاصة، وإحنا ما
عملناش حاجة غلط. هو وجه المأذون
كتب كتابهم ومشينا. حتى "مارس" ما
قعدش معاها.

لكن "روبين" صاحت بغضب أكبر:
وإحنا إيه اللي يجبرنا نجوز واحدة
رخيصة زي دي؟!!

تفوّهت بالكلمات والغضب يسيطر عليها،
ثم أضافت بصوت مرتفع:

-واحدة زبالة هي وعيلتها! ضحكت
عليكم!

وفي تلك اللحظة، دخل "مارس"
المنزل. كان حضوره غير مناسب، كما
فكرت "منار"، إذ توقعت أن وجوده
سيشعل الحرب أكثر.

أما "مارس"، فدخل بهدوء وهو يعلم
تمامًا ما يدور في ذهن والدته. وقف
أمامها بثبات، وقال باحترام وثقة:

- ماما، أنا مش هسمح لمخلوق يغلط في
مراتي، مهما كان مين! عشان كده، دي
آخر مرة تقولي عنها أي كلمة غلط. هي
أعظم وأغلى من إني أسمح لحد يجيب
سيرتها بالباطل. حقك إنك تزعلي إني
خبيت عليك، وأنا والله ما كنت عايز
كده. بس الظروف جبرتني. فأنت لو
عايزة تحاسبني حد، حاسبيني أنا. وأنا
راضٍ بأي حاجة تقوليها أو تعملها
فيا، طالما هي بعيدة عن الموضوع.

نظرت إليه والدته لثوانٍ قبل أن تقول
بغرور:

-تمام. خليها بعيدة. أنا دلوقتي بخيرك
بيني وبينها. أنت اختار: أمك ولا
مراتك؟

وقع حديثها عليه كالصاعقة. كيف يمكنه
أن يختار بين والدته، أول حب له في
حياته، وزوجته التي تحتاجه الآن أكثر
من أي وقت مضى؟

هتفت والدته بثبات، وهي تجذب
حقيبتها: -فكر واختار. ولما تختار، أنت
عارف مكاني فين.

وصلت الفتيات إلى مكان متخصص في
منتجات الـ "هاند ميد"، وصاحب هذا
المكان هو خطيب الفتاة التي تشاجرت
معها "نور" سابقًا. ولسوء حظهن،

كانت هي من تدير المكان. زفرن بضيق
من وجودها، فقالت "دعاء" بثبات:

-إحنا جاينين نشوف اللي عايزينه
ونمشي، مش جاينين نتخانق. فاهمة يا
"نور"؟

نظرت إليها "نور" بحق وردت:
-واشمعنى أنا؟!!

أجابتها "دعاء" بثبات: عشان محدش
بيعمل مشاكل غيرك.

لم ترد "نور"، وتقدمت إلى الداخل
بخطوات تحمل غرورًا مصطنعًا. نظرت
"دعاء" إلى صديقاتها بقلة حيلة، ثم
تبعنها. وما إن رأتهم الفتاة، حتى تحدثت
بسخرية:

-يا أهلاً وسهلاً! المكان نور بوجودكم...
أوه، قصدي ضلم بس.

ابتسمت لها "نور" باستفزاز وردت:

-روحي، يا شاطرة، نادمي حد كبير أتكلم
معاه.

بادلتها "علا" الابتسامة بنفس الدرجة
من السخرية، ثم قالت بجمود وشر:
-اطلعي برا المكان.

ردت "نور" بعصبية وتحولت للسخرية
قائلة:

-نعم يا أختي! ليه؟ فاكراني قاعدة في
بيت أبوكي؟ فوقي يا ماما بدل ما أجيبك
من شعرك يا منكوشة!

اشتعلت "علا" غضباً وقالت بصوت
مرتفع:

-تجيبني مين يا ماما؟! دانا أدفك مكانك
وماخدش فيكي ساعة!

تقدمت "دعاء" ودفعت "نور" بلطف
لتزيحها جانبًا وقالت بهدوء:

- إحنا مش جايين نتخايق، جايين
نشترى لبس التخرج وعايزينك تطبعي
عليه.

ردت "علا" بعصبية: بطلنا! مش هنعمل
حاجة لحد!

في تلك اللحظة، صدح صوت شاب من
خلفهن:

-فيه إيه؟

التفتت الفتيات ليجدن شابًا في أواخر
العشرينات، يرتدي ترنجانًا رياضيًا أسود،
ذو بشرة سمراء، وعيون سوداء بنظرة

حادّة وشعر مجعد. عندما لاحظ نظراتهن

المتعجبة، قال بحدة:

-فيه إيه يا "علا"؟

ردّت عليه "علا" بغضب وهي تشير إلى

"نور" بنظرة شريرة:

-فيه إني مش بتعامل مع الزبالة،

وطلبهم مش موجود.

اقترب منها الشاب وتحدث بصوت

منخفض:

-احترمي نفسك. فيه حد يقول للرزق

لأ؟!

ثم التفت بهدوء إلى "دعاء" وقال: تحت

أمرك.

قبل أن ترد "دعاء"، صاحت "علا"

بعصية:

-تحت أمر مين؟! يا أنا يا هما في المكان
ده!

نفد صبره وردّ بحدة: امشي يا "علا"
دلوقتي!

شعرت "نور" بالخرج وخافت أن تكون
السبب في مشكلة بينهما، فقالت بهدوء:
-هنجي مرة تانية. يلا يا بنات.

انسحبين واحدة تلو الأخرى، وقالت
"جيهان" بضيق:

-قلتلكم إنها هتكون هناك، يا ريتنا ما
رحنا!

أردفت "بسملة" وهي تسير بجوارها:

-خلاص ياسستي، حصل خير. المهم
دلوقتي هنروح فين؟

ردت "نور": هنروح ندور على مكان
تاني.

وفي تلك اللحظة، صدح رنين هاتف
"جيهان". أجابت على المكالمة، وبعدها
أنهت حديثها، قالت:

-أيوه، "نور" معايا، خدي كلميها.

ناولتها الهاتف، وبعد دقيقتين أغلقت
"نور" المكالمة وأعدت الهاتف
لـ"جيهان"، التي سألتها بتعجب:

-أمال فين تليفونك؟

ردت "نور" بلا مبالاة: فصل شحن.

تحرك "أشرف" خطوة نحو والدته،
لكنها رفعت يدها لتوقفه وقالت بصوت
مكسور:

-فين "أشرف"؟ مات... صح؟

نكس رأسه ولم يُجب. انهمرت دموعها
كالأمطار حين استوعبت الحقيقة. من
ظهر في الفيديو لم يكن "شريف" الذي
خدعها طوال الوقت وأخبرها أنه
"أشرف"، بل كان "أشرف" الحقيقي.
نظراته أكدت لها أنه ابنها الذي فقدته
منذ سنوات بسبب رجل بلا رحمة لقب
بزوجها. وعند تلك اللحظة، سقطت
مغشياً عليها، فاقدة لكل معاني الحياة.

صرخ "أشرف" برعب: ماما!

ركض نحوها بلهفة بعدما سقطت على
الأرض. وضع رأسها على ساقه وبدأ
يصفع وجهها برفق، يبكي كطفل صغير:

-ماما بالله عليك، أوعي تسبيني لوحدي.

أنا ماليش غيرك!

سمعت "هاجر" صراخه من الداخل،

فجاءت راكضة بخوف. وعندما رأت

المشهد أمامها، قالت بلهفة:

-أوعي يا "أشرف"، سبني أشوفها!

لم يرد عليها، فاضطرت لإبعاده بالقوة.

تحسست نبض والدته، ثم ابتسمت

براحة عندما تأكدت أنها ما زالت على

قيد الحياة. قالت له بلهجة جدية:

- "أشرف"، مامتك لازم تروح

المستشفى بسرعة!

رفع نظره نحوها، تائها وكأنه لا يعلم ما

يجب فعله. قالت له بحزم بعدما رأت

نظراته الزائغة:

-شيلها لحد العربية وقعدھا ورا، واقعد جنبھا. أنا هسوق لأنك مش هتعرف تسوق بالحالة دي.

فعل ما طلبته، حمل والدته وأشار لها بمكان مفاتيح السيارة. وقبل أن يخطو خارج المنزل، قال بتشتت:

-مازن؟

ردت عليه بثبات:

-حاولت أصحيه لكنه رفض. ممكن نخلي حد من الجيران يبص عليه، وانت ارن على "نور" خليها تيجي تقعد معاه.

هز رأسه موافقًا، ثم توجهت إلى الشقة المقابلة وطلبت من الجيران البقاء مع الطفل حتى تأتي "نور". بعدها نزل

بالمصعد، ووضع والدته في المقعد الخلفي على قدميه.

بعد لحظات، ركضت "هاجر" إلى السيارة، ولجت إليها بلهفة وقادتها بسرعة.

أما "أشرف"، فحاول الاتصال بـ "نور"، لكن هاتفها كان مغلقاً. زفر بضيق وقال بخفوت:

- "نور" قافلة تليفونها عشان عندها امتحان.

وصلت السيارة إلى المشفى في أقل من ساعة. هبطت "هاجر" أولاً، ركضت إلى الداخل وأحضرت فراشاً متحركاً ومعها ممرض. وضع "أشرف" والدته على الفراش، وتحركوا بسرعة إلى الداخل.

أتى الطبيب على الفور وأمر بتجهيز
غرفة العمليات. وقف "أشرف" ينتظر
أمام الغرفة، يترقب بخوف وقلق بينما
والدته ولجت إلى الداخل.

في مدينة الإسكندرية، حيث الجمال
والدلال، وصل "إبراهيم" بعد ساعتين
ونصف من السفر، برفقة شقيقته. نظر
إليها فوجدها تخرج من السيارة
بحماس، تفرذ ذراعيها، تستقبل الهواء
بسعادة. ابتسم لها وقال:

-افتحي يلا باب الشقة لحد ما أجيب
الشنطة.

ركضت لفتح الباب، ثم دخلت وهو
خلفها. قال لها بابتسامة:

-يلا يا مجنونة، ادخلي ارتاحي شوية
لحد ما أخذ دش وأنزل أجيب الأكل.

ردت عليه باستتكار واضح:

-أرتاح؟! أنا جاية هنا أرتاح؟! أنا جاية
عشان أتفسح يا بابا. يلا، أنت ادخل خد
دش بسرعة وتعال ننزل ناكل بره
ونتمشى سوا. وصح، البس حاجة تليق
على فستاني.

سألها بتهكم: ولونه إيه فستانك يا ست
هانم؟

ردت بمرح:

-لوني المفضل يا دوك، اللافندر طبعًا.
بعد ساعة، خرجا سويًا لتناول الطعام.
كانت تسير بجواره ويدها في يده بعدما
رفضت أن يذهبها بالسيارة. ابتسمت

بسعادة وهي تراه يرتدي ثيابًا شبابية:
سروال أبيض من خامة الجينز
وتيشيرت أبيض به نقوش باللون
الأسود.

أما هي فكانت ترتدي فستانًا طويلًا
بلونها المفضل يعانق منحنياتها، ضيقًا
عند الخصر ثم يتسع حتى الأرض، مع
حجاب أبيض عليه نقوش بلون الفستان.

وصلوا إلى المطعم. بعد أن طلب لها
طعامها المفضل، سألها باهتمام:

-ها يا "حنون"، مش هتكيلى مالك؟
بقالك كام يوم زعلانة، وكل ما أسألك
تقولي "مفيش حاجة". وأنا سايبك
براحتك، مستني تيجي تحكيلى لوحداك،
بس ده محصلش. فممكن تقوليلى مالك؟

توترت من نظراته، تفكر كيف تخبره بما
تشعر. هو لن يفهم ما تمر به، لذلك
قررت أن تصمت. وعندما طال صمتها،
سألها مرة أخرى:

- "حنان"، أنتي بنتي. لو محكتيليش أنا،
هتحكى لمين؟ مش أنتي قولتي إنك
ملكيش غيري؟

تهددت أخيرًا، ثم أخبرته بحزن: زعلانة
قوي وحاسة إنني وحيدة... ملكيش حد.
هي ماما مكنتش بتحبنى؟ ليه تسييني
لوحدي وتمشي؟ هي مش عارفة إنني
محتاجها؟ من ساعة ما أخذت الإجازة
وأنا كل يوم بحلم بيها.

استمع إليها باهتمام وحزن، ثم قال
بهدوء:

-ماما كانت بتحبك أوي ومكنتش بتسيبك لحظة، بس ده قضاء ربنا... اللهم لا اعتراض. حقك عليا، أنا من خوفي عليكى مخلتتش ليكي أصحاب. سامحيني.

ابتسمت له بخفة وقالت: أنت ملكش دعوة، أنا اللي ملقتش أصحاب كويسين. بس أوعى أنت تسيبيني أو تبطل تحبني.

صفعها على رأسها برفق وقال مازحًا:

-أسيبك إيه! هو في حد يقدر يسيب بنته حبيبته؟ كل ما تفتكريهم، ادعيلهم بالرحمة. وأنا موجود، أي حاجة عايزاها قوليلي وأنا عملها إن شاء الله، حتى لو قلبتك قرد!

ضحكت على مزاحه، فابتسم وقال:

-وبعدين يا ست الحسن، أنتي جايبانا
هنا تنكدي علينا؟

هتفت بمرح: مش بالظبط، بس آه.

ضحك وهو يشير إلى الطعام الذي
وضعه النادل على الطاولة.

عادت الفتيات إلى نفس المحل الذي كنَّ
فيه منذ قليل، بعد أن أكدت "نور" أن
"علا" قد غادرت المكان. كان المحل
بالنسبة لهن الأفضل من حيث الأسعار
وما يرغبن في تدوينه على ثياب
التخرج. وقفن على مسافة مناسبة من
المحل، لتقول "بسملة"، محاولة كسر
تردد "جيهان" و"دعاء"، اللتين خشيتا

أن تكون "نور" تتوي المشاجرة مع
الفتاة:

-أنا مع "نور"، أكيد "علا" روّحت.
إحنا هندخل نقول اللي عايزينه، ندفع
الفلوس، ونرجع بعدين ناخذ الحاجة.
مش هنطوّل.

ردّت "جيهان" بحجة واهية: بس هيبقى
شكلنا وحش قدام الراجل. قلنا مش
عايزين ومشينا، نرجع ليه؟

أيديها "دعاء": معاك حق. خرينا نروح
مكان تاني أحسن.

قالت "نور" بضيق واضح: ما تخلصوا
يا ست أنتي وهي! هندخل ولا نمشي؟

تبادلوا النظرات، ثم استقروا أخيراً على
رأي "نور". تحركوا خلف بعضهم

بخطوات مترددة. دخلت "دعاء" أولاً، لكنها توقفت فجأة، كأن الزمن تجمد عندها، بينما تبعتها "نور"، التي وضعت يدها على فمها بذهول. أما "جيهان"، فقد انهمرت دموعها بخوف وهي تتقدم ببطء، و"بسملة" أغلقت عينيها بقوة، غير مصدقة ما ترى.

في الداخل، كان هناك شاب يجلس على مقعد، والدماء تتدفق بغزارة من معدته بسبب طعنة سكين غائرة. كان بالكاد يتنفس، ويصدر أنيناً مكتوماً من شدة الألم.

اقتربت "جيهان" رغم ارتجاف قلبها وخوفها الذي يكاد يقتلها. مدت يدها، تسحب السكين برفق من معدته، لكن

جسده ان تفض بقوة رغم محاولتها
الترفق، ثم انطفأت الحياة في عينيه
وأغلق جفنيه إلى الأبد.

انفجرت "دعاء" في البكاء، بينما نظرت
"جيهان" للسكين بصدمة ثم ناولتها
بشكل غريزي إلى "بسملة"، التي
أخذتها دون أن تعي ما تفعل.

صرخت "نور" بجنون وهي تقترب
منهن:

- أنتي يا مصيبة! عملتي إيه؟!
يخربيتكم!

زادت "دعاء" من بكائها وصراها
وهي تقول بصوت مرتعش:

-بس يا "نور"! حرام عليك!

وضعت "نور" يدها على رأسها،
محاولة السيطرة على أعصابها، وقالت
بحدة:

-حرام على مين؟ الله يسامحكم!

قالت "دعاء" بصوت باكٍ ومختق:
طيب شوفيه يا "نور"، يمكن لسه
عايش!

اقتربت "نور"، وهي تدعو الله أن يكون
لا يزال على قيد الحياة. دفعت "جيهان"
و"بسملة" برفق جانبًا لتفحص نبضه.
وبعد لحظات طويلة، تنهدت بحدة، ثم
رفعت رأسها ونظرت إليهن بأسف
وهمست:

-مات.

انهارت "دعاء" تمامًا ووضعت يديها على وجهها، بينما "بسملة" جلست على الأرض منهارة، والسكين ما زال في يدها.

قالت "نور" بحزم وهي تحاول السيطرة على الموقف:

-لازم نمشي من هنا حالاً. محدش فينا عمل حاجة. إحنا جينا ولقينا المنظر ده.

ردت "دعاء" بلهفة: أيوه صح! يلا نمشي، إحنا معملناش حاجة!

اقتربت "نور" من "بسملة"، التي كانت تنظر إلى الجثة بصمت، وجذبت يدها برفق وهي تقول:

-فوقي، يا "بسملة"! بالله عليك، يلا نمشي!

نظرت إليها "بسملة" بتشوش،
وهمست:

-إيه؟

وفجأة، قطع صوت هاتف "جيهان"
الصمت. تجمدت الفتيات في أماكنهن،
وتسارعت دقات قلوبهن. أخرجت
"جيهان" الهاتف من حقيبتها بيد
مرتعشة ونظرت إلى الشاشة. كان
"أشرف" هو المتصل.

قالت بخوف: "أشرف" بيرن، يا
"نور"! خدي، ردي إنتي.

أخذت "نور" الهاتف وأجابت بصوت
خافت:

-ألو؟

جاء صوت "أشرف" من الطرف الآخر،
يتحدث بلهفة:

- "نور"، الحمد لله أنك رديتي. ماما
تعبت وأنا معاهما في المستشفى.
"مازن" في البيت لوحده، وبالي مشغول
عليه. ممكن تروحي تقدي معاه؟
ردت "نور" بقلق:

- طب إنت كويس؟ وهي في مستشفى
إيه؟

قال بصوت مرهق: أنا كويس. المهم
دلوقتي، "مازن" لوحده. روعي عنده،
وأنا هظمنك لما أقدر.

أغلق معها المكالمة سريعًا. نظرت
"نور" إلى الفتيات وقالت بثبات زائف:

-لازم نخرج حالاً. مش هنقول حاجة،
إحنا معملناش حاجة.

بدأت "نور" في مسح دموعهن، ثم
جذبت يد "بسملة" بيد و"جيهان" باليد
الأخرى، وأشارت لـ "دعاء" أن تتحرك
معهن. دون أن تشعر "دعاء"، سقط
خلخالها أثناء خروجهن.

استقلوا سيارة أجرة بصمت، ووجوههن
شاحبة، والدموع تملأ أعينهن. توقفت
السيارة أمام منزل "أشرف".

تساءلت "بسملة" بخفوت: إحنا فين؟

ردت "نور" بهدوء: ده بيت "أشرف".
أمه في المستشفى وهو معاها، وابنه في
البيت لوحده. إحنا هنقعد هنا شوية

عشان نهدى، ومينفعلش نروح لبيوتنا
بالشكل ده.

تحركت أمامهم، وهم خلفها كالأشباح، لا
ينطقون بكلمة. أخذت المفتاح من
الجيران بعدما اتصلت بـ "أشرف"
وأخبرته بوصولها إلى الشقة مع
الفتيات. دخلت إلى الداخل، وهن خلفها.
جلسن كل كانهن جثث هامدة.

أغلقت "بسملة" الباب ثم جلست على
الأرض في وضع الجنين، وهي تضم
قدميها وتضع رأسها بينهما. "دعاء"
جلست على أحد المقاعد، وضعت يدها
فوق رأسها، بينما جلست "جيهان"
بجوار الجدار على الأرض، تنظر إليهن
بضياع. أما "نور"، فقد ذهبت إلى

الداخل باحثة عن "مازن". وعندما
وجدته ما زال نائمًا، هدأت قليلاً ثم
خرجت إليهن. وعندما رأتهن بهذه
الحالة، تألم قلبها، لكن كان عليها أن
تبقى قوية، إذ إن استسلامها للضعف
سيجلب الدمار بعد ما حدث. لذا قالت
لكي تلفت انتباههن:

-المنظر ده مش طبيعي، مش فاهمة
إزاي أنتم محاميين ودرستوا قضايا
وعارفين أن في قضايا أصعب من دي.
المفروض إننا كنا بلغنا من غير ما
نلمس حاجة، لكن الأستاذة "جيهان"
دمّرت كل شيء لما مسكت السكين.
أخذت نفسًا عميقًا:

-المهم دلوقتي، قوموا اغسلوا وشكم
بشوية مية واهدوا شوية علشان نفكر.

فعلوا كما قالت، وعادوا للجلوس على
المقاعد. فقالت "نور":

-أنا عايزة أسيبكم هنا شوية وأروح
المستشفى أشوف "أشرف"، وأحاول
أقوله اللي حصل. أكيد هو هيقدر
يساعدنا

ردت "بسملة" بلهفة وأمل: ياريت يا
"نور"، بالله عليك. هو أكيد هيعرف
يتصرف.

أردفت "نور" وهي تنهض: أنا كلمت
أمك يا "بسملة" من تليفون "جيهان"
وقلت لها إنك معانا هنا. وكلمت أبوكي
يا "دعاء" وقلت له إنك هتأخري شوية

علشان قاعدة معانا. وأنتِ يا "جيهان"،
قلتِ لماما إنك معايا وهي أكيد هتقولهم.
تساءلت "دعاء" باستغراب: كلمتهم
إمتي؟

ردت "نور" بهدوء: وإنتوا جووه
بتغسلوا وشكم، خلوا بالكم من نفسكم
ومن "مازن". وأنا مش هتأخر. ولو
حصل حاجة، رنوا عليّ. أنا خدت الباور
بتاع "أشرف" من جووه علشان أشحن
التليفون.

جلس "تامر" يتابع المباراة بتركيز
شديد وهو يتناول الطعام بمفرده، لكنه
شعر بنغزة قوية في قلبه، وألمه الشديد.
هذا الشعور الغريب المولم يقسم أنه

يخصها، لا غيرها يشعر به. منذ أن
رآها، وكلما حدث لها مكروه، أصابته
هذه النغزة القاتلة. أغلق المباراة وظل
لدقائق يتهدد بقلق. ثم نهض ليتوضأ
ويصلي ركعتين لله، لعل الله ينجيها مما
هي فيه.

بعدما صلى، ظل ساجداً يتضرع لله أن
يحفظها من كل شر.

نهض بعدما ظل يدعو لها كثيراً، ثم
توجه يبحث عن هاتفه ليتواصل مع
عمته. جذب الهاتف، ثم تحرك نحو
الشرفة وقام بالاتصال بها. وبعد ثوانٍ،
أتاه الرد، ليقول:

-إزيك يا "إيمان"، عاملين إيه؟

ردت "إيمان" بفرحة: "تيمور" حبيبي،
عامل إيه؟ وحشتني أوي!

أردف بابتسامة: الحمد لله يا "أمنيّتي"،
وأنتِ وحشتيني والله. "ديالا" عاملة
إيه؟

أجابت "إيمان" وهي تتحرك نحو غرفة
"ديالا":

-بخير الحمد لله، وزى الفل. استنى،
كلمها.

وصلت الغرفة ثم دخلت لتجد "ديالا"
تجلس، تنظر للكتب بحزن بعدما لم
تتمكن من دخول اختبارات الثانوية
وأجلها والدها للسنة القادمة. قالت
"إيمان" أثناء دخولها:

- "ديالا"، "تامر" عايز يكلمك.

ابتسمت بحنين وهي تتناول منها
الهاتف، وردت عليه برقتها المعهودة:
- "تامر" عامل إيه؟

همس باشتياق لصوت صغيرته: بخير يا
قلب "تامر"، وحشتيني يا "ديدي". إنـتِ
عاملة إيه؟

أجابت بهدوء: الحمد لله بخير. هتيجي
إمتي؟ أنت وحشتني.

رد بثبات رغم الحزن الذي يسيطر عليه:
- قريب إن شاء الله. بس عايز أسألك
على حاجة، ممكن؟

عقدت ما بين حاجبيها بتعجب، ورغم
ذلك قالت:

- طبعًا، اسأل.

تسائل بتردد: بتكلمي "بسمة"؟

- أيوة.

- إمتى آخر مرة كلمتها؟

- من يومين.

- طب معلش، ممكن تكلميها وتطمني

عليها؟ حاسس إن في حاجة حصلت

معها، ومش عارف إيه هي.

ردت عليه بهدوء: متقلقش، إن شاء الله

خير. هكلمها واتصل بيك.

أغلق معها الهاتف بعدما تحدث مع

والدته و"سلمى"، واطمأن عليهم. ثم

تمنى أن يطمئن على "بسملة" أيضاً

وتكون على ما يرام. نظر للسماء

وهمس بقلق: يارب تكون بخير.

بعدها غادرت "نور" المنزل، ظلوا يفكرون في حل تلك المعضلة التي وقعوا فيها، لتقول "بسملة" بحزن غلف قلبها بعدما أدركت ما حدث:

قعدت سنين أذاكر وأتعب، وفي الآخر ضاع كل شيء. حتى لو طلغنا منها ومحدث احبس، مستحيل يقبلوا فيا. يعني خلاص، حلمي ضاع.

صمتت لحظة، ثم قالت بتشتت: لو كنت أعرف إن حلمي اللي تعبت عشانه سنين مش هيتحقق، مكنتش تعبت كده.

بكت بحرقة وقالت: والله يارب، مكنتش بنام. تعبت كتير أوي، وفي الآخر يحصل كده.

زاد بكأؤها وهي تقول: حرام والله،
حرام. أنا ما عملتش حاجة. ليه أتوجع
كده؟ ليه حلمي يضيع بالطريقة دي؟
يارب، يارب.

اقتربت منها "دعاء" و"جيهان"،
لتعانقها "دعاء" وتربت "جيهان" على
ظهرها بحنان، وهي تحدث نفسها:

-متخفيش يا "بسملة". لو حصل حاجة
واتهمنا في قتله، مستحيل أسمح إنك
تتأذي حتى لو بموتي.

نفس الحديث قالته "دعاء" لنفسها، أنه
إذا حدث ما يخشونه، ستتحمّل الجريمة
بمفردها وتتعرف أنها فعلتها.

ابتعدت "دعاء" عن "بسملة" لتجدها
كما هي، تبكي بخوف من القادم. ظلوا

كما هم حتى أتت "نور" برفقة "مي" شقيقة "أشرف"، وأخبرتهم بالعودة إلى المنزل. خرجوا الأربعة ثم وقفوا على الطريق يبحثون عن سيارة أجرة. وبعد دقائق، أتت واحدة، وصعدوا بها إلى منزل "بسملة" ثم "دعاء". بعدها عادت السيارة إلى منزل "جيهان"، وأخيرًا إلى منزل "نور"، بعدما أصرت "نور" على توصيلهم إلى منازلهم لكي تطمئن عليهم، وأخبرتهم ألا يخبروا أحدًا وينتظروا ماذا سيحدث.

دخلت "نور" منزلها ثم غرفتها مباشرة بعدما ردت على والدتها باقتضاب عن صحة والدة "أشرف"، أغلقت باب الغرفة وجلست خلفه تنهار بعدما ظلت

وقتًا طويلًا صامدة لأجل أصدقائها. لم
تتحمل المزيد، فظلت تبكي لما يقارب
الساعة، إلى أن صدح هاتفها برقمه.
مسحت دموعها وردت عليه، وما زال
صوتها يحمل أثر البكاء، ليتسأل
"أشرف" بلهفة وقلق:

مالك يا "نور"، أنت لسه تعبانة؟

ردت عليه بهدوء: أنا بخير، متقلقش.
المهم أنت عامل إيه؟ وطنظ بخير صح؟
رد عليها بتعب: كله تمام، والحمد لله.
ماما فاقت وبقيت كويسة. المهم، أنت
مالك؟ أنا حاسس إن في حاجة حصلت
معاك ومخبئها عليا. قولي يا "وزة"،
مالك؟

أجابت همسًا بعدما تنهدت: مفيش
حاجة، أنا كويسة.

تساءل بجديّة: طب إيه سبب وقوعك في
المستشفى واغمي عليك؟

تذكرت عندما استمعت لصراخ إحدى
العائلات في المشفى بعدما وصلهم خبر
وفاة مريضهم. في ذلك الوقت، لم
تستطع الصمود لتسقط مغشياً عليها.
حينها حملها "أشرف" وأدخلها إحدى
الغرف ليطمئن عليها، ثم أجبرها على
المغادرة، وطلب من شقيقته "مي"،
التي أتت عندما تواصلت معها "هاجر"،
أن تذهب هي وتعتني بـ "مازن".

فكرت "نور" لحظة ثم قالت: لما سمعت
البنات بتصرخ، مقدرتش أتحمّل

الصوت. وكم ان لأني ما نمتش طول
الليل بسبب الامتحان وتعبانة. هنام
شوية وهصحى بخير، متقلقش.

أردف "أشرف" بحنان: طب يا عمري،
نامي. ولما تصحي، طمني عليك.

أغلقت معه الهاتف ثم تسطحت على
الفراش، وهي تتمنى أن يمر الليل مرور
الكرام.

والحق، لم يمر عليهم مرور الكرام.
فالأربعة لم يزورهم النوم، وعيونهم ما
زالت تفيض بالدموع كالشلالات التي لا
تتوقف. اختفى القمر لتشرق الشمس،
وتتير الأرض، ويبدأ يوم جديد يحمل
العديد والعديد من التساؤلات.

مر الوقت وناموا في الصباح بعدما
أغلقت كل منهم غرفتها وأخبرت من
بالمنزل أن يتركها وشأنها حتى تخرج
هي. في منزل "بسملة"، استمعت
لصوت أذان العصر بعدما ظلت طوال
اليوم لم تتحرك من على الفراش. قامت
وأدت فريضتها ثم جلست تدعو المولى
من قلبها أن يكون ما يحدث كابوسًا
مزعجًا، ولكن ما حدث بعد ذلك أكد لها
الحقيقة المؤلمة.

عندما دقت والدتها على باب غرفتها
وهي تناديها بقلق، فتحت الباب لتجد
والدتها تقول:

- "بسملة"، في حكومة بره وعايزينك.

ابتسمت لوالدتها ثم عانقتها بشدة لدرجة جعلت والديتها ينتابها القلق، لكن "بسملة" كانت في وادٍ آخر. تركت والديتها وتحركت للخارج، لتقف أمام الضابط بثبات، رغم ضعفها.

ليقول الضابط بقوة: أنتي "بسملة علي"؟ ابتسمت وهي تهز رأسها، ليقول الضابط باستهزاء:

-مطلوب القبض عليك في جريمة قتل.

وأشار لأحد العساكر أن يقبض عليها.

صرخت والديتها بعدما استمعت لما قال، أما هي فقد ابتسمت لها وسارت معهم بدون نقاش. كانت قد انتظرتهم، وهي ترتدي ثياب خروج.

تحركت سيارة الشرطة بعدما ظلت
والدتها تصرخ باسمها، إلى أن جلست
على الأرض تبكي على ابنتها الوحيدة.
تحركت السيارة إلى منزل "دعاء" وتم
القبض عليها كما حدث مع "بسملة".
جلسا سوياً في نفس السيارة، نظروا
لبعضهم، وابتسامة ساخرة رسمت على
وجوههم.

الفصل الواحد والثلاثون

لم تكن إنتكاسه عاديه أبدًا!!

طال بُعدي؛

طال أمدي؛ هلك قلبي؛ غفوتُ عن

قيامي؛ ثقلت صلاتي؛ قلّ وردُ قرآني؛

زادت وحشتي..

دنيا كهذه مليئةً بالفتن صارت تعصف

بقلبي عصفًا!

من يحمل عني أوزاري يوم القيامة؟

أيّ عملٍ لي سينقذني!!

أعني عليّ فإني عدوي.

أمام قسم الشرطة توقفت السيارة ليهبط

منها الضابط، ثم أشار إلى أحد العساكر

وهو يقول: ارميهم في الزنزانة لحد ما

الضابط يجي.

أدى العسكري التحية ثم جذبهم بعنف إلى إحدى الزنانات. فتح الباب ودفعهم بقوة، ليختل توازن "دعاء" بسبب فعلته، وكادت أن تسقط. لكن قبل أن تصل إلى الأرض، كانت "جيهان" تسندها كي لا تقع، ثم عانقتها لتبكي "دعاء" بوجع على تلك الإهانة التي تعرضت لها.

جلست "بسملة" بجوار "نور" التي وضعت يدها على رأسها وهي تبكي بصوت مكتوم، بعدما فقدت قوتها الواهية. جذبت "بسملة" رأس "نور" برفق، ثم وضعتها على قدمها وهي تربت على حجابها بحنان، وتشاركها الوجع والبكاء. جلست "دعاء"

و"جيهان" بجوارهما، تنظران إليهما
بحزن.

نهضت سيدة ترتدي ثيابًا شعبية، سمراء
اللون، ونظراتها حادة كالصقر، وصاحت
بهن:

-بس يا بت انتي وهي! أكلتوا راسنا!
بدل ما أجي أجيبكم من شعركم.

نهضت "بسمة" وقالت باحترام،
وبصوت يحمل أثر البكاء:

-هو حد كلم حضرتك؟

كانت "نور" منهكة لا تستطيع الجدل
مع أحد، يكفي ما بها. ومثلها "جيهان"،
التي تنظر حولها بتشتت وهي تفكر كيف
يمكنها إخراج صديقاتها من هذا المكان.
لكن "دعاء" فقدت صبرها وقوة

تحملها، فنهضت وصرخت في وجه
السيدة:

- ابعدي يا ست انتي عننا، وملكيش
دعوة بينا! وإلا قسمًا بربي لأندمك! أنا
جاية في قتل، وممكن أعملها تاني!
نظرت "بسملة" إلى "دعاء" بشر، ثم
جذبتها من مرفقها وقالت بضيق:

- بتعملي إيه يا مصيبة انتي؟ هتلبسينا
تهمة احنا ما عملناهاش أصلاً!
لم تهتم "دعاء" بما قالتة "بسملة"،
وظلت تنظر إلى السيدة بغضب:

- ابعدي يا ست انتي عننا، عشان هي
مش ناقصة!

اقتربت المرأة بغیظ، وعلى حين غرة
جذبت "دعاء" من حجابها بعنف.

تدخلت "بسملة" على الفور، تحاول أن
تبعدها، لكن وجدت امرأة أخرى تحاول
دون ذلك. نهضت "نور" و"جيهان"
بسرعة واقتربتا من صديقتهم. دفعت
"نور" المرأة بقوة لتسقط على الأرض،
لتصيح المرأة وهي تسبهم:

-بتوقعيني أنا يا بنت *****؟ روقوهم يا
نسوان!

اجتمع من بالزنزانة عليهن، وهن في
المنتصف. لكن بسبب غضبهن، كانت
قوتهن عالية، ليهجن دفاعًا عن
أنفسهن. ولم تنته المعركة التي اشتعلت
بينهن وبين الأخريات إلا على صوت
الضابط، الذي أتى مسرعًا عندما سمع
الجلبة. صرخ بغضب:

-بس يا مرا منك ليه! بدل ما أجي
أريكم!

حاولت المرأة، التي كانت سبب
المشاجرة، أن ترد عليه قائلة:
-هما يا باشا...

لكن قاطعها بغضب: اخرسي! ما
اسمعش صوتك!

صمتت المرأة، وصمت الجميع. ثم نظر
الضابط في جميع الوجوه وقال بحدة:

-لو سمعت نفس ***، هاجي أريكم
يا****!

نظرت المرأة إلى الفتيات بشرّ، ثم
جلست مكانها. أما الفتيات، فنظرن إلى
بعضهن ليطمئنن على سلامتهن، فلم
يجدن سوى خدوش بسيفة. هنّ دمن

ثيابهن وعدلن وضعيات الحجاب، ثم
جلسن بهدوء.

في منزل "دعاء"

جلس والدها ضائعًا، لا يعلم ماذا يفعل،
بينما شقيققتها تبكي بحرقلة منذ أن
غادرت المنزل. انتفض "مصطفى" فجأة
من جلسته، وأخرج هاتفه ليتصل
بـ"فارس"، على يستطيع مساعدته بعدما
تواصل مع المحامي الذي وعده بمعرفة
مكانها قريبًا.

في منزل "فارس"

كان يجلس في منزل جدته بحي الزمالك
الراقي، يحاول إقناع والدته بالعودة إلى

المنزل من أجل "مارس"، الذي لم يخرج من غرفته منذ أن غادرت والدته، تاركة إياه في حالة لا تُحسد عليها.

قاطعته نغمة هاتفه، نظر إلى الشاشة باستغراب قبل أن يجيب بئطف:

-السلام عليكم ورحمة الله وبركاته يا عمي.

رد "مصطفى" بلهفة:

-الحقّي يا "فارس"! "دعاء" اتقّبض عليها.

تجمد "فارس" لوهلة قبل أن يسأل بعدم تصديق:

- "دعاء" مين؟

أجاب "مصطفى" بصوت مليء بالخوف:

-بنتي يا "فارس"! الظابط جه وقبض
عليها من نص ساعة، وقال إنها متهمه
بجريمة قتل!

انتفض "فارس" من مكانه وهو يهتف
بصدمة:

-مستحيل! في حاجة غلط... "دعاء"
مين اللي تقتل؟

تابع "مصطفى" بنبرة مختنقة بالبكاء:

-والله ده اللي حصل، يا بني!

ركض "فارس" بجنون نحو الخارج،
غير مكترث بصوت والدته التي سألته
عما حدث. أمسك بهاتفه وسأل:

-هي فين دلوقتي؟

أجابته "مصطفى" بقلة حيلة: مش
عارف.

حاول "فارس" طمأنته: خلاص يا عمي
"مصطفى"، أنا هعرف مكانها،
وهجيبها. متقلقش، هي معملتش حاجة.

أغلق المكالمة واتصل بصديق قديم يعمل
وكيل نيابة. بعد تبادل التحيات، أخبره
"فارس" بما حدث، وطلب منه معرفة
مكان "دعاء". خلال دقائق، عاد
الصديق بمعلومات عن القضية وموقع
المركز الذي احتُجرت فيه.

قاد "فارس" سيارته بسرعة جنونية
نحو المركز، وهناك وجد صديقه
بانتظاره. طلب منه رؤية "دعاء"،
ورغم صعوبة الأمر، نجح في إقناع
الضابط بالسماح له بمقابلتها.

في الزنزانة

دخل العسكري وسأل بصوت عالٍ:
"دعاء مصطفى" فين؟

وقفت "نور"، متسائلة بقلق: ليه؟

رد العسكري بصرامة: في واحد عايز
يشوفك.

نظرت "نور" إلى "دعاء" بجانبها
وقالت مازحة:

- يا حظك، جايلك زيارة وأنا لأ!

ردت "دعاء" بضيق: ده وقته يا
"نور"؟!

ابتسمت "نور" وسألت: طيب، مين
تفتكري؟

هزت "دعاء" رأسها بعجز، لتجيب
"جيهان" من الخلف بثقة:

- أكيد الدكتور "فارس".

عند سماع الاسم، تحركت "دعاء"

بسرعة نحو العسكري، قائلة:

-أيوة، أنا "دعاء".

نظر العسكري لنور بتعجب، فأكدت

"نور" بسخرية:

-أيوة هي "دعاء"، صدقتي.

أخذها العسكري إلى غرفة وكيل النيابة،

وعندما فتح الباب ورأت "فارس"،

ركضت نحوه وعانقته وهي تبكي

بحرقة، دون أن تهتم بمن حولها.

نظر صديقه بخرج وقال: خذ راحتك يا

"فارس"، هستنى برة.

ظل "فارس" يربت عليها بحنو، ثم

أبعدها قليلاً ليفحصها بعينيه، يتأكد أنها

بخير. سألها بقلق:

-حبيبتي، أنتي كويسة؟ حد عمك حاجة؟
هزت رأسها نفيًا وهي تبكي. أمسك
وجهها بين يديه وقبل جبينها بحنان،
وهمس:

- متخافيش يا حبيبتي، أنا معاك. مش
هسيبك هنا أبدًا، بس لازم تهدي
وتحكيلي كل اللي حصل.

أجلسها على كرسي، ثم جلس أمامها
على ركبتيه وقال بلطف:

-يلا يا "دعاء"، احكيلي بالتفصيل.
بدأت "دعاء" تسرد ما حدث بصوت
مرتجف. وعند انتهائها، قالت:

-والله يا "فارس"، معملناش حاجة. إحنا
أول مرة نشوفه، بس غاظنا لما

"جيهان" و"بسمة" مسكوا السكين
وهربنا.

أمسك "فارس" يديها وقبّلهما، ثم قال
بثبات:

- عارف يا حبيبي، عارف. أهم حاجة
دلوقتي، الظابط هيققق معاكم، وأنا مش
هسيبك.

أقلت "دعاء" نفسها في أحضانه مرة
أخرى، متوسلة بصوت منخفض:

- "فارس"، متسبنيش... بالله عليك.

أدرك "فارس" أنها تخشى أن يتخلى
عنها بسبب ما حدث. أمسك وجهها
وقبّل وجنتها وهمس بحب:

- في حد يقدر يسبب روحه؟ إنتِ روعي
يا "دعاء"، وأنا هنا علشانك.

ثم غادر الغرفة بعد أن شكر صديقه،
وبدا يخطط لمعرفة الحقيقة وتبرئة
"دعاء".

عاد "أشرف" من المشفى برفقة والدته
بعدما أخبره الطبيب أن يهتم بها وألا
تتعرض لأي ضغط قد يؤدي بحياتها.
ولجت والدته إلى غرفتها بمساعده،
ولم تتحدث معه منذ أن عادت لوعيتها
حتى الآن. جلست في منتصف الفراش،
ثم قالت بجمود:

-اطفي النور واطلع بره.

جلس بجوارها على الفراش وهو
يتوسلها أن تسمعه:

- ماما، عشان خاطرني اسمعيني. أنا والله عملت كل ده عشانك وعشان عارف إنك كنت بتحبيه أكثر مني. فقلناك إن "شريف" هو اللي سافر مش "أشرف". وكمان أنتي مزعلتني كثير عليا، عشان كده قلت الحمد لله إنك بخير بسبب إنك متعرفيش، وطالما معايا مش هتفرق "شريف" من "أشرف".

اعتدلت من على الفراش، ثم هتفت بيكاه بعدما استمعت له وهو يهتف بوجع أنها لم تحبه كما تفعل مع شقيقه:

- أنا مبحببكش زييه؟! أنت وهو وأختك كنتم دنيتي، ومليش غيركم. بس هو كان مبيحبش يتكلم ولا يتعامل مع حد غيرنا، عشان كده طول الوقت كان معايا. لكن

أنت من صغرك وأي حد تشوفه تتعرف
عليه ويبقى صاحبك، وكنت بتطلع برة
كثير تشوف أصحابك. بس هو مكنش
عنده أصحاب غيرك، وكان حاسس إنه
وحش ومحدش بيحبه، عشان كده كنت
بيبنله إني بحبه. بس مش معنى كده إني
محبكش.

محت دموعها، ثم عادت تتحدث:

-صح، معرفتش من البداية. بس كنت
حاسة إنك مش هو. طريقتك كانت
بتبان لما بتزعل، هو لما كان بيزعل كان
بيجي يحضني، بس أنت بتقفل على
نفسك أوضتك ومبتكلمش حد. عرفت
إنك مش هو لما كنت بنديك باسمه،
عينك كانت بتدمع كأنك بتقولي إنك

"شريف" مش "أشرف". حَقَّك عليا إني
موجهتكش وعرفت الحقيقة اللي كنت
خايفة منها. سامحني يا "شريف"،
وحياة حبيبك النبي متزعلش مني. أنا
كنت كل ليلة بموت من الوجد وأنا مش
عارفة مين فيكم اللي ضاع مني. أنا كنت
بمثل عليك إني كويسة، بس يعلم ربنا
إني كنت بموت في اليوم مية مرة.

اقترب منها وعانقها بشدة عندما رأى
بكاءها. ظل يربت على ظهرها بحنو إلى
أن غفت بين ذراعيه. ابتعد عنها
ووضعها على الوسادة برفق، ثم أغلق
الإضاءة وخرج من الغرفة.

صاح جرس المنزل، فتحرك ليفتح
الباب. تفاجأ من وجود صديقه، لكنه

رحب به وظن أنه أتى ليطمئن على والدته. وبعد دقائق من جلوسهما، نظر له "أشرف" بتفحص من تردده، فقال:

-مالك يا "مصطفى"؟ فيه إيه؟ حاسس إنك عايز تقول حاجة ومتردد... خير؟
رد عليه "مصطفى" بثبات بعدما أخذ نفساً عميقاً:

-بص، شكك متعرفش، وعشان كده جيتلك هنا ومردتش أرن وأقولك في التلفون.

زفر "أشرف" بنفاد صبر: يا بني، ليه الألباز دي؟ قول على طول... إيه هو اللي أنا معرفوش؟

رد عليه دفعة واحدة: مراتك متهمة في جريمة قتل.

لم يفهم "أشرف" ما قال، لذلك هتف
بتساؤل:

-مرات مين؟

أردف "مصطفى" بجديّة: مراتك أنت،
"نورهان المهدي".

لم يصدق "أشرف" ما قاله، فقال بثبات:
-أكيد اسم متشابه.

تفهم "مصطفى" حالته، فقال بثبات: يا
بني، والله مراتك. واتقبض عليها من
بدري، ودلوقتي زمانه بيحققوا معاها...
أنا متأكد.

أخرج "أشرف" هاتفه من جيب البدلة،
ثم قام بالاتصال بها، لكنها لم تُجب.
حاول مرة واثنين وثلاثة، ونفس
النتيجة. قام بالاتصال بوالدها الذي أجاب

على الفور. وبعد التحيات والسلامات،
سأله عنها، فرد "المهدي":

-راحت عند "جيهان" من بدري. وممكن
يكون التلفون مش جنبها. هو أنت
عايزها في حاجة مهمة؟

رد "أشرف" بهدوء: لا، أنا بس كنت
بظمن عليها، ولما مردتتش قلت عليها.

أردف "المهدي": أنت المفروض تقلق
على الدنيا من "نور".

ابتسم، ثم أغلق معه الهاتف بكلمات
مقتضبة. ثم قام بالاتصال بـ "جيهان"،
ولكن لا رد. انتاب قلبه القلق، لذلك نظر
لصديقه ليتأكد من حديثه، فوجده يهز
رأسه بأسف.

اقترب منه "مصطفى"، وضع يده على كتفه، ثم قال:

-تعال معايا وشوفها بنفسك.

جذب "أشرف" مفاتيح السيارة، ثم تحرك معه دون تفكير، وحمد الله أن "مازن" مع "هاجر"، ووالدته تنام بفعل الأدوية.

في المركز، داخل مكتب الشرطي، تم التحقيق مع "بسملة" أولاً لتقص لهم ما حدث بالتفصيل. قال الضابط وهو غير مصدق لما تفوهت به: اتخانقتوا مع خطيبته وبعدين هو قالها تمشي، واتكلم معاكم وشديتوا في الكلام، رحتي ضربتيه بالسكين... مش ده اللي حصل؟

نفت "بسملة" بقوة: أقسم بالله ما حصل
اللي أنت بتقولاه، إحنا دخلنا لقيناه
مضروب.

سخر منها ومن قسمها، فقد اعتاد أن كل
من يحلف في التحقيق يكذب:

- خليني معك... قاتلوا إنكم مشيتوا،
رجعتم تاني ليه؟

وضعت يدها على رأسها وقالت بنفاد
صبر، فمنذ ساعة وهي تقص له ما
حدث وهو لا يصدق:

-يا حضرت الطابط، كل أصحابنا بيحبوا
لبس التخرج من هناك، وكمان عشان
سعره رخيص شوية.

حذق فيها بتفحص ثم قال ساخرًا: وبنت
المحامي بتدور على مكان رخيص؟ ليه؟
بابا "علي" بخيل ولا إيه؟
نقد صبرها عند ذكر والدها، فقالت بنبرة
منفعلة:

-ملكش دعوة بـ بابا، وأنا قتلتك الحقيقة.
عايز تصدق صدق، مش عايز أنت حر،
لكن بابا خط أحمر.

كيف امتاكت تلك الجرأة لتواجهه في
مكتبه دون خوف؟ لم يرمش لها جفن،
مما جعله يصيح بها، فانهارت دموعها
من صراخه:

-بت، اتكلمي عدل وإلا... وقسمًا بربي
لأكون سبب في لف حبل المشنقة على

رقتك. بتهديني؟ صح... اللي قتل مرة
يقتل تاني.

رفع صوته يستدعي العسكري من
الخارج، ثم أشار له أن يأخذها. بعدها
استدعى "جيهان" للتحقيق معها.

تقابلت "بسمة" و"جيهان" في
الخارج. نظرت لها "جيهان" بأسف
عندما رأت آثار البكاء في عينيها. تحرك
العسكري بـ"بسمة" لداخل المكتب، ثم
خلع الأصفاد من يديها وتركها وغادر.
جلست "جيهان" أمام الضابط بكبرياء،
متجنباً البكاء. ضعفهم لن ينقذهم مما
هم فيه. لم تطلب محامياً للدفاع عنها،
ولم يأت أحد من عائلتها إلى الآن. ربما
لا أحد يعلم!

قال الضابط بتعجب من جرأتها في
الجلوس أمامه دون إذن:

-وده اسمه إيه إن شاء الله؟ أنا قلتك
تقدي؟

ردت عليه بهدوء: بعد كام يوم هكون
خريجة حقوق رسمي. درست أربع
سنين واشتغلت لمدة سنتين تحت
التدريب مع محام، فأنا مسمعتش طول
السنين دي إن مينفعش أقعد قدام الضابط
لمجرد إني متهمه... وكم ان بريئة.
ودلوقتي ممكن حضرتك تبدأ تشوف
شغلك.

ابتسم لها بإعجاب صريح، ثم قال
بتهم:

-تمام... احكي لي بقي قتلتيه إزاي، بعد ما
صحبتك اعترفت بالحقيقة وإنك شريكة
معها في قتله. حاول إنه يتعدى عليك،
عشان كده ضربتيه بغل. مش بس
ضربة.. دول ثلاثة.

استفزاها بجملته الأخيرة لكي تعترف
بالحقيقة. أما هي، فنظرت له بثبات
وقالت:

-لا طبعًا مقربش مني. بس ممكن أسأل
حضرتك سؤال وبعدها أقولك الحقيقة؟
رغم تعجبه من ثباتها، أشار لها
بالحديث، فسأته:

-لو أنا اعترفت بالحقيقة وفي واحدة فينا
مظلومة، هتروح إمتي؟ أقصد تطلع
براءة من القضية إمتي؟

أجاب بتعجب: بعد ما تتحول للنيابة
ونتأكد إنها بريئة فعلاً.

أخذت نفساً عميقاً ثم قالت له بكذب:

-من كام يوم اتخانقت أنا و"بسملة".

وكنت مضايقة منها عشان هي أشطر

مني وديما بتذاكر ومفـيش حاجة

متعرفهاش. وبعدين عملت إني مش

زعلانة ومفـيش حاجة، لحد ما أخذ

حقي. فكانت عندي من يومين وبتقطع

بطيخ بالسكين. وبعد ما مشت، أخذت

السكين وحطيتها في شنطتي. ولما رحنا

المحل، الواد ده استفزني بكلامه، سكت.

و"نور" قالت: يلا نمشي. ومشينا.

وبعدين أنا قلتهم: استتوا هروح أجيب

حاجة وأجي. ورجعت لقيته قاعد على

الكرسي ومغمض عينية. محسيتش
بنفسي غير وأنا بضربه. ونسيت إن
السكين هيكون عليها بصماتي معها. بعد
ما حسيت على نفسي جريت عليهم
ومشينا وسبته غرقان في دمه. ورجعنا
تاني لما "بسملة" و"نور" أصروا
نروح عشان ده أرخص مكان وبيكتب
جمل حلوة.

ركز الضابط نظراته عليها، وعلى ثباتها
وجديتها في الحديث، ليقول بعد برهة:

-رغم إن كلامك كله ميتصدقش، بس
خليني معاك. ليه جاية تعترفي على
نفسك وإنتي كارها "بسملة" وعايضة
تنتقمني منها؟ معترفتيش ليه إنها هي
اللي قتلته؟ وكمان لما إنتي قتلتيه، ليه

رجعتي تاني؟ متحججتيش ليه وروحتي
أو اتصرفتي ومخليتهمش يروحوا؟
ردت عليه بنفس الثبات: حسيت بالذنب
لما النسوان جوه كانوا عايزين
يضربونا، وهي دافعت عني. ورجعت
تاني مجبرة لما "نور" و"بسملة"
فضلوا يزنوا علينا.

هو ضابط شريف ونزيه يعرف من يكذب
ومن يقول الصدق، لذلك قال:
- أنا عارف إن كل كلامك كذب، وده
مش في مصلحتك، فقولي الحقيقة أفضل
ليكي.

ردت "جيهان" بجديّة: والله براحتك.
تصدق أو متصدقش، بس دي الحقيقة.
وأنا اللي قتلته. شوف الإجراء المناسب

واعمله، وكم ان طلع المظلومين... هما
ملهمش ذنب في اللي حصل.
ابتسم لها بسخرية، فهي تظن أنه
سيطلق سراحهم بهذه البساطة.

أثناء ذلك، كان "إبراهيم" يجلس أمام
البحر برفقة شقيقته وهما يلعبان
"الكوتشينة". ابتسم بحب بعدما رآها
تضحك وهي تهتف بمرح:
-أنا اللي فوزت يا دوك! كده أنا هطلب
طلب، وأنت تتفد من غير تريقة.
ابتسم وهو يقول بمرح: عيوني، شوفي
عايزة إيه وأنا أعمله... بس ما تقلشي
على أخوكي، عشان أنا على وش جواز
وعليّ أفساط.

ضحكت عليه، فاتسعت ابتسامته وهو
يسمعا تقول:

-نفسى أروح السـينما وأحضر فيلم
"الأميرة النائمة".

أردف بسخرية: لازم تكون "الأميرة
النائمة" حلمك... هيكون مين مثلك
الأعلى غيرها؟ لأنك مقضياها نوم،
وبعدين هنروح نتفرج على واحدة
نايمة!

نظرت له بحنق: أنا قتلتك من غير
تريفة.

زفر باستسلام: حاضر... تعالى نرجع
نرتاح شوية، وبعدين هاخذك ونروح.

كادت أن تعترض، ولكنه أوقفها بإشارة
من يده:

- هناك حاجة ونرتاح شوية... وكم ان
عايز أظمن على "جيهان"، من امبارح
بكلمها مش بترد.

ردت "حنان" بتفكير: يمكن زعلانة
منك.

نفي "إبراهيم" ذلك برأسه وأردف:

- هتزعلي ليه؟! ما عملتش حاجة تزعلها.
أنا قلقان تكون موقعه نفسها في مشكلة
هي وصحبتها، لأنهم بيتعاملوا مع الدنيا
بتهور ومن غير تفكير.

ربتت "حنان" على يده، ثم قالت بسرعة
بعدهما تذكرت شيئاً:

- طب ما تتصل بـ "أشرف"، وخذ منه
رقم خطيبته أو خليه هو يسألها عن
"جيهان".

اقترب منها وقبّل رأسها بفرحة وهو
يهتف:

- هاتي رأسك أبوسها... أنا إزاي ما
خطرش على بالي حاجة زي دي!

قالت "حنان" بغرور مصطنع: عشان
تعرف إنك ملكش غيري.

ابتسم "إبراهيم" وهو يؤكد حديثها:

- عارف من زمان إني مليش غيرك.

أخرج هاتفه ثم اتصل بـ "أشرف"،
ولكنه لم يرد. حاول مرة أخرى، ليجيب
بعد برهة بهدوء:

- السلام عليكم... عامل إيه يا

"إبراهيم"؟ و"حنان" عاملة إيه؟

رد "إبراهيم" بهدوء:

-وعليكم السلام، الحمد لله بخير. المهم
كنت عايز أطلب منك حاجة.

تعجب "أشرف" من حديثه المقتضب
على غير عادته، ولكنه تخطى تعجبه
وهو يقول:

-فيه إيه؟

أجاب "إبراهيم" بلهفة: عايزك تتصل بـ
"نورهان" وتسألها عن "جيهان"، وليه
مش بترد على التلفون. من امبارح وأنا
قلقان عليها.

كان "أشرف" في طريقه للمركز بعدما
علم أن "نور" وأصدقائها متهمون في
الجريمة، ولكنه تردد:

-هل يخبره أم لا؟

قطع أفكاره صوت "إبراهيم" الذي هتف
بقلق واضح من صمته:

-فيه إيه يا "أشرف"؟ هو حصل حاجة
عندك؟

تنهد "أشرف" وقرر أن يخبره
بالحقيقة:

-هي وأصحابها الثلاثة متهمون في
جريمة قتل واتفقوا عليهم، وحاليًا
بيتحقق معهم. أنا لسه عارف من شوية،
واديني في الطريق رايح أشوفهم
وأعرف حصل إيه.

قال "إبراهيم" بصدمة: جريمة قتل؟!
إزاي؟

قال "أشرف" لكي يطمئنه، وهو أكثر
من يحتاج لأن يطمئنها:

-متقلّش، أنتِ. أنا هتصرف وأشوف
حصل إيه.

أردف "إبراهيم" بجديّة: بالله عليك يا
"أشرف"، شوف حل وخلي بالك على
"جيهان" لحد ما أجي.

أردف "أشرف": "خليك وأنا هنا..."

قاطعته "إبراهيم" بعصبية: أخليني إيه
وهي الله أعلم بيها؟ أنا مسافة الطريق
وأكون عندك. بس أنت روح شوفهم
وظمّني عليهم وكلم محامي.

أغلق الهاتف، ثم جذب يد شقيقته لكي
تنهض وهو يعتذر منها:

-حقك عليّ يا "حنان"، بس أنا لازم
أرجع القاهرة حالاً وإن شاء الله أعودك
غيرها.

تفهمت "حنان" ما يمر به: مش
مشكلة... أهم حاجة نظن عليها.

سارت معه إلى المنزل، لينظر لها
بامتنان لتفهمها الأمر. وبعد نصف
ساعة، خرج من المنزل ووضع الحقائب
بالسيارة، ثم صعد بجوارها ليقود
بسرعة جنونية، كأنه يسابق الزمن. لم
يمر بخاطره ما حدث مع والديه وربما
يفقد شقيقته بسبب تهوره وقلقه على
معشوقته. كان شاردًا بها، وهي الآن
تبكي بمفردها، وهو هنا يمرح ويلعب.
أثناء شروده، لم ير الشاحنة التي كادت
أن تصطدم به. تفادى الشاحنة، ولكن
السيارة انحرفت عن الطريق. ولسوء

حظه، اصطدم بعمود الإنارة، وآخر ما وصل له صوت شقيقته تصرخ بجنون.

وصل "أشرف" مركز الشرطة، ثم تحرك إلى غرفة التحقيق ووقف أمامها بعدما علم أنها بداخلها. بعد دقائق، خرجت "نور" بعدما قصت للضابط ما حدث، وكان حديثها مطابقاً لحديث "بسملة" بالحرف، وهذا ما جعل الضابط يتعجب ويظن أنهن متفقات على ذلك.

تحرك "أشرف" إليها بسرعة، وعندما رآته، ابتسمت بحزن، فقال هو بلهفة:
- "نور"، أنتي كويسة؟ طمني عليكي.

هزت رأسها ولم تجب، فهي إن ردت عليه ستبكي في الحال. أما هو، فنظر

للأصفاد التي تحيط يديها بضيق، ثم أشار للعسكري أن لا يتحرك، وتركهم وولج غرفة الضابط بعدما سمح له العسكري بالدخول عندما رأى بطاقته التعريفية.

تحدث "أشرف" مع الضابط وطلب منه أن يتحدث معها في إحدى الغرف بمفردهما. وبعد دقائق، كان يقف أمام مكتب صديقه، بينما العسكري يفك الأصفاد من يديها. وضع "أشرف" يده عليها برفق، ثم دخل بها إلى الداخل وأغلق الباب. التفت لها وهمس باسمها بنبرة حنونة:

- "نوري".

وهذا كل ما احتاجته لترتمي في حضنه
وتعانقه وتبكي. ظلت لدقائق كما هي
تبكي، وهو يربت عليها، ثم ابتعد عنها
وهو يقول: حقك عليّ لأنني مقصر معك
وما كنتش أعرف اللي حصل معك.

ردت "نور" عليه ببكاء: والله ما حد فينا
لمسه! الظابط مش مصدق وبيقول كل
الأدلة ضدنا. "جيهان" مسكت السكينة،
بس ما قتاتوش، وبعدين عطتها
لـ "بسمة". هما ما كانوا في وعيهم،
بس والله ما قتاتوه! والخلخال بتاعي
كانت لابسته "دعاء" ووقع منها هناك.

أجلسها على المقعد، ثم جلس على
المقعد الثاني وقربه منها وربت على
يدها وهو يقول بهدوء:

-اهدئي يا عمري وفهميني براحة عشان
أعرف أتصرف. قوليلي قولتي للظابط
إيه؟

قصت له ما حدث، ثم قالت: الظابط
قولتله الحقيقة، بس قالي إن "بسملة"
و"جيهان" اعترفوا على أنفسهم!
يعترفوا إزاي وهما ما عملوش حاجة؟

رد عليها بجديّة: هو بيكذب عشان
يوقعكوا في الكلام ويعرف إذا كنتم أنتم
اللي عملتوها ولا لأ.

ردت عليه بقلة حيلة: طب هنعمل إيه
دلوقتي؟

ابتسم لها، ثم قال بغموض: أنا اللي
هعمل، مش أنتي. المهم يا "نور"، مش

عايزك تخافي ولا تضعفي. مرات
"أشرف المصري" مش ضعيفة.

هتف جملته الأخيرة بثقة وغرور، فهزت
رأسها بخفة ثم قالت بسخرية:

- هو ده وقت غرور بالذمة؟ وأنا
مقبوض عليّ في جريمة قتل، ومش
هقدر أتكلم معاك غير لما تطلعني.

المهم، أنت هتعمل إيه؟

أردف بثبات: ما تشغليش بالك. المهم
"جيهان" كويسة، عشان "إبراهيم"
سألني عليها وقال إنه هيرن تاني عشان
يطمن.

أردفت بحزن: أيوة، كويسة، بس
"بسملة" هي اللي خايفة قوي.

قال "أشرف" بثبات: طمئنها إن كل حاجة هتعددي. هي مسألة وقت وهتخلص.

صمت للحظة، ثم تذكر شيئاً: "نور"، أنتم اتقبض عليكم فين وإمتى؟ عشان كلمت أبوكي، قال إنك عند "جيهان".

أجابت "نور" عليه: كنت رايحة عند "جيهان"، وقبل ما أدخل الشارع، لقيتها هي كانت جاية عندي. وقبل ما نتحرك، شوفنا عربية الشرطة. ولما وقفت، سألت الغفير: "أنتم جاينين عند مين؟"، قالوا "جيهان عثمان". قولت لهم: "هي دي". وبعدين "جيهان" سألتهم عن إسمي، قالوا إنهم هيقبضوا عليها

وبعدين يروحوا عندي. راحت قالتهم إن
أنا "نورهان"، فقبضوا علينا.

قالت جملتها الأخيرة بمرح، لينظر لها
بعدم تصديق وهو يقول:

-أمال لو ما كنتوش أصحاب كنتم عملتوا
إيه؟

ردت عليه "نور" بضيق: يعني أمال
تروح لوحدها؟

رد عليها بسخرية: لا طبعًا! ده كلام؟

الفصل الثاني والثلاثون

مَسَاءَ الْخَيْرِ.

وَبَعْدُ؛

يَأْتِ بِهَا اللَّهُ.. يَأْتِ بِهَا دَائِمًا

مِثْلَمَا نُرِيدُ، بَلْ وَأَحْسَنَ مِمَّا نُرِيدُ،

يَأْتِ بِهَا وَإِنْ

تَأَخَّرَتْ لِسَبَبٍ يَعْلَمُهُ وَلَا نَعْلَمُهُ،

يَأْتِ بِهَا فِي الْوَقْتِ الْمُنَاسِبِ تَمَامًا،

وَبِالطَّرِيقَةِ الَّتِي اخْتَارَهَا لَنَا وَلَمْ تَخْطُرْ

لَنَا عَلَى بَالٍ.

انتهى اليوم بعدما تم التحقيق مع

"دعاء" وتحويل القضية إلى النائب

العام، وغداً سيقوم وكيل النيابة

بالتحقيق معهم. أغلق الشرطي القضية

بعد جمع الأدلة، وخلص إلى أن أقوال

المتهمات غير متطابقة، مما يعني أنهن
يكذبن.

طلب "أشرف" من الضابط أن يقضين
الليلة في غرفة مكتب صديقه، ورغم
رفض الضابط في البداية، تدخل
"مصطفى"، صديق "أشرف"، وتمكن
من إخراجهن من الزنزانة إلى المكتب.
أخذ "أشرف" نسخة من المحضر،
وكذلك فعل "فارس"، ليعلم ما حدث
بالتفصيل ومن قام بإبلاغ الشرطة. أثناء
قراءته للمحضر، أصابته صدمة بسبب
ما قرأ عن تلك الحمقاء، زوجته.

مر الليل بصعوبة على الجميع. كانت
العائلات في حالة يرثى لها، خاصة بعد
أن علمت عائلة "جيهان" و"نور" بما

حدث. الآن، جميع الرجال يقبعون أمام مركز الشرطة ومعهم أربعة محامين؛ الأول أتى مع "عثمان" و"المهدي"، والثاني أتى مع "مصطفى"، والثالث تواصل معه "إبراهيم" قبل أن يتحرك من الإسكندرية، والرابع كان برفقة "أشرف".

قال "فارس" بثبات: المشكلة أن كلامهم عكس بعض، في واحدة اعترفت بالحقيقة، وفي واحدة اعترفت على نفسها وفاكرة أن كده بتتقذ أصحابها، لكن هما عقدوا القضية.

أيّده أحد المحامين قائلاً: بالضبط. دلوقتي أنا هدخل أتكلم معهم قبل ما يتعرضوا على النيابة وهفهمهم يقولوا

إيه بالضبط. والباقي يحاول يعرف كل حاجة عن المجني عليه، لو عنده مشاكل أو عداء مع حد.

تدخل "أشرف" في الحوار: أنا رحنت المكان وشفت كاميرات المراقبة اللي في الشارع، وللأسف، التسجيل يدينهم لأنهم وقفوا شوية قدام الكاميرا يتكلموا، وباين عليهم كانوا مضايقين، وبعدين اتحركوا للمحل. ولما خرجوا منه كانوا خايفين.

رد عليه "فارس": أنا شفت التسجيل برضه، بس لاحظت حاجة.

نظروا له باهتمام، فأخرج هاتفه وقام بتشغيل الفيديو، ليقربوا منه ويشاهدوا التسجيل. لم يفهموا ما الذي يقصده،

لكن "أشرف" لاحظ شيئاً ولم يتحدث.
شرح لهم "فارس" مقصده قائلاً:

-التسجيل فيه جزء اتحذف. هتسألوني
عرفت إزاي؟ هقولكم. لو ركزتم، هتلاقوا
فيه ساعة بتعد في الشمال. بصوا،
دلوقتي الساعة تلاتة ونص وخمسة،
لكن بعد ثواني بقيت أربعة وعشرة.
يعني فيه خمسة وتلاتين دقيقة محذوفة،
وده أكيد الوقت اللي القاتل دخل وخرج
فيه، وعشان كده تم مسحه.

شغل "فارس" الفيديو مجدداً، وركز
على اللحظة التي تغيرت فيها الساعة.
قال محامٍ آخر:

- ده دليل معنا، بس مش كفاية. شكله
شخص فاهم في الحاجات دي كويس،
وحذفها بطريقة محدش يقدر ياخذ باله.

أما "أشرف"، فرأى شيئاً آخر تمامًا،
لكنه اختار الصمت ليعلم الحقيقة. فماذا
رأى يا ترى؟

في منزل "علا"، وهو منزل عائلي
يحتوي على والدها وأعمامها الثلاثة،
كان البيت يخيم عليه الحزن بعدما قُتل
شاب في أوائل عمره بطريقة مأساوية.
شاب لم يكن مسالمًا لكنه كان دائمًا على
صواب، لم يخطئ في حق أحد، ولكنه لم
يسمح لأحد أن يخطئ بحقه. شاب راح
ضحية لمجرم انعدم من قلبه الرحمة.

لم يكن الشاب فقط هو من راح ضحية،
فوالدته منذ أن علمت الخبر المفجع
وهي منهارة على فلذة كبدها، مستلقية
على الفراش بانهايار تام. حديثها الذي
تهذي به يوجع القلوب ويجعل الحجر
يلين، فما بالك بقلوب تسكن هي بها.

اقتربت منها ابنتها، تربت عليها بحزن
ووجع على شقيقها الوحيد، ثم هتفت
بمواساة:

-حرام يا ماما اللي بتعمليه في نفسك،
هو في مكان أحسن.

هتفت المرأة بكاء: أخوكي يا 'سماح'
سابني ومشى، مشى من غيري وهو
عارف إني ماليش غيره.

ردت "سماح" ببكاء: ربنا يرحمه
برحمته ويصبر قلوبنا.

صرخت فيها والدتها ببكاء، فهي ما
زالت تحت تأثير الصدمة:

-أنا زعلاية منه ومش مسامحاه ومش
هكلمه تاني!

تهدج صوتها وهي تهتف بتوسل:

-لا، مسامحاه... بس يرجع، خليه يرجع
يا 'سماح' عشان خاطري! أنا ماليش
غيره!

كان هذا الحوار يدور على مرأى
ومسمع "علا"، التي كانت تقف عند
الباب ترتدي ثياب الحداد وتبكي بصمت.
ركضت إلى غرفتها وهي تبكي. رآها
عمها وهي تركض، تألم قلبه وزاد

حزنه، ولكنه أقسم أن يأخذ حق ابنه
وينتقم من الفاعل.

داخل غرفة "علا"، جلست على الفراش
تبكي، ثم جذبت هاتفها لتتحدث مع
صديقتها لعلها تهوّن عليها ما حدث.
ردت عليها صديقتها بلهفة:

-إيه يا "علا"، فينك؟ من بدري أرن،
ظمنيكي عليك! أنتي كويسة؟ عرفوا
حاجة؟

ردت "علا" بكاء: أنا قلبي واجعني
أوي، ومرات عمي صعبانة عليا... هي
مكسورة ومش عارفة أعملها إيه.

ردت الأخرى بتفهم: طبعي، ده ابنها
الوحيد. ربنا يصبر قلبها. بس أنتي
زعلانة ليه كده؟! أنتي مكنتيش بتحبيه.

هتفت "علا" بوجع: بس مش بكرهه...
'علاء' ابن عمي، واللي حصل كان غلط.
أنا مش عارفة سمعت كلامكم إزاي!
ردت "نرمين" بحدة:

- 'علا'، اتعدلي! أي كلمة هتقوليهها
هتودينا كلنا في داهية، والقضية الحمد
لله مقفولة. 'دعاء' و'بسملة' و'جيهان'
'ونور' شالوها ومش هيخرجوا منها،
يبقى إحنا بعيد.

قالت "علا" بتشتت: وحتى دول اتظلموا
بسببنا!

أردفت "نرمين" بسخرية: يا حرام،
حنيتي! مش دول اللي بتكرههم؟
ردت "علا" بكاء: بكرههم حاجة،
واللي حصل فيهم حاجة تانية.

هتفت "نرمين" بغضب: خلاص يا
حبيبتني، روعي زي الشاطرة واعترفي
بالحقيقة، وشوفي هيصل إيه؟!
في المكتب

بِقَوْلِهِمْ لِسَاهُ صَغِيرِينَ وَالِدُنِّيَا فَاتْحَانَا
إِلَيْدِينَ نَغْلَطُ نُحِبُّ وَنَتَجَرِحُ وَيَامَا
هَنْشُوفُ مِنْ السِّنِينَ. حَكَائِتَا تُشْبِهُ
بَعْضَهَا وَاللَّيِّ يَقْرُبُ مِنْهَا يُلْقَى الْمَلَامِحُ
هِيَ هِيَ، نَفْسُ الْمَشَاعِرِ وَالْحَنِينِ.
وَأَحْلَامُنَا عِبَارَةٌ عَنْ قَصَصِ بِنَعِيشِهَا فِي
مَنَامِنَا، بِرَسْمِ رَسْمِهِ قَدَامِنَا نَخْلِي لِلْحَيَاةِ
مَعْنَى وَطَعْمِ وَلَوْنِ. وَتَوَجَعْنَا دُمُوعَنَا لَمَّا
حَدَّ نَحْبَهُ يَكْسِرُنَا، يُصِيبُنَا الْحُزْنَ وَيَسِيبُنَا
لَوْحِدِنَا بِتَفْكِيرِنَا اللَّيِّ مَشْ مَوْزُونِ.
أَوْقَاتِ نَلَاقِي نَفْسَنَا وَسَطِ الطَّرِيقِ فِي

حَيْرَةٌ، فِينِ الْإِتِّجَاهِ؟ يَمِينٌ؟ شِمَالٌ؟ طِبٌّ
مِنْ هُنَا لِيَّةٍ مُحْتَارِينَ؟ وَالْقَلْبُ تَاهٌ. جَوَانَا
عَالِمٌ مِنَ الْخِيَالِ وَمِئَةٌ سُؤَالٍ، مَيِّنُ اللَّيِّ
هِيَجَابٌ عَلَيْهِ؟ مُسْتَسَلِّمِينَ لِإِحْسَاسِنَا
وَمُسَلِّمِينَ قُلُوبِنَا لِيَّةٍ؟ وَأَحْلَامِنَا عِبَارَةٌ
عَنْ قَصَصٍ بِنَعِيشِهَا فِي مَنَامِنَا، بِرَسْمِ
رَسْمِهِ قَدَامِنَا نَخْلِي لِلْحَيَاةِ مَعْنَى وَطَعْمِ
وَلَوْنِ وَآيَةٍ. مَضْمُونٌ فِي دُنَيْتِنَا، بِنَتَعَلْمِ
مِنِ الْأَخْطَاءِ مُدَامٌ عَائِشِينَ، مُدَامٌ
عَائِشِينَ.

يَجْلِسُونَ الْأَرْبَعَةَ عَلَى الْأَرِيكَةِ، كُلُّ مِنْهُمْ
تَضَعُ رَأْسَهَا عَلَى الْأُخْرَى تَنْتَظِرُ الْقَادِمِ.
"نور" تَضَعُ رَأْسَهَا عَلَى "بسملة"،
و"بسملة" تَضَعُ رَأْسَهَا عَلَى "دعاء"،
و"جيهان" تَضَعُ رَأْسَهَا عَلَى "دعاء"

من الجهة الأخرى. فقد عادت "دعاء"
القوية التي تدافع عنهن، وكانت تربت
عليهن بين الحين والآخر بشرود، وكل
تفكيرها يتمثل في كيفية خروجهن من
هنا.

فاقت من شرودها على صوت "بسملة"
وهي تهمس بنبرة خافتة:
-مستقبلنا ضاع.

ردت "دعاء" بحدة لتعيد لهن رشدهن
ويفكرن في حل تلك المعضلة:
-مفيش حاجة ضاعت، فوقى أنتي وهي،
إحنا هنخرج من هنا غصب عن الدنيا
كلها.

ردت "نور" بيأس: إزاي وكل الأدلة
بتقول إن إحنا اللي قتلنا؟

بكل جدية وبروح المحامية التي تقبع
داخلها، أردفت "دعاء":

-مستحيل يكون المجرم شخص بارع في
القتل، لأن بعد كلام الظابط واللي قاله
'فارس' متأكدة إن المجرم ضربه لأنه
استفزه، فضربه بغل وغضب وفي أماكن
مختلفة. وكم ان حاسة إنه مش هو اللي
مسح البصمات وخفى أي دليل ضده،
أكيد في شخص ساعده.

انتبهت "جيهان" بكامل تركيزها، ثم
هتفت:

-مش فاهمة ليه متأكدة أوي كده؟
نظرت لها "دعاء" وأردفت بجدية: لما
اتحقق معي أنا طلبت أشوف التقرير
الطبي، ولما شوفته عرفت إن المجرم

كانت إيدته بتترعش في الضربة الثالثة.
معنى كده إنه كان خايف ومتوتر بعد ما
أدرك هو عمل إيه. فمستحيل يقدر يفكر
في حاجة، الحاجة الوحيدة اللي هيفكر
فيها إنه يجري ويسيب كل حاجة. وده
أكيد اللي حصل، وبعدها أكيد في شخص
تاني جه مسح الأدلة.

ردت عليها "بسملة" باقتناع: كلامك
مقتع، بس مش أكيد. ده ممكن يكون
احتمال، ويكون الشخص أدرك اللي
عمله، وعشان كده مسح أي دليل يدينه
وبعدها مشى. بس إحنا هنثبت الكلام ده
إزاي وإحنا هنا؟

قالت جملتها الأخيرة بحزن، لترد
"دعاء" بثبات:

-لازم واحدة فينا تهرب وتحاول تجيب
دليل. دي الطريقة الوحيدة اللي هتنقذنا.
أردفت "بسملة" بلهفة: خلاص، أهرب
أنا.

ردت "دعاء" عليها بنفسي: لأ، أنتي
مينف عش.

تدخلت "نور" تقول ببساطة: خلاص،
أهرب أنا.

حركت "دعاء" رأسها بنفسي للمرة
الثانية وهي تقول:
-ولا أنتي طبعًا ينفع.

تساءلت "نور" بعدم فهم: ليه أنا لأ؟
شرحت لهم "دعاء" وجهة نظرهما:
"نور" أنتي مينف عش تهربي عشان أكيد
هيتهموا جوزك إنه هو اللي هربك، وكده

يبقى حصلت له مشكلة بسببنا. و'بسملة'
ميينف عش عشان مس تقبلها وحلمها،
وعشان ميتقالش عنها كلمة غلط في
سيرتها. وأنا مش هينفع أسيبكم
لوحدكم. يبقى مفيش غير 'جيهان' هي
اللي لازم تهرب عشان تجيب دليل
براءتنا.

ردت "جيهان" بتساؤل بعدما فكرت
لثوانٍ أن هروبها سيكون داعماً
لاعترافها بالجريمة:

-ماشي، بس أهرب إزاي؟

أردفت "دعاء" وهي تنظر لـ "نور": أنا
عارفة يا 'جيهان' الموضوع صعب، بس
أنتي قدها. و'نور' تكلم 'أشرف' لما يجي
وتشرحلوا وجهة نظرنا باختصار،

وتطلب منه إنه يهرب 'جيهان'. وهو
هيعرف يتصرف ومحدث هيشك فيه
عشان 'جيهان' متخوش.

وافقوا على ما قالت، وساد الصمت
بينهم لدقائق. بعدها تحركت نظرات
"نور" تتفحص أرجاء الغرفة، ثم
تساءلت بجدية تامة:

-تفتكروا المكتب ده فيه كاميرات
مراقبة؟

نظروا لبعضهم بصدمة، لتغمز لهم
"نور" بمشاكسة، لتطلق ضحكاتهم
تملاً المكان، والخوف يتربع داخلهم من
أن يكون تم تسجيل حديثهم.

في المشفى، وبعد مرور عدة ساعات من الحادث، كان "إبراهيم" مستلقيًا على الفراش، بينما "حنان" تجلس في الخارج بجوار باب الغرفة تبكي. كانت تنتظر أن يعود إلى وعيه بعدما فشلت في تذكر رقم "أشرف"، وقد سقط هاتفها في السيارة أثناء الحادث. جلست بقلّة حيلة بعدما عجزت عن تقديم أي مساعدة لشقيقتها.

في الداخل، حرك "إبراهيم" جفونه بخفوت ثم فتحهما بترو، وأعاد إغلاقهما قبل أن يفتحهما مجددًا بلهفة بعدما تذكر ما حدث. انتزع الكانيولا التي كانت بيده، ثم نهض بسرعة رغم الألم الذي اجتاحه. كاد أن يسقط بسبب الدوار الذي

هاجمه، لكنه لم يهتم بكل ذلك وهو
يتحرك للخارج ليطمئن على شقيقته،
متمنياً أن تكون بخير ولم تُصب بأي
أذى بسببه.

فتح الباب ليجدها تتفرض من جلستها
وتتحرك نحوه بخوف قائلة:

-إبراهيم، أنت كويس؟ خرجت ليه؟...

قاطع حديثها حينما جذبها بقوة إلى
أحضانها ليطمئن قلبه أنها بجواره
وبخير، وهتف بصوت مختنق وملء
بالخوف وهو يربت عليها بحنان:

-حنان، أنتي كويسة، صح؟ محصلكيش
حاجة؟ حقك عليا والله، أنا آسف. من
خوفي عليها كنت هضيعك مني.

تفهمت مشاعره لتبادلته العناق وهي
تربت على ظهره بلطف:

-متخفش، أنا كويسة والله. المهم أنت،
تعالى استريح شوية، لسه فايق.

جذبتة برفق إلى الداخل. تحرك معها
على مضض وهو يقول بحنق:

- يلا نمشي، مش عاوز أستريح.
أردفت بهدوء:

-تعالى بس ارتاح لحد ما أنادي الدكتور
يشوفك.

أجلسته على الفراش، ثم غادرت الغرفة
لتعود بعد دقائق برفقة الطبيب، الذي قام

بفحصه مرة أخرى. ابتسم لهم الطبيب
باطمئنان وقال:

-حمد الله على سلامتك.

سأل "إبراهيم" بهدوء: هو حصلي إيه؟
أو فيا إيه؟

رد الطبيب بعملية: الحمد لله، الحادثة
كانت بسيطة. عندك شوية جروح
سطحية وفتح في الرأس خد خمس غرز
بس، ومفيش حاجة تانية. والسبب اللي
خلاك مفقتش غير دلوقتي إنك مريت
بحادثة كبيرة، والعقل الباطن كان
بيخوفك إنك لو فقت هتشوف خسارة
جديدة. يعني كنت في غيبوبة مؤقتة،
ونحمد ربنا إنها كانت قصيرة.

نظر "إبراهيم" لشقيقته متفحصاً إياها
بعينه قبل أن يسأل:

-طب وحنان؟ فيها حاجة؟

ابتسم الطبيب بهدوء وأجاب:
محصلهاش حاجة، زي الفل.

اعتدل "إبراهيم" في جلسته ثم قال: طب
أنا عايز أمشي من هنا.

هز الطبيب رأسه موافقًا وأضاف: تمام،
مفيش مشكلة. استرخي شوية لحد ما
الآنسة تخلص إجراءات الخروج. بس
مينفعش أنت تسوق.

رفض "إبراهيم" قائلاً بإصرار: لا، أنا
هقوم أخلص الإجراءات بنفسي.

حاول الطبيب منعه وأخبره بضرورة أن
يرتاح قليلاً قبل السفر، لكن "إبراهيم"
رفض ذلك رفضًا قاطعًا. تحرك ببطء
خلف الطبيب بعدما تأكد أن بطاقة
الائتمان لا تزال في جيبه ولم تسقط.

ورغم شعوره بالألم والدوار الذي لم
يخبر الطبيب به، كان كل ما يشغل
تفكيره الآن أن يطمئن على نصفة
الأخر.

بعد مرور نصف ساعة، وقف برفقة
"حنان" ينتظران وصول سيارة أوبر
لنقلهما إلى القاهرة.

ما زالوا جالسين على الأريكة، يفكرون
بجدية في كيفية هروب "جيهان". بعد
نقاش طويل، توصلوا إلى خطة ذكية.
فجأة، دخل عليهم المحامي وخلفه
"أشرف" و"فارس"، وكل منهما يحمل
حقيبة متوسطة الحجم تحتوي على
مأكولات ومشروبات سريعة. ناول كل

منهما زوجته طعامها، ثم جلسوا
أمامهم.

بدأ "فارس" الحديث بحدة، موجهًا
كلامه إلى زوجته:

- هو ده اللي قولتلك عليه يا "دعاء"؟

تروحي تعترفي على نفسك بالكذب!

نظر إليها الجميع بدهشة، ثم صاحت
"جيهان" بغضب:

-إيه اللي أنتي عملتيه ده يا "دعاء"؟

أنتي مجنونة؟

تحدث "أشرف" بسخرية: على أساس

أنتي معملتيش زيها.

تبادلت "نور" و"بسملة" النظرات

بصدمة، بينما قالت "جيهان" بخفوت:

-أنا عندي سبب خلاني أقول كده.

ردت "دعاء" بنبرة مشابهة: وأنا عندي سبب برضه.

قطع المحامي الحديث بجديته المعتادة:

-أنتم فاهمين غلط. إحنا مش في مدرسة
عشان تقولوا للمس إنكم اللي عملتوا
كده فتصدق وتعاقبكم مكان أصحابكم.
اللي عملتوه عقد القضية أكثر. لازم
تسمعوا كلامي وتكذبوا كل اللي اتقال في
المحضر وتقولوا اللي هقولكم عليه.

قالت "نور" بثبات: أنا مش هكذب، أنا
قلت الحقيقة وهقولها ثاني.

رد المحامي بتفهم: مش هتكدي، أنتي
هتقولي جزء من الحقيقة، والجزء
التاني اللي ممكن يضركم مش هتقوليه.
وعلى العموم، متقلقة إيش، أنا هكون

معاكي في التحقيق لو احتاج الأمر. أما
"دعاء"، هيحضر معاكي "أحمد"
التحقيق، و"جيهان" هيكون معاها محامٍ
تاني...

قاطعتهم "بسملة" بلهفة: هو بابا
مجاش؟

أجابها "فارس" بهدوء: كان هييجي
معانا، بس جاتله مكالمة مهمة فوقف
يرد.

هزت "بسملة" رأسها ولم تعلق. اقتربت
"دعاء" من "فارس" وهمست له:

- "فارس"، مشي المحامي، عايزين
نقول حاجة.

نظر إليها بتساؤل، فأشارت نحو
المحامي بصمت. شعر بالإحراج وقال:

-طب يا أستاذ "فايز"، في حاجة ثانية

تقولها لهم ولا خلاص؟

رد المحامي: لأ، هما ينفذوا اللي قولته

لحد ما نجمع دليل براءاتهم.

قال "فارس" بثبات:

-تمام. تفضل، وإحنا هنطلع وراك.

بعد خروج المحامي، سأل "أشرف"

بقلق:

-دكتور "فارس"، فيه حاجة ولا إيه؟

نظر "فارس" إلى زوجته وقال: مش

عارف.

عقد "أشرف" حاجبيه بعدم فهم، لكن

"نور" نهضت واقتربت منهم قائلة:

-أنا هقولكم فيه إيه.

نظر الجميع إليها باهتمام. أكملت حديثها:

-بعد ما فكرنا في اللي حصل، لقينا الحل... "جيهان" تهرب.

-نعم؟!!

كلمة واحدة خرجت من "أشرف" و"فارس" بصدمة، بينما أكملت "نور":

-اسمعوني، هي الوحيدة اللي تقدر تجيب دليل براءتنا. إحنا مش هنقدر.

سأل "فارس" ساخرًا: والأساتذة "جيهان" هتعمل إيه إحنا منعرفش

نعمله؟

نظرت "جيهان" لـ "دعاء" بضيق ولم تتحدث. قال "أشرف" بسخرية:

-لو عايزين إعدام، مش هتقترحوا
الاقتراح ده.

صاحت "جيهان" بغضب، موجهة
حديثها لصديقاتها:

- "نور"، "دعاء"، كل واحدة تسكت
جوزها عشان أنا محترمة نفسي
وسكته، بس أنتوا عارفين إني بمقدرش
أعمل ده كثير!

قالت "بسملة" بحسم: خلاص يا
"جيهان". دكتور "فارس"، كابتن
"أشرف"، إحنا محتاجين مساعديكم
عشان "جيهان" تهرب.

رد "أشرف" بجديّة: مينفعش طبعًا.
مستحيل أعمل كده. عايزيني أهرب
مجرم؟!!

نظروا إليه بحنق. ردت "نور" بتشنج:

-نعم؟!!

تتهد "أشرف" وقال: مقصودش، أنا عارف إنكم مظلومين، بس مينفعش.

نسيتم إني ظابط؟!!

قالت "نور" بهدوء ورقة على غير عاداتها:

-عشان خاطرني يا "أشرف". "جيهان" تعرف تتصرف أكثر مننا، وإحنا قولنالها تعمل إيه. لو مجابتش دليل براءتنا، مش هنخرج. كل الأدلة ضدنا.

رغم رفض "أشرف" القاطع، تدخلت الفتيات لإقناعه. وبعد توسلات "دعاء"، تمكن "فارس" من إقناعه.

تتهد "أشرف" وقال: طب خلاص،
سبونني أفكار. يلا يا "نور"، كلوا حاجة.

فتحت "نور" الحقيبة لتتفقد محتوياتها.
جذبت "بسملة" المولتو منها وقالت
بضيق لـ "أشرف":

-شكلك بخيل، مقدرتش تجيب بيتزا وأنا
بحبها.

رد "أشرف" بسخرية: المطعم كان
قافل.

قالت "نور" وهي تشرب العصير:
نصيب ياختي، هنعمل إيه؟ ده مقدرش
الظرف اللي أنا فيه، وجابلي أكلي
المفضل.

سألها "أشرف" بسخرية: وإيه أكلك
المفضل ده؟

أجابت بحماس: حوششي! هتجيبلي،
صح؟

حرك رأسه نفيًا ليستفزها. فجأة، قالت
"جيهان" بحنق وهي تتناول التوينكيز:

-أنا زعلانة عليكم. وقعتوا وقعة سودة.
البخل ده صفة وحشة أوي. يعني إيه
يستخسر فينا كام سندوتش كبة؟!!

سأل "فارس" زوجته "دعاء": وإنتِ
إيه رأيك؟

قالت "دعاء" بهدوء: معاها حق. البخل
صفة وحشة أوي.

تفوه "فارس" بثبات: والله؟ طيب كنتِ
عايزة إيه؟

ردت بأسف: للأسف، اللي عايزاه
الحكومة مش هترضى بيه.

عقد حاجبيه بدهشة وسألها: يعني كنت
عايزة إيه؟

قالت بثبات: كشري. نفسي فيه.

نظر إليها "فارس" بعدم تصديق، بينما
ضحك "أشرف" بسخرية وهو يقول:

- هو مين اللي ضحك عليكم وفكركم
طالعين رحلة؟ أنتم متهمين في جريمة
قتل! يا رب تكونوا فاهمين معناها!

ثم أردف ساخرًا من نفسه: وأنا كنت
فاكر إن نفسها مسدودة وهتتعبني لحد
ما أقنعها تاكل، اتاريها جاية تحقق
أحلامها هنا! قال حواوشي قال!

هبط من الطائرة بلهفة، وأخذ نفسًا
عميقًا بسعادة لعودته إلى أرض الوطن.

تحرك بسرعة لإنهاء إجراءات خروجه
من المطار، متلهفًا للذهاب ومعرفة ما
حدث لها بعدما أخبرته شقيقته بالأمر.
بعد وقتٍ ليس بالقليل، أنهى الإجراءات
وغادر المطار، ليجد رفيقه ينتظره
بفرحة.

ركض صديقه نحوه ثم عانقه باشتياق
وهو يهتف:

-وحشتني يا هندسة!

بأدله العناق بابتسامه وهو يقول
بمشاكسة:

- وأنت أكثر يا 'بودي'!

ابتعد "عبده" عنه متذمرًا وقال بحنق:

- 'بودي' في عينك! أنا غلطان إني
جيتك!

ابتسم "تامر" وصفعه بخفة على رأسه
وهو يرد:

-بهزر يا 'بودي'، فيه إيه؟

رد "عبده" بهدوء وهو يجذب منه
الحقبة:

-طب يلا أوصلك البيت عشان ترتاح،
وبعدين نتقابل بالليل.

أردف "تامر" بجديّة: لا ياسطا، مش
هروح البيت. عندي مشوار مهم، وأنا
هنا عشانه. ومحدش يعرف إني نازل
أصلاً. كلمتك أنت مخصوص عشان
توصل الشنط، وأنا هخلص مشواري
وأحصلك.

تساءل "عبده" باهتمام: مشوار إيه ده
اللي نازل مخصوص عشانه؟

رد "تامر" بهدوء: هقولك بعدين. خليني
أخلص الأول وأكلمك. معلىش هتعبك
معايا.

أردف "عبده" بعتاب طفيف: عيب يا
"تيمو" الكلام ده. فرحتي برجوعك
متتوصفش!

احتضنه "تامر" بحب، ثم ودعه وغادر
إلى وجهته.

في اليوم التالي، أمر النائب العام بحبس
المتهمات أربعة أيام احتياطياً على ذمة
التحقيقات، لاتهامهن بقتل المجني عليه
"علاء حسين محمد"، مع مراعاة
التجديد لهن في الميعاد. لم يعترفن
بالحقيقة كاملة، بل أخبرن وكيل النيابة

أنهن ذهبن مرة واحدة إلى مكان الحادث
وحينها وجدنه مقتولاً، نافيات الهراء
الذي سجله الشرطي في محضر
التحقيق.

كانت آخر من تم التحقيق معها هي
"بسملة"، التي خرجت برفقة العسكري
مكبلة بالأصفاد، ووالدها يسير بجانبها،
يواسيها ويطمئنها بأن كل شيء سيمر
ولا داعي للقلق. أثناء ذلك، رأتها واقفاً
بجوار "فارس"، يتحدثان. فرقت أعينها
بدهشة وعدم تصديق، ثم أغلقت عينيها
بقوة وفتحتهما ببطء لتجده هذه المرة
يراقبها باهتمام وهو يبتسم لها. لم
تصدق أنه هنا! ألم يكن خارج البلاد؟
متى أتى؟ وماذا يفعل هنا؟

أما "تامر"، فقد كان يتابع أخبار القضية، بينما "فارس" يقص عليه التفاصيل باختصار. عندما رأى "بسملة" تخرج من التحقيق، ابتسم لها، وتمنى لو أنه يستطيع الركض إليها، يحتضنها، ويطمئنها بأن كل شيء سيصبح على ما يرام. لكنه أدرك أن الوقت لم يحن بعد. يومًا ما، سيكون هذا حقه عندما تصبح ملكًا له، ولن يسمح لها بالابتعاد عن دفاء أحضانه. فهي سكنه ومسكنه، والمعجزة التي قابلت حياته رأسًا على عقب.

تحركت "بسملة" بجوار "جيهان" و"دعاء"، مكبلات معًا، بينما كانت

"نور" مكبلة بيد أحد العساكر. التفتت
"جيهان" بحرج وقالت:

-لو سمحت، عايزة أدخل الحمام.

أردفت "بسمة" بخجل: وأنا لو سمحت.

قادهم العسكري باتجاه المرحاض، وفتح
الأصفاد عن يد "جيهان" لتدخل. وقف
ينتظرها بالخارج.

خطت "نور" خطوتين، لكن بالخطأ
وضعت قدمها فوق قدم "دعاء"، التي
دفعتها وهي تقول بألم:

-آه! مش تفتحي يا عميا؟

صاحت "نور" بها، بعدما اختل توازنها
وكادت أن تسقط لولا يدها المكبلة بيد
العسكري:

-احترمي نفسك يا 'دعاء'، مكنش

قصدي! وبعدين ترقيني ليه؟

ردت "دعاء" بانفعال: احترمي نفسك

أنت! وبعدين دوستِ على رجلي،

ورجلي وجعتني بسببك.

تدخلت "بسملة" بتهدئة، وهي تضع

يدها على "نور":

-خلاص يا 'نور'، حصل خير.

أبعدت "نور" يد "بسملة" بعنف، وهي

تقول:

-ملكيش دعوة! متدخليش في اللي

ميخصكيش.

قالت "دعاء" بعصبية: قولتك إنها قليلة

أدب، مصدقتيش!

جن جنون "نور" وتناست أين هي،
لترد بغضب:

-والله يا 'دعاء' لو مسكتيش، لأجيبك من
شعرك، ولا هيهمني حد!

صاحت "بسملة" بغضب: إيه قلة الأدب
دي يا 'نور'! محدش قادر عليك؟

وأثناء المشاجرة العنيفة، خرجت فتاة
من المرحاض ترتدي ثياباً سوداء
تخفيها من رأسها إلى أخمص قدميها.
كانت تسير بثبات يُحسد عليه، ولم تهتم
بالشجار، الذي انشغل الجميع به ولم
يلاحظها أحد. سارت بثبات إلى أن
خرجت من المركز، لتجد شخصاً يتحدث
عبر الهاتف ويقول:

-امشي على طول. هتلاقي عربية آخر
الشارع لونها أبيض. اركبي فيها،
والسواق عارف هيوديكي فين.

تحركت بسرعة باتجاه السيارة،
وصعدت، ليتحرك السائق بها بسرعة
فائقة.

وعند المشاجرة، صاح العسكري
بعصبية:

-اخرسي يا بت، أنتِ وهي!

صمتن، لكن نظرات الغضب المتبادلة
بينهن لم تخفِ نظرات السعادة بنجاح
خطتهن. تحرك عسكري بأمر من
المسؤول لاصطحاب "نور" إلى
الزنزانية، بينما جمع الثاني "دعاء"
و"بسملة" معًا، ثم اتجه بهما إلى مكان

احتجازهما. والثالث دق على باب
المرحاض لتخرج "جيهان" بثبات، فقال
العسكري بعصبية:

- كل ده في الحمام؟

لم ترد عليه، واكتفت بالصمت، ليعيد
الأصفاذ إلى يدها ويتحرك بها نحو
الزنزانة.

وصلت السيارة أمام منزل راقٍ، نظرت
يمينًا ويسارًا وتساءلت:

- إحنا فين؟

رد السائق باحترام وهو يناولها المفتاح:

- "أشرف باشا" قالي أديكي المفتاح ده،
هو بتاع البيت اللي قصادك. وقالي
أقولك تظمني، مفيش حد في البيت،

وهو بالليل هيجي يشوفك. وياريت
متطلعيش من البيت لغاية ما يجي.

أخذت منه المفتاح، ثم هبطت من
السيارة وسارت باتجاه الباب، بينما
السائق ما زال منتظرًا دخولها. وعندما
ولجت إلى الداخل، غادر على الفور.

بدأت تفحص المنزل وكأنها جاءت
لتشترية. ثم جلست في غرفة الجلوس،
لتجد حقيبة صغيرة بداخلها بعض
الثياب، وجوارها ورقة صغيرة. جذبت
الورقة وفتحتها، لتقرأ:

-«ده لبس عشان تغيري اللي أنتي
لبساه. مفيش حد في البيت، وأنا لما
هاجي هخبط، متقلقيش. أنا معنديش

مفتاح تاني. وفيه أكل في المطبخ، بس
أوعي تخرجي من البيت غير لما أجي.»
استرخت قليلاً، ثم دخلت المرحاض
وبدلت ثيابها. خرجت لتقف أمام المرآة،
وضعت الحجاب، ثم تحركت تبحث عن
المطبخ لأن معدتها كانت تتألم من
الجوع. بعد دقائق، خرجت بالطعام
وجلست في غرفة الجلوس تتناول
الطعام.

في تلك الأثناء، ولج "إبراهيم" إلى
المنزل برفقة "حنان"، ثم أغلق الباب
خلفه. سمع صوت التلفاز وضحكات
تصدح في المكان، فتساءل بدهشة عن
هوية تلك الضحكات. ونظر إلى "حنان"
التي قالت بتفكير:

-تفتكر ده حرامي تعب من السرقة، قال
يستريح شوية عندنا؟

تحرك "إبراهيم" إلى الداخل، ليحدها
تتناول الطعام باسترخاء وكأنها في
منزلها. ورغم دهشته من وجودها، إلا
أنه قال بابتسامة: "جيهان"، بتعملي إيه
هنا؟

الفصل الثالث والثلاثون

"اللهم غيرني لما تريد أنت، واختر لي
ما تشاء أنت، واجعل قلبي متعلق بك
وحدك أنت، وبدل ما تراه عيني جميلا
بما تراه أنت، اللهم إني سلمتك أمري
ونفسي في الدنيا فأجعل دنيائي كما تحب،
وأخرتي برحمتك أنت وليست بعلمي فما
لي سواك أنت يا الله."

دخل "إبراهيم" إلى المنزل برفقة
"حنان" وأغلق الباب خلفه. سمع صوت
التلفاز وصوت ضحكات تصدح في
المكان، فتساءل بدهشة ونظر إلى
"حنان" التي قالت بتفكير:
-تفتكر ده حرامي تعب من السرقة، قال
يستريح شوية عندنا؟

تحرك "إبراهيم" إلى الغرفة ليجد
"جيهان" جالسة تتناول الطعام
باسترخاء وتشاهد فيلم "غبي منه فيه".
رغم دهشته من وجودها، إلا أنه قال
بابتسامة:

-جيهان، بتعملي إيه هنا؟

انتفضت "جيهان" من جلستها عندما
رأته يقف أمامها، لتقول بتوتر:

-أنت بتعمل إيه هنا؟

أجاب ببساطة: ده بيتي.

ردت بدهشة: بيتك؟

أبتسم قائلاً: أيوة.

انتبهت "جيهان" إلى الرباط الطبي
(الضمادة) على جبينه ولامحه

المرهقة، فتساءلت بقلق وهي تشير إلى
رأسه:

-مالك؟ اتعورت فين كده؟ ومين ده اللي
ضربك؟

ضحك "إبراهيم" بشدة مما تفوهت به،
لتجيب "حنان" وهي تجلس بإرهاق:

-متقاعيش، بسبطة، هو عمل بينا حادثة
عشان خاطر عيونك، بس الحمد لله
عدت على خير

نظرت لها "جيهان" بصدمة وقالت: أنتِ
بتتكلمي جد؟

هزت "حنان" رأسها وهي تردف:

-والله بجد. لما عرف أنك في الحبس
ساق العربية بسرعة وعمنا حادثة.

عشان كده مجاش، بس أنتِ مش
ملاحظة أنك طلعتي بسرعة أوي؟
اقتربت "جيهان" منه بضع خطوات،
وسألته باهتمام:

-أنت كويس؟

ابتسم لها وهو يردف: الحمد لله، بخير.
أهم حاجة أنك بخير. بس قوليلي،
بتعملي إيه هنا ودخلتي إزاي؟

أجابت بمرح: من الباب. وعرفت أنك
عملت حادثة، جيت أظمن عليك، عشان
تعرف إني أحسن منك.

رد مازحًا: يسلام!

قالت بمرح: أمال! ده أنت حتى مقدرتش
تجيب بخمس جنيهه عيش وحلاوة

وتيجي تزورني، شكلي هضيفك لقائمة
البخلاء.

ابتسم بقلّة حيلة وقال: يا بنتي، اتكلمي
جد. طلعتي إزاي من الحبس؟ 'أشرف'
ق...

قطع حديثه، وتابع بتفكير: 'أشرف' هو
اللي جابك هنا، لأنه معاه مفتاح البيت،
صح؟

صفت بمرح وقالت: والله باشا! إيه يا
بني الحلاوة والذكاء ده؟ أنا لو مكانك
كنت قعدت سنتين عشان أفهم.

جلس بجوار شقيقته وهو يضحك ثم
قال:

-طب يا باشا، اقعدني وقولي لي حصل إيه؟

جلست مكانها وقالت: اسمع يا دوك،

اتفقتنا أنا والبنات إني ههرب...

قاطها بدهشة: هربتي؟!!

ردت "جيهان" بمشاكسة: إيه يا دوك!

أنا لسه كنت بقول عليك ذكي، متخلفيش

أرجع في كلامي.

أخذ "إبراهيم" نفسًا عميقًا ثم ابتسم لها

وقال:

-طب كمل، هربتي إزاي؟

أردفت "جيهان": المهم، اتفقتنا إني

أهرب عشان أدور على دليل. و"أشرف"

و"فارس" ساعدونا. لما طلعت من

المركز كان في عريضة مستتياي

وجابتي هنا. السواق عطاني المفتاح

وقال إن مفيش حد، و"أشرف" هيجي في الليل. وأنا مكنتش أعرف إن ده بيتك. تفهم "إبراهيم" حرجها، فقال ليخفف عنها:

- "أشرف" فعلاً مكنش يعرف إنني هاجي هنا، لأنني كنت عنده في البيت عشان اطمئن على خالتي، بس "حنان" كانت تعبانه واصرت تيجي البيت. وبعدين، ده بيتك.

تساءلت "حنان" بهدوء:

- طب هربتي إزاي من المركز؟ مش فاهمة.

قصت "جيهان" ما أخبرها به "أشرف":

- 'أشرف' عمل ماسك شكله زي وشي.
و'فارس' طلب من أخته تكون مكاني،
وهي وافقت عشان صحبتي. فجابها
القسم واستتتني في الحمام. بعد التحقيق
طلبت أدخل الحمام ولبست النقاب اللي
هي كانت جيباه معاها. هي خدت لبسي
ولبست الماسك. و'دعاء' و'نور'
و'بسمة' عملوا خناقة عشان العساكر
يركزوا معهم ومحدث ياخذ باله وأنا
خارجة. بعدين 'منار' طلعت على أساس
إنها أنا، ومحدث عرف إنني هربت.
متقلقش، أنا هطلب من 'أشرف' أمشي
من هنا عشان متأذيش بسببي.

قالت جملتها الأخيرة لـ "إبراهيم"،
ليقول بجديّة:

-بس عبط! أنا كنت هتجنن لما عرفت
اللي حصل. تقولي متتأديش؟ أنا اتأديت
فعلاً لما كل ده حصل لك وأنا مش هنا.
الحمد لله أنك بخير وقصادي، وإن شاء
الله كل حاجة هتعدني وإحنا مع بعض.

نظرت بعيداً بخجل من حديثه الصادق،
الذي جعل قلبها يخفق كأنها تسمع
الطبول. فرّق "إبراهيم" لحيته بخرج
بعدهما شعر أنه أطال الحديث. نهض
وقال:

-هدخل أوضتي. خدي راحتك، ده بيتك،
وأنا مش هطلع من الأوضة غير لما
يجي "أشرف".

ابتسمت له "جيهان" بابتسامة زينت
محياتها، فبادلها الابتسامة، ثم استأذن

ودخل غرفته. التفتت "حنان" إليها
بمرح وقالت:

أحسن إنه مشي. تعالي بقى أوريكي
أوضتي وئرغي مع بعض."

في المركز وبالاخص في الزنزانة قالت
"دعاء" بامتنان:

-مش عارفه اشكرك أزاى يا "منار"
على اللي عملتيه جميلك هيفضل فوق
رأسي طول العمر

ردت "منار" بصوت منخفض: جميل إيه
يا هيلة أنتي مرات اخويا والمصيبة اللي
هربت صحبتي

تدخلت "نور" تقول بضيق: نعم ياختي
هي بس اللي صحبتك، وأنا إيه؟

ردت "منار" بهدوء: مقصدهش كلكم
اصحابي والله

قالت "بسمة": سيبيك منها ام لسان
طويل دي، بس والله اللي عملتيه مفيش
كلمة شكر توفي حقك، كدا "جيهان"
هتقدر تتحرك براحتها من غير ما يكون
في حد بيدور عليها

ابتسمت لها "منار" ولم تعقب لتقول
بسمة بتردد:

-انتم شفتوه هو جه فعلاً ولا أنا كان
بيتهيألي

نظرت لها "منار" بعدم فهم لكن "نور"
و"دعاء" نظروا لبعض ثم قالت "نور":

-لا ياختي شوفناه بس هو ده وقت حب
وكلام فاضي

نظرت لها بشر ثم هتفت تدافع عن
نفسها:

- انا بس استغربت لاني عارفه انه
مسافر جه أمتي

ردت "دعاء" بهدوء: ممكن يكون جه
من بدري ولما عرف اللي حصل جه
عشان "فارس"

هزت رأسها بعدما اقتناع هي تصدق
قلبها وقلبها يخبرها انه هنا لاجلها وهذا
أكثر من كافي ليسعدا وجعلها تبتسم،
انتقلت ابتساماتها للوجه وكأنها عدوى
وبالاصح "نور" و"دعاء" وهم يتمنون
أن تدوم سعادتها

وصل "تامر" المنزل بتردد، لا يعلم كيف سيقابل والده بعد مغادرته البلاد دون علمه. أخذ نفسًا عميقًا وزفيرًا بتروء، ثم خطى إلى الداخل ليجد الجميع في انتظاره. كانت أول من ركضت نحوه بلهفة هي "إيمان"، التي عانقته وهي تبكي بشوق. بادلها العناق وهو يربت على ظهرها بحنو، ليسمعها تقول:

-حمد لله على سلامتك يا "تيمور"،
وحشتني أوي.

رد عليها "تامر" بحب: الله يسلمك يا "أمنيّتي"، وأنتِ كمان وحشتيني أوي.

ابتعدت عنه عندما رأت "عايدة"، زوجة شقيقها، تقترب منهما. وقفت "عايدة" أمامه، وفجأة رفعت يدها وصفعته على

وجهه بقوة، مما جعل الجميع في حالة دهشة. لكن سرعان ما اقتربت منه لتعانقه وهي تبكي بشدة.

ابتسم "تامر" وهو يحتضنها وربت عليها باطف وهو يهمس:

-حقك عليا يا ست الكل، متزعليش مني، أنا ماليش غيرك.

ردت "عايدة" بنبرة باكية: مقدرش أزعل، هو أنا عندي أغلى منك؟ ده أنت آخر صبري.

تدخل "كريم" بصوت يمزج بين الجدية والمزاح:

- نعم يا ست "عايدة"، بتقولي إيه؟ وبالنسبة ليا أنا إيه؟ أباجورة؟ هو معنديش أغلى منه؟ والأستاذة "سلمى"

بنت قلبك، والآنسة "ديالا" روحك، وأنا
إيه؟

نظرت إليه بحب وقالت وهي تبتعد عن
"تامر":

- أنت نور عيوني وأول فرحتي.

ضحك "حسني" وقال بمرح خفيف:
على فكرة، بتضحك عليك، أنا أول
فرحتها.

نظرت "عايدة" لزوجها بضيق، ليقترب
منها "كريم" ويعانقها، ثم ابتعد عنها
ليعانق أخاه "تامر"، وهمس في أذنه
بآية قرآنية:

- (سَنَشُدُّ عَضُدَكَ بِأَخِيكَ). ليك وحشة يا
سند أخوك.

اغرورقت عينا "تامر" بالدموع تأثراً
برد أخيه، وهمس:

-حقك عليا يا "كريم".

ابتعد "كريم" عنه وهو يبتسم براحة،
بينما لمح "تامر" "سلمى" واقفة على
بعد تبكي. أشار لها بالاقتراب، فركضت
نحوه وأرتمت بين ذراعيه وهي تبكي:

-كده يا "تامر"، تسبني لوحدني وتمشي؟
أنا كنت بعترك عيلتي كلها. لما "كريم"
يزعني، أروح لمين وأنت بعيد؟

تدخل "كريم" وهو يبعدهما برفق،
واضعاً يده على زوجته:

-يا بنتي، أنا زعلتك أمتي قبل كده؟
والواد ده بتاع بنات، متقربيش منه
تاني.

رد "تامر" بمشاكسة: دي أختي يا
حبيبي، خالتك كانت فاكرة إنها مخلفة
توأم وربتي معاها.

همس "كريم" بصوت منخفض وصل
إلى "سلمى":

- عشان كده طلعتوا الاتنين مش مترين.

وكزته "سلمى" في معدته ليصرخ بألم
مصطنع، بينما اقترب "تامر" من
"ديالا" ليعانقها بصمت. شدد من عناقه
كأنه يريد أن يخفيها داخله. كانت
صغيرته الحبيبة، لكنها تحملت نتائج
أخطائه. وجهها شاحب، تبدو كمن
تخطت الأربعين، رغم أنها لم تبدأ عقدها
الثاني. ابتسامتها التي كانت تشبه

شروق الشمس اختفت، وأصبحت
صامتة بشكل مؤلم.

ابتعدت عنه وهي تبتسم بخفوت، فقبل
جبينها وقال:

-وحشتيني يا "دودو".

ردت "ديالا" بابتسامة هادئة: وأنت
كمان وحشتني أوي.

بخطوات مترددة، اقترب من مكان
جلوس والده. كان يعلم أن هذه هي
المقابلة التي يخشاها. نهض "حسني"
فجأة وجذبه بقوة إلى أحضانه، مما
جعله يقف مصدومًا كالصنم. كانت
الصدمة واضحة على الجميع، عدا
"عايدة"، فهي الأكثر دراية بشخصية
زوجها.

رفع "تامر" يده ليعانق والده، وبكى

بعنف لأول مرة، وهو يهتف بتوسل:

-حقك عليا يا بابا، بالله عليك تسامحني.

ربت "حسني" على ظهره ثم أبعدته عنه،

ومسح دموعه بأنامله، وقال بنبرة

حنونة كأنه يخاطب طفلاً صغيراً:

-أسامحك لو زعلان منك؟ أنا مقدرش

أزعل من حنة مني. أنت وأخواتك أعظم

نعمة ربنا أنعم عليا بيها، وهفضل لآخر

نفس أشكره على وجودكم.

عاد "تامر" ليعانقه، ثم جلسوا جميعاً

يضحكون ويمرحون، لكن "تامر" كان

مشغول البال بمن سكنت فؤاده.

في المساء بمنزل "إبراهيم"، حضر
"أشرف" و"فارس" للجلوس مع
"جيهان" ومعرفة خطتها القادمة. كان
"إبراهيم" قد لزم غرفته طوال اليوم،
متجنبًا إحراجها، لكنه خرج الآن
لاستقبالهم. جلسوا الثلاثة على الأريكة
بعد تبادل السلّامات، ينتظرون
"جيهان".

بعد دقيقتين، جاءت وجلست على مقعد
بعيدًا عنهم، وقالت بلا مقدمات:
-أنا هروح المحل اللي حصلت فيه
الجريمة. أكيد فيه دليل أو حاجة ممكن
تساعدنا وأنتم ما أخذتوش بالكم منها.
سألها "فارس" بجديّة: طب هتدخلي
إزاي؟ المكان متشمع.

ردت "جيهان" بهدوء: عادي، هاخذ
معايا سـكينة أو أي حاجة، وأحاول
أفتحه.

سألها "أشرف" بهدوء: هتروحي إمتي؟
أجابت بثبات: بعد ساعتين. هيكون
الوقت متأخر، ومحدث هيشوفني.
أردف "أشرف" بجديّة: أنا هروح
معاكي.

ردت بنفي وجديّة:
- لا طبعًا. في كاميرات في الشارع،
وممكن حد يلاحظ حاجة. أنا هروح
لوحدي، ودي مفهّاش نقاش.
كاد "أشرف" أن يرفض، لكنّه توقف
عندما قاطعته قائلة بحزم:

- لو سمحت، الحوار خلصان. أنا هروح لوحدي.

ثم التفتت إلى "فارس"، وقالت: دكتور "فارس"، "دعاء" قالت لي إن معاك تسجيل كاميرات المراقبة في الشارع. عاوزة أشوفه.

أخرج "فارس" هاتفه، وشغل الفيديو، ثم نهض ليعطيها الهاتف. وقفت احتراماً له وهي تأخذه، ثم التفتت إلى "إبراهيم" قائلة:

-شغله على الشاشة يا دكتور.

نهض "إبراهيم"، ووصل الهاتف بشاشة العرض، ثم شغل الفيديو. جلسوا جميعاً يتابعون التسجيل بتركيز، مرة واثنين، حتى صاحت "جيهان" بلهفة:

-وقف الفيديو يا دكتور، بسرعة!

توقف "إبراهيم" عند النقطة التي طلبتها، وسألت وهي تشير للشاشة:

-عاوزه تليفون كاميرته كويسة.

ناولها "إبراهيم" هاتفه، فقامت بالتقاط صورة للشاشة، وكبرت الصورة لتتضح التفاصيل. عندها لاحظت فتاة تختبئ خلف أحد أركان الحائط. كانت بعيدة جدًا، ومن يشاهد الفيديو يظن أنها نقطة سوداء. عندما أدركت هويتها، أصابها الذهول وبدأت تردد بعدم تصديق:

- مستحيل... مستحيل!

بدأت تسير في الغرفة ذهابًا وإيابًا، واضعةً يدها على رأسها، بينما الثلاثة

يراقبونها بترقب. تمت بصوت
مسموع:

- "علا"! يا ربّي، إزاي نسيت؟

اقترب منها "إبراهيم" وسألها باهتمام:

- نسيتي إيه؟ ومين "علا"؟

لم تستطع الإجابة، ووضعت يدها على
وجهها وهي تحاول استيعاب الموقف.
اقترب منها "فارس" وناولها كوب ماء،
وقال بهدوء:

- اشربي واهدي، وفهمينا... عرفتني إيه؟

تناولت الماء، وجلست محاولة تنظيم
أنفاسها، ثم قالت:

- لما دخلنا ولقينا القليل، من الصدمة ما
كنتش في وعيي. قربت منه، وخلعت
السكين من بطنه، وقتها نطق اسم

"علا" مرتين. لما شفت الصورة،
افتكرت.

نهض "أشرف" قائلاً بتخمين:
-يعني قصدك إنها اللي قتلته؟

هزت رأسها نفيًا، ثم قالت بتشتت: مش
عارفة! ب مستحيل. أكيد فيه حاجة
غلط. "علا" مستحيل تعمل كده. ده ابن
عمها وخطيبها، وكانوا هيجوزوا بعد
فترة. بس أكيد هي عارفة مين اللي
عمل كده، ومش بعيد تكون ساعدته.
وقوفها في المكان ده معناه إنها كانت
بتراقب اللي داخل ويخرج.

تساءل "إبراهيم" بتعجب: طب ليه
واثقة إنها مش هي؟ طالما واقفة كده،

وهو نطق اسمها وهو بيموت، يبقى أكيد هي.

ردت "جيهان" بما تعلمه: واثقة، لأنها أضعف من إنها تعمل كده. لسانها طويل وقليلة أدب، لكن ضعيفة. دي مرة شافت دم في حملة تبرع، وأغمى عليها. الدكتور "فارس" أكيد يعرفها. "علا حامد"، اللي معانا في الكلية.

أوماً "فارس" وهو يفكر، ثم قال: أنا معاك إنها ضعيفة، لكن أوقات الضعيف ممكن يعمل حاجة ما تتوقعيهاش.

وضعت "جيهان" يدها على وجهها وهي تفكر، ثم قالت:

- ممكن. بس حتى لو قلنا الكلام ده في التحقيق، هيش تبهوا فيها. لكن احنا

المتهمين الرئيسيين، وده برضو مش
دليل. أنا لازم أروح مكان الجريمة. أكيد
هلاقي حاجة.

أخرج "أشرف" هاتفًا صغيرًا من جيبه،
وقال:

- تمام. لازم نمشي دلوقتي. ده تليفون
بخط جديد ومسجل عليه رقمي. أول ما
توصلي هناك، رني عليا. عايز أكون
معاكي على الخط وأظمن.

هزت رأسها موافقة وهي تأخذ الهاتف.
طلب "فارس" الرقم، فناولته الهاتف
فسجل رقمه واتصل على نفسه ثم أعاد
الهاتف لها. عندها قالت "جيهان" بمرح
طفيف:

- إيه يا دوك، مش عاوز الرقم أنت
كمان؟

ابتسم "إبراهيم" مجيبًا بمرح: أنا معايا
صاحبة الرقم. هعمل بالرقم إيه؟

غادر "أشرف" و"فارس"، وبعد حديث
قصير مع "إبراهيم" عند الباب، عاد
الأخير إلى الداخل. وجد "جيهان" تقف
في الشرفة بحزن، فسألها باهتمام:
- مالك؟

تهادت "جيهان" بحزن، وقالت: بكرة
عيد ميلاد "بسملة". أنا متأكدة إنها أكثر
واحدة موجهة. هي عاشت مع أفضل
أب وأم في الدنيا، كانوا ييمنعوا عنها أي
حاجة وحشة. لما اتعرفنا، كانت أمها
حريصة تعرفني بشأن تظمن عليها.

اليومين دول "بسملة" تعبانة، وحتى
مش قادرة تتكلم، لأنها عارفة إنا كنا
تعبنا. وده اللي خلاتنا أنا و"دعاء"
نعترف على نفسنا عشان هي تخرج.

رفع "إبراهيم" نظره للسماء، وقال:

-صداقتكم حلوة أوي. أول مرة أشوف
حد ممكن يخاطر بحياته عشان صحابه.
بس اطمني... هي مسألة وقت، وكل
حاجة هتعدى. ربنا دايمًا مع المظلوم.

صمتت ولم تجيب وهي تنظر لسماء
وهمس قلبها برجاء: يارب.

"عيد ميلاد الليلة مين؟

عيد ميلاد "بسملة"

أجمل الحلوين

ضحكتها تملأ الدنيا نور
وتفرح كل القريين
نور ودعاء ومناز حواليا
فرحتهم لا توصف بيها
جايين التورته والهدايا
وبيغنوا أجمل غنايا
عيد ميلاد "بسملة" الحلوة
نغني ونفرح سوا
نتمنى ليها كل أملها
وتعيش أيامها بهنا
يا "بسملة" يا وردة في البستان
عيدك فرحة بكل مكان
ضحكتك أغلى هدية
تعيشي بفرحة طول الزمان
عيد ميلادك يا غالية علينا

نقول "كل سنة وانتى سعيدة"

نورك يشع في كل القلوب

ويزهري أيامك يا أميرة!"

تصاعدت كلمات الأغاني من أفواه

الجميع في الزنزانة بعد أن هددتهم

"نور"، مدعية بفخر أنها زوجة المقدم

"أشرف". شكلوا دائرة في المنتصف،

حيث كانت "بسملة"، "نور"، "دعاء"،

و"منار" يرقصن احتفالاً بعيد ميلاد

العزيزة "بسملة". دموعها امتزجت

بالضحكات وهي ترى ما يفعلونه لأجلها.

بدأت "نور" تغني كل أغاني أعياد

الميلاد التي تعرفها، وعندما انتهت،

عانقت "بسملة" بحب وهي تقول:

-كل سنة وأنتِ طيبة يا "بسو"!

ابتسمت "بسملة" رغم دموعها التي
لمعت في عينيها، قبل أن تجذبها
"دعاء" إلى أحضانها وهي تهتف
بمحبة:

- كل سنة وأنتِ أجمل حاجة في حياتي يا
"بسو"!

لكن "نور" أبعدتهما عن بعض بعنف،
مظهرة غضبًا مصطنعًا وهي تقول:

- نعم يا أختي، هي أجمل حاجة في حياتك
وأنا إيه؟

ضحكت "دعاء" وهي تعانق "نور"
بمزاح:

- أنتِ حياتي كلها يا نور!

اقتربت "بسملة" منهما، تخبئ في
أحضانها، وكأنها تريد الهروب من

العالم، بينما الثلاثة يدعون بصمت أن
تكون "جيهان" بخير، وأن يعود كل
شيء كما كان.

بعد لحظات، ابتعدوا قليلاً لتقترب
"منار" من "بسملة" وتعانقها بمحبة:

- كل سنة وأنتِ طيبة يا "بسملة"!

بادلتها "بسملة" العناق، قائلة بامتنان:

- وأنتِ طيبة، وألف شكر على كل اللي
عملتيه عشانا.

ابتسمت "منار" بخجل وهي ترد: أنا ما
عملتش حاجة، ده أقل واجب.

عادت "نور" للغناء والرقص، وانضمت
إليها "منار" و"بسملة"، بينما "دعاء"
تشاركهم الجنون بين الحين والآخر.

استمروا طوال الليل بالمرح والضحك،
متناسين تمامًا المكان الذي يجمعهم.

الساعة الواحدة والنصف صباحًا، ارتدت
"جيهان" فستانًا أسود اللون مع حجاب
ونقاب سعودي من نفس اللون. كان
"أشرف" قد اشترى لها هذه الملابس
بناءً على نصيحة "نور"، التي اقترحت
هذا الزي ليمنحها حرية الحركة ويخفي
هويتها عن الأنظار.

تحركت "جيهان" بهدوء نحو باب
الغرفة، أغلقت الباب برفق، ثم ألقت
نظرة سريعة يمينًا ويسارًا تبحث عن
"إبراهيم"، لكنها لم تجده. شعرت
بالارتياح، وحمدت الله أنه نائم، فهي

كانت تعتقد أنها ستضطر لإقناعه بصعوبة لتسمح له بالبقاء. أخذت الهاتف ومفتاح المنزل الذي كانت قد أخذته من السائق، ثم خرجت وأغلقت الباب بهدوء. تنفست بعمق قبل أن تبدأ التحرك.

لكن صوتًا خلفها قطع السكون: اتأخرتي كده ليه؟ أنا افكرتك نمتي.

كان الصوت صوت "إبراهيم"، الذي كان جالسًا في السيارة وينظر إلى ساعة يده.

تفاجأت من وجوده، واقتربت من السيارة وهي تسأله بتعجب:

-إنت بتعمل إيه هنا؟

رد "إبراهيم" بهدوء: مستنيكي.

أردفت "جيهان" بعصبية:

-وأنا قلت هروح لوحدي!

رد عليها باستنكار: وأنا وافقت؟

هزت رأسها نفياً وقالت بحزم: إنـت

متكلمتش أصلاً، يعني معنى كده إنك

موافق.

تجاهل مبرراتها وقال بهدوء: اركبي

طيب، وبعدين نتكلم.

صعدت السيارة وجلست بجواره، تنتظر

تفسيرًا. قطع صمتها بقوله وهو يقود

السيارة:

-أكيد أنتِ مش غبية عشان تتوقعي إنـي

أسيبك تطلعي من البيت في وقت زي ده

لوحديك. لو مش هخاف عليكِ من المكان

اللي رايحة له، هخاف عليك من الشارع
وأنت ماشية لوحديك. الكلاب مبرحمش.

تتهدت بقلة حيلة وهمست: أنا مش
عاوزه حد يتعرض لمشكلة بسببي.

توقف بسيارته بعد دقائق ونظر إليها
لثوانٍ قبل أن يقول بجدية:

-اسكتي يا "جيهان"، كلامك ده
بيزعني. يلا، انزلي.

نظرت إليه باستغراب وسألته: هنزل
ليه؟

رد بهدوء وهو يهبط من السيارة:
هنركن العربية هنا. المحل في الشارع
اللي ورا ده. أنت هتمشي قدامي، وأنا
وراك. لما نوصل، أنا هفتح الباب.

نزلت من السيارة وسارت أمامه بحذر حتى وصلا إلى المحل. تمكن "إبراهيم" من فتح الباب بسهولة باستخدام الطريقة التي علمها له "أشرف". دخلا معًا، وبدأ في البحث بتركيز في كل زاوية، ولكن مع مرور الوقت، خيم اليأس على "جيهان". جلست على أحد المقاعد بحزن، فحاول "إبراهيم" مواساتها قائلاً:

- ما تيأسيش، أكيد هنلاقي حاجة تبرئكم.
بينما كان يتحدث، وقعت عيناها على شيء أثار انتباهها. نهضت بلهفة، واتجهت إليه وجذبتة. تعجب "إبراهيم" مما رآه وسألها باندھاش:
- إيه ده؟

الفصل الرابع والثلاثون

"اللهم طمئن قلبي بما أنت أعلم به مني
أرحمني من أعباء أحملها بمفردي و
لست أبوح بها وأرزقي الثبات على
تقلبات هذه الحياة وأجعلني دائماً تحت
ظل رحمتك"

في اليوم التالي...

صاح العسكري باسم "بسملة"، يخبرها
بوجود أحد يريد زيارتها. تعجبت من
الأمر؛ فمنذ نصف ساعة كان والداها
هنا، وهي لا تعرف أحداً غيرهما، فمن
الذي جاء لمقابلتها يا ترى؟

تحركت معه بخطوات متثاقلة، بعدما
وضع الأصفاد في يديها، لتشعر
بالاختناق والعجز. وصلت إلى غرفة

الضابط، حيث حررها العسكري من
الأصفاد، وسمح لها بالدخول. ولجت
بخطوات هادئة لتري أحدهم يقف مُعطيًا
ظهره لها. لكنها لم تكن بحاجة إلى أن
يستدير لتعرفه، فقد أخبرتها دقات قلبها
المرتفعة من هو.

استدار بلهفة ليراها، فقالت هي
بعصية:

-إيه اللي جابك هنا؟

كان يعلم أنها سعيدة بوجوده، لكن
كبرياءها يمنعها من الاعتراف بذلك.
وإلا لما رأى بريق عينيها يلمع كنجوم
السماء. فرد بهدوء:

-جيت أشوفك. استني، اسمعيني قبل ما
تتكلمي. أنا قلت لأبوك إني جاي أشوفك،
وهو عارف إني هنا.

استدارت "بسملة" لتغادر وهي تقول
بحدة:

-تمام، أهو شوفتني. سلام.

رد بلهفة قبل أن تخرج: استني يا
"بسملة"، دقيقة واحدة بس!

وقفت في مكانها دون أن تستدير،
فتحرك ليقف أمامها قائلاً بصدق:

-أقسم لك بالله إني مش بضحك عليك.
من أول لحظة شفتك فيها، حياتي
اتغيرت للأحسن، وعاييز أكمل حياتي
معاكي.

نظرت إليه بحدة وردت: هو أنت شايف
إن ده مكان مناسب عشان تقولي كده؟!
بس ماشي، أنا هرد عليك. أنا مش
عايزاك. أصلاً مينفعش تكون أنت
الشخص اللي عشت عمري كله محافظة
على قلبي عشانه. الشخص اللي لما
يجي يكون يستاهلني، وأنا أستاهله،
ويعرف يقدر قيمتي. تفتكر أنت الشخص
ده؟

صمت "تامر"، ووضع عينيه أرضاً
بخجل من أفعاله السابقة. ابتسمت
"بسمة" بسخرية، تخفي ألمًا داخلها.
قلبها الخائن كان يؤنبها، يخبرها أن
تعطيه فرصة، لكن عقلها كان أقوى.
صاح عقلها بعنف:

- إن أعطيته فرصة، سينتهي بك الأمر
متسولة في قارعة الطريق!
قطعت جبل أفكارها عندما قال "تامر"
بإصرار:

- أنا عارف إن اللي عملته كان غلط،
بس عمري ما هغلط تاني. صحيح، أنتي
مش أول واحدة أعرفها، بس أقسم بالله
إنك الأخيرة. أنا طلبت إيدك مرة تانية
من أبوك، وقال لي إنه هيكلمك لما
تخلص المشكلة دي. أنا اتغيرت عشانك،
ومستعد أعمل أي حاجة عشانك. أنا
مش هسيبك يا "بسملة"، وهتكوني ليا
غصب عنك وعن الدنيا.

صرخت "بسملة" بغضب: إنـت فـاكر
نفسك مين عشان تقول كده؟ تكونش
عمرو دياب وأنا مش واخدة بالي!
رد "تامر" بلامبالاة: لأ، تامر حسني.

ظهرت شبه ابتسامة على وجهها، لكنها
أخفتها بسرعة قبل أن يراها، لكنه
لاحظها بالفعل وقال بابتسامة:

-أنا رجعت البلد عشانك، ومش همشي
غير وأنتي مراتي. براحتك بقى. سلام يا
بسبوسة.

سألته بفضول لم تستطع إخفاءه: إنـت
جيت إمتي؟

ابتسم "تامر" وهو يجيب: من يومين.
وجيت من المطار على هنا عشان أظمن
عليكي.

سألته مرة أخرى بعدم فهم: وجيت ليه
دلوقتي؟

صفع رأسه بخفة بعدما تذكر ما جاء
لأجله، ثم أخرج ظرفًا مطويًا باللون
الوردي، وضعه على مكتب الضابط،
وقال:

- نسيت بسببك. كل سنة وأنت طيبة يا
بسبوسة، والسنة الجاية إن شاء الله
تكوني في بيتي.

تركها وغادر، لتتظر إلى الظرف بتردد
قبل أن تجذبه وتفتحه. وجدت سلسلة
على شكل رمز إلى ما لا نهاية. ابتسمت
بسعادة، غير مصدقة كيف علم بأمنيتهما
أن تحصل على شيء كهذا. نظرت في

الظرف لتجد ورقة صغيرة، جذبتها
بلهفة وفتحتها لتقرأ ما كُتب بخط يده:

«كل عام وأنت بخير يا كل الخير، أنا
عارف إني مستهلكيش بس أنا هعمل
المستحيل عشان تكوني ليا»

ضاعفت سعادتها وهي ترى تمسكه بها،
وكأنها أسيرة أطلق سراحها. وزادت
فرحتها عندما قرأت قصيدة لشاعرها
المفضل، كانت مكتوبة في نهاية
الرسالة.

"لو عايز شئ بشدة ..

إياك تطلق سراحه !

فيه حاجات ياما بغائنا ..

قولنا نسيبهم فراحوا !

لو عايز شئ بشدة ..

اعمل حواليه قوسين !
خلي عيونك تحاوطه ..
لو حتى يروح لفين !"

"في منزل إبراهيم"

كانت "جيهان" تجلس بشرود، تفكر في
المعضلة التي وقعت بها. استيقظت من
شرودها على صوت "حنان"، التي
تجلس برفقتها وتقول:

-مقولتيش يا "جيهان"، حصل إيه
امبارح؟

ردت "جيهان" بنبرة متألئة بقلة
الحيلة:

-محصلش حاجة، دورنا وملقناش
حاجة.

ربتت "حنان" على يدها برفق وقالت:

- إن شاء الله هتتحل، متخفيش.

ابتسمت "جيهان" ابتسامة خفيفة
وأردفت:

-لو الموضوع يخصني مكنتش زعلت.
أنا زعلانة عليهم هما، مش عارفة
عاملين إيه؟ يا رب يكونوا بخير.

قالت "حنان" بطمأنينة: متقلقيش، أكيد
كويسين. وكم ان مش إنتي لسة مكالمة
"أشرف" وطمناك عليهم؟

هزت "جيهان" رأسها بهدوء، ثم سألت
بخجل:

-هو "إبراهيم" هيجي إمتي؟

ابتسمت "حنان" وردت بما أخبرها به
"إبراهيم" قبل أن يذهب إلى المستشفى:

- "إبراهيم" عنده مناوبة في المستشفى.
وقال لو احتجتي حاجة، رني عليه،
ومتطلعيش من البيت غير لما تتصلي
بیه.

تهدت "جيهان" وقالت بخفوت: هو

هيات بره البيت بسببي، صح؟

ردت "حنان" بصدق: هو قال إنه هيقعد

الفترة دي في المستشفى عشان تكوني

على راحتك، وهيجي كل يوم يطمئن

علينا ويشوفك لو عايزة حاجة.

صاح صوت هاتف "جيهان"، فنظرت

إلى الشاشة لترى اسم الدكتور "فارس"

مدوناً عليها. ردت عليه بجديّة بعدما

ألقي السلام:

- وعلّيكم السلام ورحمة الله وبركاته يا
دكتور.

سألها "فارس" عن ما حدث بالأمس،
فردت بهدوء:

-للأسف، ملقتش حاجة غير مذكرات
المرحوم. ولما قرّيت اللي مكتوب،
عرفت إنه بيكره "علا" وكان مجبور
عليها بسبب أبوه. يعني ممكن فعلاً
تكون "علا" اللي عملت كذا. بس في
حاجة تانية.

تساءل "فارس" بجديّة: حاجة إيه؟

قالت "جيهان" بهدوء:

-هو كان بيحب بنت عمه التانية، وهي
كمان بتحبه، بس هي مخطوبة. ومن كام
يوم، اتخانق مع خطيبها وهدده بالقتل.

فممكن يكون حصل خلاف بينهم ثاني،
وفي لحظة غضب قتله.

رد "فارس" بأسف: القضية عمالة
تتعقد... وبعدين؟

قالت "جيهان" بثبات: أنا من بكرة
هراقب "علا". وإن شاء الله نوصل
لحاجة، لأن ظهورها في التسجيل دليل
إنها أكيد عارفة حاجة ومخبياها.

اعترض "فارس" قائلاً بثبات: مش لازم
أنتي اللي ترقبها. "أشرف" ممكن بيعت
حد يراقبها.

نفت اقتراحه بلباقة وقالت: لا، هراقبها
أنا. لأن ممكن تحس بالشخص اللي
هيبعتوه. وكمان، أنا عايزة أظهر قدامها
وأشوف رد فعلها.

حاول إقناعها بصوته الهادئ: لو هي
اللي عملت كده أو تعرف اللي قتل،
وشافتك، ممكن تأذيكي وتعرضي حياتك
للخطر.

ردت "جيهان" بحزن: مش هيكون
أخطر من اللي إحنا فيه يا دكتور.
تحدثت معه لبضع دقائق أخرى، تخبره
بخطتها وتطمئنه أنها لن تعرض حياتها
للخطر. أنهت المكالمة بعدما أوصته أن
يعتني بـ "دعاء" ويوصل لها سلامها.

تحركت في الممر بلهفة وحزن على ما
يحدث لصغيرتها. أسوأ ما مر بخاطرها
لم يكن ليشبه هذا الواقع القاسي. "هل

يُعقل أن تكون ابنتي هنا؟! يا حسرة
قلبي عليك يا صغيرتي."

هذا ما كان يدور في عقل والدة "نور"،
التي توسلت للضابط أن يسمح لها
برؤية ابنتها. كان زوجها قد رفض
قدمها في البداية، ولكن مع إصرارها
وافق على مضيها. ها هي الآن تدخل
غرفة الضابط، تنتظر ابنتها بفارغ
الصبر.

مرت الدقائق كأنها دهور، إلى أن طرق
الباب برفق. دخل العسكري ومعه
"نور"، مكبلة بالأصفاد. حررها ثم غادر
الغرفة، فما كان من والدتها إلا أن
جذبتها إلى حضنها في عناق ساحق
وكانها تريد احتواء كل ألمها.

تتحنح الضابط وهو ينهض قائلاً:

هستى بره ربع ساعة وجاي.

رد "المهدي" باحترام: اتفضل.

غادر الضابط، فالتفتت والدة "نور" إلى

ابنتها، تبكي بحرقة قائلة:

- عاملة إيه يا ضي عيني؟ يا ريتني

مكانك وإنتي لأ.

لم تستطع "نور" الصمود أمام حنان

والدتها، وهي التي افتقدتها بشدة. بكت

بصوت مسموع، متشبثة بها كطفلة

صغيرة:

- وحشتيني يا ماما أوي. بالله عليك،

خرجيني من هنا. أنا مش قادرة أتحمل.

بكت والدتها بقلة حيلة، واقترب والدها
منها، يربت على كتفها بحنو ويقول
بقوة:

-أنتِ قوية يا "نور"، متضعفيش. إن
شاء الله قريب هتخرجي من هنا، وكل
حاجة هتعدني. اصبري.

ابتعدت "نور" عن والدتها واحتضنت
والدها بشوق جارف. كانت تفتقدهم
جميعاً.

سألت والدتها بحزن عن ابنة أخيها،
فردت "نور" بتوتر:

-... مسمحوش غير لواحدة بس إنها
تقابلكم.

مر الوقت المخصص بسرعة البرق،
وغادر والداها. نظرت "نور" إليهما

بحزن وهما يرحلان، متعجبة من عدم دخول العسكري لإعادتها إلى الزنزانة. وبينما هي تخطو للخارج، ولج "أشرف" إلى الغرفة بثبات، يقول بمشاكسة:

-بتفكري في إيه يا آخر صبري؟

جلست "نور" على المقعد بإعياء واضح، ولم تجب، على غير عاداتها. تعجب "أشرف" من صمتها، واقترب منها ليسأل باهتمام:

- مالك يا عمري؟

انهارت كل حصونها، ولم تستطع الصمود أكثر من ذلك. بكت بحرقة قائلة:

-تعبت والله. أنا مش قادرة أتحمل.
"بسملة" كل شوية تقول كلام يوجع

قلبي، وأنا بضحك وهزر عشان
متزعلش. بس هي زعلانة أوي، وأنا
زعلانة عليها ومش عارفة أعملها إيه.
يارتي مقلتهمش نرجع تاني! "دعاء"
و"جيهان" مكنوش عايزين يروحوا،
وأنا اللي أصريت. أنا السبب في كل اللي
حصل لهم.

انهارت بالبكاء وهي تحمل نفسها فوق
طاققتها. كيف تحولت حياتها من الحيرة
أمام خزانة الملابس إلى هذه الكارثة؟

جذبها "أشرف" إلى حضنه، يربت على
كتفها برفق، تارگًا إياها تبكي حتى
تخرج كل ما في قلبها. عندما هدأت
قليلاً، أخرجها من حضنه وجلس أمامها،

يمسح دموعها المتساقطة دون توقف
قائلاً بحنان:

- اسمعيني يا عمري، اللي حصل نصيب
واختبار لينا كنا. متحمليش نفسك ذنب
حاجة مالكيش علاقة بيها. أنا وعدتك
إني مستحيل أسيبك. هعمل أي حاجة
عشان تخرجي من هنا، بس اتحملي
شوية عشان خاطري.

صمت للحظة، وعندما رأى أنها هدأت
تماماً، أضاف بمشاكسة:

- وبعدين، اللي حصل ده خير ليا. كنت
فاكر إني متجاوز واحد صاحبي،
معدوش مشاعر ولا بيحس. بس طلع
عندك مشاعر زي البنات أهو، وكل

شوية تحضنيني... حاجة في منتهى
الحلاوة.

دفشته "نور" بعنف وهي تصيح
باستنكار:

-واحد صاحبك! كنت شايفني واحد
صاحبك يا "أشرف"؟

نهض "أشرف" معتدلاً، يهز رأسه
بجدية، محاولاً كتم ضحكته. بينما هي
هتفت بغضب: وربّي لوريك صاحبك ده
هيعمل فيك إيه. بس اصبر عليا!

انفجر "أشرف" ضاحكاً، يملأ صوته
الغرفة. تحول غضبها إلى نظرات خبث،
اقتربت منه فجأة، وقبّلته قبلة خاطفة
على وجنته، ثم غمزت بدلع مصطنع:
-باي يا بيبي.

غادرت الغرفة مع العسكري، تاركة
"أشرف" واقفاً في مكانه، مصدوماً مما
فعلته هذه المجنونة.

-خليك يا مارس، اتعشى معنا في البيت
وابقى اطلعوا مرة ثانية.

قال "تامر" الجملة محاولاً إقناع زوج
شقيقته بالبقاء للعشاء معهم. ولكن
"مارس" رد بجرج:

-معلش يا تامر، خليها مرة ثانية. أنا
محتاج أقعد مع ديالا شوية، وهي هنا
بتكون مكسوفة. وكم ان اليومين الجايين
هكون مشغول، فمش هقدر أجي
أشوفها.

تدخل "كريم" مازحًا: خلاص يا تامر،
سببه براحتيه. وبالمرة، شوف أختك
جهزت الأكل ولا لسه.

ابتسم له "مارس" بامتنان وقال: شكرًا
لتفهمك.

رد عليه "كريم" بمرح: أنا لا متفهم ولا
نيلة. الحكاية وما فيها إن إيمان هي اللي
جهزت الأكل احتفالًا برجوع تامر من
السفر، وأنا خايف على أختي لتطلقها لو
كنت من أكلها.

نظر إليه "مارس" بتعجب: ليه؟ هي
حاطة سم في الأكل ولا إيه؟

ضحك "كريم" على استنتاجه، وقبل أن
يرد دخلت "إيمان" وهي تقول بجديّة:
-يلا الأكل جاهز، اتحركوا.

ابتسم "مارس" بخجل وقال: معلش، أنا
وديالا هنتعشى بره.

هتفت "إيمان" بغضب:

-نعم يعني؟ أنا أقف طول النهار أجهز
الأكل وفي الآخر تقولي هتعثوا بره؟!!

قال "كريم" بابتسامة: سيبيهم يا إيمان.
على الأقل نلاقي حد ينقذنا. أو، لقدر الله،
معرفوش ينقذونا يبقى حافظوا على نسل
العيلة بدل ما أنتي ناوية تقطعيه.

تدخل "حسني" بهدوء: تعال يا بني، كُمل
حاجة خفيفة وبعدين روحوا عشان
إيمان ما تزعلش.

رد "كريم" بلهفة: إيه يا بابا؟! أنت لو
عاوز مارس يطلق ديالا، مش هتقترح
الاقتراح ده.

ثم التفت إلى "مارس" وقال مازحًا،
مقلدًا شخصية "محي الشرقاوي":

-أنا قولتلك بلاش!

نظر "مارس" إليهم بحيرة، لكنه لم
يستطع رفض الدعوة بعدما وجد الجميع
ينتظر قراره. أشار لهم بابتسامة هادئة،
واتسعت ابتسامته عندما رآها تقترب
كالحورية بفساتان بني أنيق، يبرز
جمالها الفاتن. همس بخفوت، لم يصل
سوى إلى "كريم" الجالس بقربه:

- "بسم الله ما شاء الله."

ابتسم "كريم" بحبور، حامدًا الله على
وجود هذا الشاب في حياة شقيقته.
تحرك الجميع نحو طاولة الطعام،

وجلسوا ينظرون إلى بعضهم بترقب
واضح.

مال "مارس" برأسه نحو "ديالا"، التي
تجلس بجواره، وهمس بتعجب:

-هما مالهم بصين للأكل كده ليه؟

ضحكت "ديالا" بخفوت قائلة: استنى،
هتعرف دلوقتي.

صاح صوت "تامر" بضيق:

-والله يا عمتو، أنتي تعبتي نفسك على
الفاضي. أنا مكنتش عامل حسابي أموت
النهاردة.

ردت "إيمان" بانزعاج: بطل رغي، ويلا
زي العادة ناكل كلنا مع بعض.

تدخل "مارس" بحزم: عيب يا تامر!
عمتك تعبت في تجهيز الأكل عشانك.

أقل حاجة تقولها: تسلم إيدك، وتاكل بدل ما تزعل.

ردت "إيمان" بفرحة: ربنا يجبر بخاطرك يا غالي. أنا شكلي هحبك.

قال "تامر" ساخرًا: استنى يا عسل. دوق الأكل الأول وبعدين اتكلم.

أصرت "إيمان" على تناول الجميع الطعام معًا، كما العادة. ولكن ما إن وضعوا أول لقمة في أفواههم حتى بدأ السعال ينتشر بينهم. الكل يسعل ويبصق، ثم يجذب أكواب الماء ليتناولها دفعة واحدة.

اتسعت عينا "إيمان" برعب وقالت: يا رب ما يكونش اللي في بالي!

رد "حسني" بصعوبة، وهو يسعل: ليه
يا إيمان؟ حرام عليك!

قالت "إيمان" بحزن: طب أعمل إيه؟ أنا
ماليش في الطبخ.

رد الجميع بصوت واحد: والله إحنا
متأكدين! بس يارب أنتي تفتني بده.

مسح "مارس" دمعة هاربة من عينه
بسبب حرارة الطعام وقال مبتسمًا:

-الأكل حلو... بس حراق شوية.

قال "تامر" ساخرًا وهو يرتشف الماء:

-شوية! ده شويتين تلاتة أربعة! أنتي

عايزة تنتقي منا ولا إيه؟!!

دافعت "إيمان" عن نفسها بلهفة:

-العلبة وقعت بالغلط وأنا بأخذ الملح.
افتكرت إنها فاضية، قلبت في الأكل
ومخدتش بالي.

لطم "كريم" على وجهه بصدمة وهو
يهتف:

-فضيتي علبة الشطة كلها يا إيمان؟
وتقولي بالغلط؟! الله يسامحك يا شيخة!
عارفة يا ماما، لو إيمان دخلت المطبخ
تاني لتكوني طالق.

ردت "عايدة" بحنق: وتطلقتي إزاي يا
خويا؟ قول لمراتك الكلام ده، مش لي
أنا!

غمز "كريم" لـ "سلمى"، وهو يرسل لها
قبلة في الهواء، وقال بابتسامة:

-لأ، سلمى دي العشيق. مقدرش أقولها
حاجة.

ابتسمت "سلمى" بخجل من فعلته، بينما
أضاف "كريم" بخفة ظل وممازحًا
والده:

-ها يا بابا، مش أنت اللي أصريت
مارس يتعشى معنا؟ هتعشيه إيه بقى؟

ضحك "مارس" وهو يجلس مع "ديالا"
في أحد المطاعم المطلّة على النيل، بينما
كانت تقص عليه بحماس إنجازات
"إيمان" في المطبخ. قال بصعوبة من
شدة الضحك:

-أنا كنت مستغرب إزاي بيكلموها كده،
بس والله كتر خيرهم إنهم اتحملوا كل

اللي بتقوليه ده. بس، عارفة؟ حسيت
إنها زعلت.

ردت "ديالا" بحب ودفء تجاه عمتهما
التي تعتبرها أمها الثانية:

-عمتو عمرها ما زعلت مننا. هي دايماً
بتعاملنا كأننا ولادها، وإحنا كلنا بنحبها
أوي.

ابتسم "مارس" لها وقال: ربنا يخليكم
لبعض. المهم... أنتي عاملة إيه؟

ردت "ديالا" بابتسامة تعلقو وجهها،
وفرحة تصل عنان السماء:

-فرحانة أوي عشان تامر رجع. كنت
حاسة بالذنب إنه مشي بسببي، بس
الحمد لله، ربنا استجاب لدعوتي ورجع
بالسلامة.

قال "مارس" بنبرة يملؤها الحب
الصادق:

-أنا لو كنت أعرف إن وجوده هيفرحك
كده، كنت رجعت هولك من بدري. عارفة؟
تساءلت بخجل: إيه؟

نظر إلى وجهها المحبب لقلبه وقال
بصدق:

-من أول لحظة شفتك فيها، وأنا بتمنى
أكون سبب فرحتك. عارف إني مقصر
معاكي ومش بكلمك كثير بسبب الشغل...

قاطعته بتعجب: إزاي مقصر؟ أنت
بتكلمني كثير في اليوم! مرة تسألني
صليت؟ ومرة تتأكد إني كلت، وكل شوية
تبعثلي رسالة تقولي عامله إيه. يبقى
إزاي مقصر؟

رد "مارس" بإصرار: أنا حاسس إني
مقصر معاكي أوي ياست البنات، بس
والله الشغل هو السبب. عايز أخلص
بسرعة عشان يجمعنا بيت واحد.

سألت "ديالا" بهدوء: مش كنت بتقول
إن أخوك هو اللي هيجز الشقة؟

أجاب "مارس" بجديّة: أيوة، رغم إني
مكنتش موافق في الأول. بس رضيت
لما حسيت إن فارس زعل. بس خدي
هنا، أنتِ شايقة الكام ثانية اللي بكلمك
فيهم دول يتحسبوا كثير.

ضحكت "ديالا" بخفة على ضيقه، فقال
لها بنبرة مليئة بالحب:

- ضحكك حلوة زي شروق الشمس بعد
المطر. وأنا بحبك أوي على فكرة. ربنا
يديك ليا وميحرمنيش منك.

مرت الأيام سريعًا، ولم يتبقَّ سوى
أربعة أيام على المحاكمة. دفع ذلك
"جيهان" إلى المخاطرة والتسلل إلى
منزل المجني عليه، بحثًا عن أي دليل
يدين "علاء". بعد مراقبتها لها لعدة أيام،
لاحظت أنها تلتقي بصديقتها ومعها
شخص آخر لم تتعرف عليه. ومن خلال
تلك المراقبة، علمت أن جميع أفراد
العائلة في المشفى بسبب مرض والدة
"علاء".

تحركت "جيهان" بحذر داخل المنزل، تبحث عن غرفته لعلها تجد شيئاً يساهم في كشف الحقيقة. لكنها لم تتوقع أن يأتي أحد إلى المنزل في هذا الوقت. اختبأت خلف أحد الأبواب عندما سمعت صوت خطوات تقترب، فرأت رجلاً يصعد إلى الطابق العلوي. تبعته "جيهان" بحذر شديد حتى رآته يدخل إحدى الغرف.

اقتربت بخطوات خافتة، لتدرك أن هذه هي الغرفة المنشودة، فقد رآته يمسك صورة موضوعة على الكومود ويتحدث إليها بحزن. انتظرت بضع دقائق حتى غادر الغرفة، ثم تنفست الصعداء ورأت أنه هبط إلى الطابق السفلي.

دخلت "جيهان" الغرفة سريعًا وبدأت
تبحث بعناية في أرجائها. قلبت الأوراق
وفتشت الأدراج، لكنها فجأة تجمدت في
مكانها، وتمنت لو أن الأرض تنشق
وتبتلعها...

لقد هتف الرجل من خلفها بحدة: أنتِ
مين؟ وبتعملي إيه هنا؟!!

الفصل الخامس والثلاثون

"أجمل ما قيل في وصف الصديق؟"

الصداقة كالمظلة كلما اشتد المطر،
ازدادت الحاجة لها. صديقتي إذا كنتِ
ستعيش مئة عام، فإني أتمنى أن أعيش
مئة عام تنقص يوماً واحداً كي لا أضطر
للعيش من دونك. الصداقة لا تغيب مثلما
تغيب الشمس، الصداقة لا تذوب مثلما
يذوب الثلج، الصداقة لا تموت، إلا إذا
مات الحب. الصداقة هي الوردة الوحيدة
التي لا أشواك فيها."

ولجت "جيهان" إلى الغرفة ونظرت
حولها بعينين تائقتين، تحاول استغلال
كل لحظة لتقرر من أين تبدأ البحث.
اقتربت من الفراش ورفعت الوسادة،

لتجد تحتها صورة فتاة بلامح هادئة.
لكنها تجمدت مكانها، وكان الأرض
سحبها إلى أعماقها، حين سمعت صوت
رجل خلفها يهتف بحدة:

- أنت مين؟ وبتعملي إيه هنا؟

استدارت نحوه بثبات مصطنع وقالت:
أنا واحدة جاية تدور على براءتها.

كان الرجل يقف عند الباب، وعلى وجهه
علامات الغضب الممزوج بالدهشة.
اقترب منها بخطوات ثقيلة وقال:

- إزاي دخلت البيت من غير إذن صاحبه؟
ردت عليه بثقة تُحسد عليها، وهي ترفع
النقاب عن وجهها:

- اسمعني يا عم الحج. أولاً، أنا آسفة
على دخولي بيتك بالطريقة دي، بس

والله غصب عني. وثانيًا، أنا واحدة
ممكّن يتحكّم عليها بالإعدام ظلم، ومش
بس أنا، في ثلاثة غيري.

تأملها الرجل باندهاش، ثمّ تجهّم وجهه
وهو يتذكر. نعم، لقد رآها من قبل، أكثر
من مرة أثناء التحقيقات. قال بحنق:

-أنتِ واحدة من اللي قتلوا ابني. أنا هبلغ
الشرطة حالاً.

تحرك نحو الهاتف، لكنها أسرعّت
بالكلام بثبات: لو ابنك مكانك، مكنش
هيعمل كده.

توقف واستدار نحوها، متسائلاً: تقصدي
إيه؟

قالت وهي تقترب منه بحذر: اللي عرفته
عن ابنك إنه راجل بجد وعمره ما ظلم

حد. لكن أنت دلوقتي عايز تظلم ناس
بريئة.

بدت كلماتها وكأنها اخترقت قلبه. شعر
بحزن عميق على فقدانه لسنده الوحيد
في الحياة. حاولت مواساته بصدق:

- عارفة إنك موجه، وربنا يصبر قلبك
ويرحمه. بس احنا ملناش ذنب. لو
شايف إن عيلتك اتدمرت، ففي أربع
عائلات تانية ممكن تدمر ظلم. عارف
في واحدة فينا أبوها وأمها خلفوها بعد
عذاب، تخيل حضرتك، إحساس أبوها
وأمها لو خسروها.

صمتت للحظة عندما وجدته ينظر لها ثم
قالت:

- أنا متأكدة انك عايز حق ابنك، وأنا
كمان عاوزة أكون حرة واخرج من
التهمة دي، فـ ليه متساعدينش نرجع
حق ابنك سوى؟!!

تهد الرجل ثم قال بحزن: حق ابني
عندك.

جذبت "جيهان" المصحف الشريف من
على الكومود وقالت وهي تضع يدها
عليه:

- اقسملك بالله العظيم، إني لا أنا ولا
واحدة من اصحابي قتلته، احنا أصلا
منعرفش ابنك وده كان أول يوم نشوفه
فيه.

صمت الرجل للحظة، يتأمل وجهها
الواثق. أخيراً قال بحذر:

-إنت عايزة إيه؟

أجابت بلهفة: سييني أدور في الأوضة،
وكمان أوضة علا.

نظر لها بتوجس قائلاً: علا؟

أجابت بثبات: أنا عارفة إن اللي هقوله
ممکن ما تصدقوش، بس دي الحقيقة.
علا ليها علاقة باللي قتل علاء ابنك.

صاح بغضب: إنت اتجننت! بتتهمي
خطيبته إنها قتلتته؟

-كلامها صح يا عمي.

استدارت "جيهان" بسرعة نحو
الصوت. كانت صاحبة الصوت فتاة
نحيلة، طويلة القامة، ترتدي ملابس
الحداد. وجهها متعب وعيناها مليئتان
بالحزن، كأن الخريف أصاب قلبها.

أردف الرجل بغضب: أنتي بتقولي إيه يا
"صابرين"؟

تقدمت نحوه وقالت بحزن: أنا مش
هسيب حق علاء يا عمي. من كام يوم
كنت عند علاءشان مراتك كانت
عاوزاها. وقتها سمعتها بتتكلم في
التليفون. كانت بتتحسن على حد
وبتقوله إنه السبب، وإنها هتتصرف. لكن
لما هدها، قالت له إنها مش هتتصرف
لحد.

نظر الرجل إليها بدهشة، ثم حاول الدفاع
عن ابنة شقيقه:

-أكيد سمعتي غلط. وطبيعي تكون
زعلانة، علاء كان خطيبها.

صرخت؛ "صابرين" بجنون: هي ما
كانتش بتحبه! عشان تزعل عليه، وهي
وافقت عليه عشان تكسرني! وأنت
السبب يا عمي هو مكنش عايزها.

انهارت باكية، واقتربت منها "جيهان"
لتهديتها. بكت بوجع على حبيب حرمت
منه وهو حي، ولكنها كانت سعيدة أنه
بخير وامام عينيها، ولكن الآن اخذوه
منها بدون وجه حق، ربتت "جيهان"
عليها بحنو، فاعتدت "صابرين"
لتحتضن "جيهان" وهي تبكي.

أما هو فكان يعلم أنه أخطأ بحق ابنه/
لكن لا يعقل ان تكون ابنة أخيه من
فعلتها؟! ليقول بوجع:

-حقتك عليا أنتي وهو أنا عارف إني
ظلمتكم بس انا كنت عايز اخلي العيلة
كلها مع بعض.

ابتعدت عن "جيهان" وهي تمحي
دموعها، لتقول "جيهان" بصوت به
غصة بكاء:

-بالله عليك يا عم، سبني ادور على
الحقيقة.

بعد لحظات، اعتذرت "صابرين" وقالت
لـ"جيهان":

- تعالي دوري في أوضة علا الأول.
عشان هي كانت معايا وقالت إنها رايحة
تشتري حاجة وراجع.

قبل أن تتحرك، عادت الفتاة لتضع يد
عمها على المصحف قائلة:

-احلف يا عمي إنك مش هتقول لحد
دلوقتي. لو لقينا دليل، ما تخفوهش.

تتهد الرجل وأقسم، ثم تبعهم بنظرات
مليئة بالشك وهم يتجهون إلى غرفة
"علا".

قالت "بسملة" بقلق: تفتكروا الكلام
اللي قالته "جيهان" لـ دكتور "فارس"
يطلعنا من هنا؟

ردت عليها "دعاء" بهدوء: مش كفاية،
لأنها كلها استنتاجات ومفيش دليل
مادي. ربنا يستر.

أردفت "نور": بس على الأقل يأجل
القضية ويعيد التحقيقات تاني.

تحدثت "بسملة" بحزن: يأجل القضية
معناه إننا هنفضل هنا كثير.

ردت "نور" عليها: أحسن ما يتحكم
علينا.

قالت "بسملة" بياس وحزن: أنا تعبت.

اقتربت منها "نور"، جذبتها إلى حضنها
وربتت عليها بحنو بالغ، وهمست:

-اصبري يا "بسو". والله هنطلع من
هنا، وكل حاجة هتعددي. وبكرة نفتكر
الأيام دي ونضحك عليها.

بكت "بسملة" بين أحضان "نور" وهي
تهتف بقهر:

-نضحك؟ نضحك على إيه؟ على الذل
اللي إحنا فيه؟ ولا على الظلم اللي
اتعرضناله؟ بدل ما نفرح إننا خلاصنا

تعليم ونفكر في مستقبلنا، دلوقتي بنفكر
يا ترى هنطلع من هنا ولا لأ!

شاركتها "نور" البكاء ولم تستطع
التحدث. أما "دعاء" فقالت بقوة، بعدما
رأت انهيارهن بطريقة حطمت قلبها
وحاولت أن تكون قوية، إن لم يكن لأجل
نفسها، فلأجلهن:

-فوقي يا "بسمة"! إحنا هنطلع. مفيش
حاجة اسمها ولا. ده اختبار لقوة صبرنا
وإيماننا بالله. إنتي معنديش صبر؟ قال
تعالى:

{وَلَا تَيْأَسُوا مِنْ رَوْحِ اللَّهِ إِنَّهُ لَا يَيْأَسُ
مِنْ رَوْحِ اللَّهِ إِلَّا الْقَوْمُ الْكَافِرُونَ}

ربنا أخرج المياه من الحجر وأخرج
النار من الشجر الأخضر، وقادر يخرجنا

من هنا. كام مرة وقعنا في مشاكل
واتوقعنا إنها متحلش واتحلت بطريقة
غريبة؟ ماتياسيش يا "بسو". ربنا قال:
{سَيَجْعَلُ اللَّهُ بَعْدَ عُسْرٍ يُسْرًا}

{فَإِنَّ مَعَ الْعُسْرِ يُسْرًا}.

كلام ربنا ووعدده مش كفاية عشان
نصبر؟ ثقني في وعد ربك. سيدنا
"يوسف" عليه السلام اتسجن، ولما
طلع بقى عزيز مصر. متخفيش على
مستقبلك. ربنا عالم بيه. فيه آية دايماً
كنتي بتفكرينا بيها لما يحصل حاجة.
فاكرها؟

تسألتي "بسملة" باستفسار، ثم ردت
بخفوت:

-{لَا تَدْرِي لَعَلَّ اللَّهَ يُحْدِثُ بَعْدَ ذَلِكَ أَمْرًا}.

ربتت عليها "نور" وهي تهمس:

{وَاصْبِرْ لِحُكْمِ رَبِّكَ فَإِنَّكَ بِأَعْيُنِنَا}.

{لَا تَخَفْ وَلَا تَحْزَنْ إِنَّا مُنْجُواكَ وَأَهْلُكَ}.

اصبري يا "بسملة". رب الخير لا يأتي

إلا بالخير. خلي عندك يقين بفرج

ورحمة ربنا.

زاد بكاء "بسملة" وهي بين أحضان

"نور". لتربت "دعاء" عليها وتقول:

- خلاص يا "بسملة"، هانت. استحملي

شوية عشان خاطرنا.

ابتعدت "بسملة" عن "نور" وهي تقول

ببكاء:

- والله صابرة وراضية، بس أنا أول مرة

أعرض لكل ده.

ردت "نور" بهدوء: عارفين يا
"بسملة". بس هنعمل إيه؟ مفيش في
إيدينا غير إنا ندعي ونقول يارب.

هتفت "بسملة" و"دعاء" بإيمان:
يارب!

تدخلت "منار" بمرح، بعدما كانت
تجلس بجوارهن وتتصت لحدِيثهن
باهتمام:

-إيه ده؟ إنتوا طلعتوا نكد أوي يا عيال!

ردت عليها "نور" بضيق مصطنع:
عيال في عينك! قوليلي يا باشمخامية.

غمزت لها "منار" بمشاكسة: أنا عايزة
أقولك حاجة تانية بس خايفة تزعلي.

رفعت "نور" حاجبها باستفسار، لترد
"منار" بمزاح: يا رد سجون!

حدقت بها "نور" بشر، فضحكت
"منار" بشدة وهي تنهض، لتنهض
"نور" بدورها تريد الإمساك بها.
ركضت "منار" تحتמי بإحدى
المسجونات، بينما "نور" تلاحقها،
وتدخلت "دعاء" لتهديئة "نور"، لتقول
"منار" بمشاكسة: امسكيها يا "دعاء".

رد السجون دي!

التفتت "دعاء" إليها قائلة بتهديد
صريح:

- هسيبها عليك.

وبينما الجميع يضحك، عاد الجو مليئاً
بالمرح. تناسوا مؤقتاً همومهم، وجميع
من بالزنزانة ينظر إليهم بتعجب. أوقات
يبكون، وأوقات يضحكون، لكنهم دائماً

كانوا واحداً، مثل جدران الغرفة التي لا يمكن أن يترك أحدها الآخر. إلا أن هذه الغرفة ينقصها جدار غائب، لكنه مقيم دائماً في قلوبهم: "جيهان"، الجدار الغائب.

«هم من خرقوا قوانين الرياضيات، وجعلوا الأربعة تساوي واحداً، وسيظلون دائماً كذلك.»

بحثوا في غرفة "علا" ولم يجدوا شيئاً سوى بضع ورقات مدون بها اعتذارات كثيرة. تساءلت "جيهان" بدهشة:

- إيه ده؟ كل ده آسفه؟ هي بتتأسف لمين كده؟

ردت "صابرين" بحزن: أكيد ليه، لأنها ظلمته كثير.

أردفت "جيهان" بنبرة حازمة:

- "صابرين"، كده أنت الوحيدة اللي هتقدري تساعدينني. عايزاكي تجيبيلي تلفون "علا" عشان نعرف بتكلم مين ومين الشخص اللي بتقابله دايمًا.

هزت "صابرين" رأسها وقالت بثقة:
طب اديني رقمك عشان لو عرفت حاجة.
أخرجت "جيهان" الهاتف من الحقيبة الصغيرة التي ترتديها ثم وضعته على أذنها وقالت:

-دكتور، أنا هقفل وشوية ونازلة.

رد عليها بلهفة، فهو كان يتابع الحديث باهتمام:

- لا، متفليش غير لما تكوني قدامي.

أجابته بهدوء مطمئن: دقيقة والله،
ونازلة.

أغلقت معه، فتساءلت "صابرين"
باستغراب:

- أنتِ كنتِ بتكلمي حد؟

ابتسمت "جيهان" بحب لذلك الرجل
الذي ترك منزله لأجلها وقالت:

- ده خطيبي. كان معايا على الخط عشان
يكون مطمئن عليا، عشان مرضتش
أخليه يطلع.

أردفت "صابرين" بوجع: ربنا يخليكم
لبعض ويبعد عنكم الأنايين.

أمنت "جيهان" على دعائها، ثم أعطتها
الرقم، وخفضت النقاب، وتحركت معها

إلى باب الخروج. قبل أن تفتح الباب،

وجدت "علا" تدخل وسألتها باستغراب:

-مين دي يا "صابرين"؟

ردت "صابرين" باقتضاب وهي تبعتها

عن الباب:

- صاحبتي.

قالت "علا" بلامبالاة: أهلا.

تحركت "علا" لداخل، وهمست

"جيهان" بحذر:

- "صابرين"، اوعي عمك يقول لـ "علا"

حاجة.

ربتت "صابرين" على يدها لتطمئنها:

- اطمني، طالما حلف مستحيل يقول.

تحركت "جيهان" لتري "إبراهيم"
ينتظرها أمام المنزل. وقبل أن تسأل عن
سبب وقوفه، قال بعصبية واضحة:
- قفلي ليه المكالمة؟

ردت عليه بتفهم: كنت هديها الرقم
عشان مش حافظة. وبعدين متخفش، أنا
كويسة أهو.

سار معها جهة السيارة وقال بقلق:
إزاي وثقتي فيها بسرعة كده؟
ردت عليه بثقة: عشان شفت صورتها
في أوضة "علاء" الله يرحمه. وبتقول
إنها بتحبه وهو بيحبها، يبقى أكيد عايزة
تجيب حقه. وبعدين شكلها حزين قوي.

وصلا إلى السيارة، ففتح لها الباب
لتجلس، ثم استدار إلى جهة السائق
وركب، وسأل باهتمام:
- أنتِ كويسة؟

هزت رأسها بالنفي وتهدت: لأ، أنا
زعلانة عليها قوي. شكلها وهي بتعيط
وجع قلبي. هماليه عملوا كده؟ ليه
قتلوا؟ هو عملهم إيه؟ وحتى لو عمل،
مين عطاهم الحق يقتلوه؟ هما مقتلوش
شخص واحد، هما قتلوا عيلة كاملة.
حسبي الله ونعم الوكيل فيهم.

رد بهدوء يواسيها: ربنا يصبر قلبهم.
مع الوقت هينسوا.

نظرت له وقالت بنبرة حزينة: مفيش حد
بينسى. اللي بيموت بياخد أرواح اللي
بيحبوه معاه، فيسيبهم جسد بلا روح.
تتهّد بشرود، وكأنه يتذكر: معك حق،
مفيش حد بينسى.

ثم نظر إليها وسأل بتردد: لو أنا مكانه،
كنت هتزعلي كده؟
ردت بلهفة وضيق: بعد الشر عليك! إيه
اللي بتقوله ده؟

"في منزل فارس..."

أتى "مارس" برفقة "ديالا" إلى منزله
بعدما تصالح مع والدته، التي طلبت منه
أن يستضيف زوجته على العشاء.
جلسوا جميعًا يتناولون الطعام بصمت،

إلى أن قطعت والدته هذا الصمت عندما
سألت "ديالا":

-وأنتِ مدخلتِش ليه امتحانات الثانوية؟
ولا أنتِ من البنات اللي بتروح المدرسة
والجامعة عشان تدور على عريس وأول
ما تلاقيه تسيب الدراسة؟

نظرت "ديالا" إلى "مارس"، الذي رد
عنها:

- "ديالا" مش زي حد، أنا اللي طلبت
منها تأجلها للسنة الجاية، عشان السنة
دي كانت متعبة شوية.

ارتسمت ابتسامة ساخرة على وجهه
"روبين" وهي تقول:

-وناوية تدخل السنة الجاية ولا هيكون
عندها ظروف؟

رد "مارس" بهدوء وهو يربت على يد
"ديالا" التي تجلس بصمت وتنظر
للأرض:

-هي بدأت في الدروس بتاعتها.

تناولت "روبين" رشفة ماء وقالت
باستهزاء:

-هي القطعة كانت لسانها ولا وكاتك
المحامي بتاعها؟ وبعدين شكلها كده
أدبي ومالهاش في التعليم.

أردف "مارس" بثقة وفخر:

-لا يا ماما، "ديالا" بتدرس علمي
رياضة، وكانت طالعة من الأوائل في
أولى وتانية.

تدخل والده برفق وقال: ربنا يوفقك يا بنتي ويسعدكم في حياتكم اللي جاية ويبعد عنكم الشر.

نظر إلى زوجته وهو يقول جملته الأخيرة، ليخفي "مارس" ابتسامته بعدما رأى نظرات والديه لبعض. ثم قالت "روبين" بنبرة حادة:

- وأنت يا دكتور، معذمتش ليه مراتك ولا هي لسه مطلعتش من السجن؟

هذا هو السبب الذي جعل "روبين" تعود لمنزلها؛ فهي ظنت أن العدالة الإلهية أنقذتها من "دعاء"، تلك التي استولت على قلب وعقل ابنها. وظنت أن الزمن سيجعل ابنها يتركها، فلا يعقل أن يظل مرتبطاً بجريمة ورد سجون. والآن، أتى

دور تلك المخادعة التي تجلس أمامها
متصنعة البراءة.

تذكرت "روبين" شيئاً لتسأل: "منار"
من يوم ما سافرت وفونها مغلق،
محدث فيكم كلمها؟

توتر "فارس"، ورد "مارس": "وأنا
كمان حاولت أكلمها، كان مغلق، وبعثتها
على الواتس مش بترد.

قال "فارس" بتوتر وكذب: فونها نسيته
في أوضتها وجابت فون جديد ورننت
عليها عشان تظمنكم. هي مش حافظه
غير رقمي.

أردف "مارس" بتعجب: مش معقول!
إزاي نسيته رقمي؟ دي حافظه رقمي

القومي. غريبة. طب ابعتلي الرقم أو
خليها ترن عليا، عشان عايزها.

هز "فارس" رأسه ولم يجب. لاحظ
والده تغير حالته، لكنه لم يسأله
بوجودهم، وقرر أن ينتظر حتى تنتهي
الجلسة ليجلس معه على انفراد.

همس "مارس" لـ "ديالا": "حقك عليا
من أي كلمة قالتها وزعلتك. متزعليش
منها عشان خاطري.

ابتسمت له برقة وقالت بهمس مماثل:

- أنا مزعلتش منها، وحتى لو زعلت،
بعد كلامك ده زعلي اختفى.

غمز لها وقال بخفوت: أقولك ماما
اسمها إيه بس متضحكيش، لحسن
تطردنا من البيت.

ضحكت بخفوت وأشارت له برأسها أن يتحدث وهي تضع يدها على فمها. قال هو بخفوت وهو ينظر إلى والدته:

-اسمها "روحية"، بس برسيتها شاف إن الاسم ده بيئة، عشان كده غيرته وبقى "روبين". بس لو عرفت إنك عرفتني، هتقوم قيامتي وهترملي بدري.

انفلتت منها ضحكة خافتة على نبرته الحزينة المتأثرة بما يقول. ابتسم وهو يجذب يدها ويقبلها، ولم يهتم بوجودهم، فسعادته بضحكتها تساوي الدنيا.

في اليوم التالي، اتصلت "صابرين" بـ "جيهان" وأخبرتها أن هاتف "علا" معها، لكن لم تستطع فتحه لأنه مغلق

بكلمة سر، فطلبت منها أن يتقابلا ومعها الهاتف. وافقت "جيهان" لأن "علا" فقدت الوعي، وعندما طلبوا لها الطبيب، أعطاهم حقنة مهدئة ولن تفوق إلا بعد ساعات.

أغلقت معها، وبعد تفكير، تذكرت "جيهان" حديث "ديالا" عن شقيقها وأنه يستطيع فتح أي هاتف ويمكنه اختراقه من هاتفه، فقامت بالاتصال بـ "فارس" وأخبرته أنها تريد رقم "تامر". ولحسن الحظ كان معه، ولكنه تساءل لما تريده. فأخبرته ما حدث، وعندما أرسل الرقم، اتصلت به وأخبرته أنها تريد مقابلته ضروري بعدما عرفت أنه على نفسها. ورغم تعجبه أنها خارج

الحبس، لكنه وافق وقال إنه سيأتي فوراً.

وبعد مرور ساعة، جلسوا الشباب ومعهم "جيهان" ينتظرون "صابرين". ولم ينتظروا كثيراً، فقد أتت "صابرين" بعد دقائق قليلة، لتنهض "جيهان" وتصافحها وتقوم بتعريفها على الشباب، إشارة إلى "أشرف" وقالت: ده المقدم "أشرف"، جوز "نوره"، بنت عمتي، واحدة من المتهمين في القضية.

وأشارت إلى "فارس": وده الدكتور "فارس"، جوز "دعاء" صاحبتني ومتهمة زينا.

وأشارت إلى "إبراهيم": ده الدكتور "إبراهيم"، خطيبي.

وأشارت إلى "تامر": "وده البش مهندس
"تامر".

تمنى "تامر" أن تقول "خطيب"
صديقتي، ولكنها لم تفعل. جلسوا جميعاً
لتقول "صابرين":

- ده التلفون حاولت أفتحه بس
معرفة.

قال "تامر" بجدية: هاتيه لو سمحتي.

ناولته الهاتف، وبعد خمس دقائق ابتسم
وهو يقول:
- افتح.

هتفت "جيهان" بفرحة: بجد والله
بسرعة كده؟

ابتسم لها وهو يقول: خدي شوفي.

جذبت منه الهاتف وقامت بفتح تطبيق
"الواتس آب" لتجد أن آخر شخص
تحدثت معه مسجل بـ "My Love".
دخلت المحادثة لتقرأها بصمت فعلمت
أنه حبيبها، ولكن منذ موت "علاء"
بينهما مشاكل وحديث مبهم، ولكن
يوحى أنهم من فعلوها.

ومحادثة بينها وبين صديقتها، وعندما
فتحتها، رأت أن صديقتها تقوم
بتهديدها. أغلقت التطبيق وفتحت سجل
المكالمات فرات أن صديقتها تحدثها
باستمرار، وهناك رقم آخر غير مسجل
فظنت أنه رقم آخر لحبيبها. تنهدت
براحة وهي تقول: الحمد لله على كل
حال.

تسأل "أشرف": عرفتي إيه؟

ردت عليه وهي تقوم بالتقاط شاشة

للمكالمات ومحادثات الواتس:

-بتكلم واحد عن اللي حصل بطريقة غير

مباشرة، بس كل كلامهم يثبت إنهم اللي

قتلوه.

أستفسر "فارس": أنتي بتعملي إيه كده؟

أجابت بجديّة: بعمل اسكرين شوت

للحاجات المهمة وبعثتهم لدكتور عشان

عايزة كل الأدلة تكون معايا لما أسلم

نفسي.

ثم نظرت إلى "إبراهيم" وقالت: ممكن

التلفون يا دكتور؟

أعطاه لها على الفور فقامت بإرسال كل

الاسكرينات التي التقطتها ومحتهم من

هاتف "علا" لكي لا تعلم، ثم قالت لـ
"تامر":

-باشمهندس، "ديالا" قالت لي أنك تقدر
تربط جهازين ببعض بحيث أي حاجة
تحصل في ده توصل للتاني.

رد "تامر" بجديّة: أيوة أقدر، عايزة
تعلمي إيه؟

ناولته هاتف "إبراهيم" و"علا" وقالت:

-عايزة أتابع كل حرف بتكتبه "علا"
على تلفونها.

أخذ منها الهواتف ثم قام بتوصيلهم
ببعض، وبعد دقائق، أعطاهما هاتف
"إبراهيم" وقال:

-كده تمام. افتحى الواتس عندك هتلاقي حسابها هيا. هبعث رسالة لنفسى وشوفي هتظهر عندك ولا لا.

قام بإرسال الرسالة فوصلت لهاتفه وهاتف "إبراهيم". ابتسمت بفرحة:

-ألف شكر يا هندسة. مش عارفة بجد أقولك إيه.

زجرها "إبراهيم" بنظراته، ثم تسأل:

-بتفكري في إيه؟ وليه وصلتهم ببعض؟

ردت عليه وهي تنظر إلى "صابرين" الصامته منذ جاءت:

-هقولكم بس مش دلوقتي. دلوقتي عايزة أطلب من "صابرين" وكابتن "أشرف" حاجة.

نظر لها "أشرف" باهتمام: حاجة إيه؟

أردفت بجديّة: "صابرين"، بكرة
عايزكي تطلعي أنتي و"علا" تروحوا
أي مكان، وياريت لو مكان في زحمة.
وكابتن "أشرف"، أنت أكيد عارف ناس
كثير حرامية، فعائزة واحد يسرق شنطة
"علا" وهي ماشية مع "صابرين"،
وياريت يا "صابرين" يكون التلفون في
الشنطة عشان متشكش في حاجة.

-أنا كده مش فاهم، التلفون معك وخذتي
منه كل حاجة، ليه عائزة يتسرق؟
هذا ما تفوه به "أشرف" بضيق، لترد
بهدوء:

-هشرحلكم أنا بفكر في إيه، بس الأول
"صابرين"، هتقدري تطلعها ولا إيه؟

ردت عليها "صابرين" بشراً وغضب من
الحقيرة ابنة عمها:

-أكيد، وهبعتك رسالة أول ما أطلع من
البيت.

أخبرتهم "جيهان" خطتها وشاركها بها
"فارس"، فهو عدل لها الخطة لكي
تتجح وتنتهي هذه المعاناة.

مرت الأيام بسرعة البرق، وأتى اليوم
الذي انتظره الجميع بخوف وقلق ينهش
قلوبهم. اليوم يوم جلسة المحاكمة،
والجميع موجود عدا "إبراهيم"
و"جيهان".

وقفوا الفتيات بثبات خلف القضبان، وكل
منهن تقف أمامها عائلتها ينظرون

إليهن بحزن ويتحدثون بكلمات داعمة
لكي يطمئنوا، ولكن الفتيات، كل منهن
في عالم آخر، لم يستمعوا لهم. فتيات
صغيرات في بداية عمرهن يتعرضن
لكارثة مثل هذه، كان الله في العون.

صمت الجميع وعاد الكل يقف مكانه
عندما ولج الثلاثة قضاة خلف بعض إلى
القاعة. فتحدث كاتب المحكمة قائلاً
بصوت جهوري:

-محكمة.

وبعدها جلسوا لتبدأ الجلسة، ليهمس
"أشرف" إلى "فارس" الذي يجلس
بجواره بقلق:

-متعرفش "جيهان" راحت فين؟

رد عليه بحزن حاول إخفاءه: بعد الخطة
التي عملتها وفشلت وطلع الواد مسافر،
وهي قافلة التليفون، ولما كلمت
"إبراهيم" قال إنها مش هتسلم نفسها
غير لما تجيب دليل براعتهم.
قال "أشرف": أنا قلت للمحامي يطلب
تأجيل لأن الأدلة اللي معانا مش كافية.

رد "فارس" بثبات: أنا كلمت المحامين
قبل ما ندخل وقتلهم متأجلوش.

تسأل "أشرف" بتعجب: ليه؟

لم يستطع أن يرد عليه بسبب بداية
الجلسة، أنصت الجميع بتركيز لرد
المحامي. وبعد انتهائه، جلس، لتقول
"نور" بصوت عالي:

-لو سمحت يا سيادة القاضي، أنا عايزة أتكلم.

سمح لها بالحديث لتقول: الرسول ﷺ قال: "أن يُخْطِئَ الإمام في العفو، خيرٌ من أن يُخْطِئَ في العقوبة". وسيدنا عمر بن الخطاب رَضِيَ اللهُ عَنْهُ قال:

"لأن يفلت ألف مجرم من العقاب خير من أن يُدان بريء واحد".

واحنا مش بريء واحد، احنا أربعة متهمين ظلم. يمكن الأدلة كلها ضدنا، بس الحكومة مش بتشوف شغلها كويس، استكفت باللي قدامها ومهماش إذا كان الشخص ده مظلوم ولا لأ. احنا أول مرة نشوفه، معقول نقتله من غير سبب؟ صح، السكين عليها بصمات

"جيهان" و"بسملة"، بس إليه الدافع
اللي يخليهم يقتلوه؟ مفيش، لأن احنا ما
نعرفوش وهو ما عملناش حاجة.

أخذت نفساً عميقاً وقالت: يا سيادة
القاضي، المتهم الحقيقي بره واحنا
بنتحاسب على ذنب ما ارتكبناهش.
عشان كده، أنا بطلب تأجيل الحكم.

تشاور القاضي مع القضاة ثم قال: تأجل
الق...

-استنى يا سيادة القاضي.

ولجت لداخل بلهفة، فنظر لها الجميع
بصدمة من وجود نسختين من
"جيهان". أما من يعرف، كان يشعر
بالراحة، لكن القاضي ظن أنها شقيقتها،
لذلك قال:

- أنتي مين؟

تحركت بسرعة ووقفت في الأمام وهي
تقول بثبات:

- أنا "جيهان عثمان"، واحدة من
المتهمين في جريمة قتل "علاء
حسين".

صُعِقَ الجميع مما قالت، ونظروا لمن
تقبع خلف القضبان بعدم فهم.

الفصل السادس والثلاثون

من أجمل رسائل الحب:

من الأديب الرّافعي إلى الأديبة ميّ
زيادة:

لو رأيتني، وأنا أقرأ رسائلكِ لرأيتِ أنكِ
لا تكتبين لي كلامًا.. بل تزرعين في
الورق زهر أنفاسكِ فيأتيني فأقرأه..

-استنى يا سيادة القاضي.

ولجت لداخل بلهفة، فنظر لها الجميع
بصدمة من وجود نسختين من
"جيهان". أما من يعرف، كان يشعر
بالراحة، لكن القاضي ظن أنها شقيقتها،
لذلك قال:

- أنتي مين؟

تحركت بسرعة ووقفت في الأمام، وهي تقول بثبات:

-أنا "جيهان عثمان"، واحدة من المتهمين في جريمة قتل "علاء حسين".

صُعِقَ الجميع مما قالت، ونظروا لمن تقبع خلف القضبان بعدم فهم. لتتظر "جيهان" إلى "منار" التي رفعت الماسك من على وجهها، ليحرق بها "مارس" بصدمة، ثم نظر إلى "فارس" الذي أخفض نظره بخرج من أخيه، لتقول "جيهان" بجدية:

-إحنا اتعودنا إننا نقدر الصداقة اللي بينا ونحمي بعض حتى لو هنعرض حياتنا للخطر، و"منار" صحبتي ضحت

بنفسها وقبلت إنها تتحبس مكاني عشان
أقدر أهرب وأدور على دليل براءتي.
فهي مالهاش دعوة باللي أنا عملته، ولو
في عقاب لازم يتفند، يبقى يتفند عليا
لأن مفيش حد فيهم يعرف إني هربت.

أردفت "بسملة" بصوت عالٍ: كدابة يا
سيادة القاضي، كنا عارفين، ولو فيه
عقاب يبقى نتحملة كنا.

زجرتها "جيهان" بحدة، وهي تهتف:

-متخليش حد فيهم يقاطعني يا سيادة
القاضي، أنا جاية أسلم نفسي وقابلة بأي
عقاب.

تدخل محامي الخصم قائلاً: اعتراض
عدالتكم، هذه المتهمه احتالت على
الشرطة وقامت بالهروب.

وقف محامي الدفاع قائلاً: أرجو من
عدالة المحكمة أن تسمح لموكلي
بالحديث.

قال القاضي: اعتراضك مرفوض.

وأشار لـ "جيهان" أن تحدث، لتقول
بجدية:

- يا سيادة القاضي، إحنا كنا رايعين
نشترى لبس التخرج، ولما دخلنا لقينا
زميلتنا 'علا' في بين خلافات فتخنقنا
ومشينا. وبعديها رجعنا تاني، ولما دخلنا
المحل لقينا 'علاء' مقتول. ولما شوفته
بيتوجع، قربت منه وشلت السكنينة من
بطنه، ولأني من الصدمة مكنتش في
وعيي عطيتها لـ 'بسملة'، وده سبب
وجود البصمات على سلاح الجريمة.

وفي الوقت اللي قربت منه، سمعته
بيقول اسم 'علا'. وقتها بسبب الصدمة
مركزتش. وبعدها طلعتنا من المحل وإحنا
خايفين، والكاميرات اللي في الشارع
جابتنا وإحنا بنمشي بسرعة، وده الدليل
التاني اللي بسببه بقينا المتهمين في
الجريمة.

أخذت نفساً لتهداً، ثم قالت: بس أنا معايا
دليل براءتنا.

قدمت للقاضي ملفاً به ورقاً وقالت: دي
اسكريبات أنا أخذتها من تليفون 'علا'
وطبعتهم. دي محادثات بينها وبين
صاحبته وحببها بيتكلموا فيها إنهم
اللي قتلوا 'علاء'.

وقفت "علا" تقول بزعر وخوف بلغ
منها مبلغاً:

-يا سيادة القاضي، أنا تليفوني ضاع،
وعيلتي كلها عارفة.

ردت "جيهان" بثبات: فعلاً يا سيادة
القاضي، لأن تليفونها معايا.

وأخرجت الهاتف وفتحته على المحادثة،
وقدمته للقاضي وقالت:

- "دلوقتي ممكن يتقال إني أنا اللي كنت
بكلم المجرم، بس لو حضرتك بصيت
على التاريخ هتلاقي إن المحادثات
بتاريخ قديم قبل ما يضيع تليفونها. بس
خلينا مثلاً نقول إني ذكية وعدلت
المحادثة وإن كله مزور، بس أكيد مش
هقدر أزور صوتها.

(وقامت بتشغيل تسجيل صوتي لـ "علا"

وهي تقول:

- "حسبي الله ونعم الوكيل فيك ياخي،

بسببك ابن عمي مات وكم ان

بتهددني."

ظهرت ابتسامة على وجه الفتيات،

و"أشرف" و"فارس" نطقا بخفوت:

- الحمد لله.

أما "إبراهيم" فكان ينصت لها بفخر

وحب خالص، لتقول "جيهان" بثبات

وقوة وهي تفتح هاتف "إبراهيم" على

معرض الصور:

-ده مش بس الدليل. في أدلة تانية،

الصور دي أنا صورتهاها وهي قاعدة

معهم، "نرمين" صاحبها، والشخص
القاتل، والي هو "أحمد محي".

رد محامي الخصم: وجودها مع
أصحابها في مكان عام مش دليل إنهم
اللي قتلوا.

نظرت للمحامي وقالت: معك حق، بس
يا ترى كانوا يقولوا إيه؟

صمتت وعبثت في الهاتف لثوانٍ، ثم
قامت بتشغيل فيديو وهتفت:

-الفيديو ده متصور من ساعتين.

(في الفيديو كانت تجلس "علا" برفقة
"نرمين" وحبیبها يتشاجرون، إلى أن
أتت "جيهان" وقامت باستفزازهم ببرود
ليعتبرف "أحمد" بالحقيقة ويهدد
"جيهان" صراحةً.)

قال محامي الخصم: الفيديو ده ملوش قيمة لأنه بدون إذن نيابة.

اتسعت ابتسامة "جيهان" وهي تهتف ببرود أثناء تحركها جهة القاضي لتعطيه إذن النيابة:

-أمال أنا اتأخرت ليه لحد دلوقتي؟

عانقت "دعاء" "بسمة" و"نور" بفرحة ليس لها حدود، لتقول "جيهان":

-قاعد دليل واحد، بطلب من سيادتك تسمح للشاهدة 'صابرين حافظ'.

سمح لها بذلك، لتنهض "صابرين" وتقف في منصة الشهود وتضع يدها على كتاب الله وتقول:

-أقسم بالله العظيم أن أقول الحقيقة ولا شيء غير الحقيقة.

وقفت "جيهان" أمامها وهي تقول:
احكي لنا يا 'صابرين' حالة 'علا' من
يوم ماتت 'علاء'، وإيه اللي شوفتیه
واللي سمعتیه؟

أردفت "صابرين" بهدوء رغم نبرتها
الحزينة:

- 'علا' بنت عمي، ومن يوم ماتت
'علاء' وهي متغيرة، دائماً خائفة
ومتوترة ومش بتكلم حد. وكم ان كنت
رايحة أنادم عليها مرة وسمعتها بتكلم
حد وبتتخسب فيه، والنهاردة الصبح
سمعتها بتكلم في التليفون فسجلت لها.
وقامت بتشغيل التسجيل ليصاح صوت
"علا" وهي تقول:

- "أنا مليش دعوة، أنت اللي ضربته بالسكين، و"نرمين" هي اللي مسحت الأدلة... صمتت للحظات، ثم قالت: مش بسببي، أنت اللي اتعصبت وضربتوا."

انتهى التسجيل لتقول "جيهان": شكراً يا 'صابرين'. كده أنا ما عنديش حاجة تانية أقولها. كده يا سيادة القاضي، عرفت إنني مهربتش عشان عايزة أهرب، أنا هربت عشان كان لازم أهرب وأدور على براءتي بنفسي.

صمتت وصمتت من في القاعة، ينتظر اللحظة الحاسمة، ليقول القاضي بعد دقائق من المشاورة:

-بعد الاطلاع على كافة الأوراق والمستندات في قضية رقم **، قررنا

نحن إلقاء القبض على المتهمين "أحمد محي" و"علا حامد"، و"نرمين السيد" لإعادة التحقيق في القضية.

وبراءة المتهمات "بسمة علي"، و"نور المهدي"، و"دعاء مصطفى"، و"جيهان عثمان" من التهمة المنسوبة إليهن، ويفرج عنهن إن لم يكنّ مطلوبات على ذمة قضايا أخرى.

حمدوا الله بصوت مسموع، ولكن انتظروا بترقب وخوف أن تعاقب "جيهان" بسبب هروبها، ليقول القاضي:

-ويحكم على المتهمة 'جيهان عثمان' بغرامة مالية قدرها ****.

أطلقت "نور" صوتًا صاخبًا "زغرودة"
بسعادة بالغة، وحمدت الله كثيرًا.

غادر القضاة لتقترب "صابرين" من
"علا" وتصفعها على وجهها بكل قوتها
وهي تهتف بقهر:

-ربنا ينتقم منك زي ما حرمتيني منه.

وبصقت في وجهها، واقتربت من
"جيهان" وعانقتها، ثم غادرت. وغادر
الجميع منهم حزين ويشعر بالهزيمة،
ومنهم سعيد كسعادة الأطفال ليلة العيد.
وتم القبض على "علا"، ووضعت
الأصفاة في يد "جيهان" ليتم خروجها
من النيابة العامة، وأثناء خروجها بحثت
عنه بعينيها فوجدته يبتسم لها. أبتسمت
له وغادرت.

احتضن "إبراهيم" "أشرف"، واحتضن

"فارس" أخيه الذي تساءل بحدة:

- أنت حبست أختك عشان مراتك؟

ابتعد "فارس" عنه وقال متفهماً سبب

غضبه:

- أنا ما حبستش أختي عشان مراتي،

أختي عملت كده عشان صاحببتها.

"منار" لما عرفت، جات تشوفهم من

غير ما تقول لحد، ووقتها سمعت الخطة

اللي كان "أشرف" عاملها عشان

"جيهان" تهرب. راحت "منار" ودخلت

وقالت إنها تكون مكان "جيهان". ولأن

طولهم واحد، أنا ما كنتش موافق، بس

هي اللي أصرت.

قال "مارس" بنبرة أهدأ من السابق:
أنت عارف لو ماما وبابا عرفوا هيحصل
إيه؟

رد "فارس" بهدوء: بابا عارف، لكن
أوعى تقول لماما.

تعجب "مارس" من معرفة والده أن
شقيقته مسجونة مكان رفيقتها، لكنه لم
يتحدث لكي لا يزعج شقيقه الذي تلمع
عيونه كالنجوم.

وعلى بُعد بسيط منهم، سجد "تامر" لله
بعدهما نطق القاضي بالحكم، ولم يهتم
بوجود أحد، وحمد الله أن معشوقته تمت
تبرئتها. وقد لاحظت "بسملة" فعلته تلك
وخفق قلبها بجنون.

خرج الجميع؛ منهم من عاد إلى منزله،
ومنهم من ذهب إلى المركز ينتظر
خروج الفتيات.

مرت أكثر من خمسة ساعات، ودفعت
"أشرف" الغرامة، رغم أن "إبراهيم"
و"عثمان" أرادوا دفعها، لكنه اعترض
وقام هو بدفعها. خرجت الفتيات خلف
بعض، وأول خطوة خطوها خارج
المركز عانقوا بعضًا بفرحة كبرى،
وصدحت ضحكاتهم بعدم تصديق، كأنهم
لم يصدقوا أنهم خرجوا من ذلك المكان.

ابتعدوا عن بعض لتقول "دعاء":

-شوفتوا بقي؟ أهى عدت على خير. يلا
اشكروني إني اخترت "جيهان" عشان
تهرب.

ردت "جيهان" بزهو: شفتوني يا عيال
وأنا بدافع عنكم؟ أنا كده بقيت محامية
رسمي فهمي نظمي.

هتفت "بسملة" بمرح: أيوة يا بنت يا
جيجي، كنت جامدة.

تساءلت "نور": "أشرف" قال إن الواد
اللي قتل سافر. صورتهم إزاي؟
شردت "جيهان" فيما حدث.

Flashback

كانت تجلس بحزن وبجوارها تجلس
"حنان"، التي اتصلت بأخيها تخبره أن
"جيهان" حزينه بشدة وترفض تناول
الطعام ولا تتحدث، فأخبرها أنه سيأتي.
وبعد مرور ساعة أتى وجلس أمامها
يتساءل بحنان:

- عاملة في نفسك كده ليه يا "جيهان"؟

رفعت رأسها له وقالت بحزن:

- كل حاجة انتهت. هو سافر، وإحنا

هنتحمل جريمته، وبعد كام ساعة

هيتحكم علينا.

رد بهدوء: تفكيري إن ده ممكن يحصل

وأنا موجود؟

نظرت له بتساؤل ليقول وهو ينهض:

- البت "حنان" من امبارح ترن عليا

عشان عاوزه بيتزا، فأنا جيت لينا معها.

يلا ناكل، وبعدين هقولك.

ورغم أنها لم تكن تشتهي تناول شيء،

لكنها رضخت له أمام إصراره. وبعد

الأكل قال:

-إحنا عرفنا إنه سافر من الرسالة اللي
بعثها لها. ليه صدقتِ ولغيتي كل حاجة؟
ردت بيأس: لأن كل حاجة مترتبة على
وجوده. طالما هو مش هنا، يبقى
خلاص.

تساءل: وليه ما يكونش بيكذب عليها؟
نظرت له بتساؤل ليقول: هو فعلاً بيكذب
عليها. المهم، أنا خليت "حنان" تكلم
"صابرين" من تليفونك وتقولها إنها
تطلع مع "علا". وبعدها كلمت الشخص
اللي كان متفق معاه "أشرف"، وقلت له
يروح يسرق الشنطة من المكان اللي
قالت عليه "صابرين". وبعدها خليت
"تامر" يفتح التليفون بتاع "علا"
ويبعث له رسالة يهدده فيها إنه ما جاش

في المكان ده بعد ساعتين، هيباغ الشرطة. بعد ثواني رد وقال لها ماشي. و"تامر" بعث رسالة لصاحبها وقالها تيجي تقابلها، والتانية وافقت. وأنا قبل ما أجي كلمت "صابرين" وقلت لها تاخد "علا" على المطعم بحجة إنها تعبت وعايزة تأكل، وبعدين تسببها وتمشي. ودلوقتي قومي البسي عشان الخطوة الأخيرة لازم تعملها أنت.

نظرت له بامتنان وكادت أن تتحدث، لكنه قال:

- سيبك من شكرًا والكلام الفاضي بتاعك. يلا عشان ما نتأخرش.

وبالفعل تحركوا اتجاه المطعم ووقف "إبراهيم" على مقربة منهم لكي

يسـتطيع أن يصـورهم. وتحركت
"جيهان" اتجاه موضع جلوسهم، وبعد
مناقشات حادة اعترف الفتى بالحقيقة،
وهو يسخر من "جيهان" وقام بتهديدها
أنه إن تجرأت ونطقت اسمه ستكون
نهايتها.

Back

تساءلت "بسمة": طب ليه اتأخرتوا
كده؟ "علا" موجودة من أول الجلسة.
ردت "جيهان": عشان كان لازم ناخذ
إذن نيابة عشان تسجل الفيديو.
واتصلنا بـ "أشرف" ما كانش بيرد،
والدكتور "فارس" تليفونه مقفول،
فحاول "إبراهيم" وكلم كذا حد لغاية ما
قدر يجيبه، وبعدها جيت على طول.

نظرت "جيهان" لـ "منار" بامتنان
واردفت ببسمة:

-مش عارفة أقولك إيه؟ لأن مفيش كلام
يعبر عن اللي عملتيه، الف شكر بجد،
أنتي أجدع صاحبه في الدنيا، ومحظوظ
اللي في حياته واحدة زيك.

عانقتها "منار" بحب وقالت بمرح:
مفيش شكر بين الصحاب يا عسلية.
وكذلك أقتربت منهن الفتيات وتعانقوا
بحب وهم يشكرون "منار" على ما
فعلت.

أردف "أشرف" حينما وجدهم لن
يصمتوا ولم يتحركوا من أمام المركز:
- يلا نروح. أنتم أكيد تعبانيين ومحتاجين
ترتاحوا شوية، وبعدين اتكلموا براحتكم.

وافقوا جميعًا وصعدت "بسملة" سيارة
والدها بعدما ودعتهم، ثم صعدت
"دعاء" سيارة "فارس" وجلس والدها
في الأمام وهي في الخلف وقاد "فارس"
السيارة. وصعدت "منار" التاكس مع
"مارس"، وكذلك فعلت "جيهان"،
جلست في سيارة "إبراهيم" في المقعد
الخلفي، ووالدها في الأمام، ورحلت
السيارة. لتتنظر "نور" في آثارهم
وقالت:

-أنا مش هقعد من وراء، بابا و"محمد"
يقعدوا وراء، وأنا هقعد جنب "أشرف".
هتف "محمد" من بين اصطكاك أسنانه:
-أبوكي هيقعد قدام، وأنتِ هتترزعي
معايا وراء.

رفضت ذلك ليقول والدها بقلة حيلة:
- خلاص يا "محمد"، سيبها براحتها.
صفتت بفرحة وفتحت باب السيارة
وجلست بجوار "أشرف"، الذي نظر
لوالدها بخرج من أفعالها.

"في منزل بسملة"

كانت "حورية" تجلس بفارغ الصبر
تنتظر ابنتها بعدما أصر زوجها أن تعود
للمنزل وهو سيتهي إجراءات خروجها
وسيأتي بها. وعندما أنصتت لصوت فتح
الباب، ركضت بلهفة، وأول ما وقعت
عيناها على ابنتها، عانقتها بشدة وبكت
باشتياق وحزن لما مرت به صغيرتها.
ربتت "بسملة" على ظهرها وقالت:

-خلاص يا ماما، أنا زي الفل أهو،
مفيش حاجة. ولا انتي بتعيطي عشان
مجهزتيش أكل؟

ختمت حديثها بمرح، فابتعدت عنها
والدتها ثم قبلت جبينها وقالت:

-روحي يا حبيبتي خدي دش وتعال
أكون سخنت الأكل.

تركهم "بسملة" واتجهت لغرفتها،
وأول ما دخلت تسطحت على الفراش،
وانطلقت ضحكاتها بفرحة لا تُوصف.
هو أتى من السفر لأجلها، وأهدى لها
هدية كانت تتمنى أن تحصل عليها منذ
زمن. ووالدها عاد من سفره وترك
عمله وأتى لأجلها. و"دعاء" اعترفت
على نفسها من أجلها. و"جيهان"

خاطرت بحياتها لأجلها. و"نور" كانت طوال الوقت تشاكسها وتعانقها وتربت عليها كأنها والدتها، وفعلت كل ما بوسعها لكي تهون عليها رغم أنها تمر بنفس الظروف. أطلقت "دعاء" على "نور" لقب "البهلوان" بسبب ما تفعله لأجلها. فهل يعقل أن تحزن بعد كل هذا؟

قامت بأخذ دش دافئ وارتدت بيجامة باللون الأزرق، ثم ربطت شعرها كذيل حصان ووضعت العطر لتتزع من ذاكرتها رائحة الزنزانة الكريهة. غادرت الغرفة وبحثت عن والدها، فوجدته يجلس أمام التلفاز. وعندما رآها فتح ذراعيه لها، فتحركت نحوه واستكانت بين أحضانه وهتفت بحب:

-أنا بحبكم أوي يا بابا.

رد "علي" وهو يعبث في شعرها: وأنا
ماليش غيرك يا عز أبوكي.

استكانت بين ذراعيه إلى أن أتت
"حورية" وأخبرتهم أن الطعام جاهز.
ذهبوا معها لتناول الطعام، وكانت
"حورية" تطعم "بسملة" بيديها. وبين
الحين والآخر كانت تجذبها وتقبل جبينها
وتهمس:

-الحمد لله.

بعد انتهاء وجبة العشاء عادوا للجلوس
أمام التلفاز، ليقول "علي":

-عايز أتكلم معك في موضوع مهم يا
"بسملة".

اعتدلت "بسملة"، التي كانت تجلس في
أحضان "حورية":

-خير يا بابا؟ موضوع إيه؟

ابتسم لها كي تطمئن وقال بطريقة
مباشرة:

- "تامر".

اسمه جعل قلبها يخفق بعنف، لكنها
قالت بثبات:

-ماله؟

رد "علي" بنبرة هادئة: كلمني تاني
عنكٍ وحكالي السبب اللي مخليك مش
موافقة عليه. كلنا يا حبيبتى بنغلط،
مفيش حد معصوم من الغلط. وهو
عارف غلطته وندمان، واتغير عشانك.
وقال إنه مستعد يعمل أي حاجة عشان

توافقي. كده الراجل عمل أكثر من اللي عليه. أنا مش عايزك تندمي وتضيعي حد بيحبك بجد.

لا أحد يفهم ما تفكر به. هي تخشى أن تعطيه فرصة فيعود بعدها كما كان. هي لن تسمح أن يخونها أو يكسر قلبها. لذلك قالت:

-يا بابا، أنت مش فاهم أنا...

صمتت ولم تستطع أن تشرح له وجهة نظرها. فقال "علي" برفق:

-أنا فاهم إنك خايفة إنه يخونك، وأنا مستحيل أسمح لحد إنه يوجع بنتي الوحيدة. بس هو فعلاً اتغير. اسألني "جيهان" هو ساعدها إزاي عشانك. كمان كان كل ما يعرف حاجة منهم،

يتصل يطمني. أنتي ما قولتيش إن
"جيهان" هربت، بس هو قالي. أنا
عمري ما هخصبكِ على حاجة وأنتِ
عارفة. فكري يا حبيبتِي واستخيري
ربنا، والي أنتي عايزاه هيحصل.
اقتربت منه وعانقتَه وهي تفكر: ماذا
تفعل الآن؟

"في منزل نور"
دخلت "نور" المنزل وهي تصيح بصوت
عالٍ:
-يا قوم، أنتم فين؟
زجرها "محمد" وهو يهتف بغضب: يا
بت، اعقلي شوية، الله ياخدك! جوزك
معانا هيقول عليكِ إيه؟

ضحك "أشرف" وهو يربت على كتف
"محمد":

-مجنونة، ما تقلقش، أنا عارف. المهم،
همشي أنا وأجي بكرة أشوفها عشان
هي محتاجة ترتاح شوية.

قبل أن يرد عليه "محمد"، تفاجأ من
ركض "نور" لداخل. تحركوا خلفها
بتعجب من فعلتها تلك، فوجدوها تقف
أمام التلفاز، وتحرك يديها في الهواء،
وترقص على أغنية "المبي". كانت قد
ركضت عندما سمعت صوت الأغنية
التي تصدح في المنزل. جذبت يد شقيقها
لكي يرقص معها وهي تغني:

-طالع خلاص بكرة براءة...

هنام وهصحى على رواقه...

من بكرة همشي في أي طريق...

وبراحتي وبكل جرأة...

راجع لبيتي ولسريري...

راجع لفوطي ولبشكيري...

وهنط جوه التلاجة...

شاركها شقيقها الرقص، بينما والدهم

يضرب كفاً بكف بيأس وهو يقول:

-عوض عليا يا رب، عوض الصابرين.

لم يستطع "أشرف" التحكم في صوت

ضحكاته الرنانة، فقال بأسف بعدما

توقف عن الضحك:

-أنا أسف يا عمي، بس معلش، اتحملها

لحد ما أخذها بيتي.

نظر له "المهدي" بشفقة وقال: أنا اللي
أسف يا بني على البلاء اللي هتاخده.
ربنا يصبرك.

ابتسم "أشرف" وقال: بس بلاء حلو
ودمه خفيف.

تتحنح بخرج عندما رأى نظرات
"المهدي"، وقال:

-أنا همشي، وابقى قلها تفتح تليفونها
عشان أطمئن عليها.

قال حديثه وغادر، لتتظر "نور" في
أثره بتعجب بعدما انتهت الأغنية وسألت
والدها:

-هو "أشرف" مشي ليه من غير ما
يسلم عليا؟

نظر لها بحاجب مرفوع وقال بسخرية:

-معلش، كان عندك نمرة ومرضيش
يعطلك.

ثم هتف بعصبية: بالذمة، في واحدة
محترمة تعمل كده؟

أجابت بمرح: مش أنا عملت يبقى فيه!
وبعدين مالك يا "ميمو"؟ بفرفشكم، هو
فيه حد بيدلعم غيري؟

ضحك "المهدي" بقلّة حيلة، وجذبها
لأحضانه وقال:

-الحمد لله أنك مش هتقعدي عندنا كثير.
أنا راجل كبير ومش حمل يجني نقطة
بسببك.

"في منزل دعاء"

ولجوا للمنزل، وطلب "مصطفى" من
"فارس" أن يتناول معهم العشاء، لكنه
رفض بلباقة:

-معلش يا عمي، "دعاء" تعبانة وأكيد
محتاجة ترتاح. همشي دلوقتي، وأبقى
أجيبها بكرة.

دخل "مصطفى" إلى الداخل وتركه مع
"دعاء" لتوصله للباب. وعندما غادر،
جذبها "فارس" إلى أحضانه وهو يهتف
بشوق:

-وحشتيني أوي يا حبيبتي.
ابتسمت وهي تبادلته العناق، وردت عليه
بخجل طفيف:

-وأنت كمان وحشتني.

ابتعد عنها وقبّل وجنتها قبله سريرة،
ليزداد خجلها، ثم قال:

-افتحي تليفونك عشان أطمئن عليك،
ونامي شوية. أول ما تصحي، رني
عليّ، أيّا كان الوقت، عشان عايز أتكلم
معك. أنتي وحشتيني أوي.

تحرك لكي يغادر، لكنه توقف عندما
سمع صوتها تقول بخجل:
-أنا بحبك أوي يا "فارس".

عاد يعانقها وهتف وهو يشدد عنقه
لها:

-وأنتي حبيبة قلب "فارس" وحياته
كلها.

"في منزل جيهان"

وصلوا أمام المنزل، ووقف "عثمان" يشكر "إبراهيم" بعدما قص له ما حدث وأخبره أن "جيهان" كانت تجلس مع شقيقته، فهو ترك المنزل منذ جاءت. كان "عثمان" غاضباً مما حدث، وظن أن ابنته كانت تقيم في منزل رجل غريب. فشرح له "إبراهيم" كل شيء وأقسم له أن في كل مرة تحدث معها، كانت شقيقته تجلس بينهم ولم يحدث أن تحدث معها بمفرده أبداً.

قال "إبراهيم" باحترام: مفيش داعي للشكر، ده واجبي. عن إذنكم.

لكن "جيهان" ردت عليه بهدوء: بجد شكراً على كل حاجة عملتها.

ابتسم لها، وقبل أن يرد، صدح صوت
هاتفه برنة جعلت ابتسامته تتلاشى:

- "سو يا سو حبيبي حبسوه

سو يا سو حبيبي حبسوه

حبيبي عايز له ترتر، منين أجيب له
ترتر

ده حبيبي عايز له ترتر، منين أجيب له
ترتر

ده الواد بيع التتر حبسوني وحبسوه"

نظر له "عثمان" بصدمة، وهو يفكر:
هل يعقل أن يضع تلك الرنة الساخرة؟
فهو شخص جاد، هادئ، محترم، ولا
تليق به تلك النعمة. بل للحق، لا تليق
النعمة حتى بمن وضعتها.

حدقت به "جيهان" ببسمة، وتساءل
"إبراهيم" بعينه دون أن ينطق، لترد
عليه بابتسامة متسعة وهي تهتف:
-إيه رأيك؟ لايقة على الموقف، صح؟
شعر والداها الآن بالراحة؛ فهذا جنون
ابنته. أما "إبراهيم"، فاكتفى بابتسامة
واستأذن منهم ورحل.

في الزنزانة، كانت تجلس "علا" تفكر
في ذلك اليوم المشؤوم.

Flashback

بعدها غادرت الفتيات، صاحت "علا"
بغضب:

-أنت بتطردني من هنا عشان دول؟
رد عليها "علاء" بغضب مماثل:

-دول أنا معرفهمش وممش فارقلي
أعرفهم، لكن ده رزق وجايلى لحد
عندي، أقول لأ عشان خاطر عيونك؟
في تلك اللحظة، دخلت "نرمين" برفقة
"أحمد"، وهي تقول ببرود:

-أيوة، قوله لأ عشان خاطر عيونها.
حذق "علاء" في وجه "علا" بغضب
وقال بضيق:

-خدي أصحابك واطلعي برة يا "علا".
أنا لحد دلوقتي عامل حساب عمي، لكن
لو محترمتيش نفسك وقطعتي علاقتك
بالمحترم اللي واقف، وفكراني ممش
عارف، هخليكي تندمي. دي آخر فرصة
بديهاك.

جلس "علاء" على المقعد ببرود بينما
تشتعل النيران داخله. أبيه حرمه من
حبيبته وأجبره على الارتباط بفتاة كهذه.
ولولا دماء عمه التي تسير في عروقها،
لكان أنهى عليها.

تقدم منه "أحمد" يهتف بسخرية: ولو
مقطعتش علاقتها بيا، هتحرمها من
المصروف؟ ولا هتحبسها في أوضة
ضلمة؟

ردت "نرمين" بتهكم: أنت مالكش دعوة
تصاحب مين ومتصاحبش مين، خليك
في نفسك.

أضافت "علاء" بسخرية: هو ميقدرش
يخليه في نفسه، لو خلاه في نفسه
يموت.

نهض "علاء" غاضبًا وقال بحزم: لو
مخرجتنيش حالًا، هتصل بأبوكي يجي
يتفرج على الهانم بتاعته، مثال الشرف
والعفاف.

رد "أحمد" ببرود: ده أخرك.

لكمه "علاء" بغضب أعمى في وجهه،
ثم جلس على المقعد مجددًا وهو يهتف
بحدة:

-برة يا زبالة، وإن متحركتش حالًا
هريك يا عرة الرجالة.

وضع "أحمد" يده على مكان الضربة،
ونظر إلى "علاء" بشر، ثم لمح سكينًا
موضوعة في طبق الطعام. جذبها
وضربه بها مرة وثانية وثالثة. ارتعشت
يده حين أدرك ما فعل.

صرخت "علا" و"نرمين"، لكن باب
المحل المصنوع من زجاج عازل
للصوت منع الآخرين من سماع
صوتهما. بكت "علا" بجنون وهي
تضرب "أحمد"، الذي وقف متحيرًا لا
يعلم ماذا يفعل.

لكن "نرمين" تدخلت ببرود وقالت: اللي
حصل حصل. إحنا لازم نمشي من هنا.
صرخت "علا" بجنون: نمشي من هنا؟
"أحمد" قتل "علاء"! وأنا هبلغ
البوليس، ومش هسيبه غير لما يتعدم.
أمسكت هاتفها لتتصل بالشرطة، فردت
"نرمين" ببرود:

-اتصلي، عشان أبوكي يعرف إنك
مصاحبة اللي قتل ابن عمك. وشوفي

هيعمل فيكي إيه. مش بعيد يقتلك، وغير بنت عمك اللي بتحبه وبتكرهك، هتعمل إيه؟ غير عمك وعياله، تفتكري هيعملوا إيه لما يعرفوا إنك السبب في موت ابنهم؟

بكت "علا" واقتربت من "علاء"، قائلة بأسف:

-حقك عليا يا "علاء". بالله عليك سامحني.

ابتسمت "نرمين" بسخرية وهي تبعدها عن الجثة، وقالت:

-قومي اهدي، وظبطي نفسك. حصلش حاجة. وأنا همسح البصمات اللي على السكينة وأي بصمات لينا في المكان وكان حصلش حاجة.

نظرت لها "علا" بعيون فارغة. قامت
"نرمين" بمسح بصمات سلاح الجريمة
وتنظيم المكان كما هو، ثم قالت:

- يلا نمشي. وأنتِ يا "علا"، ارجعي
البيت وكأنك متعرفيش حاجة. واتصدمي
زيهم.

قالت "علا" بشرود: فيه كاميرات
مراقبة في الشارع. يعني هيجيوننا
وإحنا داخلين وخارجين، وهيعرفوا
الحقيقة.

ردت "نرمين": جدعة إنك قـولتيلي.
"أحمد"، شوف كاميرات المراقبة فين،
وادفع فلوس لصاحبها وامسح الفترة
اللي دخلنا فيها لحد ما خرجنا. وخلي

بالك، ضبط التسجيل كويس عشان
محدث يشك في حاجة.

غادر الثلاثة، وتركوا "علاء" ينزف
حتى الموت. عندما عادت "علاء" إلى
المنزل، أعطتها زوجة عمها طعامًا
وطلبت منها أن توصله إلى "علاء"،
لأنه اتصل بها وأخبرها أنه جائع.

اتصلت "علاء" بـ "نرمين" لتخبرها،
فقالت "نرمين" لها أن تذهب وعندما
تدخل المحل تصرخ وتدعي أنه مات.
فعلت "علاء" ذلك. اجتمع الناس، ثم
جاءت الشرطة والإسعاف.

Back

بكت "علاء" في الزنزانة، تهتف بتوسل:

-يا رب، سامحني.

اتصل "تامر" بـ"فارس" وطلب منه أن يتواصل مع الشباب لتحديد موعد في كافيه قريب، لأنه يريد التحدث معهم.

في تمام الساعة التاسعة مساءً، وصل الشباب واحداً تلو الآخر. وبعد السلام، سألوا "تامر" عن سبب تجمعهم، فقال:

-اسمعوا يا شباب، البنات الفترة اللي فاتت كانت صعبة عليهم، وكل ده كان بسبب حفلة التخرج اللي كان نفسهم يحضروها. للأسف، نتيجة تهم ظهرت والحفلة اتعملت وهما محضروش، حتى محدش فيهم سأل على النتيجة. فإيه رأيكم نعملهم حفلة خاصة، للعيلة بس؟ يعني كل واحدة وعيلتها، بس نكون كلنا في مكان واحد. وكل واحد فيكم يجيب

هدية لخطيبته أو مراته ويقولها نتیجتها
بنفسه.

ظهرت علامات الرضا على وجوه
الجميع، وقال "فارس":

-فكرة حلوة وعجبتني. أنا معاك، نشوف
ممكن نحجز قاعة ونجهزها على ذوقنا
ونفكر كمان في المفاجآت.

وأضاف "أشرف": وأنا معكم، شوفوا
هتعملوها إمتي.

رد "تامر": بكرة، إيه رأيكم؟

قال "إبراهيم": أنا معنديش مانع. فيه
هدية كنت ناوي أجيبها لـ "جيهان"

بكرة، يبقى أديها لها بعد الحفلة.

قال "فارس" بابتسامة:

-وأنا كنت بفكر في هدية لـ "دعاء".
الحفلة دي هتفرحها أوي. شكرًا يا
"تامر".

وأثناء الحديث، صدح صوت هاتف
"إبراهيم" بنغمة:

"سو يا سو حبيبي حبسوه."

ضحك "تامر" بسخرية وقال: تفتكر
حبيبك اللي حبسوه ده لو سمع الرنة
دي، هيعمل فيك إيه؟

رد "إبراهيم" بابتسامة: هتصدق لو
قلتلك إنها هي اللي حطتها؟ وأنا
مرضتش غيرها غير لما هي غيرها
بنفسها.

انفجر "أشرف" ضاحكًا وقال بصعوبة:
أنا مصدقك، عشان عندي نسخة منها.

فهم "فارس" أنه يقصد "نور"، تلك
المجنونة التي يخشى أن تؤثر على
زوجته، فقال:

- أنت صعبان عليا يا "إبراهيم". مش
متخيل واحد بهدوئك ورزانتك يتجاوز
واحدة زي "جيهان". عشان أنا
صاحبك، بقولك فكر كويس. أما
"أشرف"، فهو اتدبس واللي حصل
حصل.

ابتسم "إبراهيم" بشرود وقال بحب:
يمكن تكون مجنونة، بس جنونها
عاجبني. هي أجمل وأجدع وأفضل بنت
عرفتها في حياتي، وربنا يقدرني
وأسعداها زي ما هي سبب سعادتني من
يوم ما شفتها.

هتف "أشرف" بابتسامة هادئة وهو
يتذكر عزيزة القلب:

- "نور" هي السعادة بحد ذاتها. عشت
عمري كله ما لفتش نظري أي واحدة،
كأني عايش في كوكب ذكوري، ويوم ما
شفتها خفت قلبي زي حرامي محترف
بيسرق من غير ما حد يحس. سرقت
قلبي بنظرة عندها، وأنا بحمد ربنا على
وجودها في حياتي.

شاركهم "فارس" الحديث بعشق، وقال:

- "دعاء" حاجة تانية، زي جوهرة
نادرة، وأنا المحظوظ اللي كانت من
نصيبه. فيها حنية العالم، وهدوعها
بيجنني، وعندها فيها سحر. لما تبصلي

بفقد عقلي وبحس إني تايه. أنا من غير
حنية "دعاء" هضيع.

اختتم "تامر" بابتسامة، وقال: "بسملة"
بقى مزيج بين الهدوء والجنون، حاجة
كدا متكررتش مرتين. ويبختي لو بقيت
من نصيبي.

الفصل السابع والثلاثون

"ولولا صاحبتني الباقية

ل كُنْتُ فِضْلَتْ فِ السَّاقِيَةِ

بِئْفِ الدُّنْيَا مَشِ لَاقِيَةِ

وَلَا احْضَانَ وَلَا رَحْمَةَ

جَمِيلَةَ الدُّنْيَا وَأَنَا جَنْبُكَ يَا أَطْيَبَ رُكْنِ فِ

الزَّحْمَةِ"

اليوم كان متعبًا على الجميع نفسيًا

وجسديًا، والكل خلد للنوم. ولكن "نور"

استيقظت الساعة الثانية صباحًا،

وشعرت بالضيق وهي لا تعلم ماذا تفعل

الآن. حاولت الاتصال بـ "أشرف"، لكن

هاتفه مغلق؛ فهو أخبرها منذ ثلاث

ساعات أنه سيخذ للنوم وسيقوم بإغلاق

هاتفه، وعندما يستيقظ سيتصل بها.

زفرت بضيق وهي تحدث نفسها:

-أنا غطانة، يارتي خليته ميقفلش

التليفون.

ثم فتحت تطبيق الواتساب وأرسلت

رسالة في المجموعة الخاصة بهم:

-«حد فيكم صاحي؟»

بعد ثوانٍ، ردت "دعاء":

-«أيوة ياختي، صاحية ليه لحد

دلوقتي؟»

أردفت "نور" ساخرًا:

-«على أساس إنك نايمة وبتحلمي».

زفرت "دعاء" بضيق ودونت:

-«خلاص يا أم لسان طويل».

تساءلت "نور":

- «"جيهان" و"بسملة" نايمين؟»

ردت دعاء:

- «لأ، أنا لسة كنت بكلم جيهان، لكن

بسملة مش عارفة».

قالت نور:

- «هَرِنَ عليها».

تساءلت دعاء بتعجب:

- «فيه حاجة عاوزة تقوليها ولا إيه؟»

ردت نور بضيق:

- «لأ، بس زهقانة وعايزة حد يسأليني.

وأنتِ رخملة، لكن بسملة وجيهان

هيرغوا معايا».

زفرت دعاء بضجر وهي تكتب:

- «روحي نامي يا نور».

أردفت نور بجدية:

- «أقولك على حاجة بس متقوليش لـ
جيهان».

سخرت دعاء منها:

- «على أساس إن جيهان مش هتعرف
تقرأ اللي أنتي هتكتبيه. ها، قولي
ياختي».

دونت نور:

- «لما كنا محبوسين، أشرف قالي أهرب
أنا لأن جيهان ممكن تهرب ومرتجعش،
وإحنا نتحبس».

أردفت دعاء:

- «وأنتِ رديتي عليه قولتي إيه؟»

ردت عليها:

- «قولتله معك حق، أنا أصلاً معنديش
ثقة في بسمة وجيهان».

كتبت جيهان بغضب، فهي كانت تتابع
الحوار منذ البداية:

- «وحيات أمك يا نورة، لربيكي بس أما
أشوفك، أنتي والظابط على ما تفرج
ده».

وكذلك بسملة قالت بنفس الغضب:

- «بقى معنديش ثقة فيا يا حيوانة؟
ماشى، وربى لعلمك الأدب عشان تعرفى
متثقيش فيا تاني».

قالت دعاء:

- «دي بتهزر يا بنات».

ردت نور:

- «لأ، مش بهزر ده حقيقي».

كتبت دعاء بعصية:

- «اخرسي يا مصيبة».

أردفت بسملة بوعيد:

- «سيبها يا دعاء، تكمل عشان أشوف
آخرتها إيه بنت المهدي».

ابتسمت نور خلف الشاشة وهي تكتب:

- «آخرتي فل إن شاء الله. وبعدين بهزر
يا حلويات، مالكم؟ شفتي يا بت يا دعاء
هما مسلين إزاي، مش زيك يا نكديّة».

دونت دعاء:

- «النكديّة؟ هتكد على أهلك بس لما
نشوفك».

تساءلت جيهان:

- «المهم، هتقولي لدكتور فارس يا دعاء
وتيجوا تقعدوا معايا بكرة عشان في
حاجات كتير عايزة أقولكم عليها».

قالت بسملة:

- «ما تيجوا تقعدوا عندي أنا، عشان أنا
كمان عايزة أقولكم على حاجة مهمة».

ردت نور:

- «بصي يا عسلية، منك ليها، أنتم
هتيجوا عندي لأنني تعبانة ومش هتحرك
من البيت لمدة سنة».

وبعد مناقشات حادة بينهم، وافقوا على
الذهاب لمنزل بسملة. وبعدها أغلقوا
هواتفهم، ولكن أتى لـ بسملة رسالة من
رقم مجهول الهوية، لكنها تقسم أنها
تعلم هويته؛ فلا يوجد أحد في حياتها
غيره. ابتسمت بسعادة وهي تقرأ ما
دون:

- «تصبحي مش لاقية اللي يديك عشان
ليكي قلب وماشية وراه

واهو قلبك شاف أحزان ياما، مين زيك
لقى حزن واتخطاه
الله يا جميل خلقك واحنا، لو شوفنا
جميل بنقول الله

وان شوفتك ما أملكش إلا أقول
إن أنا يشغلني أكون ضهرك
افتحك عيني لزوم سهرك
وافتحك قلبي مساحة سير
تصبحي على خير».

في اليوم التالي
وفي حدود الساعة الرابعة مساءً، وقف
الشباب يتفقون التجهيزات الخاصة
بالحفلة، وقاموا بإخبار الجميع عدا

الفتيات مع توصيتهم بعدم إخبارهن.
تساءل إبراهيم:

-الفساتين دي هتوصلهم إزاي من غير
ما يشكوا في حاجة؟ خصوصًا إن الأربع
فساتين زي بعض.

تساءل تامر بجديّة: هو مين اللي اقترح
إن الفساتين يكونوا نفس اللون
والتصميم؟

رد فارس بثقة: فكرتي، لأن دعاء قالتلي
مرة إن نفسهم يلبسوا نفس الفساتين،
فأكيد هيفرحوا بحركة زي دي.

أردف أشرف بعد تفكير: نور قالت إنها
في بيت الأستاذ علي، يبقى تامر يتصل
بيه ويقابله يديه الحاجة، ويقوله يديهم

الحاجات على أساس إنه هو اللي
جايبهاهم بما إنه بيعتبرهم زي بناته.

وافق فارس وإبراهيم على حديثه، لكن
تامر قال بتردد:

-كلمه أنت، لأنك متجاوز واحدة منهم،
لكن أنا لأ.

كان أشرف يريد أن يساعده بعدما تعرف
عليه ووجد الصدق والحب في عينيه
لصديقة زوجته، لذلك قال:

-أنا مش هقدر عشان عايز أروح أجيب
هدية لـ نور قبل ما تيجي، وفارس لازم
يقعد هنا يظبط باقي الحاجة، وإبراهيم
رايح يجيب أخته، فمفيش غيرك.

وافق تامر بتردد، وذهب كل منهم إلى
وجهته.

في منزل بسملة

-جيهان، أنتي كنتي بتكلمي إبراهيم في
الليل، صح؟ وطبعًا كنتم بتحبوا في
بعض؟

هذا ما قالته دعاء وهي تحقق بجيهان
التي تجلس معهم بعقل غائب. ردت
جيهان بضيق:

-ياختي اتتيلي، أحب في مين؟! أنتي
فاكراه قليل الأدب زي جوزك؟ ده محترم
لدرجة بتخليني عايزة أعيط.
تساءلت بسملة بتعجب:

- وأنتي إيه اللي مزعلك إنه محترم؟!
ردت جيهان بضجر وهي تتحرك في
الغرفة ذهابًا وإيابًا:

- عشان أنا مش محترمة ومش متعودة
أتعامل مع المحترمين، وهو محترم
زيادة عن اللزوم. دانا ببقى عايزة أقل
أدبي وأقوله إني بحبه، بس باجي قدامه
والقطة تاكل لسانى بسبب طريقته معايا.

سألت نور بثبات: يعني بتحبي إبراهيم؟
طب ومحمد، نسيته؟

لا تعلم لما زالت تبغضه وتبغض من
يذكر اسمه أمامها، فصاحت بضيق:

-محمد! محمد مين ده؟ مفيش مقارنة
أصلاً، وأنا مستحيل أقارن بين إبراهيم
وشخص زي ده. إبراهيم شخص
ميتكرش مرتين، وياريت يانور
متجيبش سيرته قدامي.

قالت دعاء لتغير الحديث: وأنتي يا
بسملة، قررتي إيه؟

تتهدت بسملة وهي تضع رأسها على
قدم نور:

-مش عارفة، بس حاسة إنني تايهة،
مش قادرة أقرر، ومش عارفة أحدد
مشاعري تجاهه عامله إزاي. هو أول
شخص يدخل حياتي، عشان كده خايفة
أندم.

ردت جيهان عليها: بس على فكرة يا
بسملة، هو شكله بيحبك بجد. أنتي
مشوفتيش كان زعلان إزاي وأنتي في
الحبس؟ وكم ان أول ما اتصلت بيه
وقتلته إنني صاحبتك وعايضة أشوفه جه

على طول و مترددش لحظة يساعدا،
وديالا بتقول إنه اتغير عشانك.

لم تجب، فقالت نور: حاولي تهدي يا
بسملة وادي نفسك فرصة ثانية، لأن
كانا بنغلط وأنتي حكمتي عليه ونفذتي
الحكم من غير ما تسمعيه.

وأردفت دعاء: وأنا رأيي زيهم، لأن
فارس كان بيتكلم عليه وقال إنه شخص
محترم.

اعتدلت بسملة في جلستها وقالت: أنا
خايفة إن يكون التغيير مؤقت وبعدها
يرجع زي ما كان.

ردت دعاء بهدوء: اللي بيتعب عشان
يوصل لحاجة مش بيخاطر ويضحى

بيها. وأهو أنتي مطلعة عينه عشان
يرضيكي، فكري كويس ومنتسر عيش.

قالت نور موجهة حديثها لدعاء: وأنتي
يا دعاء، إيه أخبارك مع فارس؟

ردت دعاء بحب: أنا متوقعتش في
حياتي إن نصيبي يكون حلو أوي كده
وأتجوز شخص زي فارس. أنا بحس إنه
كثير عليا، بجد يا بختي بيه.

أردفت جيهان بحب، عندما وجدتها تقلل
من نفسها:

-يا بُخته هو واحنا بيكي، ويبخت أي حد
دعاء في حياته، لأن مفيش في الدنيا
كلها حد زي دعاء. إن شاء الله لما ربنا
يرزقني بنت هسميها دعاء عشان تطلع

زيك. أصل أنا خلقي ضيق ومش حمل
واحدة زي نور ولا بسملة.

ابتسمت دعاء وهي تفتح ذراعيها:
تعالى هاتي حضن يا بت.

اقتربت منها جيهان وعانقتها، لتفعل
نور وبسملة المثل بغيره واضحة، حينما
قالت نور:

- تعالى يا بت يا بسملة في حضني،
أشمعنى هما؟

تساءلت دعاء بعدما ابتعدت عن جيهان:

-وانتي يا نور، إيه أخبارك مع أشرف؟

ردت بسملة بدلاً عنها بمشاكسة: هيكون

إيه أخبارها؟ الراجل الله يكون في عونہ.

شكله أمه كانت بتدعي عليه عشان كده

ربنا وقع الابتلاء نور في طريقه.

دفشتها نور بقوة جعلتها تسقط من على
الفراش:

- بقى أنا يا جزمة ابتلاء؟!!

ثم تنهدت وقالت: والله معاكي حق يا بت
يا بسملة. أنا مطلعة عينه ومش عارفة
متحملني ليه؟! ده بابا اللي هو بابا عايز
يرميني في الشارع.

أردفت دعاء: طب خفي يا أختي على
الراجل، حرام عليكى.

ردت نور بحب لم تستطع إخفاءه: صح،
مطلعة عينه بس بحبه أوي. هو بقى
أغلى عندي منكم.

تساءلت بسملة بمرح: يعني أنا ولا هو؟

ردت نور بدون تفكير: هو طبعًا، ده
كلام.

كادت بسملة أن ترد، لكن استمعت
لطرق باب غرفتهم، فاعتدلن ووضعن
الحجاب، إذ توقعن أن الطارق والـد
بسملة، فلو كانت والدتها، كانت طرقت
مرة واحدة ودخلت بعدها.

تحركت بسملة نحو الباب، وقبل أن
تفتحه صاحت نور:

- استني، أنا اللي هفتح.

تحركت لتفتح الباب، فوجدت علي يقف
على بعد خطوات. سألته بضيق زائف:

-خير يا أستاذ علي، عاوز حاجة؟

ضحك علي على طريقتهما، لتجذبها
بسملة من مفرقها، وتهمس بضيق:

-يا مصيبة، اتكلمي عدل مع بابا، إذا
كان أنا مش بكلمه كده.

أبعدت يدها وهي تعود بنظرها لمن يقف
أمامها وقالت:

-نعم، عايز إيه؟

ابتسم علي وقال برفق وهو يرفع
الحقائب التي بيده:

-أنا آسف يا أستاذة نورهان على
الإزعاج، بس أنا جيت أشكركم على اللي
عملتوه مع بسملة، وجايبلكم هدية
بسيطة، يارب تعجبكم.

ردت دعاء بجدية وابتسامة هادئة:
مفيش داعي للشكر يا عمو، بسملة
أختنا.

لكن جيهان قالت وهي تجذب الحقائب:
-هات بس نشوف الهدية، وبعدين تعرف
عجبتنا ولا لأ.

نظرت لها دعاء بغضب، لكن جيهان لم تهتم، وولجت للغرفة بالحقائب. وقالت نور بضيق وهي تتبعها:

-وليه تجيب هدية بسيطة؟ ما تجيب هدية غالية! هو أنت بخيل ولا إيه؟!!

حذق علي في ظهرها بصدمة من رد فعلها، وركضت بسملة خلفهم دون أن تهتم بوالدها. فقالت دعاء بحرج:

-إحنا آسفين يا عمو، بس هما عفويين شوية...

قاطعها بابتسامة هادئة:

-ولا يهمك. حورية كانت بتحكي لي عنهم، بس متوقعتش يكونوا كده. المهم، قولي لهم يجهزوا عشان آخذكم أفسحكم، وماتقلقيش، أنا كلمت مصطفى وفارس

وقلتهم، لكن التانيين معتقدش هيكون
عندهم اعتراض.

تركها وغادر، فدخلت الغرفة بغضب
تريد الفتك بالحمقاوات صديقاتها.

في قاعة الاحتفالات

وصل الجميع إلى القاعة، فوجدوا أسماء
الفتيات مدونة على الحائط داخل قلب
كبير بلون أبيض، وكل اسم مكتوب
باللون المفضل لصاحبه. دعاء اسمها
مكتوب باللون الأخضر، ونور باللون
الأرجواني، وبسمة باللون الوردى،
وجيهان بالسماوي. وفوق القلب كانت
هناك جملة مكتوبة باللون الأسود:
-«مبروك النجاح».

في منتصف القاعة، كانت هناك طاولة كبيرة الحجم وضعت عليها أربعة قوالب من الكيك المفضل لكل واحدة منهن. الكيك الخاص ببسمة كان مكتوبًا عليه: «مبروك التخرج يا بسبوسة»، أما كيك جيهان فكان مكتوبًا عليه:

«مبارك التخرج يا جوجو»، وكيك دعاء كُتب عليه: «مبروك التخرج يا فرحة قلبي»، وكيك نور كُتب عليه: «مبروك النجاح يا مجنونة».

كان الجميع يتابع ما فعله الشباب لأجل الفتيات بفرحة غامرة. المكان كان مبهجًا، الأضواء الهائلة تضيء عليه جمالًا خاصًا، والأسماء التي تلمع كما النجوم مع الأغاني بدون موسيقى كما

طلب إبراهيم، زادت الأجواء بهجة.
الأحاديث الجانبية التي أثبت على هذا
العمل أضافت سعادة للجميع، بينما كان
الشباب يترقبون لحظة وصول الفتيات
ليعرفوا رأيهن في المفاجأة.

خلال هذا الوقت، صدح صوت هاتف
تامر برسالة من علي محتواها:

«أنا والبنات وصلنا، يلا اجهزوا واطفوا
النور».

أخبر تامر الجميع بوصولهم، وظهر
الحماس في عيونهم وهم يطفئون
الأضواء.

في الخارج
نظرت نور بضيق قائلة لـعلي بسبب
صمته وعدم إخباره لهن عن وجهتهن:

-أوعى تكون جاي تتجوز على حورية
وجايبنا نحضر الفرح، أصل الفساتين
الحلوة دي ما تنفesh غير في فرح!

ردت بسملة بعصبية: هتتجوز على ماما
يا بابا بعد كل ده! وكمان واخدني أتعرف
عليها عشان ماما تزعل مني؟ والله
لخلي البنات يخربوا لك الفرح!

نظر لها والدها بصدمة مما قالت، ثم
نظر في المرآة إلى الجالسات في المقعد
الخلفي وقال:

-عاجبك كده يا نورهان؟

ردت نور بجدية: أيوة، أمال تتجوز على
أمها وتسكت لك؟
عنفتها دعاء بضيق:

-اهدي يا زفتة الطين، وأنتِ يا بسملة

اعقلي! في حد يصدق نور برضه؟

هبط علي من السيارة وقال بصرامة: يلا

انزلوا، ومن غير كلام عشان مش هرد

علي واحدة فيكم.

نزلوا من السيارة، فقالت نور هامسة

لبسملة:

-تفتكري أبوكي شغال في الأعضاء

وجاي يبيعنا؟

ردت جيهان بنفس الهمس: لأ مش

معقول، مكنش جاب لنا فساتين غالية.

ابتسمت دعاء براحة لأن جيهان لم

تشارك نور في حماقة تفكيرها، لكن

تلاشت ابتسامتها عندما وصلها صوت

جيهان التي قالت بعد تفكير:

- بس ممكن يكون عايز يبيعنا لرجال
الأعمال! مش أبوكي يعرف رجال أعمال
أغنياء يا بت يا بسملة؟

ردت بسملة بهمس جعل عيون دعاء
تتسع:

- أيوة يعرف كتير! والنهارده سمعته
بيتكلم في التليفون مع واحد وقاله إن
البضاعة غالية وحلوة. تفتكروا كان
بيتكلم علينا؟

تساءل علي بتعجب وهو يراقبهم
يتهامسون بصوت منخفض:

- فيه إيه مالكم؟ يلا ندخل!
مسحت دعاء وجهها بعنف ودفعت نور
وبسملة أمامها وهي تقول بعصبية بعدما
فقدت هدوءها:

-اتحركوا أنتو وهيه قدامي، ومسمعش
نفس واحدة منكم!

داخل القاعة

تحركوا لداخل القاعة فوجدوا المكان
مظلمًا، وعلي اختفى. همست نور
بخوف:

-اجروا يا عيال! ده طلع بتاع أعضاء
وجاي يبيعنا!

وفي لحظة واحدة أضيئت القاعة
وصدحت أغنية حكيم:

"طير بينا يا قلبي يلا على الحب وعلى
الغرام

نحضن ايامنا يلا ننسى الآه والخصام

خايفين من بكره ليه في ايه نخاف عليه

خايفين من بكره ليه في ايه نخاف عليه
هما اللي قبل منا من الدنيا اخده ايه
ونجحنا كله يرقص وفلحنا كله يرقص
وارتحنا كله يرقص اووووه
وسهرنا كله يرقص وذاكرنا كله يرقص
ونجحنا كله يرقص اووووه
اووووه واو واو واو اووووه واو
واو واو
اووووه

الله على الحب لما يجمع دول ودول
الدنيا بتبقى احلى واللي بيصبر بينول
سلمها للي فوق وانسى الاوهام وفوق
سلمها للي فوق وانسى الاوهام وفوق
دي مصيرها تروق وتحلى
دوق طعم الفرحة دوق

عل الواحده كله يرقص عل الطبله كله
يرقص

عل الصفقه كله يرقص اووووه

هلا هلا كله يرقص ماتيلا كله يرقص

عل البركه كله يرقص اووووه

وسهرنا كله يرقص وذاكرنا كله يرقص

ونجحنا كله يرقص وفلحنا كله يرقص

وارتحنا كله يرقص

عل الواحده كله يرقص عل الطبله كله

يرقص

هلا هلا كله يرقص "

انطلقت ضحكات الفتيات بفرحة

واختلطت مع الأغنية. الجميع تابع هذه

اللحظة بسعادة، وعيون الفتيات كانت

تلمع كأنها نجوم، وهن يتبادلن العناق.

اقترب أشرف من نور وهو يمد يده لها
قائلاً بابتسامة مهلكة:

-تعالى يا نوري-

ابتسمت بحب وهي تضع يدها في يده،
فخطى بها إلى قلب الكيك الخاص بها
وقال:

-ألف مبروك النجاح، وعبال التخرج
وفرحنا-

هتف كلمته الأخيرة بخفوت، فضحكت
وقالت بجرأة:

-يا رب فرحنا الأول!

ابتسم لها وهو يضع في يدها سكين
صغير وعليها فينكة بيضاء وقال:

- قطعي الكيك-

أما فارس، فقد وقف أمام دعاء وحينما
وضعت يدها في يده، قبلها برقعة دون
اهتمام بمن حوله، وحركته تلك جعلت
دعاء تكاد تموت خجلاً بسبب وجود
الجميع هنا، ثم تحرك بها جهة كعقتها،
وقال بحب:

-مبروك النجاح يا حبيبي-

نظرت لوالدها فوجدته ينظر لها بحب،
بينما هي اكتفت بابتسامة خجولة.

وقف إبراهيم بجانب جيهان وقال بخفة
دم:

- مبارك يا باشا!

ردت عليه بمرح: الله يبارك فيك يا
قلب...

قطعت حديثها بصدمة مما تفوهت به،
وعادت تعدل من حديثها قائلة:

-أقصد، الله يبارك فيك بس-

اتسعت ابتسامته ولم يتحدث، لتدور
حول نفسها بسعادة وهي تهتف:

- إيه رأيك في الفستان؟

تلاشت ابتسامته وقال بجديّة: حلو، بس
اثبتني كلهم بيبصوا عليكي-

ثم أشار لها بان تتقدمه جهة الطاولة
لتغمز له وتسير أمامه بكبرياء ليبتسم
بيأس منها ويسير خلفه-

اما تامر فكان يحرق بها من بعيد،
عيونها التي تشبه فضاء واسع بلونها
الأسود المميز، وجهها الخالي من أي
مساحيق تجميل، حجابها الممزوج بين

الأبيض والبنّي فزادها جمالاً فوق
جمالها، فساتانها الستان ذات الاكمام
الواسعة ويطلق عليها كم مروحة يضيق
من عند الخصر ويتسع من الأسفل، ذات
لون رائع فلا يوجد أروع من اللون
البنّي الترابي فهو لون بني دافئ ممزوج
بالأحمر والبرتقالي والأصفر جعلها
كالاميرات، تمنى من كل قلبه أن يقترب
ويخبرها كم هي فاتنة، فاقترب والدها
منها واصطحبها للطاولة...

وقفوا الفتيات أمام الطاولة ينظرون
لبعض بسعادة بالغة وقاموا بتقطيع قالب
الكيك، وقامت نور ودعاء باطعام
ازوجهم ليصفق لهن الجميع بحرارة اما

جيهان وبسمة فبتسموا لبعض وكل
منهم تطعم الأخرى.

وبعد الانتهاء قام الجميع بتهنأتهم
بالنجاح، وأثناء ذلك ولج محمد ابن عم
جيهان للقاعة وقام بتحية الجميع
وعيونهم تتابع تلك التي تتشاجر مع نور
ولم تراه، كان إبراهيم يتابع نظراته
بضيق منذ دخوله وعندما شعر أنه يود
التحرك جهتها قام بالاتصال بجيهان
التي نظرت للهاتف بتعجب ثم حركت
عيونها تبحث عنه فوجدته يشير لها
بالاقتراب، تحركت إتجاهه وتساءلت

بتعجب من تبدل نظراته للجديّة: مالك؟

رد بضيق: اقفى هنا ومنتحركيش.

نظرت له بعدم فهم، ليقول بنبرة اهدئ:

-حنان هنا عشانك، ومتعرفش حد
غيرك وهي واقفه لوحدها.

ردت بأسف وهي تتحرك جهة حنان: -
أسفه بس كنت فرحانة، ومخدتش بالي.

شعر بالحزن لنبرتها الحزينة لذلك
أقترب منها يعطيها هديتها وهي تجلس
بجوار شقيقته وقال بابتسامه:

-مبارك النجاح ومبارك عليا أنتي، أنا
كلمت ابوكي وحددنا معاد كتب الكتاب.

نهضت بلهفة وقالت بفرحة كبرى: بجد،
أخيرًا!

اتسعت ابتسامته وتساءل: فرحانة؟

ردت بحب: أوي، لدرجة إنني عايزة
احض...

اتسعت عيونها بصدمة مرة أخرى
وركضت من أمامه بسرعة، لتتطلق
ضحكاته مثل سنفونية عذبة.

على بعد صغير كان فارس يتابع سعادة
دعاء وهي بين احضان أبيها، رقيقة هي
كفراشة تنتقل بين الأزهار ويا لحظ قلبه
بها عيونها الخضراء تشبه جمال النهر
وكلما نظر لها غرق بهم، حجابها
الأبيض زادها بهاءً مع لون بشرتها
السمراء، وفساتانها الجميل كجمال
عينيها لم يناسب سواها كأنه صنع لها،
أقرب منها ليعطيها هدية النجاح وقال
بحب:

-مبروك يا دودو.

اخذتها منه على استحياء، وفكرت هو لم
يخجل وقبل يدها أمام الجميع إذا لما لا
تفعل المثل، وعلى حين غرة وجدها بين
احضانه تهمس بحب:

-أنا بحبك أوي-

رفع ذراعيه ليعانقها وهمس بعشق:
مش أكثر مني، يا حته مني-

-هات الهدية بتاعتي يلا؟

نظر لها أشرف بتعجب، لتقول نور:

-متنحش يلا هات الهدية، وقولي كلام
حلو زيهم-

رد أشرف بثبات: هدية إيه؟

حدقت فيه بشر وقالت وهي تنظر على
دعاء وجيهان وما يحملون:

- إيه مش شايف كلهم جايبين هدايا؟

رد بلامبالاة: محدش قلتي.

-نعم

قالتها بصوت مرتفع وصل للجميع بعدما جعلوا صوت الاغاني منخفض، ليقربها

أشرف منه ويقول:

-وطي صوتك هتفضحينا.

نظرت له وقالت بحزن مصطنع: بعد
إذنك.

جذب يدها بلهفة قبل أن تتحرك وقال:

-اسف والله بهزر معاك، جبتلك هدية

هو أنا اقدر أنسى، وبعدين أنتي أحلى

هدية في الدنيا.

ابتسمت بخجل فطري، ليتحرك هو

ويأتي بعد ثواني بحقيبة متوسطة الحجم

ويقدمها لها ويقول بصدق:

-كنت مختار اجبك إليه عشان أي حاجة
قدام عيونك ملهاش قيمة.

ثم هتف أشرف بمرح: بحبك يا وزه.

لمعت عينيها بفرحة وضاع هو بهم،
عيونها العسلية التي تشبه جمال
الشمس بعد المطر وفستانها الذي جعلها
كالحورية من حوريات الجنة ، ورغم أن
جميعهم يرتدون نفس الثياب لكنه يراها
فريدة من نوعها، هتفت نور بحب:

-وأنا كمان بحبك أوي.

أثناء تلك اللحظات الهادئة صدح صوت
محمد يعكر الأجواء:

-أستاذ علي انا بطلب منك إيد الانسه
بسملة.

وقف الجميع مذهولين من طلب محمد يد
بسملة بهذا الشكل المفاجئ، خاصة أنها
لم تكن تتوقع الأمر. نظرت له بصدمة،
ثم تحركت عيناها سريعاً نحو تامر الذي
بدا عليه الصدمة للحظة قبل أن يتحول
وجهه إلى ملامح حادة مخيفة.

فقال علي بحسم وهو ينظر إلى محمد:
ده شرف ليا يا محمد، بس بنتي أغلى
حاجة عندي، ورأيها هو الأهم، وكم ان
الأمور دي ليها وقتها.

قال محمد بجدية: أنا عارف بس حبيت
استغل اليوم الجميل ده، واطلب ايدها،
واخد موافقة مبدئية عشان نيجي زيارة
أنا وعيلتي.

همسة دعاء بضيق: قصدك تبوظ اليوم
الجميل ده.

ابتسم فارس على ما تفوهت به، وتابع
ما يحدث كما الجميع، عندما أقترب
محمد نحوها وسأل بلطف:

-إيه رأيك؟

نظرت له بسملة بحرج، ثم ردت بهدوء:

-أنا شاكرة اهتمامك... لكن زي ما قال
بابا، الموضوع ليه وقته.

تغيرت ملامح محمد، لكن سرعان ما
أخفى ارتبাকে بابتسامة صغيرة وقال:

-أكيد، أنا تحت أمركم في أي وقت.

شعرت بسملة براحة مؤقتة ولم تستطع
منع نفسها من التطلع، حيث كان تامر

ما زال واقفًا، ملامحه صامته لكن عينيه
كانت تقول الكثير.

اقترب أشرف منه وهمس بخفة ليكسر
الصمت الثقيل:

-إيه يا هندسة؟ هتسييه كده؟ يخطف
خطيبك المستقبلية؟

نظر له تامر بضيق، ثم قال بحزم:
اسكت يا أشرف، الموضوع مش سهل
زي ما أنت فاكر.

غمز له أشرف وهو يتحرك بعيدًا عنه:
-تقدر تخليه سهل.

بينما همّ بالجلوس، اقترب تامر فجأة،
وقال بصوت واضح أمام الجميع:

-أستاذ علي، لو سمحت، ممكن آخذ
دقيقة من وقتك؟

التفت الجميع إليه بدهشة، خاصة
بسملة، التي اتسعت عيناها وكأنها لا
تصدق ما يحدث.

رد علي باستغراب: خير يا تامر؟

قال تامر بثقة: أنا كمان عايز أطلب يد
بسملة رسمي، قدام الكل. صحيح
ما عنديش الجرأة اللي عند محمد، لكني
عندي استعداد أسنتي العمر كله عشان
أكون الشخص اللي يسعدها.

ساد الصمت للحظات في القاعة، والكل
ينظر إلى بسملة التي كانت في حالة من
الصدمة والارتباك. شعرت بشيء يتحرك
في قلبها، شيء لم تفهمه لكنها شعرت
أنه كان ينتظر تلك اللحظة.

ابتسم علي بخفة وقال: والله يا بنتي،
شكك مش هتعرفي تنامي النهارده.
انطلقت ضحكات الجميع، بينما بقيت
عينا بسملة معلقتين علي تامر، وكأنها
أخيراً بدأت ترى شيئاً كان دائماً أمامها
ولم تلحظه.

بعد مرور ساعة

غادر الجميع ولم يتبق سوى الفتيات
والشباب. كان أشرف قد طلب من
عائلتهم أن يسمحوا له بتوصيلهم،
مؤكداً أنه لن يتأخر. اجتمعوا حول
الطاولة، حيث جلست الفتيات من جهة
والشباب أمامهم في صمت ثقيل.

قطعت بسملة هذا الصمت بتساؤل شارد:

-أعمل إيه دلوقتي؟ أكيد بابا هيقول لي
اختاري واحد منهم... وأنا محتارة.

ردت دعاء بهدوء وبططف: استخيري
ربنا، واللي تحسي إنك مرتاحة له وافقي
عليه. خدي وقتك وفكري براحتك، ولو
مش مرتاحة لأي حد فيهم، ارفضي.
وإحنا معاكي في أي قرار تاخديه.

أضافت نور بابتسامة داعمة: هو صح
ابن خالي، لكن إنتِ أغلى عندي منه.
اللي يريحك وافقي عليه. وزي ما قالت
دعاء، إحنا معاكي مهما كان قرارك.

أما جيهان، فقد كانت تلتزم الصمت منذ
أن تحدث ذلك البغيض. كان إبراهيم
يراقبها بصمت هو الآخر، والغضب
ظاهر في ملامحه.

تساءلت بسملة بتعجب وهي تنظر نحو
جيهان:

-وأنتِ يا جيهان، إيه رأيك؟

رفعت جيهان عينيها من على هاتفها،
وقالت ببرود:

-بصي يا بسملة، سيبك من كلام دعاء
ونور، لأنه مش مهم دلوقتي. أنا هقول
لك حاجة واحدة ومفهاش نقاش: وأنتِ
بتختاري بين محمد وتامر، اختاري بيني
وبين محمد. لو وافقتي عليه، يبقى
اعتبري إنك ما عندكيش صاحبة اسمها
جيهان.

نهضت فجأة، وجذبت حقيبتها والهدية
التي كان قد أعطها لها إبراهيم، ثم
تابعت بصوت حاد:

-بعد إذنكم... وأوه، ما تفكر ريش
تكلميني، عشان عملتاك بلوك. ولما
تختاري، هتعرفي توصلني لي سلام.

غادرت القاعة، تاركة الجميع في حالة
من الذهول. نظرت بسملة إلى الباب
بدهشة وصدمة، فيما كان أشرف يتبادل
نظرات الاستفهام مع إبراهيم.

أخيراً قال إبراهيم بصوت هادئ لكنه
مشوب بالحزن:

-وصل حنان معاك يا أشرف، وخلي بالك
منها. بعد إذنكم.

ثم نهض وغادر هو الآخر، تاركاً خلفه
مشاعر مختلطة بين الحزن والتوتر.

الفصل الثامن والثلاثون

وماذا عن شعور بلال بن رباح عندما
دخل مجلسًا يجلس فيه نبينا الكريم
وكبار الصحابة،

فجلس بلال آخر المجلس لأنه يرى نفسه
أقل منهم،

فناداه النبي من أول القاعة وقال لأبو
بكر أن يفسح قليلًا ليجلس بلال بينهما،
فجلس بلال على استحياء وهو يقول في
نفسه:

(كيف لعبدٍ أسود مثلي أن يجلس بين
أشرف نبي وأفضل صحابي؟)

فقال له النبي: (يا بلال، إنني أسمع
صوت قرع نعليك في الجنة).

اللهم ونحن ♥

غادر إبراهيم خلفها، ليجدها تقف في
انتظاره، وعندما وصل إلى مكان وقوفها
قال بنبرة جامدة:
-تعالى.

نظرت إليه جيهان بتعجب وسألته:

هنروح فين؟ وفين حنان؟

رد بنفس النبرة الجادة: حنان هيروحها
أشرف. فيه كافيه قريب، هنروح نقعد
شوية. عايز أتكلم معاكى.

تحركت خلفه بحيرة من تغيره المفاجئ،
حتى وصلا إلى الكافيه المنشود. جلسا
على الطاولة، وبعد لحظات أتى النادل
ووضع القهوة التي طلبها إبراهيم.

سأته جيهان وهي تراقبه: مالك؟

رد إبراهيم بضيق واضح: مالي! مش
عارفة مالي؟!!

ردت بحيرة: لأ، هعرف منين؟! إحنا كنا
كويسين من شوية، ودلوقتي بتتكلم
معايا بطريقة غريبة.

تنفس بحدة قبل أن يقول: ممكن
تفهمني إيه اللي حصل في القاعة؟

فكرت جيهان لثوانٍ، قبل أن تدرك سبب
ضيقه. فقالت بتعجب:

-أوعى تكون فاهم إني زعلانة عليه؟!!

رد بثبات وهو ينظر إليها مباشرة: وهي
ليها تفسير تاني؟

صاحت بعصبية:

=أيوة يا دكتور، ليها تفسير تاني!
بسملة أختي، وعمري ما هقبل إنها
تتجوز واحد زي ده.

جذب صوتها المرتفع الأنظار إليهما،
فمال إبراهيم نحوها قليلاً وقال بجدية:
-صوتك.

نظرت له بحرج ثم اعتذرت بنبرة أهدأ:
-أسفة، مقصدش أعلي صوتي. بس أنت
بتفكر غلط! يعني بعد كل ده تفكر إنني
زعلانة عليه؟

نظر إليها بثقة وقال برفق:
-مفيش داعي للأسف. بس طريقتك
وزعلك عليه زعلني. أنتي مش فاهمة
حسيت بآيه وأنا شايفك زعلانة عليه...

قاطعت حديثه بصدق: والله ما ز علانة
عليه ولا نيابة! أنت فاهم غلط. أنا بس
اتفاجأت. وبسملة الفترة دي تايهة ومش
عارفة تاخذ قرار. خفت تعند قصاد تامر
وتختار محمد. وهي أضعف من إنها
تتحمل واحد زي ده.

تههد وهو ينصت لها، ثم قالت باعتذار:

-حقك عليا إنك زعلت بسببي. بس
مكنتش أقصد. أنا لما طلعت من القاعة
كنت واقفة مستتياك، عشان عارفة إنك
مش هتسييني أمشي لوحدي.

ابتسم لها وهمس بحنو: حقك أنتي عليا
وعلى قلبي إني فهمتك غلط. بس كان
ممكن تفهميها براحة، لكن زعلك

وطريقتك دي خلّتني أفهم إنك لسه
بتحبيه.

ردت بلهفة تنفي حديثه: والله أبداً! ولا
بحبه ولا حاجة. هو مش فارقلي أصلاً.
أنا بس فكرت في بسمة.

نظر إليها بخبث وسأل بتصنع البراءة:
-طب بتحبي مين؟

وبدون تفكير، هتفت: أنت طبعاً.

اتسعت ابتسامته، فأدركت ما قالت.

وضعت يدها على وجهها بخجل، بينما
هو يغير الموضوع بجديّة كي يحو
خجلها:

-تفتكري بسمة هتختار مين؟ تامر ولا
محمد؟

رفعت رأسها بثقة وقالت بابتسامة: أنا.

-سيبك منها ومتشغليش بالك بكلامها،
هي قالت كده في لحظة غضب؛ شوية
وهتها وتكلمك.

خرجت الكلمات من نور محاولة مواساة
بسملة التي بدا الحزن واضحًا في
عينها.

أضافت دعاء بلهجة مطمئنة: اختاري
اللي يريحك وإحنا معاك، حتى جيهان،
هي بس اتفاجئت. أنا هروح أكلها.

تدخل فارس بصوته الرزين وقال:

-تسمحيلي أقول رأيي؟

رفعت بسملة رأسها عن صمتها
وأجابت:

-طبعا يا دكتور، اتفضل.

رد فارس بجديّة: ردة فعل جيهان
طبيعية لأنها صعب عليها تتعامل مع
محمد. هو هيكون جوز صاحبها اللي
بتشوفها دائماً، فيازاي تتعامل معاه وهي
كانت بتحبّه؟ أقل حركة أو نظرة منهم
ممكن الكل يفهمها غلط. الأفضل فعلاً
إنك تبعدني عن الشخص ده. أما بالنسبة
لتامر، هو عايزك وشخص كويس،
وأعتقد إنه مناسب.

أردفت بسمة بهدوء:

-أنا فاهمة جيهان وعارفة هي بتفكر في
إيه. ومحمد ده أنا مش عاوزه
ومستحيل أفكر فيه. وكنت هقول لـ بابا
لما أرجع إنني مش موافقة عليه.

أضاف أشرف بجديّة: هو ده الصبح. لأن
نظرتة بتقول إنه عايز يتجوزك عشان
يكون قريب منها. وده هيدمر علاقتكم
ببعض طول العمر. علاقتكم حلوّة
وقويّة، ما شاء الله، فمتسمحيش لحد
يدمرها.

هزت رأسها موافقة دون أن ترد، ليقول
فارس وهو يخرج علبة صغيرة من
جيبه: تامر كان جايبك هدية، وبعد ما
مشى بعثلي رسالة أديها لك. اتفضلي.

وضع العلبة أمامها، لترد بحرج: بس أنا
مش هينف...

قاطعتها نور بحماس: هينفع ونص!
هات بس نشوف جايب إيه؟ لحسن يطلع

بخيل زي ناس أعرفهم، أول حرف من
أسمهم أشرف وفارس.

ضحك أشرف بيأس دون تعليق، بينما
تجاهل فارس المزاح وقال بجدية:

- طب مش يلا نمشي عشان الوقت
اتأخر؟

رد أشرف وهو ينظر إلى ساعته: آه،
ياريت. أنا قتلهم مش هيتأخروا. يلا يا
نور.

نهض الجميع:

-أشرف ونور ومعهم حنان التي كانت
جالسة بصمت طوال الوقت. أرسل
أشرف رسالة إلى إبراهيم يخبره أنهم
غادروا، ثم قاد السيارة لتوصيل حنان
إلى منزلها أولاً، ومن ثم زوجته نور.

بينما فارس قاد السيارة في صمت حتى
أوصل بسملة إلى منزلها. بعد ذلك،
أوقف السيارة أمام منزل زوجته دعاء،
التي كانت تحديق به بشرود طوال
الطريق. اقترب منها وقبّل وجنتها فجأة.
تراجعت بحرج وهتفت بخفوت: عملت
إليه؟

رد فارس بابتسامة: بثبتك إنك أحلى.
نظرت إليه بعدم فهم، ففسر لها بابتسامة
مشاكسة:

-لما بنشوف حاجة حلوة أوي، بنبقى
عايزين نبوسها. لكن لو الحاجة حلوة
بس مش أوي، بنتفرج عليها من بعيد.
زي ما كنتي بتعملي طول الطريق،

مركزة فيا وشايفاني حلو. لكن أنا عملت
كده لأنك حلوة أوي.

احمر وجهها خجلاً وهتفت بضيق
مصطنع:

- لم نفسك وبطل قلّة أدب! إزاي دكتور
محترم وتعمل كده؟

رد وهو يربت على رأسها كأنها قطعة
صغيرة: أنا خايف أصدّمك وأقولك إن
اللي حصل مش قلّة أدب خالص. قلّة
الأدب الحقيقية لسه جاية.

زاد خجلها وقالت بخفوت: بس بقى!
اقترب منها وهمس بحنو: عارفة يا
دودو؟ عمري ما فكرت في الجواز. لكن
لما شفتك، حسيت إنني عايز أخطفك
وأبعد بيكي عن الدنيا كلها.

ردت عليه بخفوت مماثل: مفيش حد
يقدر يعيش من غير الناس.

أجابها بابتسامة: إنتي كل ناسي.

ثم ابتعد عنها بمرح وقال: يلا انزلي قبل
ما أعملها بجد وأخطفك.

ردت بجرأة لم يعهدا منها:

-وأنا موافقة طالما هكون معاك.

جذب يدها وقبّلها وقال: دائماً معايا. ويلا
بقي، عشان عايز أتجوز. شهر واحد

وأكون خطفك غصب عنك. وسيبك من
اتفاقكم السخيف إنكم تتجوزوا في يوم

واحد.

اعترضت دعاء بحدة: لأ، هتستني يا
فارس! أنا مش هتجوز من غيرهم. إحنا

متفقين على كده.

اقترب منها وقبّل جبينها وهمس بحب:
أنا مستعد أستتاي العمر كله طالما
نهاية الطريق هتكون عندك. عارفه إني
نفسي أخلف بنت حلوة زيك.

ضحكت وقالت بحماس: لأ! أنا عايزة
بنتي زي نور، وجدعة زيها، وأسميها
نور.

رد عليها بضيق مصطنع: ومين قالك
إني موافق؟ بنتي هتكون اسمها دعاء.
نزلت من السيارة بغضب قائلة: خلصت
الأسماء عشان تسميها دعاء؟

أغلقت الباب بقوة وغادرت. أما هو،
فأرسل لها رسالة بمجرد أن دخلت:
«تصباحي على خير يا أستاذة دعاء؛

والباب اللي كسرتيه هتدفعي تمنه،
وبرضوا هسمي بنتي دعاء»

قام أشرف بتوصيل حنان إلى منزلها، ثم
تحرك نحو منزل زوجته، التي كانت
تجلس بجواره دون أن تبدي أي اهتمام
به. وضعت رأسها على النافذة ورددت
كلمات الأغنية التي تصدح من الراديو.
قطع حالة الصمت متسائلاً بتعجب:

-مالك يا وزه؟

نظرت إليه وابتسمت بخفوت: سلامتك.

زاد تعجبه، فأمسك بيدها بين راحتيه
وضغط عليها كأنه يخبرها أنا معك، ثم
قال:

-مالك يا قلبي؟ زعلانة من إيه؟

هتفت نور بهدوء:

-مش زعلانة، بالعكس. فرحانة أوي
ومش مصدقة إنك معايا، وبعد فترة
هنكون واحد.

أردف أشرف ببسمة هادئة: أنا اللي
مش مصدق إنك في حياتي. بحمد ربنا
إن مراتي وأول فرحتي هي أنتي. من
أول لحظة دخلتني فيها حياتي وأنتي
نورتيها وكنتي اسم على مسمى. أحياناً
بتكوني مجنونة ومتهورة وبتعصبيني،
بس على قلبي زي العسل.

قالت بمزاح: هتستحمل؟

رد بثقة: لآخر لحظة في عمري.

تابعت بتحدٍ: هتتعب؟

أجاب بابتسامة: تعبك راحة يا نوري.

أردفت بخوف خافت: هتزهق؟

رد قاطعًا: أزهق من الدنيا كلها وأنتِ لأ.

ترددت قليلاً قبل أن تضيف بصوت

مكسور:

- هتبعد؟

اقترب منها وأمسك بيدها بحنان: هبعده

عن الكل عشان أكون معاك.

قالت بخفوت متردد: أنا خايفة.

قبّل أشرف يدها بحب، ثم قال مطمئنًا:

- اطمني. طالما فيا النفس، هحميك من

نفسي ومن العالم كله. كام نور عندنا؟

ضحكت بمرح قائلة: واحدة.

نظر إليها بجدية وهو يوقف السيارة

أمام منزلها:

- اطمني يا قلبي، واعلمي اللي أنتي
عايزاه. أنا مستحيل أبعد عنك. أنا بحب
نور المجنونة، مش الهادية اللي خايفة
تعمل حاجة وتزعني. لأنني لو زعلت من
الدنيا كلها، مستحيل أزعل منك. بحبك يا
نور عيني.

اقتربت منه وعانقته بحب وهمست: وأنا
بحبك أوي.

جلست بسمة على الفراش تفكر بتامر.
كيف حاله الآن؟ وماذا يفكر؟ ربما هو
حزين، وهي أيضًا تشعر بالحزن لأجله.
قلبها يطالب به ويخبرها أنه السكن
والمسكن، لكن عقلها يعترض قائلاً: من
خان ربه خان عبده. وجدت نفسها

ضائعة بين الاثنيْن. هتفت بشرود بجملَة
شهيرَة من إحدى الروايات، تتناسب مع
حالتها:

-أقسى ما يعذبني معه أنني لا أتصور
حياتي دونَه... ولا أتقبلها معه...! هو
سيد قلبي وعدو عقلي... فماذا عساني
فاعلة معه؟!!

وكأنه يعلم أنها تفكر به، أرسل لها
رسالة يعبر فيها عن إصراره بالحصول
عليها. كتب:

-«أنا لستُ جديرًا بك، لكن من قال إن
الأحمق الآخر الذي تقدم لخطبتك جدير
بك؟! لكن ما دمت ستقعين في قبضة
وغد لا محالة، فليكن أنا.»

ارتفعت ضحكتها بسعادة بالغة بعد قراءة
الرسالة، وقفزت على الفراش عدة
مرات وهي تعانق الهاتف وتضحك.
كتبت له ردًا مختصرًا:

- «موافقة»

لم يتوقع أن ترد عليه، فنهض من على
الفراش بلهفة وكتب:
«موافقة على إيه؟»

ردت عليه وعيناها تلمعان، وقلبهما
يخفق بعنف:

«هقول لبابا الصبح إني موافقة عليك،
وأنت كلمه واتفق معاه»

أردف بفرحة تسع الأرض بما عليها:

«أرن عليه دلوقتي عادي»

نظرت للهاتف بتعجب وقالت:

«دلوقتي؟! أنت عارف الساعة كام؟»

رد بضيق:

«خلاص، مش مشكلة، أسهر لحد

الصبح وأكلمه.»

ابتسمت وهي تقول:

«أنت ممكن تنام وتكلمه لما تصحى

عادي.»

كتب بفرحة:

«هو أنا هعرف أنام في الليلة الحلوة

دي؟ يارب الليل يعدي بسرعة.»

أرادت إنهاء المحادثة، فقالت:

«تصبح على خير.»

فهم هو رغبته، فرد مبتسمًا:

«وأنت من أهلي.»

ثم أرسل رسالة أخرى جعلت دموعها
تنهمر فرحاً:

«وأكبر حلم دلوقتي أغمض عيني مش
قلقان

يجمعني بعينيك مكان

وأعيط مرة مش مكسوف

بحبك قبل ما الدنيا تجمعنا أنا وأنتِ

وفتحتي فـ حياتي ببيان عاشت عمر
مقفولة

برقة وردة خدت القلب وروحتِ وجيتِ
وسكنتِ

وبالعشرة وبالأيام بقيت السيدة الأولى.»

ارتمت على الفراش تبكي بفرحة وتقبل
الهاتف بين الحين والآخر. أما هو، فلم
يصدق ما حدث، وأراد الذهاب إلى

منزلها الآن ليطالب بها. خرج من
غرفته بفرحة وصاح بصوت مرتفع:

-بابا، ماما، يا إيمان، كريبييم، سلمى، يا
ديالا!

خرج الجميع من غرفهم بقلق، وركض
كريم نحوه متسائلاً بلهفة:

-في إيه؟ مالك يا تامر؟ أنت تعبان؟

لم يرد عليه، بل جذبته لأحضانه قائلاً
بفرحة:

-باركلي يا كريم! بسملة وافقت
تتجوزني!

حمد الله كريم في سره ورفع ذراعيه
ليعانق شقيقه. فمنذ ساعات كان تامر
يبكي بين أحضانه ويخبره أنه فقد البنت

الوحيدة التي أحبها. ربت كريم عليه
وقال:

-مبروك يا تيمو، وربنا يسعدكم.

انتشرت السعادة كالعدوى على وجوه
الجميع، فتساءلت ديالا بتعجب وهي
تقترب منه:

-مين قالك إنها وافقت؟

ابتعد عن كريم واقترب منها ليعانقها
وقال والسعادة تقطر من كلماته:

-هي! أنا كلمتها من شوية وقالتلي أكرم
أبوها الصبح.

ابتسمت ديالا وهي تبادل له العناق وهتفت
بحب:

-مبارك يا حبيبي!

وكذلك فعلت إيمان ووالدته، لكن سلمى

اقتربت منه، فتحت يدها وقالت:

- هات فلوس عشان أجيب فستان.

نظر لها بتعجب وقال: فستان إيه؟

ردت بحماس: فستان أحضر بيته

خطوبتك.

دفشها برفق نحو زوجها وقال مازحًا: يا

شيخة، ابعدي عني وشوفي جوزك! بدل

ما تيجي تقولي مبروك، تقولي عايزة

فلوس!

قربها كريم منه وقال بحنان: سيبك منه

يا روعي، وأنا أجيبك أحلى فستان.

اتسعت ابتسامتها وأخرجت لسانها لتغيظ

تامر قائلة:

- يخليك ليا يا كيمو، ويبعد عنك
الحاقدين أمثال تامر أخوك!

ابتسم لها ولم يعقب، فقد كان في مزاج
رائق لا يريد تعكره بسبب تلك المزعجة.
اقترب من والده الذي كان ينظر إليه
بضيق وسأله بقلق:

-بابا، مالك؟ أنت مش موافق؟

رد حسني بانزعاج: وموافقش ليه
ياخويا؟ بس في واحد عاقل يصرخ كده
في نص الليل يطلعنا مخضوضين! مش
قادر تستنى للصبح وتقولنا؟

احتضنه تامر وقال: فرحان يا بابا،
ومكنتش مصدق إنها وافقت!

رد والده بحب: ربنا يسعدك، ويجعلها
زوجة صالحة ليك.

ابتعد تامر عن والده وقال بحماس: بكرة
جهزوا نفسكم، عشان هنروح نخطبها
رسمي!

أردف كريم بجديّة: يا بني، أنت لسة
هتكلم أبوها وتأخذ معاد تيجي فيه! يعني
أكيد مش بكرة.

رد تامر بانزعاج: مفيش حاجة اسمها
ميعاد! أنا هكلمه بكرة وهقوله إننا في
الطريق. أنا استنيت كتير ومش هستنى
تاني!

قال كريم بسخرية: وعلى إيه تقوله إننا
في الطريق؟ إحنا ناخذ معانا المأذون
ونحطهم قدام الأمر الواقع ونكتب عليها!
لمعت الفكرة في عقل تامر، فقال
بحماس:

-أنا وافق! كلم أنت المأذون وقوله يجي
هنا الساعة أربعة!

انطلقت ضحكاتهم بسخرية عليه، فلم
يصدق أحد أن تامر مهووس ببسمة
إلى تلك الدرجة...

انتهى اليوم بسعادة على الجميع ليبدأ
يوم جديد بشمس تشرق داخل أحدهما
وتغرب عن الآخر، وها هو أتى اليوم
الذي انتظره تامر منذ زمن.

الساعة الآن التاسعة صباحًا، كانت
بسمة وحوارية تقومان بتجهيز الفطور،
وعلي يجلس في الشرفة حين صدح
هاتفه برقم تامر. تعجب من اتصاله في
هذا التوقيت، لكنه رد بجدية:

-السلام عليكم.

رد تامر بسعادة: وعليك السلام يا عمي
علي.

تعجب علي من تامر، فهو منذ معرفته
به يناديه بأستاذ علي، فماذا تغير الآن؟
عاد صوت تامر يصدح عبر الهاتف:

-أنا بستاذن حضرتك إني جاي أنا
وعيلتي بعد العصر نطلب إيد الأنسة
بسمة بشكل رسمي.

لم يعلم علي بماذا يجيب؛ فابنته لم تأخذ
قرارًا بعد. صمت يفكر، فأتت زوجته
تسأله:

-بتكلم مين يا علي؟

قام بتفعيل كتم الصوت ورد عليها
بحيرة:

-تامر اتصل بي يقول إنه عايز يجي هو
وعيلته بعد العصر عشان يخطب بسملة،
ومش عارف أقول له إيه، هي لسه
موافقتش، وأنا مش عايز أضغط عليها.

ابتسمت حورية وربتت على كتفه
وقالت:

-قوله يجي ينور. بنتك وافقت، وكانت
عايزة تقولك بعد الفطور، بس شكله هو
مستعجل.

نظر لها متسائلاً، فقالت: رد عليه الأول،
وبعدين هقولك.

كان تامر ينتظر حديثه بتوتر، إلى أن
قال علي:

-تيجي تنور في أي وقت.

رد تامر بسعادة: بعد العصر على طول
هكون عندكم.

أغلق علي الهاتف ونظر لزوجته،
فقال:

-هنفطر، وهنقولك يعني هنروح فين؟

جلسوا يتناولون الطعام، وبسملة تكاد
تموت خجلاً من الموقف ونظرات والدها
التي لم تتركها. أنهت طعامها بسرعة
ونهضت لتغادر، فأوقفها والدها:

-تعالى يا بسملة، عايز أتكلم معك،
وحرورية هتعمل لنا شاي.

تحركت خلف والدها بخجل، فقال علي:

-مكسوفة منى يا بسملة؟

حاولت أن تتحدث، لكن الكلمات فرت
منها، فقال علي:

-أنا معديش أغلى منك، وتصعب عليّ
نفسي وأنتِ بعيدة عني، بس أهم حاجة
عندي سعادتك. احكي لي، حصل إيه
امبارح؟

صمتت للحظات تخفي خجلها، ثم أردفت
برقة:

- بعد ما مشيتوا، جيهان زعلت مني
وقالت لو اتجوزت محمد مش هتكلمني
تاني، وأنت عارف يا بابا جيهان غالية
عندي إزاي.

رد علي بثبات: يعني أنتِ وافقتِ عشان
جيهان؟

نفت برأسها وهتفت بخجل طفيف: لأ،
أنا وافقت عشان هو كويس، وكمان
جيهان فهمتني إني ممكن أخسره بسبب

عنادي، فأنا هدي نفسي فرصة أتعرف
عليه.

تساءل والداها بهدوء: وهو عرف منين
إنك موافقة؟

أخبرته أن ينتظرها، ثم توجهت لغرفتها،
وجذبت هاتفها، وفتحته على المحادثة
وأعطته لوالداها قائلة بخرج:

- أنا آسفة يا بابا، هو بعث لي كذا
رسالة وأنا مكنتش برد، بس امبارح لما
بعث لي رسالة، رديت وقلت له إني
موافقة. حضرتك شوف بنفسك، أنا
مكنتش ثقتك والله.

قرأ علي المحادثة وهو يبتسم بفرحة،
لأن ابنته حصلت على شخص مصرّ
بالفوز بها. هتف بمرح:

-الواد ده معلم في التثبیت، دانا نفسي

أتثبت. شفتي آخر رسالة كاتب لك إيه؟

«اتاري الدنيا فيها جميل وحلو عكس ما

اتقالي

وحظي الحلو مش ضايع وكان وياكي

متشالي.»

ابتسمت له ولم تعقب، فقال وهو يجذبها

لأحضانه:

-ربنا يسعدك يا بسمة، ويجعله الزوج

الصالح، ويرزقك الذرية الصالحة اللي

تكون سند ليك في الدنيا.

بادلتها العناق وهتفت بحب: أنا سندي

في الدنيا ربنا ثم أنت يا بابا. أنا مليش

غيرك، ومش عايزة يكون لي سند

غيرك.

قبل جبينها وأبعدها عنه وقال:
-يلا، روعي قولي للمجانين صحباتك،
عشان لو عرفوا متأخر هيخلصوا عليكِ.
ضحكت، وقبلت يده، ثم غادرت من
أمامه.

بعد مرور ساعتين في منزل دعاء
-اخلصي يا دعاء، بقالنا ساعة مستتيينك
الله.

ردت دعاء ببرود: وأنا بقالي تلت سنين
بستتي فيكم ومتكلمتش، اسكتي بقي
عشان مش عارفة ألبس إيه.
ردت نور بضيق: البسي أي حاجة يا
ستي واخلصي.

أردفت دعاء، وهي تقبع أمام خزانة
الملابس بحيرة:

-فارس هيكون هناك، وأنا عايزاه
يشوفني حلوة. وبعدين، قال لما تخلص
الخطوبة هياخدني ونتمشى شوية مع
بعض.

هتفت نور بتهكم: طب يا أختي ابعدي
كده، وأنا هختارك.

اختارت نور فستاناً هادئاً بلوني الأسود
والأخضر يناسب جمال عيون دعاء.
قفزت دعاء بسعادة عندما أعجبها
الاختيار، وكأنها لم تراه في الخزانة من
قبل. وبعدها، قامت بتغيير ثيابها،
ووضعت الحجاب بطريقة مختلفة عما

اعتادت عليه. أعجبت بمظهرها، وتمنت
أن يعجب فارس.

قالت جيهان باستحسان لمظهرها
الرائع:

-الفستان جميل أوي عليكِ ما شاء الله.
لما تغسلي الفستان، ابقِي ابعثيهولي
عشان عجبي أوي وعازية ألبسه.

ردت عليها نور: حلو على دعاء لكن
عليك هيطلع وحش.

حدقت بها جيهان بشر، لتقول دعاء: يلا
اخلصوا، اتأخرنا. بسملة مجنونة، مش
هدخلنا.

نظروا لها بسخرية، فهي من آخرتهم،
والآن تقول ذلك. خرجوا من المنزل
وتحركوا إلى منزل بسملة. وبعد دقائق،

وصلوا، قاموا بطرق الباب، ولم يجب
أحد. طرقتوا مرة واثنين، ولم يجب أحد،
لتقول نور بضيق:

-افتحي يا بسملة الباب بدل ما أكسره
على رأسك.

ردت بسملة، التي كانت تقف خلف الباب
ولم ترد وتمنع والدتها من التحدث:

-مكان ما جيتي روعي، أنا مش عايزة
حد منكم.

ردت دعاء بهدوء وخبث، وهي تبعد
جيهان عن الباب:

-افتحي يا بسملة، عيب كده. كلها عشر
دقايق اللي اتأخرناها، وبعدين كنا بنقنع
جيهان عشان تيجي، وبرضه مرضيتش.

فتحت بسملة الباب بسرعة، وهي تقول
بغضب:

-نهارها أسود كمان، مجتث ولسه
عاملاي بلوك، وربّي أرواح أجيبها من
شعرها.

ضحكت نور وهي تعانقها: مبروك يا
بسو.

ردت عليها بحب: الله يبارك فيك يا نور.
اقتربت دعاء وعانقتها، وهي تقول
بمزاح:

-أخيراً هتجوز.
أبعدتها بسملة عنها بضيق، وهي تقول:
-شوف الوطية فرحانة عشان هتجوز
مش عشاني.

ارتفعت ضحكة دعاء، وهي تهتف: أيوة
طبعا عشان أنتِ اللي معطلاني، ومش
عارفة أتجوز بسببك.

قالت بسملة بضيق، وهي تحاول إغلاق
الباب في وجههم:

- غوري يا دعاء من هنا. أنا غلطانة إني
قلت لكم. يلا، مش عايزة أشوف حد
منكم هنا.

زادت ضحكة دعاء، وهي تقول
بصعوبة:

- خلاص، خلاص، ألف مبروك يا بسو.
ظهرت جيهان أمامها واقتربت منها
لتعانقها بسعادة لأجلها. بادلتها بسملة
العناق، وهي تردد باعتذار:

-مز عيش مني يا جيغي، أنا مكنتش
أقصد أز علك.

ربتت جيهان عليها وقالت: مز عيش
مني أنت، أنا عملت كده عشان خايفة
عليك. أبعدها بسملة عنها وهي تبتم،
وعلى حين غرة جذبتها من حجابها،
وهتفت من بين اصطدام أسنانها
ببعضها:

-بقى أنا يا جزمة عمليتي بلوك وأجي
أكلمك من عند ماما عمليتها بلوك، كان
ناقص عملي ل بابا كمان.

أردفت جيهان، وهي تحاول إبعاد يدها:

-والله عملتله عشان تبقوا أسرة مع
بعضيكوا.

دفشتهم دعاء إلى الداخل، وأغلقت
الباب، وجذبت يد نور، وقالت:

-لما تخلصوا، تعالوا ورائنا.

توسلتها جيهان ببراعة مصطنعة:

خلاص يا بسو، عشان خاطري. مش

أنتِ قولتِ إني زي أختك؟ في أخت

تشمت في أختها الأعراب؟ شفتي دعاء

ونور فرحانين فيا إزاي؟

ابتعدت عنها حينما تحولت نبرتها

للحزن، واحتضنتها. رفعت جيهان يدها

وربتت عليها بحب. وعلى بعد صغير،

كان علي يتابع ابنته وتعلقها الشديد بـ

جيهان. يعلم أن جيهان صديقتها الأولى،

وهي من عرفتها على نور ودعاء،

ولكنه لم يتوقع أن تكون متعلقة بها لهذا

الحد. في الأمس، سمعها وهي تقول
لوالدتها بحزن أن جيهان وضعتها في
قائمة الحظر ولا تريد أن تحدثها، فظن
أنها تبالغ، ولكن ما رآه الآن جعله يعلم
أن ابنته تعتبرها شقيقة لها.

بعد صلاة العصر، تحرك تامر برفقة
عائلته كلها إلى منزل بسملة، فوجد علي
بانتظاره ومعه فارس وأشرف، الذي أتى
مجبوراً بسبب المجنونة خاصته التي
هددته أنه إن لم يأت، ستحيل حياته
للجحيم، فأتى مستسلماً. أما فارس، فأتى
بعدهما خدعته دعاء بأنها لم تطلب منه
شيئاً، وأن أول طلب يرفضه سيجعلها
حزينة، فبكت بتمثيل، وهو يعلم ذلك،
لكنه رضخ لها خوفاً من أن تحزن

بالفعل. أما إبراهيم، فرفض لأنه لم يلتق
بعلي من قبل، وحاولت جيهان معه،
ولكنه أخبرها أن لديه عملاً ولن يستطيع
أن يأتي، فقبلت علي مضض.

اجتمعوا وبعد تبادل التحيات، طلبها
حسني لابنه بشكل رسمي، فوجد القبول
من علي. بعدها ولجت بسملة، وهي
تحمل العصير وقدمته لهم. من خجلها،
لم ترفع عينيها عن الأرض، وخرجت
على الفور. أما تامر، فخفق قلبه عندما
رآها تلمع كأنها النجوم، فهمس لـكريم
بعده كلمات خافتة.

قال كريم بود: شرف لنا يا أستاذ علي
إن إحنا نناسب حضرتك، واطمئن علي

بنتك بسملة. هتكون زي ديالا أختي،
وهنشيلها فوق راسنا.

كان علي يشعر بسعادة بالغة أن ابنته
ستنتمي لتلك العائلة الراقية، فقال بود:

-زادنا الشرف بكلامك يا دكتور كريم.

ابتسم له كريم وقال: بلاش ألقاب، إحنا
بقينا عيلة. وبعد إذنك، ممكن تامر يقعد
يتكلم مع بسملة شوية؟ وأي حد يقعد
معاهم عشان ما يكونوش لوحدهم.

أردف علي بسخرية: متقلقش، حتى لو
أنا عايز يقعدوا لوحدهم، في ناس مش
هتسمح بكده. دقيقة.

خرج، وبعدها بدقيقتين عاد، فقد أخبرهم
أن تامر يريد التحدث مع بسملة.

فصاحت نور بحماس، تعلن موافقتها
وكان موافقتها ضرورية.

ولج تامر الغرفة التي تنتظره فيها
بسملة، وهتف بمرح عندما رآها تجلس
بمفردها:

-السلام عليكم يا بسبوسة.

-وعليكم السلام يا عسول.

التفت خلفه، فوجد فتاة لم يعرف اسمها،
ولكنه يعلم أنها صديقتها؛ فقد رآها يوم
المحكمة. ولجت نور، وجلست على
الأرض أمام الأريكة براحة وكأنها
بمنزلها. تعجب تامر من جلوسها. دخلت
جيهان وببيدها تسالي، وقالت بلا مبالاة:

-ادخل، وما تاخذش في بالك، دي نوره،
عادي.

دخل خلفها بهدوء، وبسملة تكاد تموت
خجلًا منه. فقال وهو يجلس على أقرب
مقعد منها:

-إزايك يا بسملة؟

-الحمد لله، والله زي الفل. إنت شايف
إيه؟ دي طول النهار تزغرد، فأكرة إنه
فرح العمدة.

هكذا ردت عليه نور بتهكم، لينظر لها
بتعجب، فهو لا يفهم ما يحدث. تغاضى
عن حديثها وقال:

-شكرًا لأنك وافقت.

-ما فيش شكرًا من غير هدية، ولا إنت
بخيل زيهم ولا إيه؟

خرجت تلك الجملة ببرود من جيهان،
وهي تتناول التسالي. فقالت بسملة بغيظ
منها:

-اطلعي يا جيهان، إنتِ ونور، شوفوا
دعاء فين؟

ردت جيهان باعتراض: لأ، روعي إنتِ
يا نوره، لأنني بحب الحاجات دي أوي.

تساءل تامر بتعجب: حاجات إيه؟

ردت عليه نور، وهي تنهض وأشارت
عليهما:

-قصده على المشهد الرومانسي اللي
بيحصل.

خرجت نور، ليقول تامر: مبروك.

ابتسمت له وردت: الله يبارك فيك.

أردف تامر: إحنا حددنا كتب الكتاب يوم
١٠/٩، والفرح. عم علي قال إنك
عاوزاه مع أصحابك. كده هنستنى لما
يحددوا معاد.

كانت جيهان تعبت في هاتفها، وعندما
استمعت إلى حديثه، قالت بجدية:
-أنا مش موافقة يا بسملة.

أتت نور، وجلست بجوار جيهان، وقالت
بثبات: ولا أنا يا بسملة موافقة.

نظر لهما تامر بدهشة، ولكن بسملة
ظنت أنهما يمزحان كعادتهما. لكن حديث
دعاء فاجأها عندما قالت بهدوء:
-وأنا كمان مش موافقة.

الفصل التاسع والثلاثون

قالت لي عجوز ذات مرة:

-ولكن يا صغيرتي الشيطان لن يأتيكي
برداء أحمر و قرون مخيفة ... إنه
سيأتيك في هيئة كل ما تشتهييه و تهواه
نفسك فاحذري.

أردف تامر: احنا حددنا كتب الكتاب يوم
١٠/٩، والفرح. عم علي قال إنك
عاوزاه مع أصحابك. كده هنستنى لما
يحددوا معاد.

كانت جيهان تعبت في هاتفها، وعندما
استمعت إلى حديثه، قالت بجدية:

- أنا مش موافقة يا بسملة.

وجلست نور بجوار جيهان وقالت
بثبات:

-ولا أنا يا بسملة موافقة.

نظر لهم تامر بدهشة، ولكن بسملة ظنت
أنهم يمزحون كعادتهم. لكن حديث دعاء
فاجأها عندما قالت بهدوء:

-وأنا كمان مش موافقة.

تساءلت بسملة بصدمة: حتى أنتي يا
دعاء؟

ردت دعاء بهدوء: لأنه مينفعش يا
بسملة.

تساءل تامر تلك المرة: هو إيه اللي
مينفعش؟

ردت عليه نور: تاريخ كتب كتابك يا
سيدي.

أردف تامر ساخرًا: ليه؟ الأستاذة وراها
معاد ولا إيه؟

نظرت له بشر ثم هتفت بضيق: شكلي
هحطك في البلاك ليست. واه يا سيدي،
عندي معاد، مش بس أنا، وبسمة كمان
معانا.

أردفت بسمة بعدم فهم: معاد إيه ده؟

ردت جيهان بضجر: كتب كتابي يا ستي.
أنا مش قلتكم من شوية إن هيمما حدد
معاد كتب الكتاب؟ وساعتها عمو علي
نادى عليكي، ومسمعتيش التاريخ.

قالت نور ساخرة: هيمما؟

ردت جيهان بحنق: أيوة يا اختي، هيمما،
اللي غيران منا يقلدنا.

هتفت نور وهي ترفع أحد حاجبيها:

-ياختي اتتيلي. هغير منكم علاء؟

تساءلت جيهان بسخرية: قوليلي يا

نوره، لما تحبني تدلعي أشرف، هتدلعيه
بأشروفة ولا إيه؟

صدحت ضحكات جيهان عندما رأت
نظرات نور المشتعلة، وقالت بصعوبة:

-وأنتِ يا دعاء، هتقولي لفارس إيه؟
فروسة ولا أبو الفوارس؟

زادت ضحكات جيهان وأشارت إلى
بسملة بضحك:

-أنتي براءة يا بسملة، صح؟

أردفت دعاء بضيق وغضب مكتوم: ها
يا خفة، خلصتي ضحك ولا لسة؟ عشان
نتكلم جد.

وضعت جيهان يدها على فمها وأشارت
لها أن تتحدث. لتقول دعاء بجدية:

-جيهان كتب كتابها يوم ٩، يعني بعد
أسبوع. وطبعًا مش هينفع يكون كتب
كتابكم معاها.

تساءل تامر بعدم فهم وضيق:

-ليه؟ المأذون مش هيرضى يكتبنا ولا
إيه؟ هما هيكتبوا في بيتهم واحنا هنكتب
هنا.

دخل في تلك اللحظة أشرف وفارس،
فقال الأول بهدوء:

- مش هينفع عشان هما عايزين
يحضروا مع بسمة ومع جيهان.

أردف تامر بإصرار: يعني إيه؟ أنا
خلاص حددت، ومش هينفع أروح أقلهم
يأجلوا عشان سبب زي ده.

تدخل فارس وقال بعد تفكير: خلاص
بسيطة. دعاء تحضر مع بسملة ونور
تحضر مع جيهان.

اعترضت بسملة على حديثه وقالت: بس
أنا عايزة أحضر مع جيهان.

وكذلك جيهان قالت: وأنا عايزة أحضر
مع بسملة.

نظر أشرف لتمام كأنه يخبره أن هذا
مقصده. فقالت دعاء ببساطة:

-عندي فكرة. نخلي كتب كتاب بسملة في
العصر، ونحضر كلنا معها. وبعدها
نروح بيت جيهان ونخلي كتب الكتاب
بعد العشاء.

ابتسم فارس لها بفخر: برافو يا حبيبتي.
ذكية من يومك.

نظرت لهم نور بضيق، وأبعدته عنها،
ووقفت بينهم، وقالت:

- ابعد يا عسل. احترمني، أنا واقفة هنا.

نظر فارس لأشرف وقال: شوف مراتك
يا أشرف، عشان أنا تعبت منها.

اقترب أشرف من نور، ووضع يده
عليها ليقربها منه، وهمس بنبرة خافتة:
- ملكيش دعوة بحد يا نور.

لم ترد عليه لقربه الشديد منها، ابتسمت
وهزت رأسها بصمت. ليقول تامر:
- خلاص، موافق.

أردفت نور بضيق: أصلاً محدش خد
رأيك.

كمم أشرف فمها وقال بأسف: أنا آسف
يا جماعة، بس دي نور، محدش بيقدر

يسكتها. لو عندكم حل عشان تخرس
وما تدخلش في حاجة، هكون شاكر
ليكم.

ابتعدت عنه بضيق، وجذبت يد دعاء
وبسملة وقربتھما منها بتملك. ونظرت
للشباب بشر، ثم تبذلت نظرتها لأخرى
خبیثة، وقالت ببراءة مصطنعة:

-أنا ولا الكائن ده يا بسملة.

ضحك أشرف على المجنونة خاصته،
وعلى نظرات الشباب لها. وانقضى
اليوم بسعادة وبهجة. غادر تامر مع
عائلته، وبعدها الفتيات غادرن على
اتفاق باللقاء غدًا لتذهب بسملة وجيهان
للاستوديو لالتقاط صور لهما من أجل
عقد القران وتجهيز الأوراق المطلوبة.

مر الأسبوع على ما يرام واليوم، واليوم
لقاء الأحبة برابط مقدس. اليوم عقد
قران بسملة وجيهان، وكان منزل بسملة
متكديًا بالسكان، والأصوات الصاخبة
تصدح لتهز القلوب فرحًا. كانت الفتيات
يجلسن في غرفة بسملة، يرتدين ثيابهن
بعدها تم تجهيز بسملة، التي أصبحت
مثل الشمس.

-إيه رأيك يا بسو، فستاني حلو، صح؟

هكذا تساءلت دعاء وهي تدور حول
نفسها، لترد عليها جيهان:

-حلو أوي، وأنتي أحلى.

لكن نور اعترضت على الفستان ومن
أتى به:

- مش حلو، واللي اشتراه معندوش

ذوق. برضه ده منظر فستان؟

نظرت لها دعاء بشر: ملكيش دعوة،

محدث خد رأيك.

أردفت نور بلامبالاة: أنتي حرة، أنا

خايفة عليكى وعلى شكك، وبقولك رأيي

قبل ما تدبسي في الجوازة. هي في

واحدة عاقلة تتجوز واحد اسمه فارس؟

ردت عليها دعاء ببرود: آه، ملكيش

دعوة، ع الأقل مسموش أشرف.

هتفت نور تدافع عنه: ماله أشرف

ياختي؟ ده زينة شباب البلد، كفاية عينيه

السواد.

ولجت حورية الغرفة، فوجدتهم

يتشاجرون. هزت رأسها بيأس، ثم

اقتربت من ابنتها التي ترتدي فستانًا
مثل السمكة، ملتصقًا على جسدها من
عند الصدر باللون الوردى، ومتسعًا
قليلاً من الأسفل باللون الرمادي،
والحجاب مزيج من الأبيض والوردى.
كانت تضع بعض المساحيق التجميلية
التي أبرزت جمالها مع لون عينيها
الأسود كسواد الليل، وبشرتها الحنطية،
وجسدها الكيرفي. كانت حقًا جميلة مثل
شمس بعد المطر.

ابتسمت حورية بسعادة وعانقت ابنتها
وهي تقول:

- بسم الله ما شاء الله، زي العسل يا
حبيبتي.

بادلتها بسملة العناق بفرحة كبرى،
والفتيات نظرن إليهما بعيون تلمع كأنها
النجوم. ابتعدت عنها حورية وهي تقول:
-تامر وصل مع عيلته ومعهم المأذون.

خرجت الفتيات بعد تلك الجملة وخلفهن
حورية. وبعد دقائق، جلس تامر وعلي
بجوار المأذون الذي بدأ الحديث المعتاد
عن عقد القران، وأنهى حديثه بقوله:

-بارك الله لكم، وبارك عليكم، وجمع
بينكم في خير.

ثم ولج علي غرفة جلوس النساء ومعه
كريم وشقيقه عز، فهم الشهود على
الزواج. طلبوا من بسملة التوقيع
والبصم على العقد. فعلت بسملة ذلك،
وبعدها انطلقت الأصوات الصاخبة من

أفواه النساء. جذبت جيهان يد بسملة
لترقص معها، واقتربت الفتيات
ليرقصن. أصبحت بسملة في المنتصف
والفتيات حولها، واستمر الرقص لبعض
الوقت إلى أن قالت حورية:

-بسملة، يلا تعالي، عشان تامر عايز
يشوفك.

استأذنت جيهان ونور ودعاء للمغادرة.
قام فارس بتوصيلهن إلى منزل جيهان،
وذهب أشرف برفقة إبراهيم إلى منزله
إلى أن يأتي الوقت المحدد.

ولج تامر غرفة بسملة التي كانت
تنتظره بها. فرحته بلغت عنان السماء،
ها هو قد وصل إلى القمر، بل امتلكه

وأصبح ملكية خاصة لا يحق لأحد أن
ينظر إليها. والقمر هي بسملة، التي
جلست أمامه تسترق النظر إليه بخجل.
اتسعت ابتسامته وأغلق الباب خلفه، ثم
اقترب منها. وقبل أن ترفع عينيها عن
الأرض، وجدت نفسها بين أحضانها. دار
بها حول نفسه وهو يهتف بفرح:

- الحمد لله، الحمد لله! مش مصدق أنك
بقيت مراتي.

شاركته السعادة، وهتفت بخجل: نزلني.
توقف وهو ما زال يحملها بين ذراعيه،
رافعاً إياها عن الأرض كي تصل لطوله،
وقال مبتسماً:

- لأ، أنا مرتاح كده.

استكانت بين ذراعيه، ولم تدرك مضي
من الوقت وهما على هذا الوضع، إلى
أن أنزلها برفق، ثم قبل جبينها وأصق
رأسه برأسها قائلاً بحب:

-عنيكي جميلة أوي وهي بتبتسم.

ابتعد قليلاً وسألها باهتمام: حاسّة بايه؟

نظرت له بخجل، وقالت: فرحانة أوي...

بس يا رب ما تكسرش ثقتي فيك، وما
تجرحش قلبي اللي بينبض باسمك.

كان اعترافاً صريحاً بمكانته في قلبها،
لذلك قال بلهفة:

-بموتي، وطول ما أنا عايش هحافظ

على قلبك من أي حزن. واليوم اللي

يزعل فيه قلبك، هكون أنا تحت التراب.

هتفت بسملة بلهفة: بعد الشر عليك!

ابتعد عنها خطوتين، وقال وهو يتابع
عينها بشغف:

-ولإنك حلوة وبنت أصول وعفيفة ومن
بيت راجل جد،

تستاهلي الشخص اللي يشوفك وكان ما
فيش في جمالك حد.

يتعب علشان يوصل باباك ويقابل ناسك
وأحبابك،

وتعيشي معاه فرح شبابك، ويجيب لك
ورد يليق بالورد.

أخرج لها وردة حمراء من جيب بدلتة
الأنيقة وناولها إياها، ثم غمز بعينه
بمشاكسة وعاد يقول:

-الغالي ما ياخدوش غير غالي، وأنت
الغالية.

أنتِ اللي تظلي الصبحية من سور
البلكونة العالية،
تظلي على الناس وكأناك البنت أم الشعر
المسحور.

اقترب منها ليفك حجابها، يرى شعرها
الأسود الكيرلي، وعبت بخصلاته بحنان.
هتف:

زي الأفلام الأبيض وأسود، ومشاعرك
خام لسه وخالية.

الناس عمالة تتغير، وأنتِ على وضعك
من يومك.

الأدب اللي مزين وشك، والذوق الواسع
في هدومك.

أمسك يدها وقبلها، ثم بدأ يرقص معها
على دقات قلبه وهو يقول:

-إحنا الرجالة بندور على الست اللي
تدوم،

بندور على أم وزوجة تشاركنا الأفراح
والهموم،

بندور على ونس الرحلة والنص الحلو
من الدنيا،

والست اللي تربت مظبوط، وراجلها
يميل تسنده ويقوم.

توقف ونظر إلى ملامحها بحب، ثم
وضع يديه على وجهها، وقال:

-البيت الشبعان حنية يطلع إيه غير
حنية؟

يطلع إيه غير قلب جميل وملامح هادية
ووردية؟

والله يا بخت اللي تحبيه، هيفوز بالدنيا
والآخرة.

أنواع الرزق كثير، لكن أحلاها تكون
ست وفية.

ابتعد عنها قليلاً ونظر لها بلوم وعتاب
لدخولها حياته متأخرًا. عاد يقول:

-تعرفي أنا ليه لسه لوحدي؟ ما دخلتش
دنيا وبتهرب،

علشان عندي تاريخ أسود من بعده مش
عاوز أجرب.

الناس حوالينا مش أحكي، ما أنتِ أكيد
شايقة وعارفة،

بيكونوا بعيد حلوين جدًا والصورة تبوظ
لما نقرب.

أخذ نفسًا عميقًا وقال:

-فبقول لك نصيحة يا حلو: خليكي
بوضعك وتمامك،

خليكي بأدبك وهدوئك وكسوفك دائماً في
كلامك،

احفظي قلبك من غشم الناس والوضع
البايظ حوالينا،

وهيجي الفارس بالخاتم، وهينزل يركع
قدامك.

جلس على ركبتيه أمامها، وأخرج علبة
صغيرة بها خاتم محفور عليه اسمها.
انهمرت دموع بسملة بسعادة مما
يحدث. اقتربت منه ليضع الخاتم في
يدها، وقال:

-تسأهلي الحب اللي يطلع وتشوفه
الناس ظاهر في النور.

الرجالة يدخلوا من الباب، وما فيش
راجل ينط السور.

طول عمرك غالية، فخليكي متشالة
بكيك ولونيسك.

أرتمت بسملة بين أحضانه، وهي تبكي
وتقول:

- أنا بحبك أوي يا تامر.

بادلها العناق، وهو يشدد من احتضانها
قائلاً:

-وأنا مهووس بيكي يا حياة تامر.

-زعلان ليه يا مارس؟

خرج هذا السؤال باهتمام من ديالا، التي
تقف معه بعيداً عن الناس في منزل
بسملة، ليرد عليها بضيق: بقولك تعالي

نتمشى مع بعض شوية وأنتي مش
راضية.

ردت ديالا بهدوء: امشي إزاي من هنا،
والنهارده كتب كتاب أخويا.

أردف مارس بثبات:

- وكتب الكتاب خلص، وتامر قاعد مع
مراته يعني مش هيفكر فيكم، وفارس
خد مراته وأصحابها ومشى، ومفيش حد
هنا غير الكبار، وشوية وهيروحووا كتب
الكتاب الثاني.

قالت ديالا برقة: وأنا كمان عايزة أحضر
عند جيهان.

رد مارس بلهفة: مش هنتأخر، هنتمشى
شوية وبعدها هنروح مع بعض.

هزت رأسها بموافقة، ليتركها ويتحرك
يبحث عن والدها. وعندما رآه، اقترب
منه واستأذن أن ييالا ستذهب معه
للسير قليلاً، وبعدها سيذهب بها إلى
منزل جيهان. وعندما وافق، خرجا سوياً
من المنزل. تحركا إلى موقف الحافلات،
فوجد سيارة أجرة، أوقفها ثم فتح لها
الباب الخلفي لتصعد، وصعد هو
بجوارها. تحركت السيارة، وقال
للسائق: نزلني الغورية.

وبعد مرور الوقت، توقفت السيارة. نزل
منها، ثم نزلت بعده. تحركا معاً جهة
شارع المعز. كان مارس يعشق هذا
المكان، لذلك أراد أن تشاركه المكان
الذي يحب. أخبرها بقوله:

- عارفة يا ديالا، أنا بحب الشارع ده
أوي، بحس إنه شبيهي أو بنتمي ليه.
أردفت ديالا بهدوء: يمكن أنا مجتش هنا
غير مرة واحدة مع كريم، بس حبيته
كفاية إنه محتفظ بكل حاجة قديمة،
وخصوصًا المباني. بحب أوي المباني
القديمة.

سار معها يبحث بعينه عن هدية تليق
بها. فوجدها تسأله بتردد:

- هو مين اللي اختارك اسمك؟

نظر لها ورد على سؤالها بسؤال: ليه؟
مارس وحش؟

نفت برأسها وردت توضح سؤالها: لأ،
حلو بس غريب. مارس ده شهر من

شهور السنة. يعني، مش عارفة، أول مرة أسمع حد اسمه كده.

رد عليها بابتسامه هادئة: هقولك يا دودو. ماما اللي اختارت الاسم، مع إن بابا مكنش موافق، كان عاوز يسميني فادي، بس ماما أصرت واتكتب مارس.

أردفت بهدوء: طب هي ليه سمتك كده؟ أو مارس معناه إيه؟ غير إنه شهر في السنة.

قص لها ما أخبرته به والدته عندما سألتها:

-شهر مارس هو أول شهور السنة الرومانية قبل إضافة شهري يناير وفبراير إلى التقويم الروماني. ومن المعروف عندهم أن جميع أشهر التقويم

الروماني ترجع تسميتها إلى حدث أو
أسطورة في التاريخ الروماني. هكياك
قصته.

صمت اللحظة، فوجدها تتشبث بيده
وتتابع باهتمام. قال:

-يعتبر مارس هو إله الحرب في التاريخ
الروماني، وكم ان من أعظم آلهتهم
القديمة بعد إله السماء، الإله جوبيتر.
واتذكر كثير مقترناً بإله الإغريق آريس،
سواء في الفن والأدب أو الميثولوجيا.

زادت شهرة الإله مارس بسبب كثرة
الحروب التي خاضوها وانتصاراتهم
العظيمة التي حققوها عبر التاريخ. وكان
معروفًا باسم جد روما الأسطوري. غير
أن أغلب الأعياد في روما كانت في

شهري مارس وأكتوبر. وشهر مارس
كان بداية للحملات الحربية والمعارك.
وظهر مارس في الأعمال الفنية والأدبية
المأخوذة من أساطير الإغريق والإلهة
فينوس، إلهة الجمال والحب لدى
الرومان، والتي أنجبت منه إله الحب
أمور. وبكده بدأت حكايات الإله مارس
مع الإلهة فينوس مع الفنانين وبقت من
الموضوعات المعروفة والمس تهلكة.
وبقي موضوع الإله مارس والإلهة
فينوس من الموضوعات الشهيرة،
ورسمها العديد من كبار الرسامين،
وألفت عنها الألحان.
تساءلت ديالا بتعجب: هي طنط عرفت
كل الكلام ده منين؟

رد مارس وقد وصل للمكان الذي يريده:
-ماما مدرسة تاريخ في الثانوية بنات.
طول عمرها بتحب التاريخ وقصص
الحب الأسطورية، وعشان كده سممتي
مارس. وأنا صغير كنت بزعل، وبعدين
اتعودت.

ثم نظر لها وتساءل: طب وإنتي كمان
اسمك غريب.

أخبرته وهي تبتم: عمتي كانت بتحب
المسلسلات التركي. وكان فيه مسلسل
جميل اسمه الأرض الطيبة، والبطلانة
كانت اسمها ديالا، فسممتي عليها.

دارت بينهم أحاديث كثيرة، وكل واحد
منهما يتعرف على الآخر عن قرب. فقد

زاد حب مارس لها، وتمنى أن يوفقه الله
ويجمعه بها في القريب العاجل.

كطفل تاه بين الزحام وظل يبكي
ويرتجف وهو يبحث عن والدته إلى أن
وجدتها تبحث عنه، فاطمأن قلبه بعد
خوفه الشديد أنها لم تتذكره وتعود إلى
المنزل دونه. فرض لها وعانقها
وتشبث بها بقوة كي لا تتركه مرة
أخرى. هذا كان حال تامر الذي لم يترك
بسملة تغادر أحضانه، وكلما حاولت أن
تبتعد أعادها لتستوطن أحضانه مرة
أخرى.

يجلس على الأرض وهي بين ذراعيه
ولم يتحدث أيًا منهما. لتتفص بسملة

وتبتعد عنه بعدما تذكرت جيهان،
ليتساءل هو بدهشة من الذعر الذي
أصابها:

-مالك يا حياتي؟

ردت عليه وهي تنهض: اتأخرنا
وجيهان هتموتني.

أردف بضيق بعدما نهض: إيه رأيك
نقضي اليوم مع بعض بره وسيبك منها؟
وهي أكيد فاهمة إننا محتاجين نقعد مع
بعض شوية.

قالت بسملة بجديّة: مستحيل، أنا لازم
أحضر معاها.

تساءل بتعجب: ليه مستحيل يعني؟ لو
محضرتيش هي مش هتتجوز؟

ابتسمت له وهتفت بثقة: مذبوط، جيهان
مجنونة وتعملها، وممكن كمان تيجي
هنا تاخدني، أو بمعنى أصح تجيبي من
شعري.

انزعج من حديثها وقال: ليه يعني كل
ده؟ عزمت صاحبته ومحضرتش، فين
المشكلة؟

همست بسملة بحب: أنت قلت صاحبته،
مش أختها. وأنا وجيهان أخوات.
رد تامر عليها: محظوظة جيهان دي
لأنك بتحبها للدرجة دي.

أردفت بسملة بشرود وهي تتذكر
الماضي:

-يمكن العكس وأكون أنا المحظوظة. أنا
واحدة عاشت عمرها كله وحيدة ملهاش

حد غير أبوها وأمها. ابتدائي وإعدادي
وثانوي كلهم كنت لوحدي، رغم إنني
بكره الوحدة بس مكش عندي حل ثاني.
وطول عمري كان نفسي يكون عندي
صاحبة أو أخت، بس ماما تعبت في
ولادتي وشالت الرحم.

صمتت للحظة، فوجدته ينظر لها باهتمام
وأشار لها بعينه أن تكمل. فقالت:

-ودخلت الكلية وأنا عارفة إنني هفضل
لوحدي، بس في أول يوم جات جيهان
وقعدت جنبني. كانت اجتماعية أوي،
فضلت تتكلم معي وكنت فرحانة رغم
إنني عارفة إن بعد المحاضرة مش
هشوفها ثاني. لكن هي طلبت رقم
تليفوني، ولما عطتهولها، بقيت ترن

عليا وتسألني عن المحاضرات وتحكي لي حاجات خاصة بيها. لحد ما تعلقت بيها وبقيت بحب الكلية عشان هي فيها. ولما ماما شافتني متعلقة بيها وبروح معاها كل مكان بعد ما كنت مبخرجش، طلبت إنها تتعرف عليها. واتقابلت مع ماما وماما اطمأنت إنها كويسة. قضيت أنا وهي سنة بعمرى كله، وكانت بتقف جنبى في أي مشكلة، وكانت مرة هتموت بسببى.

تساءل تامر باهتمام: إزاي؟

ردت عليه بسملة بعدما تذكرت ما حدث:

-كنت بخاف أعدي الطريق لوحدي، فهي ضحكت عليا ومرضيتش تمسك إيدي وأعدي معاها. فعدت هي للناحية الثانية

وسابتي، وفضلت تقولي متخفيش
تعالى. ولما قررت أعدي، جات عربية،
فخفت وغمضت عيني ووقفت. وقتها
جيهان جرت عليا ودفعتني على الأرض
والعربية خبطتها.

-وحصلها إيه؟

تهادت بسمة وقالت: اتكسرت رجلها
وقعدت خمستاشر يوم في الجبس. ولو
ما تحركناش دلوقتي، هتكسر رقبتى
أنا.

أنهت حديثها ليرتفع صوت هاتفها.
ابتسمت بسخريه وهي تنظر لتامر
لعلمها من المتصل. ثم جذبت الهاتف
لتتأكد من هوية المتصل. فتحت المكالمه

ثم وضعتها على السامعة الخارجية،
ليصدح صوت جيهان الغاضب:

- أقسم لك بربي يا بسملة، لو اتأخرتي
عن نص ساعة كمان، لأجي أجيبك من
شعرك. ولا يهمني حد، عشان الأستاذ
علي المحترم معرفش يربي بنته
وسايبها مع راجل غريب في البيت
لو حدهم.

تدخل تامر يقول بضيق من إفساد يومه،
فهو كان يود أن يفعل الكثير من الأشياء
برفقتها:

- خير يا أستاذة جيهان، الغريب ده
بيكون جوزها لو متعرفيش.

هدأت جيهان وهتفت بثبات: عارف يا
هندسة، أنا هدفعك تمن تأخير بسملة

غالي. واسأل مراتك اللي أنت جوزها
عني.

قالت جملتها الأخيرة بسخرية لتجذب
نور منها الهاتف وتقول:

-وربنا يكفيك شر جيهان ونور لما يكون
ليهم حق عند حد. وأنا قلت لك قبل ما
أمشي متأخرش عن نص ساعة، واهو
مسمعتش كلامي، من أولها يبقى
استحمل.

وأغلقت الهاتف في وجهه. لينظر تامر
لبسمة:

-هو إيه ده؟ مش فاهمه؟ فاكريني
هخاف منهم؟

كانت بسمة أمام المرآة تضع حجابها
وقالت له:

-أنا لو منك أخاف، لأن مفيش حد عاقل
ميخفش من ريا وسكينة لما يجتمعوا.

في منزل جيهان

دخلت غرفتها لكي تجهز نفسها، وخلفها
دعاء ونور، لتقول نور:

- يلا يا جيهان، شوفي هتلبسي إيه
بسرعة، مفيش وقت، المأذون هيجي
بعد العشاء، والعشاء قرب.

دارت جيهان حول نفسها بسعادة بالغة
وهتفت بمرح:

-يا صغيرة، يا أحلى بنات العيلة، كتبوا
كتابك يا عروسة الليلة!

قفزت عدة مرات بفرحة وهي تهتف
بسعادة:

-أنا عروسة، أنا بقيت عروسة.

ابتسمت لها نور وقالت:

-طب يلا يا عروسة عشان العريس قرب

يوصل.

اقتربت منها جيهان وعانقتها، ثم عانقت

دعاء وأردفت بضيق:

-ماشي يا بسمة، هنتحاسب بعدين.

وبعدها ذهبت وارتدت الفستان الذي

أرسله لها إبراهيم. وبعد دقائق، انتهت

دعاء ونور من وضع الزينة لها لتصبح

جميلة حد الفتنة. ارتفعت الأصوات

الصاخبة في الخارج لتبشرهم بقدوم

العريس. تحركت جيهان بلهفة لتغادر

الغرفة، لكن دعاء جذبت يدها وهي

تقول:

- اسئتي يا أختي، إنتي العروسة.
هتفضلي هنا لحد ما يطلبك المأذون.

جلست بضيق، لتربت دعاء عليها
بحنان. ولجت بسملة وهي تقول:

- يلا يا بت يا نور، بيكتبوا الكتاب، تعالي
نتفرج.

تحركت معها نور للخارج، لتقول جيهان
بضيق:

- يا حيوانة، يا بسملة، مجتش سلمت
عليا وقالتلي مبروك.

ضحكت دعاء على تذررها، لتولج
بسملة مرة أخرى وتعانقها وتهتف:

- مبروك يا أهلكي جيبي، وربنا يتملكم
على خير.

وقبل أن ترد جيهان، تركتها وغادرت بحماس وسعادة ليس لها مثيل.

في الخارج، جلس المأذون وعلى يمينه عثمان وعلى يساره إبراهيم، وبدأ يقول حديثه المعتاد، وعثمان يردد خلفه، وبعدها إبراهيم، إلى أن قال المأذون:

-بارك الله لكم وبارك عليكم وجمع بينكم في خير.

لتطلق الأصوات الصاخبة من بسمة ونور لتزيد الوضع بهجة. تنهد إبراهيم براحة لأول مرة يشعر بها منذ وفاة والديه، وكأنه محارب ظل لأعوام يحارب ولا يعلم متى تنتهي الحرب. وعلى حين غرة وصل لنهاية المطاف وعلم أن الحرب انتهت. ابتسامته تلك المرة لم

تكن مجاملة بل سعادة من أعماق قلبه.
وتمنى أن يركض الآن ويعانقها لتهدأ
ضربات قلبه وتطمئن جوارها، ولكن
مهلاً، لم يتبق الكثير.

لم تنتظر جيهان بالداخل، بل خرجت
لترى بنفسها ما يحدث. وعندما انتهى
المأذون، ركضت لها بسملة واحتضنتها
بشدة. وعندما ابتعدت عنها جذبت يدها
ويد دعاء ودارت بهما بسعادة تخطت كل
الحدود.

كانت نور تتابع سعادتهم بسعادة، ولكن
خارج إرادتها شعرت بالحزن لأنها لم
تحب تلك المشاعر. جذبتها دعاء
لتشاركهم الرقص.

وبعد الانتهاء من المباركات والتهاني،
أمسكت دعاء يد جيهان وأدخلتها الغرفة
رغم رفض جيهان وإصرارها على
الجلوس معهم، لكن دعاء لم تسمح لها.
خرجت من الغرفة فوجدت نور وبسمة
يقفان أمام الباب. نظرت لهما بعدم فهم،
وتسألت:

- وقفين كذا ليه؟ يلا اتحركوا، إبراهيم
دقيقة ويجي.

ردت نور عليها: إحنا مستتينه.
نظرت لها بتساؤل لترد بسمة: هنقوله
الوصاية العشرة وبعدها نمشي.
ضربت دعاء كفًا بكف وقالت بيأس:
يادي الوصاية العشرة اللي تعبتوا بيهم
الناس.

وأثناء حديثهم أتى إبراهيم برفقة شقيقة

جيهان، فتساءلت نيرة:

-وقفين كذا ليه يا بنات؟

ردت نور عليها: مفيش، روعي إنتي،

واحنا جايين وراكي.

تركتهن وغادرت، لينظر لهن إبراهيم

بابتسامة هادئة وقال:

-تحت أمرك.

أردفت بسمة بجدية: بص يا دكتور،

أنت اتجوزت أختنا، وأختنا طبعًا مش أي

حد. يعني لو فكرت تزعلها يبقى

استحمل اللي هيحصلك.

اتسعت ابتسامته، فقد أخبره فارس

وتامر عن هذا الهراء. لتقول نور:

ركز عشان كلامي مش هيتعاد. في
شخصين مش هقولك إن اسمهم فارس
وتامر، أنا بكرهم وحاطاهم في البلاك
ليست، فبلاش أحطك معاهم. يبقى بلاش
تزعل البنت وتسمع الكلام. تقولك رايحة
عند صحابي توصلها من غير كلام،
ماشي؟

رد إبراهيم وهو يرضخ لحديثها: ماشي،
في أوامر تانية يا أستاذة نورهان؟

هزت رأسها نفيًا وقالت: مبحبش
الألقاب، أنا هقولك يا إبراهيم، وإن
تقولي يا أستاذة. اتفقنا؟

ضحك إبراهيم بخفوت وقال: اتفقنا، في
أي أوامر تاني يا أستاذة؟

هزت رأسها نفيًا وأشارت له بالدخول.
طرق الباب بخفوت ثم فتح وخطا إلى
الداخل. وعندما أغلق الباب تفاجأ بها
تركض إليه وتعانقه وتهمس بحب:

-والله بحبك أوي يا هياما.

اتسعت عيناه من هول المفاجأة، لكن
هي لم تهتم. تبأ للخجل الذي جعلها
تنتظره كل هذا الوقت. ستعترف له أنها
تهيم به عشقا منذ وجدته الملجأ الوحيد
لأحزانها.

استأذن تامر من علي أنه سيخرج برفقة
بسملة ولن يتأخر، فسمح له. غادر تامر
برفقة بسملة، وفعل فارس المثل، إذ
أخبر مصطفى أنه سيأخذ دعاء ويسيران

في الشارع لبضع دقائق في تلك الأجواء
الخريفية الرائعة.

لم يتبق سوى نور، التي اتصل بها
أشرف. ورغم تعجبها، تحركت للخارج
تبحث عنه. وعندما لم تجده، أرادت أن
تتصل به، لكنها لم تر من يقف خلفها
يتربص بها. وفي ثوانٍ معدودة، كان
يكم فمها بلاصق طبي ويضع شيئاً على
عينيها لتمنعها من الرؤية. حملها
ووضعها في سيارة وقاد بسرعة.

كل هذا حدث في لحظات لم تستوعب
فيها نور شيئاً. شعرت بالرعب يدب في
أوصالها، وانهمرت دموعها، وهمست
باسمه بخوف: أشرف...

الفصل الاربعون والأخير

أبو عبيدة بن الجراح ؛ مواسياً عُمر بن
الخطاب:

هَوْنٌ عَلَيْكَ فَمَا هِيَ إِلَّا دُنْيَا فَأَيَّامٌ
وَنَمَضِي؛ فَلَا تَحْزَنْ فَكُلْ مَا فِيهَا مُتَعَبٌ،
وَكُلْ مِنْ فِيهَا مُتَعَبٌ، الْحَمْدُ لِلَّهِ أَنَّهَا لَيْسَتْ
دَارَنَا وَلَا دِيَارَنَا وَأَنَّ الْمُسْتَقْرَّ بِجِوَارِ رَبِّ
الْعَالَمِينَ، الْحَمْدُ لِلَّهِ أَنَّهَا دُنْيَا وَسَتَنْقُضِي،
وَعَسَانَا فِي الْجَنَّةِ نَأْسٌ وَيُونُسُ بِنَا،
لَبَّيْكَ إِنَّ الْعَيْشَ عَيْشُ الْآخِرَةِ.

خطى إبراهيم إلى الداخل، وعندما أغلق
الباب تفاجأ بها تركض نحوه وتعانقه
وتهمس بحب:

-والله بحبك أوي يا هيما.

اتسعت عيونه من هول المفاجأة، لكنها
لم تهتم. تبًا للخجل الذي جعلها تنتظره
كل هذا الوقت! قررت الاعتراف بأنها
تهيم به عشقًا منذ وجدته الملجأ الوحيد
لأحزانها. أما هو، فقد أدرك الموقف،
فرفع يده ليعانقها مبتسمًا، وهتف
بمساكسة:

-كنت هعمل كده بس أنت استعجلتي.

هتفت بمرح وسعادة: مش مشكلة، يلا
طوحنى.

رفعها عن الأرض ودار بها حول نفسه،
وهي تتشبث به. ارتفعت ضحكاتها
بسعادة، وكأنها سيمفونية عذبة،
وشاركها الضحك. وبعد دقيقة أنزلها،
لكنه لم يتركها. نظر في عينيها البنية

بعشق، ثم قبل جبينها ووضع رأسها
على صدره وقال:

- عنيني حلوين أوي.

ابتعدت جيهان عنه وهتفت بمرح:
عاوزه ورد يا إبراهيم.

ضحك إبراهيم وقال بمرح: يابنتي اهدي
شوية، خليني أتكلم.

صاحت بضيق مصطنع: نعم ياخويا؟
يعني أنا أقولك بحبك يا هيمما، وانت
تقولي بنتي؟ أنا عندي جفاف عاطفي
ومش هتحمل أكثر من كده! أنا عايزك
تقولي: حبيبتني، روعي، عمري، حياتي،
قلبي، أي حاجة من بتاعت العيال
الصايعين دي.

ارتفعت ضحكات إبراهيم بعدم تصديق،
وقال بصعوبة:

-حاضر، هـكون من العيال الصايعين.
وبعدين بيقولوا الاهتمام مبيطلبش، بس
أهو بيطلب عادي.

أشاحت بيدها بلا اهتمام وقالت وهي
تجلس على الفراش:

-سيبك من الناس المتخلفة دي، معايا
هيطلب عادي. تعال بس اقعد.

جلس على مقعد بجوار الفراش،
والبسمة تزين وجهه. فقالت:

-اسمع يا دوك، عشان الجواز دي تتم
على خير، عايزك تعمل اللي هقولك
عليه.

رد بثبات وهو يحاول إخفاء بسمته من
طريقتها:

-سامعك، قولي عايزة إيه؟

أردفت بجديّة تتنافى مع حديثها: عايزك
تشجعني يعني كل ما أتحرك من جنبك
تقولي: شاطرة يا جيبي. لو صحيت من
النوم، تقولي: شاطرة يا جيبي. لو
شربت مية، تقولي: شاطرة يا جيبي. لو
غسلت وشي، تقولي: شاطرة يا جيبي.
لو اتنفست، تقولي: شاطرة يا جيبي.

كتم ضحكة كادت أن تفلت منه، وتساءل
بثبات:

- طب لو جهزتي الفطار، أقولك إيه؟

اتسعت عينيها وهتفت باستتكار: فطار!
أنت ليك عندي إنني أجهزلك وجبة

واحدة، وانت تختار غدا ولا عشا. لكن
فطار؟ مستحيل! مين العبيط اللي يصحى
الصبح يجهز أكل؟ وكمان تجبلي حاجة
حلوة وانت جاي، وتقولي: شاطرة يا
جيجي.

رد بضحك: الحمد لله، اطمنت على
مستقبلي. شاطرة يا جيجي.

ردت بمرح: برافو عليك يا هيمما.

نهض إبراهيم واقترب منها وقبّل
وجنتها قبلة سريعة، ثم عاد يجلس
بهدوء كأنه لم يفعل شيئا. وضعت
جيهان يدها على وجهها بخجل، فقال
إبراهيم بهدوء:

-الحمد لله أنك سكتي. سبيني أتكلم بقى،
أنا بقالي سنة مستني اللحظة دي.

فرقت بين أصابعها لتفتح عينيها وترى
وجهه من بينها، ثم عادت لتضم أناملها
وتغمض عينيها. فقال بهدوء:

-نزلي إيدك يا عمري وافتحي عيني،
الكسوف مش لايق عليك بعد الحظن
اللي قابلتيني بيه.

فتحت عينيها وهتفت بضيق: أنت قليل
الأدب.

ابتسم وقال بهدوء: أنتِ أول حد يقولي
إني قليل الأدب.

ردت بمرح يتنافى مع خجلها:

-نحن نختلف عن الآخرين يا دوك.

هتف بمراوغة ليزيد من خجلها: واللي

أنتي عملتيه من شوية كان اسمه إيه؟

أردفت بحدة: إبراهيم!

- عمره كله.

ابتسمت له، فاقترب منها وجلس
بجوارها وعانقها، وقال:

-حببك يا عمري، اللي ابتدا بيكي
وهينتهي بيكي.

ردت عليه بهمسة وهي تتلذذ بنطق
اسمه:

-إبراهيم، اسمك حلو أوي. أنا مش
عارفة الناس اللي اسمها مش إبراهيم
عايشة إزاي.

ضحك وقال: لو إبراهيم حلو فهو أحلو
بيكي.

وصلت السيارة التي تحمل نور إلى
وجهتها. هبط السائق وحملها بين

ذراعيه، ثم ولج إلى المبنى، وبعدها إلى
الشقة المنشودة. ما زالت نور تحاول
الصراخ، ولكنه كمن فمها. أجلسها على
الأريكة، ووقف خلفها ليحرر فمها
ويرفع الشريط عن عينيها. صاحت نور
بجنون وهي تنهض:

-يا بن الك... يا حق...

توقفت عن السب بصدمة عندما رآته
يقف، وهو يغمض عنيه بيأس منها،
وهتف بسخرية:

- كمل يا قلبي، سكتي ليه؟

ردت بتوتر وهي تتراجع للخلف عندما
تقدم نحوها:

-آأ أشرف، أنت... أنا ما كنتش عارفة
إنك أنت.

أردف أشرف بسخرية: وفكرتي مين يا
قلبي اللي هيقدر يخطفك وأنا موجود؟
صاحت في وجهه بغضب:

- وأنا أعرف مين إنك أنت؟ وبعدين،
إزاي تعمل كدا أصلاً؟

تراجعت للخلف وهي تتفحص المكان.
رأت الشقة مزينة بطريقة احترافية
بالبالونات الملونة في كل الأركان،
والسفرة المليئة بجميع مأكولاتها
المفضلة، مع الإضاءة الخافتة. زادت
صدمتها، ثم نظرت إليه بغضب مما
توصلت إليه، وهتفت بعصبية بالغة:

-استنى، استنى... أنت جايبني هنا
عشان تستفرد بيا وصارف ومكلف
نفسك؟ لا يا باشا، مش نور المهدي اللي

حد يضحك عليها! أنا أقلب الدنيا كلها لو
فكرت تقرب مني سنتي.

اتسعت عيون أشرف بصدمة مما قالت.
ضحكت نور بسخرية وهي تقول:

-إيه يا باشا؟ فكرتني غبية ومش هفهم
اللي أنت مخطط له؟ لا يا باشا، فوق! أنا
نور المهدي.

رد أشرف بانفعال، وهو يمسح وجهه
بكف يده:

-والله ما حد غبي غيري، عشان فكرت
أعمك مفاجأة! أنا اللي غلطان.

هتفت نور بتعجب: مفاجأة؟

أردف أشرف بسخرية، وهو يجلس على
الأريكة:

- آه يا أختي، مفاجأة! وبعدين، إيه كل ما
أكلمك تقولي هستفرد بيكي؟ أنتي مراتي
يا نور يا مهدي، وبعد شهرين هتكوني
مراتي قولاً وفعلاً.

اقتربت نور منه بحرج، وهي تهتف
بصوت منخفض:

- ما أنت اللي جايني بطريقة عجيبة،
عايزني أفكر إزاي؟

أشار لها بالجلوس بجواره. جلست
بخجل طفيف، فاقترب منها هو وعانقها،
وهتف بهمس:

- حبيبتي، أنتي مراتي يعني مستحيل
أذكي. اطمني يا وزه.

استكانت بين ذراعيه لدقائق، ثم ابتعدت
عنه بخجل ونهضت متجهة نحو الطعام:

-أنا جعانة أوي.

تناولت قطعة من البيتزا ونظرت إليه، ثم
تساءلت وهي تشير للطعام:

-هو مين اللي جهز كل ده؟ وأنت كنت
معانا؟

نهض واقترب منها، وقال وهو يجذب
القطعة من يدها ويتناولها بتلذذ:

-طلبت دليفري، وخلعت نص ساعة
جهزت الحاجة في الشقة، وبعدها جيت
أخذك.

هزت رأسها وجلست تتناول الطعام،
وهو يتابعها بعشق إلى أن انتهت. نهض
ليشغل لها موسيقى رومانسية ويرقص
معها. صدحت كلمات الأغنية، فقدم لها
كف يده. وضعت يدها بيده، فاجتذبتها

إليه. تحركا بخفة، وهو ينظر لعينيها
بحب:

«إو عديني

لو زعلتي مرة مني تعرفيني

لو جرحتك غصب عني تحسسيني

ماتشيليش جواكي حاجة

تحكي ليا كل حاجة

لما هفهم هبقى أحسن صدقيني

إو عديني

لو نسيت يا حبيبتي نفسي تفوقيني

لو خدتي الدنيا منك رجعيني

لو في لحظة زاد غروري

اشتكي لومي وثورني

بس اوعي في يوم تروحي وتسيبيني

أنتِ قلبي وأنتِ روعي وأنتِ عيني

حد عايز أعيش معاه لآخر سنيني

أنتِ بالنسبالي مش حب في حياتي

أنتِ كل حياتي فعلاً افهميني»

كان يردد كلمات الأغنية بصدق، وهي

تتمايل بين ذراعيه. عندما انتهت، حملها

وَدَارَ بها بسعادة. وضعها بجانبه، ثم

وضع جبينه على جبينها، وهمس بحب:

-أوعديني يا نور إنك ما تضيعينيش

مني.

نظرت إليه بتعجب، وما زالت الابتسامة

تتير وجهها. أكمل أشرف حديثه:

-لو ضيعتي مني، هضيع من نفسي.

بعد مرور شهرين وفي إحدى القاعات

المخصصة للزفاف، وفي إحدى الغرف

الخاصة بتجهيز العروس، كانت الفتيات
يجلسن وهن يرتدين ثياب الزفاف،
فالיום هو يوم لقاء القلوب، اليوم الذي
انتظره الجميع على أحر من الجمر.
وقفت الفتيات ينظرن إلى بعضهن
بسعادة بعدما وضعت خبيرة التجميل
لمساتها الأخيرة. الآن ينتظرن دخول
أول أب ليسلم ابنته لزوجها.

اقتربت نور منهن وهتفت بمرح: تعالى
في حضن أخوك فوزي يا فواز.

اقتربوا منها وعانقوها بحب، وكل
واحدة منهن تتمنى السعادة لرفيقات
دربها. وقد كانت معهن في الغرفة
سلمى، وديالا، وحنان، ونيرة، إلى أن
وصل الأب الأول وهو علي. تحركت

بسملة نحو والداها ليقبل جبينها بسعادة،
وهو يرى صغيرته أصبحت عروسًا،
واليوم سيسلمها بيده لزوجها. هتف
بنبرة حزينة لفراقها:

-ربنا يسعدك يا عز أبوكي.

بسملة، التي تعلم ما يشعر به أبيها عن
ظهر قلب، هتفت بنبرة شبه باكية:
-وأنت كمان هتوحشني يا بابا.

جذبها إلى أحضانها، متشبثًا بها كأنه لا
يريد أن تغادر. لكنها ستغادر لا
محالة، فابتعدت عنه لتضع يدها بيده،
وهبط بها الدرج الذي يقف تامر عند
نهايته. وعندما رآها تامر، لم ينتظر أن
تصل إليه، بل صعد خطوات الدرج بلهفة

ووقف أمامهم ليبتسم علي وهو يقول لـ
تامر:

-خلي بالك منها، دي زينة بيتي وكل ما
ليا، واللي يزعلها امحيه من على وش
الأرض. بنتي لو غلظت، تعالى حاسبني
أنا، لكن هي، أوعى توجّه لها كلمة
واحدة تزعلها.

هتف كلمته الأخيرة بتهديد صريح،
فابتسم له تامر وهتف بحب:

-هحطها في عيني وفوق رأسي. من
اللحظة اللي اتكتبت فيها على اسمي وأنا
اعتبرتها بنتي قبل مراتي اللي نورت
حياتي بوجودها، ومستحيل أسمح لحاجة
تزعلها.

اتسعت ابتسامة بسملة، وربت علي علي
كتف تامر، ووضع كف بسملة في كفه.
اقترب منها تامر وقبل جبينها، ثم تحرك
بها جهة المكان المخصص للعروسين.

صعد عثمان إلى الأعلى، فرأى ابنته
وابنة شقيقته، فابتسم لهما واقترب من
نور، عانقها وهتف بحب:

-مبروك يا نور.

ردت نور بحب: الله يبارك فيك يا خالو،
عبال حجك.

تركها ووقف أمام ابنته ليجذبها إلى
أحضانه وربت علي ظهرها بحنو وقال:
-ألف مبروك يا جيهان، وربنا يسعدكم.

ردت جيهان وهي تتشبث في والدها: الله
يبارك لي فيك يا بابا.

ثم دارت بالفستان حول نفسها وهتفت
بمرح:

-إيه رأيك فيا وأنا عروسة؟ حلوة صح؟
ابتسم لها وأردف: زي العسل، ويختمه
بيكي.

وضعت يدها في يده وقالت: طب يلا
بسرعة عشان إبراهيم مسنتي من
زمان.

ضحكت الفتيات على لهفتها، وهبط
عثمان بها إلى الأسفل. عندما رآها
إبراهيم، الذي كان يرتدي بدلة أنيقة
باللون الأبيض ليكون مختلفًا عن بقية
الشباب، قالت له بضيق:

-إبراهيم، أنا مش قولتلك مبحبش اللون
الأبيض؟ دلوقتي توسخه وتطلع عيني
في غسيله.

لم يتفاجأ من حديثها فقد توقعه، وهو
يختار البدلة، فقد أراد أن يثير جنونها
لكي تنسى خجلها منه. أرف عثمان
بيأس من ابنته:

-أنا المفروض أقولك خلي بالك منها،
بس عشان أنا عارف بنتي هقولك خلي
بالك من نفسك، وربنا يعينك.

رد عليه إبراهيم بهدوء: جيهان فرحة
عمري، وهتكون تاج فوق رأسي طول
العمر لأنها كل العمر.

جذب إبراهيم يدها وتحرك بها نحو
المكان المخصص لهما، وما زالت هي
عابسة الوجه. همس لها:

-افردى وشك، لاحسن يقولوا مخصصة
على الجواز.

نظرت له بتهديد، لكنه ابتسم لها، لتبادلته
الابتسامة بأخرى وقالت بمرح:

-أنا عاوزة ورد يا إبراهيم.

في تلك الأثناء، كانت العائلات الأربعة
يقفون أسفل الدرج، وعندما تظهر
العروس، يصفقون لها ويلقون عليها
الورد ويباركون للعروسين. وبعد ذلك،
يتوجه العرسان إلى المكان المخصص
لهم. كان فارس يقف بينهم ينتظر دوره،

وبجواره والد دعاء. مال عليه فارس
وهمس:

-ها يا عم مصطفى، ناوي تطلع تجيب
دعاء، ولا أروح أجيبها أنا؟

ضحك مصطفى عليه، فمنذ أن أخبرتهم
الفتيات أنهن انتهين من التجهيز، وهو
يحاول الصعود، لكن سبقه الآخرون.
الآن كان على وشك التحرك، فرأى
المهدي وابنه يتخطون درجتين من
السلم، فنظر له بقلة حيلة وكم ضحكته
على معالم الحزن التي تربعت على
وجهه.

في الأعلى...

وصل محمد إلى شقيقته نور، التي
اقتربت منه لتحضنه عندما فتح
ذراعيه، لكنها توقفت عند سماعه يقول
بمشاكسة:

- الحمد لله يارب، أخيرًا هخلص منها
وهاخذ أوضتها بدل ما أنا نايم في
الشارع.

نظرت له بغضب واقتربت منه مهددة:

- طب فكر تقرب من أوضتي وأنا أخلي
جوزي يحبسك. هو انت فاكر إيه، البلد
مفيهاش قانون؟

ابتسم لأنه نجح في إثارة غضبها، ثم
جذبها إلى أحضانه وقال بحب:
- ألف ألف مبروك يا نور.

تلاشى غضبها وهي تقول: الله يبارك
فيك يا حموه، عبالك.

ابتعدت عنه وألقت نفسها في أحضان
أبيها، وقالت بحب:

-هتوحشني أوي يا بابا.

ربت والدها عليها بحب وقال: وأنتي
هتوحشيني أكثر يا نور. البيت هيضلم
من غيرك.

تحرك بها إلى الأسفل، حيث كان أشرف
ينتظرها خالي اليمين. فقالت بتساؤل:

-إيه ده؟ أنت جاي فاضي؟

لم يفهم أشرف مقصدها، فرد بسؤال:
أمال هاجي بايه؟

ردت بضيق وهي تندب نصيبها: يعيني
عليكي يا نور وعلى حظك. كل العرايس

بيتجبلها ورد ويتقال لها: انتي وردة
حياتي. وأنا جاني إي ورا وإيد قدام.
تدخل المهدي مازحًا وهو يقول لـ
أشرف:

-بص يا بني، أنا من امبارح بفكر
هقولك إيه في اللحظة دي. وملقتش غير
إن ده ابتلاء من ربنا، ولازم تصبر
عليه. ربنا بيبتلنا الابتلاءات تكفيرًا
لذنوبنا أو عشان تقربنا من الجنة. فربنا
يتوب عليك.

ختم حديثه بابتسامة وابتعد عنهم، ليقول
محمد بمرح:

-على فكرة يا أبو نسب، البضاعة
المباعة لا تُرد ولا تُستبدل.

أنهى حديثه بغمزة لشقيقته، ثم تركهم.
نظر أشرف لنور بغيظ وقال:

-لسانك عايز قص. لو صبرتي شوية،
هيحصل إيه؟

ردت بضيق: قولتك هاتلي ورد، وأنت
مجبتش.

هتف من بين اصطكاك أسنانه: جبت يا
أختي، بس نسيته في الكوشة. يلا يا
قلبي.

أردف جملة الأخيرة بحب وهو يشير
لها أن تتحرك معه. فابتسمت ووضعت
يدها بيده. تحرك أشرف مع نور متجهين
نحو الكوشة، وسط تصفيق الأهل
والأصدقاء الذين لم يتوقفوا عن التهليل
والتصفيق.

وفي الأعلى، وصل مصطفى إلى دعاء
التي وقفت تنتظره بفساتانها الأبيض
الجميل، وإلى جوارها شقيقتها. أقترب
منها مصطفى بابتسامة واسعة، ثم قبل
جبينها وجذبها إلى أحضانه، وقال بحب
أبوي:

-خلي بالك من نفسك يا دعاء، وخليكي
فاكرة إنك ست البنات، ومفيش زيك.
كفاية عنكي الحلو اللي ورثاها من
أمك، الله يرحمها.

انهارت دموع دعاء ولم تستطع منعها
من الانهمار، وقالت ببكاء:

-أنا بحبك أوي يا بابا. خلي بالك من
نفسك عشان خاطري.

حاولت شقيقتها أن تخفف الموقف،
فقال بضيق:

- ما تعطيش يا دعاء، المكياج هيبوظ!
في تلك اللحظة، اقترب فارس منها
والذي قد صعد خلف والدها وقد سئم
الانتظار ولم يستطع الانتظار أكثر،
أقرب وهي ما زالت بين أحضان أبيها.
جفف دموعها بمحارم ورقية، وقال
بصوته الرخيم:

- يلا يا حبيبتى.

ابتعدت دعاء عن أبيها، ليقرب مصطفى
ويجذب ابنته الأخرى إلى أحضانه، ثم
قال لفارس بنبرة تحمل الكثير من الحب
والوصية:

-خلي بالك منها يا فارس. دعاء غلبانة
وطيبة، وأنا معنديش أغلى منها هي
وأختها.

رد عليه فارس بحب وصدق: وأنا كمان
معنديش أغلى منها. لو الدنيا كلها
اتحطت في كفة ودعاء في كفة، هختار
دعاء. وأنا متأكد إنها هتغنيني عن الدنيا
كلها.

اقترب فارس من دعاء، وقبل جبينها
برفق، ثم أمسك بيدها وتحرك بها إلى
الكوشة.

في القاعة

اشتعلت الأجواء بالغناء والرقص، بعد
أن انضم الجميع إلى الحفل. كان تامر قد

أعد فقرة خاصة مليئة بالمفاجآت، حيث
قام الأصدقاء والعائلات بالمشاركة في
رقصات جماعية.

اقتربت نور من شقيقها محمد وهمست
له بشيء أثار دهشته. سألها باستنكار:

-بتهزري ولا بتتكلمي جد؟

ردت عليه وهي تبسّم: جد طبعًا، يلا
روح عشان خاطري.

تحرك محمد باستسلام نحو الـدي جي،
ليطلب الأغنية التي أرادتها نور. مع بدء
الموسيقى، أشارت نور إلى صديقاتها أن
يقفن بجوارها. وقفت نور أولًا، وضعت
يدها في يد دعاء، ثم بسملة، وبعدها
جيهان.

تحرك كل عروس وعريس نحو بيوتهم
الجديد، والفرحة تملأ القلوب. كانت هذه
الليلة بداية جديدة، مليئة بالأمل والحب،
وكأنها وعد من القدر أن السعادة
تنتظرهم طالما كانت المودة والرحمة
هي الأساس.

كما قال تعالى:

{وَمِنْ آيَاتِهِ أَنْ خَلَقَ لَكُمْ مِنْ أَنْفُسِكُمْ
أَزْوَاجًا لِتَسْكُنُوا إِلَيْهَا وَجَعَلَ بَيْنَكُمْ مَوَدَّةً
وَرَحْمَةً}.

يصدق القرآن الكريم من منزل حسني
بصوت مرتفع، ليجعل القلوب تخشع
لذكر الله. فقد أراد حسني أن يكون
الزفاف خاليًا من المعازف، واقترح على
ابنه ذلك؛ لكن ابنه لم يرضخ وهو يقول

إنّها ليلة في العمر. ليته يعلم أن تلك
الليلة سيحاسب عليها.

وقفت السيارة التي يجلس بها تامر
وبسملة، فهبط هو أولاً وبعده بسملة
التي لم يترك يدها كأنه يخشى أن تكون
وهمًا. تحرك بها إلى الداخل، وعندما
وصل إلى الدرج حملها بين ذراعيه
وصعد بها إلى شقته، وهي أخفت
وجهها في صدره بخجل. ولج إلى شقته
وأغلق الباب خلفه، وأردف بابتسامة:
-مبروك عليا أنتِ.

نظرت له بخجل، فتهاوى هو في عيونها
السوداء. وقف يتأملها بعشق؛ فستانها
الأبيض الذي تمنى كثيرًا أن يراها
ترتيبه له، وقد تحقق الحلم. الآن تقف

أمامه بجمالها الذي يفتن الزاهد، فما
بالك بقلب تسكنه هي؟ وما زاد جمالها
حجابها الأبيض الذي يخفي خصالاتها،
وفوقه تاج جعلها تبدو ملكة على عرش
قلبه.

تأوه تامر بحب وهو يقربها منه: آه يا
ربي... الجمال ده كله ليا أنا.

ابتسمت بسملة بخجل، وهي تبتعد عنه
وهتفت بتوتر وهي تنظر إلى الأرض:
- هدخل أغير عشان نصلي.

جذب يدها، وأردف وهو يتحرك بها جهة
الركنة وأجلسها وجلس بجوارها، وما
زالت يدها تقبع بين يديه، وقال:
- هنتكلم شوية وبعد كده نصلي.

هزّت رأسها بخفوت ولم تُجب، ليقول
هو بصدق:

-أنا عارف إني كنت وحش وعملت
حاجات كثير وحشة، بس أقسم لك بربي
إني من اللحظة اللي حسيت فيها
بمشاعر ناحيتك وأنا قطعت علاقتي بكل
اللي أعرفهم. يمكن أنا مش الشخص
اللي اتمنيته، بس أوعدك إنك مش
هتدمي على قرارك. واوعي في يوم
تقارني نفسك بواحدة منهم، لأنك مفيش
منك اتنين.

قال حديثه الأخير لأن بسملة حاولت أكثر
من مرة أن تسأله عن الفتيات اللاتي
كان يعرفهن قبلها، ولكنها تراجعته. وقد

فهم هو ما يدور في خلدنا، لذلك هتف
بتلك الجملة.

فقلت بسملة بتردد:

-بس أنت عرفت بنات كتير أوي قبلي...

قاطع حديثها وهو يرد بمرح: طبيعي يا
حياتي، عشان أوصل للقمر لازم أعدي
على النجوم.

في شقة فارس

كانت بين ذراعيه وهي تتحرك معه برقة
على صوت الموسيقى، ليضع جبينه
على جبينها ويقول:

-مش مصدق أنك بين أيديا، أكيد أنا
بحلم صح؟

هزّت رأسها بنفسي وأردفت بحب رغم
خجلها:

- لأ، أنا اللي مش مصدقة أنك نصيبي.
أنت جميل أوي يا فارس، وأنا بحبك
أوي.

قربها منه أكثر وقال بعشق: وفارس
مجنون فيكي يا حبيبة قلب فارس،
وخليكي واثقة أن الجمال اتخلق منك
وليكي.

استنشق خصلات شعرها بعشق بعدما
حرّرها من الحجاب، وهتف بهمس:
-روحي اتوضي عشان نصلي.

بعد دقائق، خرجت وهي ترتدي أسدالاً
أبيض وتتحرك نحوه بخجل. وضع هو
سجادة الصلاة، وعندما اقتربت منه، قبل

جبينها ثم ابتعد عنها وبدأ الصلاة وهي خلفه. شعور رائع أن تتشارك مع من تحب الصلاة.

بعد دقائق، أنهى الصلاة ووضع يده فوق رأسها وأردف:

-بسم الله الرحمن الرحيم. اللهم إني أسألك خيرها وخير ما جبلتها عليه، وأعوذ بك من شرها وشر ما جبلتها عليه. اللهم اجعلها زوجتي في الدنيا والآخرة. اللهم بارك لي فيها واجعلها خير الزوجة الصالحة.

وبعدما انتهى، وضعت دعاء يدها على رأسه وقالت:

-بسم الله على قلبك حتى يهدأ، بسم الله على روحك حتى تطمئن، بسم الله

الرحمن الرحيم. اللهم إن كنت خيرًا له
فاقربه مني وقربني منه، وبارك لنا.
وإن كنت شرًا له فأبعدني عنه، ثم قرب
له الخير حيث كان.

جذبها إلى حضنه بحب، فتلك الفتاة هي
أفضل النعم التي أنعم الله عليه بها،
وسيظل إلى آخر عمره يشكر الله على
وجودها.

وكالعادة، عندما تشعر نور بالخجل
والتوتر، تفعل أشياء جنونية. وقد قامت
بتشغيل إحدى المهرجانات ووقفت
ترقص عليها بطريقة عشوائية جعلت
أشرف ينظر لها بيأس وهو يقول
بضيق:

- على فكرة يا قلبي، النهارده فرحنا مش
فرح ابن خالتك وانتي بتحيه.

أشارت له بلامبالاة وأردفت: أسكت
عشان مرضتتش تخليني أرقص في
الفرح.

تحرك اتجاهها وأردف بخبث: إحنا
ممكّن نشغل أغنية رومانسية ونرقص
مع بعض.

انقلبّت تعابير وجهها للاشمئزاز
وأردفت:

- يع، مليش في المحن.
هتف ساخرًا: بس ليكي في الهبل ده،
صح؟

هزت رأسها بسعادة ولم ترد عليه،
ليغلق الأغاني ويجذبها إليه. صممت

بخجل وهو يطوف بعينه بين وجهها
ويضع يده يتحسس بشرتها الناعمة،
ليزيد خجلها بشكل ملحوظ، وأردف:
-نورتي حياتي يا وزرة.

أغمضت عينيها بخجل، ليقبل هو عينيها
بحب. ابتعدت عنه بخجل شديد وهمست:
-أشرف...

ليقول بعشق: قلبه.

ردت بتوتر وهي تبتعد عنه: هروح...
آآ.

وأشارت إلى الغرفة. ضحك على خجلها
وأشار لها، فركضت بسرعة وارتفعت
ضحكاته عليها. صفت الباب بقوة، مما
زاد من ارتفاع ضحكاته بسعادة. فقد
أصبحت نور مسكنه الوحيد، وهو

سيحرص على الحفاظ عليها لآخر نفس
يخرج منه...

في منزل إبراهيم

صلى إبراهيم بجيهان وجلس معها على
الأريكة وهي تستوطن أحضانها. جلسا
بصمت، وهو يهمس في داخله أنه لا
يريد من الدنيا شيئاً بعدما حصل على كل
شيء، ويقصد بالكل شيء جيهان، الفتاة
التي رآها أكثر من مرة وظن أنها عابرة
كغيرها، ولم يعلم أنه سيسقط في بحار
عشقها. الفتاة المتهورة التي رأت طفلاً
صغيراً في الطرقات فرّق قلبها ولم تفكر
في كرامتها وهي تأتي إليه طالبة منه
الزواج لكي تتبنى الطفل وتكون حامية

له من قسوة العالم. ولم تعلم أنها لم تنقذ
الطفل فحسب، بل أنقذت رجلاً زهد
الحياة وبغض الوحدة وظن أن حياته
ستنتهي ولن يتغير شيء، إلى أن أتت
وغيرت كل شيء.

ابتعدت جيهان عنه وقالت: إبراهيم، أنت
ناسي حاجة؟

أعادها إلى مكانها وأردف:

- لأ، ومنتحركيش، أنا مرتاح وانتني في
حضني.

ابتسمت بخجل وهتفت بخفوت: هياما.

رد بحب: إيه يا عمري؟

ابتعدت عنه وأردفت بمرح: أنا عاوزه
ورد يا إبراهيم.

حملها بين ذراعيه وهو يهتف بمراوغة:

-الأوضة جوه مليانة ورد، والورد
يستاهل الورد.

وها نحن وصلنا إلى النهاية، ولن نقول
إلى اللقاء فهناك لقاء أخير. نلتقي في
الخاتمة، إن شاء الله، من رواية أربعة
تساوي واحد.

الخاتمة

ثِقْ بِأَنَّ اللَّهَ سَيَنْصُرُكَ نَصْرًا عَظِيمًا ، وَ
سَيَجْبِرُكَ جَبْرًا لَمْ تَحْلَمْ بِهِ ، وَمَا هَذَا
التَّأخِيرُ إِلَّا لِحِكْمَةٍ لِيَخْتَارَ لَكَ أُنْسَبَ
الأَوْقَاتِ الَّتِي تَكُونُ فِيهَا سَعِيدًا جَدًّا ،
وَتَتَمَنَّى لَوْ أَنَّ لَكَ جَنَاحَانِ تَطِيرُ بِهِمَا مِنْ
شِدَّةِ الْفَرْحِ بِإِذْنِهِ تَعَالَى

-أنتِ يا مصيبيتي السوداء، تعالي هنا.
وعندما لم تجد ردًا من المصيبة
خاصتها، صاحت بأعلى صوت لديها
باسمها، والشرار ينطلق من عينيها:
-دعاء!

أتت دعاء بضيق وهي تهتف بتأفف،
ووضعت يدها في خصرها وقالت:

-نعم يا ماما، عاوزة مني إيه؟ هو مفيش

غيري في أم البيت ده؟

فعلت جيهان المثل ووضعت يديها في

خصرها وأردفت:

-هو أنا يا بت مش قلتك صحي أخوكي

وخليه يلبس عشان اتأخرنا؟

نظرت دعاء، صاحبة التسع سنوات، إلى

يدها التي لا تحمل ساعة، وأردفت:

-لسه بدري، وبعدين إحنا لسة هنستتي

هيما لما يجي.

جذبتها جيهان من مرفقها بغضب

وهتفت من بين اصطكاك أسنانها:

-عارفة لو قلتيله هيما تاني، أنا هخلص

عليكي وريح الدنيا منك! محدش يقوله

هيما غيري، سامعة؟ ويلا روجي البسي

وصحي أخوكي عشان لو اتأخرنا أكثر
من كده نورة هتقتلنا.

تركت يدها لتتحرك دعاء بتأفف وتتمتم
بضيق:

- نورة تقتلنا، نورة تقتلنا.. إنتي
بتخافي منها أكثر من بابا.

استمعت جيهان لها فصاحت بعصبية:

- وهخاف من أبوكي ليه يا آخر صبري؟

في ذلك الوقت، ولج إبراهيم إلى الداخل
فوصل له ما قالت جيهان. تنهد بتعب
وهو يقول بهمس:

- والله إنتم الاتنين آخر صبري.

رأته دعاء فركضت إليه بلهفة وهتفت
بحزن مصطنع:

-بابا، اتأخرت ليه؟ مراتك كانت عايزة
تقتلني!

انحنى إبراهيم إليها وعانقها بحب:
حبيبة بابا أنتي وأول فرحتك، ماما
عملتك إيه؟

اقتربت جيهان منهم وأبعدتهم عن بعض
بعنف ووقفت في المنتصف وقالت
بضيق:

-أولاً أنا أول فرحتك مش هي، ثانيًا
اسألها هي عملتي إيه؟ مش أنا عملتها
إيه؟

زفر إبراهيم عدة مرات لكي يهدأ وينتهي
هذا الروتين الذي اعتاد عليه، فمناذ
تخطت دعاء عامها الرابع أصبحت
زوجته تراها عدوتها، ولا تصدق أنها

نسخة مصغرة منها. بل يجن جنونها إن
أخبرها بذلك.

تتهد إبراهيم وسأل: عملتي إليه لماما يا
دعاء؟

هتفت دعاء بيروود لتستفز جيهان: ولا
حاجة يا بابا. كان عندها فستان عاجبني
قولتها تجلبي زي، مرضيتش، رحى
قصيته.

اتسعت عينا إبراهيم بصدمة وكاد أن
يتحدث، لكن جيهان أوقفته بإشارة من
يدها ونظرت إلى ابنتها بشر:
-كملي.

ابتسمت دعاء واقتربت من والدها
لتختبئ خلفه عند اللزوم، وأردفت:

-وكسرتها المجد اللي هي بتحبه ومش
بترضى تخليني أشرب فيه.

اتسعت عينا جيهان واقتربت منها بشر.
لم تكن تعلم أنها فعلت ذلك، ليوقف
إبراهيم أمام ابنته ويمنع جيهان من
الاقتراب، وهو يقول بهدوء وبسمة:

-معلش يا عمري، حقك عليا. هعمالك
واحد أحسن منه.

أردفت جيهان بغضب: اطردها من البيت
أو وديها أي ملجأ! عندنا غيرها، لكن
دي متقدش في بيتي.

ابتسم إبراهيم بيأس، فكلما حدثت بينهم
مشكلة تأتي الأخرى وتخبره أن يطردها
من المنزل. قال بلهجة هادئة:

-اصبري يا جيغي عشان خاطري.

خليني أشوف عملت كده ليه.

استدار إلى ابنته وجلس أمامها، وسأل

برفق:

-عملتي كده ليه؟

ردت دعاء بحزن:

-عشان هي قالتلي إنك بتحبها أكثر مني

وإنك تعرفها قبلي.

نظر إبراهيم إلى جيهان التي نظرت إلى

سقف الغرفة كأن الحديث لا يعنيها. عاد

إبراهيم يتطلع إلى ابنته وسأل بحنو:

-وأنتِ صدقتيها؟

ردت عليه بثقة: أيوة، عشان أنت

جبتلها المـج وحطيت عليه صورتك

وصورتها ومعملتليش واحد زيها.

قربها إبراهيم منه وجعلها تستوطن
أحضانها وهتف بهدوء:

-حبيبتي، طبعي أعرف ماما قبلك، لأنني
لو كنتش أعرفها مكنتش أنتي جيتي.
واللي أنتي عملتيه مع ماما غلط. تعالي
اطلبي مني اللي أنتي عايزاه وأنا
أجيبهولك. هو أنا عندي أغلى منكم؟

أبعدتها جيهان عنه وقالت بحنق: ابعدني
يا بت عنه، وملكيش دعوة بيه. ويلايا
إبراهيم، ادخل خد دش وروح هات
حمزة عشان اتأخرنا.

نهض إبراهيم بضيق وهتف: جيهان،
اعقلي شوية. دي بنتك.

ردت جيهان بعناد: لأ، مش بنتي. أنا
بنتي اتبدلت في المستشفى.

أردفت دعاء تؤيدها الرأي: ده حقيقي،
لأن مش معقول أنا حلو ومما تي
وحشة.

نظرت لها جيهان بشر، ليقول إبراهيم
بنفاد صبر:

- أنا تعبت منكم أنتم الاتنين.

نظرت دعاء إلى جيهان بحزن. بادلتها
جيهان النظرة وهي تفكر أن إبراهيم
يعاني بسببهما. وفي ثوانٍ، اتسعت
بسمتها وهتفت بلهفة قبل أن يخرج من
الغرفة:

- إبراهيم!

استدار إبراهيم ليرى ماذا هناك،
وأردف:

- نعم؟

-عاوذة ورد يا إبراهيم.

-عاوذة ورد يا إبراهيم.

عبارة اعتاد سماعها منذ عقد قرانه
على معشوقته، والآن أصبح يسمعها من
كليهما، خصوصاً صغيرته التي أصبحت
نسخة من زوجته. ابتسم لهم بيأس
وفتح ذراعيه لتركض إليه دعاء،
ويعانقها ويقبل وجنتها، ثم ابتعد عنها
ليقترب من جيهان ويعانقها.

هتفت بأسف: آسفة لأنني تعبتك.

هتف بحب وهو يقبل جبينها: تعبك راحة
يا عمري.

ارتفع صوت صراخ الصغيرة التي
تخطت عامها الأول منذ شهرين، لتبتعد

عنه جيهان وتتحرك إلى غرفة ابنتها
وهي تقول:

-حضرتك الطقم اللي هتلبسه على
السريير. وخلي المصيبة اللي جنبك
تروح تصحي الغيبوبة من أوضته.

ابتسم إبراهيم وهو يتذكر ما مر في
العمر. لقد مر عشر أعوام على زواجهما
ولم يندم لحظة، رغم طباعهما المختلفة.
فهو شخص هادئ يحب العزلة،
ويفضلها عن ضجيج العالم، أما هي
فتمثل ضجيج العالم بحد ذاته. فهي
ثائرة لدرجة مهلكة، لكنه يعشقها
ويعشق كل ما يصدر منها.

فالיום التي تغيب فيه عن المنزل تغيب
عنه الحياة، فصبحت كما لقبها عمره

فلن يحسب عمره قبل وجدها؛ فعمره
يحسب منذ ولوجها حياته، ويتمنى أن
ينتهي برفقتها فهي الوحيدة التي اعطته
دون مقابل، فقد اهدته ثلاث جواهر
يتمنى من المولى أن يحفظهم فالأولى
دعاء اهدتها له بعد زواجهم بعام
ويعشقا فوق العشق عشقاً لانها نسخة
منها، والثاني محمد أتى بعد شقيقته
بعامان ويحبه لأنه نسخة منه في كل
شيء، وما يميزه أنه نائم طوال الوقت لا
يستيقظ إلا لتناول الطعام ويعود للنوم،
والثالثة داليا والتي انارت منزله منذ
عام وبضع أشهر، فحمد الله كثيراً على
نعمة وجودهم في حياته.

كانت تجلس في الشرفة وتحمل كتاباً
تقرأ منه بتركيز شديد وهدوء تتميز به
مثل والديها، إلى أن قطعت والديها
أجواءها الهادئة بقولها وهي تدخل
الشرفة:

- نور، تعالي البسي عشان فارس قرب
يوصل.

رفعت نور عينيها من الكتاب وأردفت
بهدوء:

-حاضر.

تحركت للداخل ثم وقفت واستدارت
تتساءل بهدوء:

-هو بابا كان فين يا ماما؟

ردت دعاء وهي تربت على رأسها: راح
يجيب هدية لنونه.

ابتسمت لها وغادرت من أمامها لتغير
ثيابها بسرعة. ورغم أنها تحب الجلوس
في المنزل، إلا أنها تحب أكثر رؤية
أصدقائها فقد اشتاقت لهن وتود الجلوس
معهن.

ارتدت فستانًا طويلًا بحمالات، لونه
أخضر كلون عينيها التي ورثتها عن
والدتها، وتركت شعرها البني القصير
يرفرف خلفها. ارتدت سلسلة مدون
عليها اسمها وأسماء رفيقاتها الثلاثة،
والتي أهدتها لها نور منذ عدة أيام
بمناسبة عيد ميلادها الثامن، وقد نالت
إعجابها بشدة.

تحركت لخارج غرفتها فوجدت والدها،
كما العادة كلما ولج المنزل، يعانق

والدتها ويقبل جبينها. ابتسمت وهي
تقترب منهما، وعندما رآها فارس،
اقترب منها وحملها وقبل وجنتها وهتف
بحب:

-نور عيوني.

قبلت وجنته هي الأخرى وهتفت: فارس
قلبي.

جملة اعتادت على سماعها من والدتها
وأصبحت ترددها كلما رأت أبيها.

تركها فارس، وقبل وجنتها وقال:
هسيبك شوية وأدخل أغير هـدومي
وبعدها هنطع. تعالي يا دعاء.

جلست بانتظارهم وتحرك فارس برفقة
دعاء لغرفتهم. وبعد دقائق أبدل فارس
ثيابه ووقف أمام المرآة يصفف شعره،

ووقفت دعاء تتابع ما يفعل بحب يزداد
يومًا بعد يوم، وتضاعف أكثر عندما
رزقها الله بنور بعد عامين من
زواجهما لتصبح حياتها مكتملة. فقد
اكتفت بهم ولا تريد شيئًا من الدنيا غير
وجودهم بأمان.

اقترب فارس منها ليقف خلفها ويحاوط
خصرها لتعود من شرورها. عندما
اقترب منها، ابتسمت له وقالت:

-مالك؟، شكل مزاجك رايق النهاردة.

شدد من تمسكه بها وهتف بمراوغة: أنا
طول عمري مزاجي رايق يا حبيبتني.
بس إيه رأيك أتصل بـ مارس ياخذ نور
معاه ونقضي اليوم مع بعض؟

دفشته بعيدًا عنها وأردفت وهي تجذب
يده:

- يا بابا نور، ممكن تخليني أرفع
قضية خلع عليك لو متحركتش حالاً.

تحرك معها للخارج فوجد ابنته كما
تركها. حملها وخرج من شقته وهبط
بها للأسفل، فوجد أخيه أيضًا خارجًا
وهو يحمل ابنه وزوجته معه. حمل ابن
شقيقه وقبله، وبعدها تحركوا جميعًا
للخارج.

صعد مارس سيارته ومعه عائلته
ذاهبين إلى عيادة الكشف الخاصة
بالأطفال، وتحرك فارس جهة سيارته،
وأجلس ابنته الوحيدة في المقعد الخلفي
وفتح الباب الأمامي لزوجته لتصعد،

وتحرك هو جهة مقعد السائق وقاد
السيارة إلى منزل أشرف.

"جواكي نقاء مايقاش موجود

حتى جمالك السر وراه

إنك عاملاه من غير مجهود

مش محتاجة لمكياچ ولا لون

ولا محتاجة لوقفه مرايات

لما بقابلك باكتب ف النوته

إني الساعة تمانية هقابل خمسة بنات:

واحدة لطيفة

واحدة عنيدة

واحدة ضعيفة

واحدة شديدة

وواحدة كأنها لسه ف مدرسة

جواها مرايل وفيونكات. "

كلمات تصدح من هاتف تامر الموضوع
على الكومود، وتقبع بسملة وابنتها أمام
المرآة يرقصان على القصيدة التي لا
تتناسب مع رقصهما. ليدخل تامر الغرفة
برفقة ابنه الذي يرتدي ثيابًا مطابقة له.
حتى اللون الأسود أصبح يفضله، فهذا
الصغير يريد أن يكون مثل أبيه. أغلق
تامر الهاتف وهتف بنفاد صبر:

-اخلاصي يا بسملة بقالك ساعتين
بتسرحي شعرها، ده لو فرحها مش
هتعملي كدا! وأنتِ يا أستاذة جيهان
متلمسيش تلفوني تاني.

هتفت جيهان بضيق: قولي يا جوجو،
وبعدين ما أنت بتشغله لماما دايماً
وتدور وراها في البيت تغنيها حد كلمك.
حدق بها تامر بشر ثم وجه حديثه
لزوجته:

-ربي بنتك ياختي.

انحنت بسملة تقبل وجنتها وقالت: هو
فيه حد متربي زي العسل ده؟

جذب ابنته لخارج الغرفة وهتف: يلا يا
بابا على أوضتك غيري هدومك عشان
نخلص، وأنت يا أستاذة بسملة اخلصي،
قدامكم عشر دقائق، لو مخلصتوش
همشي وأسيبكم.

كاد أن يغادر خلف ابنته لتجذب بسملة
يده وتغمز له بمشاكسة. ليبتسم وينظر
لابنه ويهتف بخبث:

-اطلع يا عمار، استتاني بره لحد ما
أعمل حاجة مهمة وجاي.

تحرك عمار للخارج وأغلق تامر الباب
خلفه، لتقترب منه بسملة بدلال وتعانقه
وتهمس بدلع:

- تيمو.

حاو ط تامر خصرها وهمس: حياة تيمو.

هتفت بدلع وغنج لا يناسب ما تتفوه به:

-جوجو، كسرتك اللابتوب اللي بتشتغل
عليه، وأنا جيت أصلحه وقع مني بالغلط
في المية.

وبعدھا ابتعدت عنه لتري نظراته
المشتعلة ليهتف بغضب:

-نهارك أسود أنتي وبنتك.

ركضت لخارج الغرفة وركض خلفها
وهو يصيح بعصبية بالغة، لتقف خلف
ابنها تحتمي به وتقول:

-أحميني يا عمار، أبوك عايز يقتلني.

هتف تامر بغضب: لو فاكرة أن فيه
حاجة هتحميكي مني يبقى انسي.

تساءل عمار بهدوء: فيه إيه يا بابا؟
وماما عملت إيه؟

رد تامر بعصبية: فيه إن المصيبة اللي
بليت نفسي بيها هي وبنتها كسرت
اللابتوب اللي عليه كل ملفات الشغل.

أردفت بسملة بحزن مصطنع وهي تبعد
عن ابنها:

-أنا مصيبة يا تامر ابتليت بيها؟ شكرًا يا
ذوق، هتصل بابابا يجي ياخدني
ويشتريك لاب غيره.

وتحركات خطوتين وهي تعد بخبث:
واحد... اثنين... وقبل أن تنطق الثالثة،
جذب تامر يدها ليووقفها وهتف بلهفة:

- أنا آسف والله يا بسبوسة، مقصدش،
حقتك عليا. أنا بس اتعصبت لأن كل
الشغل عليه وللأسف مش عامله كوبي،
بس فداكم. أهم حاجة متزعلش.

أردفت بحزن وهي تبعد يده عنها: ولا
يهمك، وبرضو هدفعك تمن تصليحه أو

هجبك غيره. أنا مش هسمح لحد إنه
يزعق فيا أنا وبنتي عشان خاطر فلوس.
وتركته وولجت غرفة ابنتها، ليزفر تامر
بضيق وهو يقول:

-أمك زعلت، فكر معايا نصالحها إزاي؟

رد عليه عمار بحزن: وماما لما بتزععل
بتفضل تعيط، وأنا مش بحبها تعيط،
ودلوقتي أكيد قاعدة تعيط هي وجيهان.

في الداخل، كتمت بسملة فم ابنتها التي
تضحك، وأردفت بحدة:
-اخرسي، هيسمع.

غمزت لها جيهان وقالت: بس طلعتي
جامدة يا ماما، خلتيه هو اللي يقولك
آسف.

قالت بسملة بفخر وهي ترتدي الحجاب،
فكانت تضع ثيابها في غرفة ابنتها لأنها
كانت تخطط لكل هذا بعدما أهلكت هي
وابنتها الجهاز:

- أيوة يا بنتي، هو أنا أي حد؟

أردفت جيهان بحزن: بس بابا صعب
عليا.

أيدها بسملة هي الأخرى وهتفت: وأنا
والله، بس هنعمل إيه؟ ما انتي السبب
ياختي.

طرق تامر الباب وهتف بلهفة وخوف
مصطنع:

-الحقيني يا بسبوسة، عمار أغمى عليه.

كانت تود أن تتدل علىه، ولكن عندما
استمعت لاسم ابنها، سقط قلبها برعب

وركضت للباب وفتحته بخوف وهي
تقول بقلق:

-ماله عمار يا تامر؟

أردف تامر بحزن مصطنع: مش عارف،
وقع وأنا بتكلم معاه.

ركضت بسمة تبحث عنه وهي تقول
ببكاء:

-عمار يا حبيبي، فينك؟

وجدته يجلس على المقعد، ركضت له
بلهفة وتفحصته بنظراتها بخوف:

-مالك يا حبيبي؟

شعر تامر بالندم، فهو يعلم خوفها
الشديد على أحبابها، ولكن ظن أن
خوفها تلاشى منذ زمن. فهي توقفت عن
حديثها عن الخوف، على عكس أول

زواجهما، حيث كانت دائماً تخبره أنها
تخشى كل شيء. فردد بندم:

- هو كويس، بس أنا كدبت عليكى عشان
تطلعي من الأوضة.

ابتعدت عن ابنها الذي احتضنته وهي
تبكي، ثم نظرت لـ تامر وما زالت
دموعها تهبط:

- تكذب عليا في ابني؟ وأنت عارف إن
الدنيا كلها في كفة وهما في كفة تانية.
أردف بندم حقيقي: آسف...

قاطعت حديثه ببكاء: إلا ولادي يا تامر.

غادرت من أمامه وهي تبكي. ربما إن
رأى أحد هذا المشهد سيظن أنها تبالغ،
لكن الحقيقة هي أنها أم تألمت تسعة
أشهر، ورزقها الله بتوأم، ولد وبنيت،

لكن لم تكتمل فرحتها عندما أخبرهم الطبيب أن لديها مشاكل بالرحم ولن تستطيع أن تتجب مرة أخرى، فإن حدث، سيكون سبباً في وفاتها. ولم تتطبه معاناتها هنا، بل علمت أن ابنها لديه ثقب بالقلب ويحتاج إلى جراحة، وعندما تخطىء العام السابع من عمره، تم إجراء العملية ونجحت بفضل الله وأصبح بخير، ولكنها ما زالت تخشى عليه من نسمة الهواء.

نظر تامر لأولاده نظرة جعلتهم يعلمون ما يريد والدهم، فركضوا الاثنان وهو خلفهم إلى غرفتها. وجدوها مستلقية على الفراش، فاقترب منها عمار ويدغدغ خصرها بأنامله حتى ضحكت.

وفعلت جيهان المثل لترتفع ضحكاتها
تملاً الغرفة. وشاركتها أولادها الضحك،
وتامر يقف عند الباب يتابعهم بسعادة.
وبعد دقائق، غادروا المنزل وتوجهوا
إلى منزل أشرف.

تسألت بهدوء وهي تحمل صغيرها:
- أشرف جبت الحاجة اللي قولتلك عليها؟
رد أشرف بجدية وهو يربت على وجه
الصغير الذي يقبع بين أحضان نور:
- أه يا نور، وعطيتهم لامك.

تسألت نور باهتمام: طب فين الولاد؟
مشفتهم من بدري وافكرتهم معك.
قال وهو يحمل منها الصغير: كانوا
معايا، شريف قاعد بره مع خاله،

وشاهر أكيد في المطبخ بياكل، وبسملة
هتلاقيها قدام المرايا، مش محتاجة
تسألني عليها.

أنجبت نور ثلاث أولاد وفتاة، وقامت
بتسمية بسملة لأنها وعدتها بذلك. كانت
بسملة ابنتها البكرية صاحبة التسع
أعوام، وبعدها بثلاث أعوام أنجبت
شريف رغم رفض أشرف للاسم، لكنها
أصرت أن تحيي اسم زوجها الحقيقي
لأنها تعلم أنه يحبه ولكنه لم يخبرها
صراحةً. وبعده بثلاث أعوام أخرى
أنجبت شاهر، صغيرها المدلل وأقربهم
لقلبها. ومنذ أسبوع أنجبت شادي.

قامت نور بتشغيل أغاني السبوع لتجعل
للمنزل بهجة، وتحركت لتري ماذا تفعل

ابنتها، فوجدتها كما أخبرها زوجها،
تضع طلاءً لشفاهها أمام المرأة. صرخت
فيها بغضب:

- أنتِ يا زفّفة بتعملي إيه؟

ردت بسملة بلامبالاة:

- ولا حاجة يا ماما، بجهز نفسي.

أردفت نور بحدة: وحيات أمك، واللي

أنتِ مهيباه في وشك ده إيه؟

ردت بسملة ببرود: ميكب.

جذبتها نور من مرفقها وهتفت من بين

أسنانها:

- الله يرحم أمك، مشفتش الميكب ده غير

لما اتجوزت أبوك. يلا، يا بت، امسحي

اللي في وشك بدل ما أمسحك أنا من

الدنيا كلها.

ذهبت بسملة جهة المرحاض بتأفف
لتفعل ما قالت له والى دتها دون جدال.
وبعدا بدقائق ارتدت ثيابها وجلست
تنتظر رفيقاتها. ولم تنتظر كثيراً، فقد
وصلت إحداهن مع عائلتها.

وصل فارس وعائلته أولاً. قابلهم
أشرف، وبعد التحيات جلس فارس
وأشرف معاً، وولجت دعاء وابنتها
لداخل تبحث عن نور. استقبلتهم بسملة
الصغيرة وهي تركض نحوهم بلهفة
وهتفت:

-نور، اتأخرتي ليه؟

تدخلت دعاء تقول: إيه يا بسملة، مش

هتسلمي عليا ولا إيه؟

نظرت لها بسملة بحرج وأردفت بخجل:

- آسفة يا خالتو، عاملة إيه؟

انحنيت دعاء لتقبل وجنتها وقالت
بابتسامة:

- الحمد لله يا حبيبتى.

جذبت بسملة يد نور وهي تقول: تعالي،
أقولك حاجة.

ردت دعاء بهدوء: خليها تسلم على أمك
الأول وبعدها تروح معاكى.

-الله الله، الأستاذة دعاء لسة واصله!

كلمات خرجت من فم نور وهي تضع
يدها في خصرها. لتبتسم دعاء وتقول:

-على فكرة أنا أول واحدة وصلت، يعني
قولي الكلام ده لحد غيري.

ردت نور بضيق، ثم أشارت على
الصغيرة:

- هحاسبكم بعدين. تعالي يا نور، عيني
أسلم عليكي.

ركضت نور الصغيرة لها بفرحة، فهي
تحبها كثيراً، وهتفت:

- وحشتيني أوي يا خالتو.

ردت نور وهي تعانقها: وأنتِ وحشتيني
أكثر يا قلب خالتو. ووالله، ما حد
مصبرني على أبوكِ وأمكِ غيرك.

ضحكت دعاء بيأس. مر أعوام ولم
تتغير وما زالت نور ترى أن فارس
عدوها، وقالت:

-فين شادي؟

أشارت نور لداخل: جوه، تعالي.

تحركت لداخل بصحبتها، وفي ذلك
الوقت وصل إبراهيم وعائلته ومعه

حمزة، ذاك الصغير الذي كان سبباً في جمعهم. فتح لهم فارس الباب وتبادل السلام مع إبراهيم، لكن جيهان نظرت له بضيق. لم يهتم بها فارس، فقد اعتاد على تصرفاتهم، فاقترب من دعاء

الصغيرة وسلم عليها وهو يقول:

- تأخرت لي يا دودو؟ أنا مش قلتك إن إحنا طلغنا من بدري.

ردت دعاء الصغيرة بقلة حيلة:

- هعمل إيه ياخويا؟ ربنا بلاني بأم.

نظرت لوالدتها التي نظرت لها بشر وهي ترفع إحدى حاجبيها، لكن دعاء لم تهتم، وقالت:

- مش هقدر أتكلم، لأنها مهما كان أمي. ربنا يسامحها على اللي بتعمله معايا. أنا

لو عندي بيت تاني كنت رحته، لكن
هعمل إيه؟ مفيش حل. إذا كان أبوها
وجوزها مش قادرين عليها، هقدر أنا
الغبانة؟

كتم إبراهيم ضحكته على تشنج جسد
زوجته التي هتفت بعصية:

-وحياة أمك اللي محدش قادر عليها،
هربيكي يا بنت إبراهيم!

تدخل إبراهيم يقول بمرح: وإبراهيم ماله
يا باشا؟

ردت عليه بعصية: معرفتش تربي بنتك
وفضحاني قدام الأعداء، اللي فاكره
المحامي بتاعها كل عشر ثواني ترن
عليه.

وتركتهم وولجت للمنزل وهي تحمل
صغيرتها داليا. اعتذر إبراهيم من
فارس:

-أسف يا أبو نور.

رد فارس بابتسامة: ولا يهمك يا
إبراهيم، أنا اتعودت عليهم، وعشان
خاطر دعاء أي حاجة تهون.

داعب وجنتها لتضحك وهي تسأل: نور
جات، صح؟

أجاب وهو يبتسم لها: أه يا ح...!

قبل أن يكمل جملة ركضت لداخل
ليضحك عليها إبراهيم بيأس، فوجد
صغيره يشير له أن ينحني قليلاً. فعل ما
أراد وتساءل ليرد محمد بنعاس:

-بابا، عايز أنا.

اعتدل إبراهيم وهتف بحدة: يا بني،
ارحمني! هو أنت بتصحى عشان تنام؟
ثم أشار لحمزة: خده معاك يا حمزة
جوه، وخليه يلعب مع شريف وشاهر
ومازن. جوه، وشوية وعمار هيجي.
أنهى جملته فوجد تامر وعائلته أمامه.
ألقي تامر عليهم التحية:
-السلام عليكم.

رد إبراهيم وفارس عليه: وعليكم السلام
ورحمة الله وبركاته.
جذب عمار يد مازن وهو يقول: تعال
أوريك حاجة في الفون.
وأشار لمحمد أن يأتي معهم، وبعدها
تحركوا لداخل وولجت بسملة وابنتها
خلفها، وتحرك الرجال ليجلسوا معًا.

في الداخل، وتحديداً في غرفة بسملة
الصغيرة، أردفت جيهان بهدوء وهي
تعبت في الهاتف:

-بصوا أنا عملت إيه.

اقتربوا منها لتريهم صور الرسومات
التي قامت برسمها، وأردفت وهي تشير
لإحدى الصور:

-دي أنا وطنط جيهان.

تسألت دعاء: اشمعنى ماما؟

ردت جيهان بهدوء: عشان أنا بحب
طنط جيهان، وكمان اسمي زي اسمها.

هتفت دعاء بضيق: طب وأنا بحب طنط

دعاء أوي، وهي كمان بتحبني أكثر من

نور!

أغلقت بسملة الهاتف وقالت: أقولكم
حاجة بس محدش يقول لماما.

قالت دعاء باهتمام: قولي.

أردفت بسملة بسعادة: أنا ضربت البيت
الرخمة أسماء وحطيت وشها في الطين.

هتفت نور بضيق، ورغم أنها أصغرهم
لكنها تمتلك عقلاً ناضجاً كوالدها:

-تاني يا بسملة! أنا مش قتلتك ملكيش
دعوة بيها؟

صفت جيهان بشماتة: تستاهل عشان
رخمة.

أردفت نور بهدوء: دلوقتي أبوها هيقول
لأنك أشرف، وهيزعق فيكي. قتلتك لما
تكلمك تعالي قولي لطنط نور وهي
هتتصرف.

وهتفت دعاء بتشفي: أحسن، عشان هي
على طول تضايقتنا في المدرسة.
وماتخفيش يا بسملة، إحنا هنكون معاك
ومش هنخلي أنكل أشرف يكلمك.

عاد الزمن بنسخة مصغرة من أمهاتهم.
ولم يكتف بذلك، بل زرع الحب في
قلوبهم وجعلهم يدًا واحدة، كما كانت
أمهاتهم. وعادوا ليخرقوا قوانين
الرياضيات، ويجعلوا الأربعة تساوي
واحدًا.

بعد مرور ساعتين، وضعت دعاء شادي
في الغربال ليقوموا بتقاليد السبوع
المتعارف عليها. وبعدما خطت نور على
ابنها سبع خطوات، حملته من الأرض
وناولته لدعاء، ثم أمسكت الهون وظلت

تدق عليه وتغني. كان الجميع يدور
حولها في مشهد مبهج جمع الكبار
والصغار الذين يحملون الشموع
ويتحركون خلفهم بحماس.

غنت جيهان بحماس والجميع يردد
خلفها:

"شرفت يا خويا من يجي أسبوع..."

وشاركتها بسملة الغناء بقولها:

"دقولو الهون وروه وشكم..."

وأردفت دعاء بسعادة وهي تحمل

الصغير وتدور به وبجوارها فارس:

"ومتخضوش لو كان مسروع..."

وهتفت نور بسعادة وأشرف يمسك

بيدها:

"لسة الدنيا ياما هتهشكه..."

شارك إبراهيم في الغناء وهو يغمز
لجيهان:

-هشك بشك يا صغفن دانا شيك جوه
عنيا...

هتف تامر بسعادة وهو يحمل الصغير:
-هشك بشك يا صغفن أوعى لتعملها
عليا...

انطلقت الضحكات ليغني أشرف:
-خد بالك من البزازة دي هي أعز ما ليك
دلوقت...

وأردف فارس:
-عشان تشرب في ازازة لسة الموضوع
محتاج وقت...

وردت جيهان:
-فرصة تكبر وتنام وتبرطم أي كلام...

وأردفت دعاء:

-تعقد في الأفه تمام والناس حوليك يجوا
مية...

وقالت بسملة وهي تضحك وغمزت
لتامر:

-أنا عايزك تطلع شاب تمام ورجولة
ومش فرفور.

حملت نور ابنها وهي تغني:

-وتكون كدا لاعب كورة لا أنت محامي
ولا دكتور...

حملت جيهان ابنها من إبراهيم وقالت
وهي تقبل وجنته:

-هشك بشك يا صغنن دانا شيلك جوه
عنيا...

هشك بشك يا صغنى أوعى لتعملها
علياً...

كانت هذه الجملة الأخيرة تتردد من
أفواه الجميع لتطلق الضحكات بسعادة
بالغة. كلاً منهم ينظر لعائلته ويحمد الله
على وجودهم، متمنياً أن يدوم هذا
الجمع للأبد.

«وهنا نقول إلى اللقاء، تمت بحمد الله».

٢٠٢٤/٩/٣٠